

ქალაგებები და სიტყვები

ქალისტრება ცინცაქა

ქალისტრება ცინცაქა



ქალაგებები და  
სიტყვები

სერია «რელიგია კონფლიქტებსა და მოლაპარაკებებში» მკითხველთა თართო წრეს ამჟამად სთავაზობს წინამდებარე წიგნს და ამ გამოცემას უძღვნის აღნიშნული სერიის ერთ-ერთი დამაარსებლის, კონფლიქტებისა და მოლაპარაკებების საერთაშორისო კვლევითი ცენტრის აწ განსვენებული დირექტორის, ფილოსოფიის მეცნიერებათა დოქტორის, პროფესორ

## გიორგი ხუციშვილის ხსოვნას

(1948-2013)



*This book is dedicated to the memory of the  
Founder and unchallenged leader of  
International Center on Conflict and Negotiation,  
Doctor of Philosophy,  
Professor George Khutsishvili (1948-2013)  
who initiated the Series entitled "Religion in  
Conflicts and Negotiations" in Georgia and within  
the frame of which this book is published.*

გამომცემელი ორგანიზაციები

Published by



კონფლიქტებისა და  
მოლაპარაკებების  
საერთაშორისო  
კვლევითი ცენტრი

International Center on  
Conflict and Negotiation



სულხან-საბა ორბელიანის  
სასწავლო უნივერსიტეტი

Sulkhan-Saba Orbeliani  
Teaching University

სერია «რელიგია კონფლიქტებსა და მოლაპარაკებებში»

## კალისტრატე ცინცაძე

# ქადაგებები და სიტყვები

გამოსაცემად მოამზადა, შესავალი და გამოკვლევა დაწერა  
ნუგზარ ჭაჭუაშვილმა



გამომცემლობა „უნივერსალი“  
თბილისი 2014

UDC (უაკ) 27-475  
ც – 661

პირველად ქვეყნდება XIX-XX საუკუნეების დიდი ქართველი სასულიერო პირისა და საზოგადო მოღვაწის, კათალიკოს-პატრიარქ კალისტრატე ცინცაძის საეკლესიო-ლიტურგიკული ქადაგებებისა და საპარაკლისო-საპანაშვიდო სიტყვების კრებული. პუბლიკაციას ახლავს გამომცემლის, ნუგზარ პაპუაშვილის, შესავალი და გამოკვლევა, რომლებშიც წარმოჩენილია წინამდებარე გამომცემის მოტივი და მიზანი, კათალიკოს კალისტრატეს ცხოვრებისა და მოღვაწეობის ძირითადი საკითხები, პარალელები თანამედროვეობასთან. განკუთვნილია როგორც სასულიერო თემატიკით დაინტერესებული პირებისათვის, ისე კონფლიქტოლოგებისა და პოლიტოლოგებისათვის.

რედაქტორი: **ზურაბ კვინაძე**



ავტორისეული შეფასებები და მოსაზრებები შესაძლებელია არ გამოხატავდეს გამომცემელი ორგანიზაციების პოზიციას.



© ნ. პაპუაშვილი, 2014

გამომცემლობა „**უნივერსალი**“, 2014

თბილისი, 0179, ი. ჯავახიშვილის გამზ. 19, ☎: 2 22 36 09, 5(99) 17 22 30  
E-mail: [universal@internet.ge](mailto:universal@internet.ge)

ISBN 978-9941-22-444-7

## სარჩევი

შესავალი.....	7
---------------	---

### ყვავილკრებული

<i>არაკალენდარული ქდავებები ქაშვეთის სამრევლოში</i>	
სამრევლოში შესვლა.....	25
სამწირველოს კურთხევა.....	30
ტაძრის კურთხევა.....	31
ეპისკოპოსად დადგინება.....	32

#### I. უძრავ დღესასწაულთანი

ახალი წელი (3).....	35
წმ. ნინო.....	41
დავით აღმაშენებელი.....	53
მირქმა.....	54
წმ. გიორგი (6).....	56
შობა (2).....	80

#### მარხვან-აღვსებისანი

დიდმარხვის მეორე კვირა.....	87
დიდი პარასკევი.....	89
სააღდგომო ეპისტოლე.....	92
სამარიტელის კვირიაკე.....	94

#### II. პარაკლისებისა და პანაშვიდებისანი

<i>სკოლა და კულტურა</i>	
სწავლის დაწყების გამო (3).....	98
გიმნაზიის საფუძვლის კურთხევა.....	101
სამუსიკო სკოლის კურთხევა.....	103
თეატრის შენობის განახლება.....	104
უფასო სადილის გამართვა (2).....	105
უნივერსიტეტის გახსნა.....	107
სამოძღვრო კურსების გახსნა.....	108
<i>საზოგადოება და პოლიტიკა</i>	
ბაქოში სომეხ-თათართა შეტაკების გამო.....	109

ბატონყმობის მოსპობის გამო .....	110
კავკასიის ჯარის გამარჯვების გამო .....	111
მოხალისეთა რაზმის საომრად გამგზავრების გამო.....	112
<b>ეპიტაფიები</b>	
ნიკოლოზ ბარათაშვილი .....	113
გიორგი ქართველიშვილი.....	118
ილია ჭავჭავაძე .....	122
ეპ. ალექსანდრე .....	124
გრიგოლ ორბელიანი .....	127
ეგნატე ნინოშვილი.....	133
დავით სარაჯიშვილი .....	134
ნიკოლოზ ლოლობერიძე .....	136
ნიკოლოზ ცხვედაძე .....	139
იაკობ გოგებაშვილი .....	142
ალექსანდრე ხახანაშვილი .....	145
არისტო ქუთათელაძე.....	148
კოტე მესხი .....	150
აკაკი წერეთელი (2) .....	152
ვარლამ გელოვანი .....	155
ნიკო ლომოური .....	156
ალექსანდრე ჭიჭინაძე .....	157
იროდიონ ევდოშვილი .....	159
თედო ჟორდანიას .....	160
კიტა აბაშიძე .....	162
მაკარაშვილი და ჩიკვაიძე .....	163
ვლადიმირ გობეჩია .....	165
მიტრ. ანტონი.....	166
კ-პ ლეონიდი .....	168
ეპისტოლე.....	170
ნუგზარ პაკუაშვილი, კალისტრატე ცინცაძე სარწმუნოების, მოქალაქეობისა და კულტურის შესახებ (შენიშვნებით) .....	173
Н. Папуашвили, Католикос-Патриарх всея Грузии	
Каллистрат Цинцадзе.....	289
Abstract .....	302

## შესავალი

ძნელია მოიძებნოს მოაზროვნე, რომელიც არ აღიარებს, რომ რელიგია, სხვაგვარად რომ ვთქვათ, ზებუნებრივი სამყაროს რწმენა და მის მიმართ კრძალულება არის საყოველთაო სიკეთისა და სიხარულის წყარო. არც იმაზე დავობენ, რომ მსოფლიო კულტურისა და ცივილიზაციის სათავეში ღვთის რწმენა და ღვთის დიდება დგას. ისიც ცხადია, რომ ამ რწმენისა და ამ დიდების გარეშე არ იქნება და ვერ იქნება „ქვეყანასა ზედა მშვიდობა და კაცთა შორის სათნოება“ (ლუკა 2,14). ისტორია ცხადყოფს და საღვთო წიგნი ადასტურებს, რომ სიცოცხლის ხე, რომელიც რელიგიის შუაგულში დგას, კაცთა მოდგმის განკურნებისთვის, სულიერი, ზნეობრივი და გონებრივი გამოფხიზლებისათვის, გაუმჯობესებისა და გაკეთილშობილებისათვის არის განკუთვნილი (შდრ. გამოცხ. 22,2).

მაგრამ იგივე ისტორია და იგივე წიგნი იმასაც ცხადყოფს, რომ ღვთის არსებობის რწმენა და ღვთის ქება, ღვთის წინაშე შიშითა და თრთოლვით დგომა კაცთა მოდგმის გაუმჯობესების საკმარისი პირობა არ არის. განა ტერორისტებს და მოძალადეებს ღმერთი ნაკლებად სწამთ?! მოციქული ხომ პირდაპირ ამბობს: „ემშაკებსაც სწამთ და ძრწიან კიდევ... მაგრამ რწმენა საქმეთა გარეშე მკვდარია“ (იაკ. 2,19-20). და მართლაც: რა ფასი აქვს სარწმუნოებასა და რელიგიას სათნოებისა და სიყვარულის გარეშე?! რელიგიური ადამიანი, რომელსაც სხვათა მიმართ თანაგძნობა და თანალმობა არ გააჩნია, როგორც წესი, მზვაობარია და, მამასადაძამე, პოტენციური დამნაშავე. ეგევე ითქმის მორწმუნეთა დიდი თუ მცირე ჯგუფების მიმართ, რომელთა შორის სიყვარულის და სათნოების ნიჭი შელახულია. მოკლედ რომ ვთქვათ, არა ნებისმიერი რელიგია და ღვთის ნებისმიერი რწმენა გახდის ადამიანს უკეთესს, არამედ მხოლოდ და მხოლოდ სიყვარულით შთაგონებული რელიგია და სიყვარულისმიერი სარწმუნოება. და თუ როგორ უნდა აღიძრას და აღიზარდოს კაცთა გულსა და გონებაში ასეთ მაღლის და შინაარსის სარწმუნოე-



ბა, იყო და არის ყოველი მშვიდობისმყოფელი რელიგიური საზოგადოების, კულტუროსანი ერისა და ცივილიზაციის უმთავრესი პრობლემა.

ერთ-ერთი სერიოზული პრობლემა, რომლის წინაშე თანამედროვე საქართველო დგას, არის ფუნდამენტალიზმი და ნაციონალიზმი ამ ქვეყნის მართლმადიდებლად ცნობილი მოსახლეობის დიდ ნაწილში. ლაპარაკია იმ ცნობიერებისა და განწყობილების მართლმადიდებლებზე, რომლებსაც აქვთ მისწრაფება და კატეგორიული მოთხოვნა, საკუთარი შეხედულებები და რწმენა-წარმოდგენები გაავრცელონ გლობალურად და ისინი იმ უბნებშიც დანერგონ, რომელთა ნიადაგი მსგავსი შეხედულებებისა და რწმენა-წარმოდგენებისათვის არ არის გაჩენილი, რადგან ბუნებრივადაც და თვისობრივადაც ეს სხვა უბანი და სხვა ნიადაგია. იგულისხმება სამოქალაქო და სახელწიფო სივრცე, რომელიც მოიცავს საჯარო სკოლებს, მეცნიერებისა და სახალხო განათლების ცენტრებს, გასართობსა თუ პოლიტიკურ კლუბებს, შეხვედრების და გაცნობის ადგილებს, აუდიო და ვიდეო სტუდიებს და ბევრ სხვა ისეთ უბანსა თუ ნიადაგს, რაც ბუნებითად და დანიშნულებისამებრ არ არის ეკლესიის სივრცე და ადგილი. ეს სეკულარული, პროფანული, საერო სივრცეა. ზემოთ აღნიშნული კატეგორიის მართლმადიდებლები, რომლებიც დღესდღეობით ადგილობრივი მართლმადიდებელი ეკლესიის მნიშვნელოვან ნაწილს შეადგენენ (ასეთია ზედაპირული შთაბეჭდილება), ცდილობენ, რომ თავიანთი პრინციპები და დიქტატი ასეთ სივრცესა და უბნებზე განავრცონ.

პოსტსაბჭოურ საქართველოში თითქმის ყოველდღე გაისმის მოწოდებები იმ ინდივიდებისა თუ კოლექტივების მხრიდან, რომლებიც თავიანთ თავს მართლმადიდებლად მოიხსენიებენ: საჯარო სკოლებშიც უნდა ისწავლებოდეს საღვთო რჯული იმ შინაარსით და იმ მეთოდით, როგორაც ამას ჩვენ მოვიაზრებთ! სცენასა თუ ეკრანზე, წიგნსა თუ გაზეთზე წარმოდგენილ არ უნდა იქნას ის, რასაც ჩვენ სულისწარწყმედად მივიჩნევთ! რესტორნებსა თუ პლაჟებზე არ უნდა მოეწყოს ის, რაც ჩვენი რწმენით არ უნდა მოეწყოს! მი-

ტინგი, აქცია და ქუჩაში მსვლელობა არ უნდა მოაწყონ მათ, ვისზეც ჩვენ ვამბობთ, რომ არ უნდა მოაწყონ! ესა თუ ის შენობა, ნანგრევი თუ მიწის ნაკვეთი არ უნდა გადაეცეს მას, ვისაც ჩვენ ვთვლით, რომ არ უნდა გადაეცეს! (ჩვენ უნდა გადმოგვეცეს). ამ დროს ფაქტია (და ესაა აქ მთავარი და არსებითი), რომ ამ და მსგავსი მონოდებების წინაშე ხშირად (და მეტწილად) ქედს იხრის ის ინსტიტუტი, რომელიც წესისა და რიგის მიხედვით ასეთ მონოდებებს და მოთხოვნებს ქედს არ უნდა უხრიდეს. ეს ინსტიტუტი არის სეკულარული და დემოკრატიული სახელმწიფო, რომელიც ჩვენს სინამდვილეში მფარველობს ერთი აღმსარებლობის ეკლესიას და უგულვებელყოფს სხვა აღმსარებლობის ეკლესიებს (ქრისტიანულს თუ არაქრისტიანულს!), რაც არღვევს როგორც ეკლესიისა და სახელმწიფოს გაყოფის, ისე მოქალაქეთა თანასწორუფლებიანობის კონსტიტუციურ პრინციპს. ამ ფაქტმა ქვეყანა უკვე მიიყვანა სავალალო შედეგებამდე, რაც გამოიხატება არამართლმადიდებლების ანუ სხვაგვარმადიდებლების, ასევე არაქართული ერებისა და ეთნოსების გარკვეული ნაწილის საქართველოს საერთო სივრცისაგან გაუცხოებაში.

ქმედებები და მოვლენები, რაც საქართველოს მართლმადიდებელი ეკლესიის სახელით ბოლო ათწლეულებში წარმართება, რასაც სხვადასხვა სახის რწმენა-წარმოდგენები კვებავს და რომლის მასშტაბმა უკვე სერიოზული სახე მიიღო, ყველაზე მეტად აღნიშნულ ეკლესიას აზარალებს და მომავალში კიდევ უფრო დააზარალებს. სწორედ მისი და, პირველ რიგში, მისი ავტორიტეტი ილახება ადგილზეც და საერთაშორისო ასპარეზზეც. გარეშე თვალს რჩება შთაბეჭდილება, რომ მოძალადეობა, სხვა კონფესიის ეკლესიათა ისტორიული მემკვიდრეობის მითვისება; ნაირნაირი ცრუმორწმუნეობა, ფეტიშიზმი და პათოლოგიური მისტიციციზმი (კათოლიკური ეკლესიები, მუსლიმთა თუ ებრაელთა სალოცავები „მართლმადიდებელი ეკლესიების ძველი ქვებით“ არის აშენებული და ამის გამო ჩვენიაო) თითქოს ამ ეკლესიის, საქართველოს მართლმადიდებელი ეკლესიის, ბუნება, მისი არსება და წარსულის მემკვიდრეობაა. ვინმე იფიქრებს (და ფიქრო-

ბენ კიდეც), რომ რელიგიური ეთნონაციონალიზმი (ერთგვარი ერესი, – ფილეთიზმი), სხვა აღმსარებლობის ეკლესიების მიმართ ქსენოფობიური, რეტროგრადული და კარჩაკეტილი დამოკიდებულება, რომლისთვისაც ნიშანდობლივია სიძულვილის ენა და რითაც აღბეჭდილია პოსტსაბჭოური საქართველოს საეკლესიო სივრცე, საქართველოს მართლმადიდებელი ეკლესიის განუყოფელი და მოუცილებელი ნაწილია. ვიმეორებთ, არ არის გასაკვირი (და მოცემულ გარემოში ეს ბუნებრივია), რომ მავანმა ირწმუნოს, თითქოს ძველადაც ასე იყო. და თუ ძველადაც ასე იყო და დღესაც ასეა, მაშინ გამოდის, მავანთა და მავანთა მოსალოდნელი დასკვნით, რომ ყოველივე, რაზეც ზემოთ ვილაპარაკეთ: სხვათა სიძულვილი და ჩაგვრა, თითქოს, საქართველოს მართლმადიდებელი ეკლესიის ბუნებითი თვისება ყოფილა.

დაისმის არსებითი და საჭირობოროტო კითხვა: მართლა ასეა?

სრულყოფილი პასუხის მისაღებად ამთავითვე უნდა ვიკითხოთ: შეუძლია თუ არა საქართველოს მართლმადიდებელი ეკლესიის გარდასული დღეების გამოცდილებასა და მემკვიდრეობას ნვლილი შეიტანოს თანამედროვე კონფლიქტების მოლაპარაკებათა გზით მოგვარებაში? პასუხი, ცხადია, საჭიროებს ამ ეკლესიის ისტორიის გაცნობას. პირველ რიგში უნდა გაირკვეს: ის მოვლენები და ტენდენციები, რაც უარყოფითად ახასიათებს დღევანდელი საქართველოს მართლმადიდებელ საზოგადოებას როგორც სამშობლოში, ისე მის საზღვრებს გარეთ, წინააღმდეგობაში ხომ არაა ამავე ქვეყნისა და მისი მართლმადიდებელი ხალხის წარსულთან? როგორია ამ ქვეყნისა და მისი მართლმადიდებელი ეკლესიის რეალური ტრადიცია? რასაც ახლა ვგმობთ, ამ ტრადიციის შემადგენელი ნაწილია, თუ – ამ ტრადიციისათვის უცხო სხეული? კიდევ უფრო რომ დავაკონკრეტოთ: იმ ამბებს, რაც პოსტსაბჭოურ საქართველოში ხდება, რაზეც უკვე ვთქვით, ანდა არ გვითქვამს, მაგრამ ვიგულისხმეთ, მოიწონებდნენ ქართველი ხალხის ჩინებული წინაპრები და წმინდანები? გვმართებს, გავიხსენოთ საქართველოს მართლმადიდებელი

ეკლესიის დიდი მნათობნი, გვირგვინოსანი თუ უგვირვინო მეფეები: დავით აღმაშენებელი, ანდა თამარი, ანდა ილია ჭავჭავაძე, ანდა წმ. ეპისკოპოსი გაბრიელი და სხვანი; გავიხსენოთ მათი სიტყვანი და საქმენი, მათი სარწმუნოებრივი და სამოქალაქო პოზიციები და საკუთარ თავს ვკითხოთ: მათ რომ ჩვენს დროში ეცხოვრათ და ამ ამბებს შესწრობოდნენ, რა პოზიციას დაიჭერდნენ ისინი და რომელ მხარეს დადგებოდნენ?

და, აი, ახლა, როდესაც წინამდებარე წიგნის ამ მონაკვეთზე ვმუშაობთ (2014 წლის ოქტომბრის ბოლო კვირა), უკვე რამდენიმე დღეა, მასმედიაში მრისხანედ ჟღერს მართლმადიდებლების მიერ მუსლიმთა შეურაცხყოფისა და დამცირების კონკრეტული ფაქტები: ქობულეთში მედრესეს კარებზე ღორის თავის მილურსმნა და იქაურობის ღორის სისხლით მოთხვრა, პიკეტის მოწყობა და ამ დაწესებულების „დაპატიმრება“ (მოქმედების შეჩერება); სოფელ მოხეში 1944 წელს დეპორტირებული მუსლიმი მესხების სალოცავი სახლის ბიბლიოთეკად გადაკეთებისა და ამ გზით ამ ხალხის ნატერფალის მოსპობის მცდელობა; ადგილობრივი მართლმადიდებელი ეპისკოპოსის მიერ აღნიშნული სალოცავის ქრისტიანთა ეკლესიის ქვებით აგების ერთგვარი ჰიპოთეზისა და ქვების რელიგიური ნიშნით დახარისხების ასეთივე შინაარსის თეორიის შემუშავება, რაც, პირდაპირ რომ ვთქვათ, არაჯანსაღი მისტიციზმის სფეროს განეკუთვნება და სიმართლის გარკვევას არ ემსახურება. კვლავ დაისმის კითხვა: რას გვეტყოდნენ ჩვენი დიდი წინაპრები, დასახელებული ექსცესების შესახებ ინფორმაცია რომ მიეღოთ და ხსენებული ეპისკოპოსის ქვათა მისტიკა მოესმინათ? ამჯერად ჩვენი ყურადღება განსაკუთრებული ძალით ნეტარხსენებულმა მღვდელმოდვარმა კალისტრატე ცინცაძემ მიიპყრო. 1918 წელს, როდესაც საქართველოში გახშირდა მკვლევობა და კრიმინალი, რასაც, როგორც ჩანს, ხშირად მართლმადიდებელი სარწმუნოებით თავმომწონე ადამიანები ჩადიოდნენ, და როდესაც ქვეყნის ტერიტორიულ მთლიანობის იდეას ბზარი შეეპარა, ვინაიდან აჭარელმა და ინგილო მუსლიმებმა

ერთიანი საქართველს სივრციდან გასვლა მოინდომეს, ავბედობის მიზეზის ძებნა მან, ღრმად განსწავლულმა ღვთისმეტყველმა და ისტორიკოსმა, დაიწყო არა სხვაგან, არამედ საკუთარი ქვეყნისა და ეკლესიის წიაღში და დასვა კითხვა: რატომ გახშირდა ასერიგად დანაშაული ჩვენს ქვეყანაში? რატომ არ უნდათ სხვა სარწმუნოების შვილებს, თანაც ჩვენს სისხლსა და ხორცს, ჩვენს გვერდით ცხოვრება? იქნებ იმიტომ, რომ ჩვენს სარწმუნოებრივ ცხოვრებას რაღაც აკლია? იქნებ იმიტომ, რომ ჩვენ ჩვენი სარწმუნოებრივი ცნობიერების სიმრთელესა და სიჯანსაღეზე ნაკლებად ვზრუნავთ? მოვისმინოთ მისი სიტყვები, იმდროინდელი პოლიტიკური და სახელმწიფო მოღვაწის, ვლადიმერ გობეჩიას, დაკრძალვის დღეს, 1918 წლის 23 ივნისს, წარმოთქმული: „ჩვენში რომ საღის სარწმუნოებრივის სწავლისათვის ეზრუნათ, დაეცვათ მტკიცედ ქრისტეს სჯული, პატივისცემით მოჰპყრობოდნენ სხვის სარწმუნოებას, – აჭარა არ ჩამოგვეშორებოდა, ინგილო-მაჰმადიანები და ინგილო-ქრისტიანები ძმურად იცხოვრებდნენ ერთმანეთში და თვით ვლადიმერ გობეჩია დღეს აქ უსულოდ მდებარე არ იქნებოდა... შევისწავოთ: ღვთის განგება კიდევ გვაფრთხილებს! ის გვეუბნება: ქრისტეს დიადის მცნების – ურთიერთას სიყვარულის – გარეშე ცხოვრება შეუძლებელია და, ამისათვის, თუ გნებავთ, განთავისუფლებულ საქართველოში განვითარდეს თავისუფალი მოქალაქობა, ხელი შეუწყეთ საღის სარწმუნოებრივ-ზნეობრივის სწავლის გავრცელებას” („ახალი სიტყვა”, 1918, №8, გვ. 4). თუ რას გულისხმობს ცნება „სალი სარწმუნოება”, შედარებით ვრცლად ვისაუბრებთ ქვემოთ, გამოკვლევაში. აქ ჩვენთვის იმის ხაზგასმაც საკმარისია, რომ ეს სიტყვები თითქოს დღევანდელი დღისათვის არის წარმოთქმული და დაწერილი, რათა მიგვანიშნოს: განწყობილებები და მოთხოვნები, რაც დღევანდელი საქართველოს აქტივისტ მართლმადიდებლებს აქვთ, საყრდენს და გამართლებას ამ ქვეყნისა და მისი მართლმადიდებელი ეკლესიის ტრადიციაში ვერ პოულობს.

სწორედ დღევანდელი დღის პრობლემები, მართლმადიდებელ ეკლესიასთან დაკავშირებული, აძლიერებს ისეთი

ლიტერატურის მოძიებისა და გამოცემის სურვილს, რომელიც სალი სარწმუნოებრივი და მოქალაქეობრივი თვალთახედვით არის განმსჭვალული. ასეთი ლიტერატურა, საბედნიეროდ, მოგვეპოვება და იმედი გვაქვს, რომ ის მკითხველთა ფართო წრეს მართებული ორიენტაციის ჩამოყალიბებაში დაეხმარება და შეასრულებს ალტერნატივის როლს, რათა საქართველოს მოსახლეობის საგრძნობ ნაწილში ზემოთ აღნიშნული განწყობილებებისა და ტენდენციების მასშტაბთა შემცირება მოხერხდეს.

ასეთ ლიტერატურად წარმოგვიდგება ზემოთ ციტირებული ტექსტის ავტორის, სარწმუნოებით, ზნეობითა და განათლებით განთქმული მოძღვრის, ბოლშევიკურ-კომუნისტური დევნილების ხანაში სრულიად საქართველოს კათალიკოს-პატრიარქის\* – კალისტრატე ცინცაძის (1866-1952) – წერილობითი სამოდვრო-საღვთისმეტყველო მემკვიდრეობა. ესაა საეკლესიო დღესასწაულებისა და სადაგი დღეებისათვის განკუთვნილი ქადაგებები (საკუთრივ ქადაგებები), სხვადასხვა საზოგადოებრივი, პოლიტიკური და კულტურულ-საგანმანათლებლო შემთხვევის გამო წარმოთქმული სიტყვები, განსაკუთრებით – ეპიტაფიები ანუ სიტყვები (იგივე ქადაგებები), რომლებიც გამოჩენილი საერო და სასულიერო მოღვაწეების დაკრძალვის დღეს წარმოითქვა. მითითებულ სიტყვებში, წმინდა საეკლესიო-საღვთისმეტყველო თემატიკის გარდა, გვხვდება მსჯელობა ისეთ საკითხებზე, როგორიცაა დემოკრატია, ადამიანის უფლებები, პიროვნების სინდისის ხელშეუხებლობა და თავისუფლება; ეკლესია და სახელმწიფო; ერთსა და იმავე სოციალურ სხვადასხვა კონფესიის ეკლესიათა თანაარსებობა; მოქალაქეთა თანასწორუფლებიანობა განურჩევლად სქესისა, კანის ფერისა, წოდებისა, ნაციონალური თუ რელიგიური კუთვნილებისა; თანადგომა, თანაღმობა და ქველმოქმედება ყოველთა მიმართ; უცხოთა შეწყნა-

---

\* ჩვენ ვამჯობინებთ ფორმას «კათალიკოსი»: ნ. პაპუაშვილი, კათალიკოსი და კათალიკოსობა საქართველოში. „დიალოგი“, 2008, №1-2, გვ. 210-212.

რება და შეყვარება, მოშულლეთა შერიგება და კაცთა შორის სათნოება.

ჩვენი ქვეყნის დღევანდელმა, რელიგიურად შეფერილმა გარემომ გვიკარნახა, გვეზრუნა ხსენებული სასულიერო პირის ჰომილეთიკური (ქადაგებისეული) ტექსტების თავმოყრასა და კრებულის სახით მათ გამოცემაზე. აღნიშნული მასალის ნაწილი ავტორმა თავად გამოაქვეყნა სხვადასხვა გაზეთში, ჟურნალსა თუ კრებულში, ასევე ნაბეჭდი ფურცლების სახით (საეკლესიო ქადაგებები). ნაწილი გამოუქვეყნებელი დარჩა და ხელნაწერების (მეტწილად ავტოგრაფების) სახით არის წარმოდგენილი მის პირად საარქივო ფონდში. ცალკეული ქადაგების გამოქვეყნება ჩვენ 1980 წლიდან დავიწყეთ და გზადაგზა, მიმდინარე საზოგადოებრივ-პოლიტიკურ და კულტურულ პროცესებთან თემატური თანხვედრის პრინციპით, რამდენიმე პუბლიკაცია განვახორციელეთ, მეტწილად საპატრიარქოს ბაზაზე („საღვთისმეტყველო კრებული“ და „ჯვარი ვაზისა“). ესენია (საბჭოთა პერიოდში გამოქვეყნებული, ქრონოლოგიურად): სიტყვები 1. ნიკოლოზ ბარათაშვილის განჯიდან გადმოსვენებაზე („ჯვარი ვაზისა“, 1981, №1, გვ. 28-29) 2. აკაის გარდაცვალების გამო („ჯვარი ვაზისა“, 1983, №1, გვ. 49) 3. ილიას გარდაცვალების გამო („ჯვარი ვაზისა“, 1987, №1, გვ. 66-67; „საღვთისმეტყველო კრებული“, 1987, №3, გვ. 173-176) 4. ეპისკოპოსად დადგინების გამო („საღვთისმეტყველო კრებული“, იქვე, გვ. 166-168) 5. დიმიტრი ლაზარიშვილის ეპისკოპოსად კურთხევის გამო (იქვე, გვ. 169) 6. 1936 წლის ეპისტოლე (იქვე, გვ. 170-172. შემდეგი პუბლიკაციები იხ. ქვემოთ, გამოკვლევაში) 7. გრიგოლ ორბელიანის გარდაცვალებიდან 25 წლისთავზე (იქვე, გვ. 177-183) 8. გიორგი ქართველიშვილის გარდაცვალების გამო (იქვე, გვ. 184-188) 9. ქართული თეატრის შენობის განახლების გამო (იქვე, გვ. 189-190) 10. უნივერსიტეტის გახსნის დღეს („მესხეთი“, 1990, 3.XII, №1)\*. საეკლესიო კალენ-

---

\* მითითებული სიტყვების ნაწილი კვლავ გამოაქვეყნეს პროფ. მიხეილ ქავთარიამ (მნიგნობრობა ქართული 10, თბ., 2010, გვ.

დრის რიგის ქადაგებები შევიყვანეთ ქადაგებათა ჩვენს მიერ მომზადებულ კრებულში, რომელიც მოთავსდა „საღვთისმეტყველო კრებულის“ 1985 წლის № 1-ში (შიდამოხმარების წესით გამოცემულში რამდენიმე ეგზემპლარად). ერთ-ერთი ქადაგება წმ. გიორგის ციკლიდან გამოვაქვეყნეთ „ჯვარი ვაზისაში“ (1986, №1, გვ. 26-27).

ამჯერად მკითხველთა ფართო წრეს ვთავაზობთ მისი უწმინდესობის ჰომილიათა ვრცელ კრებულს. ამ კრებულს სისრულის პრეტენზია არა აქვს, თუმცა ავტორის მიერ ქართულენოვან ღვთისმსახურებებზე წარმოთქმული ქადაგებებისა და სიტყვების უმრავლესობას მოიცავს; მთავრდება ეკლესიებში წასაკითხი ეპისტოლით, რაც რეალურად, ასევე, არის ქადაგება ანუ ჰომილია („ჰომილია“ ხომ მორწმუნეთა საკრებულოს წინაშე წარმოთქმულ სიტყვას ეწოდება, სიტყვას, რომელიც საწმინდოებრივ შინაარსს შეიცავს და რელიგიური განცდების აღძრვისა და აღზრდისათვის არის განკუთვნილი). ამასთანავე, მიზანშეწონილად ჩავთვალეთ, კრებულისათვის დაგვეერთო ჩვენი ნაშრომი ავტორის ცხოვრებისა და მოღვაწეობის შესახებ (ქართული ვრცელი და რუსული მოკლე ვარიანტი).

დასახელებული ნაშრომი (ნარკვევი, გამოკვლევა) დაწერილია 1980-1982 წლებს შორის. ამ დროს საქართველოს საპატრიარქოში კათალიკოს-პატრიარქ ილია II-ის ინიციატივითა და ლოცვა-კურთხევით დაისვა საკითხი კათალიკოს-პატრიარქ კალისტრატე ცინცაძის წმინდანად გამოცხადებისა და კანონიზაციის თაობაზე (იხ. უკანასკნელი პანაშვილი. „ჯვარი ვაზისა“, 1982, №1, გვ. 26-27). დაიწყო მასალების შეგროვება, რათა შესაძლებელი გამხდარიყო შესაბამისი ჰაგიოგრაფიული ცხოვრების დაწერა. ამ უბანზე მუშაობის სურვილი მეც აღმედრა და საარქივო საქმეების გაცნობას შეუდექი ხელნაწერთა ინსტიტუტის (ამჟამინდელი ხელნა-

---

150-193) და პროფ. სერგო ვარდისანიძემ (მისივე, პატრიარქები, თბ., 2013, გვ. 94-107). გამომცემლები, ჩანს, ჩვენს პუბლიკაციებს არ იცნობენ.



ნერთა ეროვნული ცენტრის) ფონდის მასშტაბით (ამავე ინსტიტუტის წამყვანი მეცნიერი თანამშრომლის, ბატონ მიხეილ ქავთარიას თანადგომით). მართალია, გაურკვეველი მიზეზების გამო კანონიზაციის პროცესი შეჩერდა, მაგრამ მე, შინაგანი მოწოდების თანახმად, მუშაობა გავაგრძელე. იმის მიუხედავად, რომ მე-20 ს-ის 80-იან წლებში, საბჭოთა იდეოლიგიისა და ცენზურის პირობებში, მსგავსი თემები არც პრესტიჟულად და არც პერსპექტიულად არ გამოიყურებოდა, რამდენიმე პუბლიკაციის განხორციელება მაინც მოხერხდა როგორც საეკლესიო, ისე საერო ორგანოში. რამდენიმე ქადაგების (იხ. ზემოთ), ილია ჭავჭავაძეზე მოგონებისა და ივანე ჯავახიშვილისადმი წერილის გარდა (ბიბლიოგრაფიული მითითებები იხ. ქვემოთ, გამოკვლევაში) კალისტრატე ცინცაძის ცხოვრებისა და შემოქმედების მკითხველთა ფართო წრის წინაშე წარმოჩენის მიზნით ჩვენ გასული საუკუნის 80-იან წლებში შემდეგი სტატიები გამოვაქვეყნეთ (ზოგიერთი ხელმოწერლად, – გასაგები მიზეზების გამო):

- [ნ. პაპუაშვილი], კათოლიკოს-პატრიარქი კალისტრატე (აღსაყდრების 50 და გარდაცვალების 30 წლისთავი). საქართველოს ეკლესიის კალენდარი 1982, თბ., 1982, გვ. 143-162

- ნ. პაპუაშვილი, კ. მ. ცინცაძის ცხოვრება და მეცნიერული მემკვიდრეობა. მრავალთავი XIII, თბ., 1986, გვ. 96-113

- ნ. პაპუაშვილი, სრულიად საქართველოს კათოლიკოს-პატრიარქი კალისტრატე ცინცაძე (დაბადების 120 წლისთავი). „ჯვარი ვაზისა“, 1986, № 1, გვ. 22-25 (= „საღვთისმეტყველო კრებული“, 1987, № 3, გვ. 5-15).

- საეკლესიო-ლიტურგიკული ქადაგებები სხვა ავტორების ქადაგებებთან ერთად (ბიბლიოგრაფიული მითითება იხ. ზემოთ).

- კალისტრატე ცინცაძის დაბადების 120 წლისთავს მივუძღვნით „საღვთისმეტყველო კრებულის“ სპეციალური ნომერი (1987, №3), რომელშიც შესულია მისი რამდენიმე ქადაგება-სიტყვა (იხ. ზემოთ), ნაწყვეტი მოგონებიდან (ქართული თარგმანით) და ნაწილი სადისერტაციო ნაშრომისა (მეტი ინფორმაცია იხ. ქვემოთ, გამოკვლევაში).

რუსულ ენაზე მოვამზადეთ აგრეთვე სტატია (ზემოთ ნახსენები „რუსული მოკლე ვარიანტი“): „Святейший и Блаженнейший Католикос-Патриарх всея Грузии Каллистрат Цинцадзе“, რომელშიც მოცემულია კათალიკოს-პატრიარქ კალისტრატე ცინცაძის ცხოვრებისა და მოღვაწეობის შეჯამება და ეძღვნება მისი უწმინდესობის დაბადების 120 წლის-თავს. სტატია უნდა დაბეჭდილიყო რუსეთის მართლმადიდებელი ეკლესიის ოფიციალურ ორგანოში „Журнал Московской Патриархии“ (1986 წლის ერთ-ერთ ნომერში), მაგრამ არ დაიბეჭდა. სამაგიეროდ დაიბეჭდა აღნიშნული ორგანოს სამეცნიერო და ლიტერატურული რედაქტორის, თბილისის სახელმწიფო უნივერსიტეტის კურსდამთავრებულის, ამჟამად საეკლესიო და, ზოგადად, სასულიერო თემატიკის ცნობილი სპეციალისტის, პუბლიცისტისა და რედაქტორის ვალენტინ ნიკიტინის სტატია, რომელიც დიდწილად ჩვენი ნაშრომის მონაცემებს ემყარება: В. Никитин, Святейший и Блаженнейший Католикос-Патриарх всея Грузии Каллистрат (К 120-летию со дня рождения). „Журнал Московской Патриархии“, 1986, №7, გვ. 49-55.

ზემოთ დასახელებული გამოკვლევა („ქართული ვრცელი ვარიანტი“), რომელიც ოცდათორმეტი წლის წინათ მომზადდა, დღემდე არ გამოქვეყნებულა. მისი მთლიანი ფორმით გამოქვეყნება მაშინდელ ვითარებაში არც მოხერხდებოდა; მას საბჭოთა გამომცემლობაში ვერც კი წარადგენდი (მკითხველი დაგვეთანხმება!). მაგრამ ახლა, როდესაც ქადაგებათა წინამდებარე კრებულზე მუშაობა დავიწყეთ, გადავწყვიტეთ, ტექსტების პუბლიკაციისათვის ეს ნაშრომი დაგვეერთო. გადავხედეთ გაყვითლებულ ფურცლებს და საავტორო რედაქციას შევუდექით; ბევრი ადგილი გავაახლეთ და დავაზუსტეთ, თუმცა შინაარსში არსებითი ცვლილებები არ შევიტანეთ, არც სტილზე გვიძალადია მაინცდამაინც. დამატებითი ინფორმაციები შენიშვნებში წარმოვადგინეთ. იქვე ჰპოვა ასახვა იმ ლიტერატურამ, რომელიც მომდევნო წლებში (პერესტროიკის ბოლო ფაზასა და პოსტსაბჭოურ საქართველოში, 1989 წლი-

დან დღემდე) გამოქვეყნდა და რომელთა მონაცემების წარმოჩენის საჭიროება გამოკვლევის ამა თუ იმ დეტალმა გვაგრძნობინა.



ჰომილიათა წინამდებარე კრებულს ვაქვეყნებთ სათაურით „ყვავილკრებული“. ეს არის ქადაგებათა, სიტყვათა, მოძღვრებათა და კათოლიკე (ანუ საყოველთაო, „მრგვლიად მოსავლელ“) ეპისტოლეთა წიგნის ერთ-ერთი სახელი ძველ ქართულ საეკლესიო, საღვთისმეტყველო და საღვთისმსახურო ტრადიციის მიხედვით. ანალოგიური კრებულები ცნობილია სხვა სახელწოდებითაც: „მრავალთავი“ და „მარგალიტი“. მათში მასალას, როგორც წესი, საეკლესიო კალენდრის რიგზე განათავსებდნენ: ჯერ წარმოადგენდნენ უძრავი დღეებისა და დღესასწაულების ქადაგებებს, შემდეგ კი მარხვისა და აღვსების, აგრეთვე სულიწმინდის გარდამოსვლის მომდევნო პერიოდის ქადაგებებს. აღნიშნული წიგნების მომდევნო ნაწილი ეთმობოდა სხვადასხვა შემთხვევის გამო წარმოთქმულ სიტყვებსა და მოძღვრებებს, რომელთაგან ზოგიერთს, განსაკუთრებული საღვთისმეტყველო და საზოგადოებრივი მნიშვნელობის მქონეთ, შეიძლებოდა საყოველთაო ეპისტოლის ფორმა და ფუნქციაც შეეძინა. წინამდებარე „ყვავილკრებული“ ქადაგებათა ძველი ქართული კრებულებისაგან შემდეგი პრინციპით განსხვავდება: ამავე სახელწოდების ძველ კრებულებში მეტწილად სხვადასხვა ავტორის რჩეული ჰომილიები არის თავმოყრილი ანუ მრავალავტორიანია, მაშინ როდესაც ჩვენი კრებული მხოლოდ ერთი ავტორის, უწმინდესი კალისტრატეს, ჰომილიებს მოიცავს. უწმინდესი კალისტრატე კარგად იცნობდა ძველი ქართული ჰომილეტიკის ხელნაწერულ ტრადიციას და ეჭვი არაა, რომ ის ამ ტრადიციის ზემოთ მითითებულ წესსა და პრინციპს გაუწევდა ანგარიშს თავისი ხელნაწერი და ნაბეჭდი ქადაგებე-

ბის, სიტყვებისა და ეპისტოლეების კრებულის შედგენის დროს.

შესაბამისი მასალის გაცნობა გვარწმუნებს, რომ ასეთი კრებულის შედგენისათვის მას ჯერ კიდევ მიტროპოლიტობის დროს უზრუნვია; თავი მოუყრია ყველა ქადაგებისა და ეპისტოლის ტექსტებისათვის, რისი მოძიებაც კი მოუხერხებია; ისინი ერთ რვეულად (როგორც თვითონ უწოდებს) წარმოუდგენია და დაურთავს მათთვის „წინასიტყვა“, რომელიც დათარიღებულია 1931 წლის 24 აპრილით. შემდეგ, გზადაგზა, ეს „რვეული“ ავტორს შეუესია მომდევნო წლების მასალებით: ეპისტოლეებითა და პირადი წერილებითაც, მიუმატებია აგრეთვე თავისი მოკლე სტატიების ტექსტები (გამოქვეყნებულიც და გამოუქვეყნებელიც), „რომელიც კი შემოწმდა“-ო. ეჭვი არაა, რომ აღნიშნული დოკუმენტების გაერთიანება და ყდაში ჩასმა პატრიარქობის ხანაში, უფრო ზუსტად კი, 40-იანი წლების მიწურულსა და 50-იანი წლების დასაწყისში მოხდა. ასე შეიქმნა უმდიდრესი და უძვირფასესი ხელნაწერი კრებული, რომელიც დაცულია ავტორის პირად საარქივო ფონდში (ხელნაწერთა ეროვნული ცენტრი) ნომრით 97. ესაა მაგარ ყდაში ჩასმული სქელტანიანი ხელნაწერი წიგნი, რომლის ტექსტი შინაარსის მიხედვით ორ ნაწილად განიყოფა: (ავტორისავე დასათაურებით) „სიტყვათა კრებული“ (ფფ. 1-210) და „დამატება“ (ფფ. 211-378). თითოეული დოკუმენტი, რასაც კი აქ ბინა აქვს მიჩენილი, აღბეჭდილია მაღალი აკადემიზმით, დახვეწილი გემოვნებითა და გულმოდგინებით. იქ ყველგან, ყოველ ნაბიჯზე, საგრძნობია მეცნიერის ხელწერა – ინფორმაციის მეცნიერული სიზუსტით მიწოდების კულტურა; ბიბლიოგრაფიული მითითებებისა და შენიშვნების სიუხვე და შეძლებისგვარი სისავსე. თითოეულ ქადაგებას (ქადაგებას ფართო გაგებით) ახლავს მინაწერი, რომელიც გვაუწყებს, თუ სად, როდის, რა ვითარებაში და რა მიზეზის გამო წარმოითქვა ეს ქადაგება და სად გამოქვეყნდა ის (თუკი გამოქვეყნდა მქადაგებლის სიცოცხლეში).

გვინდოდა, არ დაგვერღვია ამ კრებულის აღწავლა და მასალა, რომლის ქრონოლოგიური საზღვრები 1893-1943

ნლებს მოიცავს, იმავე რიგზე გაგვეწყოს, როგორც იქ არის განყოფილი. მაგრამ იმის გამო, რომ წინამდებარე გამოცემის მიზანი არის არა ზემოთ აღწერილი ხელნაწერი დოკუმენტის – „სიტყვათა კრებულის“ – მთლიანი სახით პუბლიკაცია, არამედ მასში წარმოდგენილი მასალის დიდი ნაწილისა, ქადაგებათა ტექსტების ავტორისეული თანმიმდევრობის ზუსტად დაცვის აუცილებლობა ვერ დავინახეთ, თუმცა ცალკეულ რგოლში აღნიშნული თანმიმდევრობა მაინც დავიცავით.

წინამდებარე კრებული შედგება ორი განყოფილებისაგან: ა) საეკლესიო-სადღესასწაულო ქადაგებები და ბ) კერძო ღვთისმსახურების (პანაშვიდების, პარაკლისების) დროს წარმოთქმული სიტყვები. ეს სიტყვები ჩვენ თემატურად დავაჯგუფეთ და თითოეულ ჯგუფში მასალა იმავე ქრონოლოგიის პრინციპით განვალაგეთ, რა პრინციპითაც ავტორს მთელი მასალა აქვს განლაგებული.

დავაზუსტებთ, რომ მეორე განყოფილებაში შევიტანეთ სხვადასხვა კულტურულ და საგანმანათლებლო, საზოგადოებრივ და სახელმწიფოებრივ მოვლენასა და ღონისძიებასთან დაკავშირებული საპარაკლისო ქადაგებები. მათ გვერდით დგას ცნობილი პიროვნებებისადმი, მეტწილად ლიტერატურისა და ხელოვნების მუშაკებისადმი მიძღვნილი ჰომილიები. აქ იგულისხმება პანაშვიდებისა და ანდერძის აგების დროს წარმოთქმული ქადაგებები, რომლებიც სპეციალურ ლიტერატურაში ცნობილია ეპიტაფიების სახელითაც. კრებულს ვამთავრებთ საყოველთაო ეპისტოლით, რომლის ტექსტს, გავრცობილსა და კომენტარებულს, ავტორი, კათალიკოს-პატრიარქი, საღვთო ლიტურგიაზე, სავარაუდოდ, წარმოთქვამდა კიდევ.

ამასთანავე გვინდა აღვნიშნოთ შემდეგი: ქადაგებები, რომელთა ტექსტები წინამდებარე გამოცემაში ვერ მოხვდა, შვევა მომდევნო გამოცემაში, რომელიც მისი უწმინდესობის ქადაგებათა და სიტყვათა სრული კრებული იქნება (თუკი ამ იდეის ხორცშესხმის საშუალება გამოინახება).

პუბლიკაციაზე მუშაობის პროცესში რედაქცია შეეხო მექანიკურ შეცდომებს (რისი შემჩნევაც მოვახერხეთ) და ტექ-

ნიკურ მხარეს (მაგალითად, დიდი აბზაცების დაშლას, როდესაც ამისკენ შინაარსმა და ტექსტის შინაგანმა ლოგიკამ გვიბიძგა); ასევე, იშვიათ შემთხვევაში, პუნქტუაციას, აქა-იქ ბიბლიურ ციტატებსაც, როდესაც ეს ქართული ბიბლიური ტექსტოლოგიის თანამედროვე დონემ გვიკარნახა. სრულად შევინარჩუნეთ კალისტრატე ცინცაძის სამოძღვრო-სამქადაგებლო ჰომილეტიკის სტილი, ჰომილეტიკისა, რომელიც, ჩვენი (და არა მხოლოდ ჩვენი) შეფასებით, არაფრით ჩამოუვარდება მსოფლიო სახელისა და მნიშვნელობის საეკლესიო მოღვაწეთა ჰომილეტიკას არც აზრის სიღრმით და არც გრძნობის ექსპრესიით, არც მჭევრმეტყველების ხელოვნებით და არც სიტყვათა კონის სისავსით, არც ტრაგიზმის განცდით და არც პოეტური აღმაფრენით.



**შენიშვნა:** ქადაგებათა ტექსტების ბოლოს მოცემული ბიბლიოგრაფიული მითითებები ეკუთვნის ავტორს. ქადაგებები, რომელთაც ასეთი მითითება არ ახლავს, ავტორის სიცოცხლეში არ დაბეჭდილა. მითითებებს ავტორის შემდგომდროინდელი პუბლიკაციების შესახებ მკითხველი იპოვის შესავალსა და გამოკვლევაში.

**ნუგ ზარ პაპუაშვილი**



ძღუდელი კალისტრატე ცინცაძე

უნძინდესიქა და უნეცარესიქა  
სრუდიად საქართვედოს კათალიკოს-პატრიარქ  
კაღისცროსე ცინცადის

ქადაგებეზიქა და სიყვეზიქა

ყ ვ ზ ვ ი ჯ კ ლ ე ბ ყ ჯ ი

„მოდღერის მოვალეობათა შორის პირველი ადგილი უჭირავს ადამიანთა მომოწაფეზას (მატთ. 28, 19), ანუ მათ გულთა და სულში სარწმუნეობით ქრისტეს დამკვიდრეზას (ეფეს. 3, 17), რისთვისაც საჭიროა მაცხოვრის სიტყვის ანუ სწავლის ჟამითიუჟამოდ ქადაგება (2 ტიმ. 4, 2). დღიდან მოდღერად დადგინეზისა ვცდილობდი ამ მოვალეობის შეძლებისდაგვარად შესრულეზას: ვმეტყველებდი თითქმის ყველა კვირა-უქმე დღეებში...“

კათალიკოს-პატრიარქი კაღისცროსე





კათალიკოს-პატრიარქი კალისტრატე

არაკალენდარული დღეები ქაშვეთის სამრევლოში

ს ი ტ ყ ვ ა  
სამრევლოში პირველად შესლვისა ბამო

ნარვედით ყოველსა სოფელსა და უქადაგეთ  
სახარება ესე ყოველსა დაბადებულსა  
(მარკ. 16,15)

საყვარელნო! ჩვენს დროში თუმცა სარბიელი ქართველ მოძღვრის მოღვაწეობისა ვინრო ფარგლით შემოიხაზა, მაგრამ, სამაგიეროდ, მოვალეობა მისი ცხადლივ გამოიკვეთა, მიიღო რა განსაზღვრული მიმართულება: წინად თუ იგი მიდიოდა აფხაზეთსა და ოსეთს და იქ **ქადაგებდა სახარებასა სასუფეველისასა**, დღეს ამ სახარების ქადაგებას საჭიროებენ ძენი ივერიისანი.

უფალმან, რომელმან **განუწესა ყოველსავე ნათესავსა კაცთასა ჟამნი და საზღვარდადებანი დამკვიდრებისა მათისა პირსა ზედა ქვეყანისასა** (საქმე მოციქ. 17,26), წილად არგუნა ერთს მუჭა ქართველს ერს, მთელი თორმეტი საუკუნე გარდალობებოდა წინ ზღვას უმეცრებისას, ბარბაროსობისას, ძალმომრეობისას და კაცთსიძულვილისას და, ამ სახით, დაეცვა დაღუპვისა და შთანთქმისაგან ქრისტეს სჯული, განათლება და დასავლეთის ერნი. ქართველმა ერმა პირნათლად შეასრულა ეს მოვალეობა განათლებული კაცობრიობის წინაშე: თუ მთლიანად არა, ნახევრად მაინც შეაკავა, შეაფერხა წინსვლა ვეშაპისა ალბორგებულისა და განმზადებულისა შთანთქმად განათლებულის ქვეყნების სახელმწიფოთა; თვით მტლედ დაედო ერთა თავისუფლებას; სხვის დამოუკიდებლობას შესწირა მსხვერპლად საკუთარი თვითთავადობა და დაავადებული, მოუძღურებული და ძალაგამოლეული მიეყრდნო იგი ერთმორწმუნე, ახალგაზრდა და ძლიერ ერს ძალთა მოსაკრებად და მასთან ერთად ახალის ცხოვრების დასაწყებად. ხოლო, ვიდრე ახალ ცხოვრებას დაიწყებ-

და, მიმოიხედა და დაინახა, რომ მამაპაპათა განთქმული სარწმუნოება შესუსტებულიყო, განათლება გამქრალიყო და სიბნელეს მოეცვა არემარე. მიზეზი ამისა იყო ის, რომ ჟამთა ვითარების გამო ძველნი ტაძარნი მეცნიერებისა – დიდებულნი ლავრანი – დაცალიერდნენ, მონასტერნი დადუმდნენ, მწყემსნი მოიწყვიდნენ და მოძღვარნი მოისრნენ.

მაგრამ, თავდაპირველად, ვერც ახალ გარემოებაში მოენყო განათლების საქმე სასურველად. ბიზანტიისა და სპარსეთის გავლენით აღზრდილნი ჩვენნი მამაპაპანი, რუსეთთან შეერთების დროს, ახალ წესწყობილებისათვის სრულებით მოუმზადებულნი იყვნენ და, ამის გამო, თანამედროვე ცხოვრებას ჩამორჩნენ. ნამეტან ცუდ მდგომარეობაში ჩავარდა ამ მხრივ ჩვენი სამღვდელოება: ის, ვინც წინად სათავეში ედგა სწავლა-განათლების საქმეს, დღეს უკან ჩამორჩა განათლებით სხვა წოდებას. ამის გამო საქმე ისე მოენყო, რომ სასულიეროთათვის სრულიად საკმარისად სთვლიდნენ ჟამნ-და-ვითნ-კონდაკის ცოდნას და ვაივაგლახით ხელის მონერას საეკლესიო საბუთებზედ...

მართალია, ხშირად ამისთანა მოძღვარნი ბრწყინავდნენ ხოლმე მაღალი ზნეობით, მაგრამ ახალ დროის განათლებული საზოგადოება, უმეტეს წილად – განათლებული გარეგნობით და არა ჭეშმარიტად, ვერ ურიგდებოდა ამგვარ სამღვდელოების ზნეობრივ გავლენის ქვეშ ყოფნას, ვინაიდან, ახალ განათლებასთან ერთად, მან შეითვისა ის აზრი, რომ სარწმუნოება და ზნეობა საჭიროა მარტო სამღვდელოებისა და გაუნათლებელ ხალხისათვის, ხოლო განათლებულნი ანუ, უკეთ რომ ვთქვათ, ცრუგანათლებულნი, სარწმუნოებასა და ზნეობაზედ მაღლა სდგანან. ეს შეხედულება ცრუგანათლებულთა მსწრაფლ გავრცელდა ჩვენს ქვეყანაში, ჯერ ქალაქებსა და დაბებში და შემდგომ თვით სოფლებშიც. ამას ხელი შეუწყო იმ გარემოებამაც, რომ რჩენა ამ განათლებით უკან ჩამორჩენილის სამღვდელოებისა, – ცრუგანათლებულთა აზრით, დახავსებულ დაწესებულების მსახურთა, მუქთამჭამელთა და ხორცმეტთა, – დაეკისრა მშრომელ და შედარებით ღარიბ ხალხს, მაშინ როცა უფრო შეძლებულნი (თავადაზნა-

ურნი) ამ მოვალეობისაგან თავისუფალ არიან. ცრუგანათლებულთა აზრების გავრცელების გამო დღეს სიბნელე და გარყვნილება იმ ზომამდე მივიდა, რომ თამამად შეგვიძლიან წმიდა მოციქულთან ერთად ვთქვათ: **სოფელი ჩვენი ბოროტსა ზედა დგას** (1 იოან. 5,2). თუ არ ნაბილწვისა და გარყვნილები ნიშანია, მაშ რა არის ეს ლოთობა, ქურდობა, უზრდელი სიტყვა-პასუხი, უფროსის შეურაცხყოფა, დედ-მამის ავად მოპყრობა, კაცის პიროვნების ცუდად მოხსენება, ცოლქმრობის შეგინება და ათასი სხვა ავკაცობა! ეს მდგომარეობა მით უფრო საშიში და სავალალოა, რომ, რაც ხანი მიდის, მით უფრო ძლიერდება ბოროტება, მწვავედება ძმათა შორის ურთიერთობა და ირღვევა ყოვლის შემძლებელი სიყვარული და ერთობა!...

რა ეშველება, რა წამალი დაედვის ამ ავადმყოფობას, ვინ უნდა უპატრონოს **ერსა ბნელსა შინა მავალსა და დამკვიდრებულსა აჩრდილთა თანა სიკვდილისათა** (ეს. 9,2)? ნათქვამია, ცეცხლით დამწვარი ცეცხლით დამწვარი თვე მორჩებაო და ეს თქმულება სიმართლეს არ არის მოკლებული, – ვინაითგან სარწმუნოება და ზნეობა დაამხო ჩვენში უმეცრებამ და ცრუგანათლებამ, მეცნიერებამ და ჭეშმარიტმა განათლებამ უნდა კვლავ აღადგინოს იგინი...

ამის გამო, ყოველს ჭეშმარიტად განათლებულს ქართველს ვალად აძევს, დაუბრუნოს უმრწემესთა ძმათა თვისთა ის, რაც წაართვა მათ უმეცრებამ და ცრუგანათლებამ; დაუბრუნოს ერსა ქრისტიანესა, ერსა ჯვარისმტვირთველსა, ერსა ქრისტესთვის წამებულსა მამაპაპური სარწმუნოება და შეულახველი, ჩირქმოუცხებელი და სპეტაკი ზნეობა...

მართალია, დღეს ბოროტება ძლიერია, იმის გავლენისაგან განთავისუფლება ძნელია, მაგრამ არც ისე, რომ მორწმუნე ქრისტიანეს წაართვას, დაუკარგოს იმედი საუკეთესო მომავლისა. მოიგონეთ, საყვარელნო, თუ რა ძალა ჰქონდა ბოროტებას ამ ცხრამეტის საუკუნის წინად, როდესაც თვით **წინამძღვარი იგი ცხოვრებისა მოჰკლეს** (საქ. მოც. 3,15) ჯვარსა ზედა, მოიგონეთ, თუ ვითარ **აღიძრნეს წარმართნი და ერმან იზრაახა ცუდი; შეითქვეს მეფენი ქვეყანისანი და**

**მთავარი შეკრბეს ერთად უფლისათვის და ცხებულისა მისისათვის** (ფს. 2,1-2); მოიგონეთ, თუ რაოდენი სისხლი დაინთხა წმიდათა მოციქულთა, მქადაგებელთა, მონამეთა და აღმსარებელთა ქრისტეს იესოსათა, მაგრამ ძალმან ღვთისამან შემუსრნა ბჭენი ჯოჯოხეთისანი; რწმენამან ჭეშმარიტებისა და სიმართლისამან სძლია ბოროტებას, ხოლო **უფალი ჩვენი იესო ქრისტე გუშინ და დღეს და უკუნისამდე იგივე არს** (ებრ. 13,8): რაც მაშინ მიანიჭა მორწმუნეთა თვისთა, მას დღესაც მოსცემს მსასობელთა მისთა. მაშასადამე, თუ ჩვენში კიდევ დარჩომილა სულ მცირედიც ნაპერწკალი სიყვარულისა ქრისტეს იესოსა, თუ კიდევ შეგვრჩენია ხალისი მოქმედებისა წარსამატებელად მოძმისა და მოყვასისა, დრო წასული არ არის, საქმის გასწორება, ღვთის შეწევნით, კიდევ შეიძლება. საჭიროა მხოლოდ, ვიცოდეთ, თუ რა არს ნება ღვთისა კეთილი, სათნო და სრული (რომ. 12,2) და, თანახმად ამ ცოდნისა, – მოქმედება სასარგებლოდ ეკლესიისა და მამულისა.

დღეს კი ჩვენ სწორედ ეს გვაკლია. დღეს ჩვენ ვეძებთ არა ნებას ღმრთისასა, არამედ ნებასა ჩვენისა და ამისათვის, რაც ერთს მიაჩნია სანეტაროდ, ის მეორეს არა სწამს, ხოლო მესამე ორთავეს აზრს უარჰყოფს. მართალია, აზრთა სხვადასხვაობა ნიშანია გონების მუშაობისა, სიცოცხლისა და წინსვლისა, მაგრამ ეს სხვადასხვაობა უნდა შეეხებოდეს უკეთეს საშუალებათა გამოძებნას და არა თვითმისწრაფების საგნის ძიებას. ქრისტეანესათვის საგანი მისწრაფებისა გარეშე ქრისტესა არ არსებობს, რის გამო საგანი მისი მოქმედებისა არის და იქნება, **რათა გამოიხატოს ჩვენს შორის ქრისტე** (გალატ. 4,18). ამისთვის კი საჭიროა შეერთებული მოქმედება ყოვლისავე ჭეშმარიტად განათლებულისა განურჩევლად წოდებისა, სქესისა და ჰასაკისა; საჭიროა, რათა ყოველნი **ვზრახვიდეთ, რაოდენი არს ჭეშმარიტი, რაოდენი პატიოსანი, რაოდენი მართალ, რაოდენი წმიდა, რაოდენი საყვარელ, რაოდენი საქებელ, რაოდენი სათნო და რაოდენი ქებულ** (ფილიპ. 4,3). საჭიროა, შემოვკრბეთ გარშემო მისა, რომელმან ბრძანა: **მე ვარ ნათელი სოფლისა. რომელი**

**შემომიდგეს მე, არა ვიდოდეს ბნელსა, არამედ აქვნდეს ნათელი ცხოვრებისა** (იოან. 8,12).

ყოველივე ეს საჭიროა და სავალდებულო კაცადკაცად-სათვის, ხოლო წინამძღვრობა, გზის მაჩვენებლობა, ხელმძღვანელობა ამ საქმეში უნდა გაუწიოს ერსა ქრისტესსა მოძღვარმან და მწყემსმან ეკლესიისამან, რომელნი მოსცნა უფალმან, რათა მოღვაწობითა მათითა **მივიწინეთ ყოველნი ერთობასა სარწმუნოებისასა და მეცნიერებასა ძისა ღმრთისასა, მამაკაცად სრულად, საზომად ჰასაკისა სავსებისა მის ქრისტესისა** (ეფეს. 4,13). ამისათვის მოძღვარმა უნდა ჰქადაგოს სიტყვა, ზედაადგეს ჟამითი უჟამოდ; ამხილოს, შერისხოს, **ლოცვიდეს ყოველთა სულგრძელებითა და მოძღვრებითა** (2 ტომ. 4,2). ერთი სიტყვით, მოძღვარი უნდა სდგეს თავის სამწყსოს დარაჯად, დღე ყოველ ზრუნავდეს მისთვის, სწუხდეს მწუხარებითა მისითა და განიხარებდეს სიხარულითა მისითა...

შესძლებს თუ ვერა დღეს ამ გვარად მოქმედებას ჩვენში მოძღვარი, ეს დამოკიდებულია მწყემსისა და სამწყსოს ურთიერთობაზედ. სიტყვა ღმრთისა, რომელიც უნდა ჰქადაგოს მოძღვარმა, უფალმან ჩვენმან იესო ქრისტემ შეადარა თესლსა, ხოლო მქადაგებელი – მთესველსა. მთესველი კი, როდესაც ხედავს, რომ შრომა მისი ამაო არ არის, როცა ხედავს, რომ თესლი, მის მიერ დათესილი, გადაქცეულა ჯეჯილად, ჯეჯილი კი ჰლამის დაპურებას, ჰპოვებს თავსა შინა თვისსა ერთიორედ მეტ ძალღონეს შრომის განსაგრძობად. მოძღვარიც ეგრეა: თუ სიტყვა მისი არ რჩება ხმად მლაღადებელისა უდაბნოსა ზედა, თუ სამწყსოს ესმის ხმა მისი, თუ იგი ყურადიღებს სიტყვათა მისთა, იმარხავს მათ გულსა შინა თვისსა, ხელმძღვანელობს მისის სწავლა-დარიგებით, არის მასთან გულახდილ და წრფელ, თუ მათ შორის არ არის კედელი გულცივობისა, უნდობლობისა და მედიდურობისა, – მაშინ მოძღვარიც აღფრთოვანდება, ჰპოვებს ახალს ძალას და სიმხნეს შრომის გასაორკეცებლად, **დასამტკიცებლად ნმიდათა, საქმედ მსახურებისა და აღსაშენებლად გვამისა ქრისტესისა** (ეფ. 4,12)...

მოვალ რა ამ განზრახვით, საყვარელნო, წმიდასა ამას ეკლესიას, მე განმზადებულ ვარ **ყოვლითა გონებითა კეთილითა** მსახურებად უფლისა, სადიდებელად მისდა და წარსამატებელად თქვენდა. მე მზათა ვარ ვიღვანო თქვენს შორის **არა იძულებით, არამედ ნებსით; არცა საძაგელის შეძინებისათვის, არამედ გულმოდგინედ** (1 პეტრ. 5,2). ხოლო თქვენგან ვითხოვ სიყვარულსა და ლოცვასა, რათა უფალმან ღმერთმან არა ამაოდჰყოს თქვენ შორის მოქმედება ჩემი. ამინ.

(წარმოითქვა ქაშვეთში 1903.XII.21; „ივერია“, 1904, №7; „Вестник Грузинского Эжагхата“, 1904, № [?])

## სიგყვა ქვაშვეთის სულის წმიდის სახელოვის სამწირველოს კურთხევის ბაგო

*ესე არს დღე, რომელ ჰქმნა უფალმან:  
ვიხარებდეთ და ვიშვებდეთ ამას შინა (ფსალ. 117,24),*  
ვინაითგან დღეს იწყება დასასრული იმ საქმისა, რომელიც გვიმტკიცებს, რომ ჩვენში ჯერ კიდევ საკმაოდ ღვივის წმ. მოციქულთასწორის ნინოს მიერ აღნთებული ცეცხლი სარწმუნოებისა, რომ ჯერ კიდევ არ გამქრალა ის მამაპაპათა ძლიერი სული, რომელმაც შეჰქმნა სვეტიცხოველი, გაენათი, ბედი, სამთავისი და მრავალი სხვანი!...

მოგეხსენებათ, რომ ის წმიდა ტაძარი, რომელიც ას-ორ-მეოცდა-ათერთმეტის წლის განმავლობაში იცავდა თავის შორის უუძველესთა სინმიდეთა, რომელთა წინაშე არა ერთსა და ორს თაობას უფრქვევია ცრემლნი მწუხარებისა და სინანულისანი და შეუწირავს სამადლობელნი ხოტბანი და ქებათა-ქებანი, ამ ათიოდე წლის წინად განირღვა ოთხად და ყოველს წამს ჰლამობდა დაქცევად. ყოველივე შრომა და მეცადინობა იმ ტაძრის დასაცველად შეიქმნა ამაო და ფუჭი, ვინაითგან რაც დროთა ვითარებამ გაანადგურა, – კაცთა ხელოვნებამ და გონებამ ვერ შესძლო აღდგინებად!...

სწორედ ამ გარემოებამ აღუძრა სურვილი მოყვარულთა სახლისა ღვთისა შვენიერებისათა აღევით ახალი ტაძარი იმ გეგმით, რომელიც შეიმუშავა და შეითვისა ქართველთა ერის გონება-გემოვნებამ. და აჰა ნაყოფი ამ სურვილისა: განზრახულს ტაძართან ერთად ჩვენ მოგვეცა შეძლება აღგვეგო ეს მეორე ტაძარიც, დღეინდელის მღვდელთმოქმედების შემდეგ განმზადებული სამკვიდრებელად ცხოველმყოფელისა სულისა!...

ვიხარებდეთ და ვიშვებდეთ, საყვარელნო, დღესა ამას, ვინაითგან ამ ტაძრის კურთხევა წინამორბედია უმთავრესის ტაძრის დასრულებისა, ნიშანია უფლისა მიერ ჩვენის განზრახვის მსხვერპლად სულნელად შეწირვისა და თავმდება მისის მოწყალების ჩვენზედა კვალად მოღებისა.

ამა სიხარულთან ერთად, მივცეთ დიდება უფალს ჩვენის განზრახვის კურთხევისათვის, ლოცვა ვყოთ მათთვის, ვინც ხელი შეუწყო ამ კეთილ საქმეს, გამოვითხოვოთ უფლისაგან სიმხნე საქმის მესვეურთათვის და შევევედროთ ყოფლად-მოწყალეს, რომ ღირსგვეყოს ვედრებად მისდამი მთავარს ტაძარშიაც, რათა მუნ ლოცვითა ჩვენ ყოველნი **შევიქმნეთ ჭეშმარიტს ტაძრად ღვთისა ცხოველისა, დასამკვიდრებელად და საქცეველად ჩვენ შორის ყოვლადწმიდისა სულისა** (2 კორ. 6,16)!... ამინ.

(ნარმოითქვა ახლადნაკურთხ ტაძარში  
1909. IV. 19; „მწყემსი“, 1909, №8)

## სიტყვა

### ქვაშვეთის წმიდის გიორგის ახლის ტაძრის საკურთხეველად განმზადების ბაჟი

საყვარელნო! თქვენ იცით, რომ მამაპაპათა მიერ 1753 წელს აგებული და მათის სულისკვეთებისა და გულისზრახვათა მცველი ტაძარი ჰლამობდა დაქცევად!...

ამ გარემოებამ აღძრა ზრუნვად ჩვენის სამრევლოს მესვეურნი და გამოაძებნინა წყარო ახალის ტაძრის ასაშენებ-



ლად. უფალმაც აკურთხა ზრუნვა მათი, და აჰა, ჩვენ ვსდგევართ ამ დიდებულ ტაძარში და ვსასოებთ, დღევანდელის ლოცვა-ვედრებისა და ხვალინდელის მღვდელმოქმედების შემდეგ, შეიქმნეს იგი **ადგილ საყოფელ დიდებისა** უფლისა (ფსალ. 25,8)!...

მოგილოცავთ რა ამა ჭემმარიტად ბედნიერს დღეს, მოგინვევთ, მივსცეთ **მადლი ღმერთსა** (2 კორ. 2,14) ამა ექვსის წლის წინად დაწყებულის საქმის კეთილად დამთავრებისათვის!...

ამას შევსძინოთ ვედრება, – ტაძარსა ამას შინა წყალობითა და მონყალებითა მოჰხედოს უფალმან **ყოველსა სულსა ჭირვეულსა და დაწუნებულსა**, მართლმადიდებელსა და არამართლმადიდებელსა, ქრისტიანესა და არაქრისტიანესა!... ამინ.

(წარმოითქვა 1910. X. 30)

ს ი ტ ყ ვ ა  
**წინონიღის ეპისკოპოსად დაღბინების  
გამოსახლების შვილება**

თქვენო უწმიდესობავ და ყოვლადსამღვდელო მწყემსთმთავარნო!

თქვენ მოგეხსენებათ, რომ წესი მღვდელთმთავრად განმზადებულის განცხადებისა შეიცავს საჯაროდ თქმულს აღსარებას...

ნება მიბოძეთ, მეც აღვიარო სამღვდელო და საერო დასათა წინაშე გულის ჩემის ზრახვანი!

ვინც მიცნობს, უეჭველად იცის, რომ ჩემს მღვდელთმთავრობაზედ აზრი არც თავში მომსვლია და არც გულში გამივლია: ჩემი მოღვაწეობის სარბიელი ჩემი ძალღონისათვის საკმაო და ფრიად ვრცელიც იყო. მიუხედავად ამის, უკანასკნელი ნახევარი წლის განმავლობაში ჩვენი ეკლესიის გულშემმატკივართაგან, რომელთა შორის პირველი თქვენ

ბრძანდებით, უწმიდესო მამათმთავარო, თითქმის ყოველ-  
დღე მესმოდა: იტვირთე ჯვარი მძიმე მღვდელთმთავრისაო,  
– ყველას მადლობით და მოკრძალებით უარით გისტუმ-  
რებდით...

რათა, რისთვის?.. დიდი მოციქული პავლე ხომ ბრძანებს:  
**უკეთუ ვისმე ეპისკოპოზობის უნდეს, კეთილისა საქმესა  
გული ეტყვისო (1 ტიმ. 3, 1)?**

დიახ, ამას ჰბრძანებს წმ. მოციქული, მაგრამ თვითვე  
დასძენს: **ჯერ არს ეპისკოპოზისა, რათა უბრალო იყოს,  
ფრთხილ, წმიდა, შემკულ... სწავლულ... მყუდრო, უღალ-  
ველ... (იქვე. 2, 3).**

აღნიშნული თვისებები განა ამშვენებენ წინაშე თქვენსა  
მდგომარესა?... განა ამ თვისებათა უქონლობას არ უჩიოდ-  
ნენ და ამის გამო არ ერიდებოდნენ მღვდელთმთავრობას  
კაცთა შორის ბუმბერაზნი – ათანასე ალექსანდრიელი და  
ბასილი კესარიელი, გრიგოლ ღვთისმეტყველი და იოანე ოქ-  
როპირი?... მათთან შედარებით რას წარმოადგენს თქვენს  
მიერ მღვდელთმთავრად განმზადებული?...  
მტვერს, ფერფლსა და ნაცარს...

იყო მეორე მიზეზიც: ბევრმა აქა მყოფმა იცის, რომ ოც-  
დაცამეტი წლის განმავლობაში ჩემი უერთგულესი მეგობარი  
და ცხოვრების განუყრელი თანამგზავრი უცხო და შორეული  
ერის შვილია; რომ, ჩემი გულისათვის, მან დასთმო დედა და  
მამა, დანი და ძმანი, სამშობლო მხარე და მეგობარნი, მომენ-  
დო მე, შეუერთა თავისი ბედი ჩემს ბედს, შეიყვარა და შეით-  
ვისა ჩემი ერი და ჩემი ეკლესია, საუკუნის მესამედის მან-  
ძილზე იზიარებდა ჩემს ლხინსა და უფრო ხშირად ჭირსა და  
ერთხელაც არ მოუყენებია ჩემთვის უსიამოვნების აჩრდი-  
ლიც კი... ნუთუ შემეძლო მე განვშორებოდი ასეთ ადამიანს,  
რასაც მოითხოვს საეკლესიო კანონმდებლობა, განსაკუთრე-  
ბით მაშინ, როდესაც ის უკვე შესულია მოხუცებულებაში და  
დღედაღამ თავს დასტრიალებს ბოროტის სენით შეპყრო-  
ბილს ჩემს ასულს?...

არა, და ათასჯერ არა!...

იყო სხვა მიზეზ-საკითხიც: როგორ შეხვდებოდა ჩემს

მღვდელთმთავრობას საქართველოს ეკლესიის ეპისკოპოზთა კრებული, ტფილისის სამღვდლოება, რომელთანაც ისე ვარ არსებითად დაკავშირებული, რომ მის გარეშე ვერც კი წარმომიდგენია ჩემი თავი, ტფილისის მორწმუნე ერი, რომელთა შორის ვიქცეოდი სამი ათეული წელი, და ჩვენი ეკლესიის უზენაესი ორგანო, საკათალიკოზო საბჭო?...  
ეს ჩემთვის გამორკვეული არ იყო...

მაშ რამ, ან ვინ გამაბედვინა მოსვლა წინაშე თქვენსა?

ერთი მხრივ, მოციქულთა შორის თავმა, რომელიც იტყვის: **ძალი უფლისა უძღურებასა შინა სრულ იქმნებისო** (2 კორ. 12, 9). მეორეს მხრივ, ჩემი ცხოვრების თანამგზავრის საქართველოს ეკლესიისადმი სიყვარულმა და უზომო პატივისცემამ – გაიგო თუ არა ჩვენი ეკლესიის გულშემატკივართა ბეჯითი სურვილი, მან გადმომცა: თუ მშობელი ეკლესია მოითხოვს შენგან ახალ პირობებში სამსახურს, შენ, თანახმად მაცხოვრის მცნებისა, უნდა **დაუტეო ცოლიცა და შვილიც, აღილო ჯვარი თვისი და შეუდგე ქრისტეს** (მატთ. 10, 37;

16,24), ჩვენთვის **ზრუნვა მიუტევე უფალსა** (ფს. 54, 23): რომელი არა ივინყებს ცის მფრინველთა და ველის შროშანთა (მატთ. 6, 26-28), არ მოგვაკლებს თავის მონყალებას ჩვენცაო...



ამასთან ერთდ გამოირკვა, რომ საქართველოს ეპისკოპოზთა კრებული, მორწმუნე ერი და საკათალიკოზო საბჭო ჩემ მიერ დაუმსახურებელი თანაგრძნობით შეეგებნენ თქვენი უწმიდესობის სურვილს, ხოლო ტფილისის სამღვდლოე-

ბა „სრულ ნდობას და თავდადებულ თანამშრომლობას“ აღუთქვამს ჩემს უღირსებას...

რა უნდა მექმნა ყოველივე ამის შემდეგ, თუ არა მოვსულიყავი წინაშე თქვენსა და სიმდაბლით მომეხსენებინა: **მორჩილ ვარ ბრძანებისა თქვენისა და არა რას მცირესა წინააღმდეგოსა ვიტყვი...**

გარნა, ეს კიდევ არ ნიშნავს, რომ ჩემს თავს ვთვლიდე სავსებით განმზადებულად მღვდელთმთავრობისათვის: მე კიდევ ვსაჭიროებ თქვენს ბრძნულ რჩევას და დარიგებას, ხელმძღვანელობასა და განსაკუთრებით ლოცვა-ვედრებასა. ამისათვის კადნიერებით გთხოვთ: ან და მარადის ევედრებით მას, რომელი **უძლურთა ჰკურნებს და ნაკლულევანთა აღავსებს, გარდამოავლინოს ჩემზედა მადლი სულისა წმიდისა და მომანიჭოს ძალი და სიმხნე წინამდებარისა მსახურებისათვის...** ამინ!

(წარმოითქვა ქვაშვეთში 1925. X. 31)

უძრავ დღესასწაულთანი

სიტყვა  
ახალწელიწად დღეს

*დღე დღესა აუწყებს სიტყვასა და ღამე ღამესა მიუთხრობს მეცნიერებასა (ფს. 18, 3).*

თანახმად ამა სიტყვათა წმ. მეფისა და ფსალმუნთმგალობელისა დავითისა, დღევანდელი დღე, გვირგვინი და დასაბამი ახალის წლისა, გვაუწყებს და მოგვითხრობს ჩვენ, საყვარელნო, მეტად ყურადსაღებ რასმე. სახელდობრ, მოგვითხრობს, რომ **ჟამი ესე შემოკლებულ არს ამიერიტგან** (I კორ. 7, 29); გვაუწყებს, რომ ჩვენი ცხოვრების დღენი ერთის წლით შემოკლდნენ და ცივი სამარე ერთის ნაბიჯით მოგვიახლოვდა; მოგვითხრობს, რომ ბევრნი მათგანი, რომელნიც ამ ერთის წლის წინად ჩვენთან ერთად განიხარებდნენ, ჩვენთან ერთად ოცნე-

ბობდნენ საუკეთესო მომავალსა, გვილოცავდნენ ახალს წელს და გვინატრიდნენ ახალს ბედნიერებას – დღეს ჩვენთან აღარ არიან. ისინი განისვენებენ იქ, სადაც დღე და ღამე განუყრელია, სადაც ახალი და ძველი წელი გაერთიანებულია, სადაც იმედს ბედნიერებისას და ოცნებას ქვეყნიურის კეთილდღეობისათვის აღარა აქვსთ ადგილი და სადაც ყოველი ჩვენგანი მიიღებს, რაც დაიმსახურა აქა ცხოვრებით, და რის ღირსათაც იცნობს პირუთვნელი მსაჯული: **წინა-უძს კაცსა ერთ-გზის სიკვდილი და მისსა შემდგომად სასჯელი** (ებრ. 9. 27). დღევანდელი დღე გვაუწყებს, რომ ზოგიერთი მათგანი, ვისაც დღეს ვხედავთ ჯანსაღად და სიცოცხლით სავსედ და რომელთა კარგად ყოფნა ყველას გვიხარის და დღეგრძელობა გვესაჭიროება, ამ ახალის წლის განმავლობაში გამოუსაღმებიან წუთისოფელსა, წარემართებიან იქ, სადაცა განისვენებენ მამანი და ძმანი ჩვენნი, [რომელნი] **განცხადებად არიან წინაშე საყდართა ქრისტესთა** (2 კორინთ. 5, 10) და მიცემად ანგარიშისა, თუ როგორ გაატარეს თითოეული წამი ცხოვრებისა ამქვეყანაზედ, ვინაითგან ყოველივე წამი ჩვენის ცხოვრებისა არის ნიჭი ღვთისა, ბოძებული კეთილის საქმისათვის, – არის ქანქარი, რომლის ავად თუ კარგად მოხმარებისათვის უნდა ვაგოთ პასუხი.

ვის ძალ-უძს, საყვარელნო, წარსდგეს კადნიერებით ამა საშინელის სამსჯავროვს წინაშე და სრულის იმედით მოელოდეს სიმართლის გვირგვინს, რომელსაც მისცემს უფალი მარტოოდენ **მათ, რომელთაც შეიყვარეს გამოჩინება** მისი (2 ტიმოთ. 4, 8)? მათ, რომელთა შრომა და ღვაწლი ამა ქვეყანაზედ იყო ნაყოფიერი, ხოლო ცხოვრება სათნო ღვთისა; რომელთაც ყოველივე საქმე შეასრულეს თანახმად უფლის მცნებათა, რომელთაც ჩვეულებად ჰქონდათ გადაქცეული ანგარიშის განევა თავის სვინდისთან; მათ, რომელნიც განიკითხვიდნენ თავსა თვისსა, თანახმად მოციქულის მცნებისა: **თავთა თვისთა განიკითხვიდეთ** (1 კორ. 11, 31).

ამისათვის, თუმცა განიკითხვა თავისა, განსჯა გულის-თქმათა, განზრახვათა, სიტყვათა და მოქმედებათა თვისთა ქრისტეანეთათვის დღემუდამ საჭიროა და სასარგებლოა,

მაგრამ ვინც ჯერ ვერ შესჩვევია, ვისაც სხვა დრო ვერ უპოვნია, დღეს მაინც უნდა მოიცალოს ამ ფრიად კეთილის საქმისათვის და შეეკითხოს თავის თავსა: როგორ და რარიგად გაატარე, თავო ჩემო, გასული წელი? რაოდენი ხანი მოანდომე ღვთის მსახურებას, ლოცვა-ვედრებასა და (ღვთის) ქება-დიდებას? ბევრი დრო შესწირე კეთილსა და ნაყოფიერს საქმესა ღვთის სადიდებლად და მოყვასის სასარგებლოდ? თუ უფრო მეტი დრო დაჰკარგე ზარმაცობასა და უსაქმოებაში, უნაყოფოსა და უსარგებლო საქმისათვის, ცუდად ყოფნასა და ბინიერს ცხოვრებაში?

რა უყავ ის ნიჭი ანუ ნაყოფი, რომლითაც გვირგვინოსან-ჰყო უფალმა შრომა შენი? რაში დახარჯე ნაშრომი ხელთა შენთა, კეთილსა თუ ბოროტს საქმეში, სულის საცხოვნებელად თუ მის წარსაწყემდელად, სადიდებელად ღვთისა და წარსამატებელად მოყვასთა შენთა, თუ გასანებივრებელად ხორცისა შენისა და დასაკამყოფილებელად ვნებათა ღელვათა შენთა, ასესხე უფალსა გლახაკთა ხელით, თუ მოანდომე სმას, ჭამას და განცხრომასა?

მოვალეობის აღსრულების დროს, რას უფრო აქცევდი ყურადღებასა, – პირად სარგებლობას და პატივის მოპოვებას, თუ მოძმეთა სარგებლობას და სვინდისის მოთხოვნილებას? კაცთაგან ელოდი ქება-დიდებას, თუ, როგორც ჭეშმარიტი მონა ქრისტესი, ელოდი სასყიდელს მამისაგან, რომელიც არს ცათა შინა? ქველ მოქმედებას საჯაროდ, კაცთა საჩვენებლად ენეოდი, თუ გაიღებდი წინაშე გულთა მხილავისა მამისათა?

თავისუფალს დროს როგორ ატარებდი ხოლმე, – რა გრძნობანი და მოგონებანი აღგეძროდიან უფრო ხშირად გულსა და სულში? გაითვალისწინე მცნებანი უფლისანი, შეუდარე გულის-თქმანი, სიტყვანი და საქმენი შენნი და სთქვი: ხარ თუ არა მზად კადნიერებით და პირნათლად წარსდგე წინაშე უფლისა და მსაჯულისა შენისა?

ამა კითხვის პასუხი ცხადად დაგვანახვებს, თუ რა ვყოფილვართ და რა უნდა ვყოფილიყავით; გვიჩვენებს, თუ რა უნდა დავვიწყოთ და რა უნდა დავიხსოვოთ, რა უნდა გავას-

ნოროთ და რა უნდა გავაუმჯობესოთ, რას უნდა დავანებოთ თავი და რას უნდა მაგრად ჩავკიდოთ ხელი, რომ არ მოგვასწროს ულმობელმა სიკვდილმა მოუმზადებელი და არ მიგვცეს საუკუნო ტანჯვასა და მწუხარებასა?

მართალია, ამგვარად განკითხვა თავისა არა სასიამოვნოა, განსაკუთრებით ისეთს დღეს, რომელსაც სხვები უდარდელად და მხიარულებით ატარებენ, მაგრამ ნუ დავივინყებთ, რომ ის, რაც სასიამოვნოა, ხშირად მავნებელია, ის კი, რაც თავდაპირველად მწარეა, საბოლოოდ ტკბილი და მარგებელია. ამისათვის, ყურად ვიღოთ სწავლა, რომლითაც განგვაბრძნო დღევანდელმა დღემ და ვიხელმძღვანელოთ მითა: უმჯობესია სასარგებლოდ, თუმცა არა გარდამეტებულის მხიარულებით, გავატაროთ დღე ესე, ვიდრე სიამოვნებით, მაგრამ უსარგებლოდ. ამგვარს შემთხვევაში ჩვენ უნდა წინ გვიდგეს წმ. მოციქულის დარიგება: **ყოველივე გამოიცადეთ და უკეთესი შეიკრძალებთ** (1 თესალ. 5, 21). ამინ.

(წარმოითქვა ქვაშვეთში 1909.1.1; „მწყემსი“, 1909, №1; „ქადაგებანი“, 1913, №1)

## სიტყვა ახალ წელიწად ღღეს

*აკურთხე, უფალო, გვირგვინი წელიწადისა ამის  
სიტკბოებითა შენითა (ფსალმ. 64,11)!*

ამ სიტყვებით წმ. მეფის და წინასწარმეტყველის დავითისა მოგესალმებით, საყვარელნო, დღევანდელ ღღეს და მოგილოცავთ ახალ წელს! ამასთანავე მოგაგონებთ, რომ ბედნიერება არის ღვთისმიერ მონიჭებულის **ხატებისა** მისსა **მსგავსებად** გარდაქცევა (შექმ. 1,26-27), და მოიპოვება განუწყვეტელის ზრუნვითა სულისა და ხორცისათვის...

ხორცისათვის საჭიროა საზრდელი, ტანთსამოსი და სადგური, და მათ შეძენისათვის პატიოსანი შრომა ღვთისაგან

ნაკურთხია და ყველასათვის სავალდებულო...

უმეტესად სავალდებულოა ზრუნვა სულისათვის, რომელსაც ესაჭიროება ღვთისცნობაზედ დამყარებულის განათლებითა და სწავლით საზრდოება, ღვთის სათნო საქმეთა მიერ შემოსვა და მის სიყვარულსა ზედა დადგრომა...

თუ ადამიანი ყოველივე ეს მოაკლო სულსა, მაშინ ჭეშმარიტს ბედნიერებას ვერ მიაწევს: განათლებით და შრომის სიყვარულით შეიარაღებული ქრისტიანე კი ზღვასა და ხმელეთს, ცასა და ქვეყანას ჰქმნის მოქმედების ასპარეზად და ბედნიერების მოსაპოვებელ მოედნად...

მაშ, განვაგრძოთ უკვე მიმდინარე წელში ხორცის ნამდვილ საჭიროებათა დაკმაყოფილებისა და სულის განათლებისა და განბრძნობისათვის შრომა, რათა მსგავს ვექმნეთ უფალსა და მოვიპოვოთ ბედნიერება! ამინ.

(წარმოითქვა ქვაშვეთში 1914.1.1)

## ს ი ტ ყ ვ ა ახალ წელიწად ღელს

ახალწელიწადს ჩვეულებად გვაქვს ვუსურვოთ ერთმანეთს ბედნიერება!

მერმე, როგორ გვესმის ჩვენ ეს სიტყვა, ვისა ვსთვლით ჩვენ ბედნიერად?!

ბევრნი, ძალიან ბევრნი, ჰგონებენ, თუ კაცი ჯანმრთელია, აქვს საკმაო საშვალეობა უშრომლად ცხოვრებისა, განიცდის ამა ქვეყნიურ სიამოვნებათა, – სულიერია სიამოვნება იგი, თუ ხორციელი, – კაცი იგი ბედნიერიო...

ცხადია, ქრისტიანე ვერ ჩასთვლის ამგვარ ადამიანს ბედნიერად, პირველად მისთვის, რომ ამგვარნი პირნი ცოცხა მოიპოვება, ბედნიერებას კი ყველა ეტრფის, და შემდგომ კიდევ მისთვის, რომ წყაროდ ბედნიერებისა დასახულია აქ ცვალებადი რამ. ცვალებადს კი თან სდევს იმედის გაცრუება, უსიამოვნება, მწუხარება. ბედნიერება კი ჩვენ გვაქვს წარმოდგე-



ნილი როგორც მუდმივი რამ, რომელიც მიანიჭებს ადამიანს **მშვიდობასა** (ეფს. 2,14) და **განსვენებასა** (მატთ. 11,29), ჭირში იქმნება იგი თუ ლხინში, სიღარიბეში თუ სიმდიდრეში.

იკითხავთ: შესაძლებელია კი ადამიანისათვის ეგეთი ბედნიერება? შესაძლებელიც არის და იყო კიდევაც ბედნიერი ადამიანი! ეს იყო მაშინ, როდესაც ადამიანი ცხოვრობდა სამოთხეში, როდესაც თვის ზრახვას, სიტყვას ან საქმეს იგი უკავშირებდა ღვთის ნებას, გრძნობდა თავს ღვთის შვილად და შერაცხდა უფალს უსაყვარლეს მამად და უმახლობელს ხელმძღვანელად. ამავე დროს იგი არა ცხოვრობდა უშრომლად: იქმნდა და სცვიდა სამოთხესა, არკვევდა პირუტყვთა ზნეთა და თვისებათა, აკვირდებოდა ბუნების მოვლენათა და მის კანონთა და, ამ სახედ, ემზადებოდა, გამხდარიყო მეუფედ ქმნილებისა (შექმნ. 1, 26-28; 2, 15-20)...

ადამიანის შეცოდებამ დაარღვია ესეთი ბედნიერება (შექმნ. 3, 1-24), მაგრამ დაარღვია, არკი მოუსპია, და ამის გამო არცთუ ისე ძნელია მისი დაბრუნება, აღდგენა. საჭიროა მხოლოდ, გვახსოვდეს დღედაღამ, ძილში თუ ღვიძილში, რომ **ღმერთი ნათელ არს და ბნელი არა არს მისთანა** და რომ იგი **სიყვარული არს**, და **რომელი ეგოს სიყვარულსა ზედა**, – **ღმერთი მისთანა არს** (1 იოან. 1, 5; 4, 16). მაშასადამე, ჯმნა სიბნელისა და ბოროტისა საქმისაგან, შედგომა ნათლისა, დაგება სიყვარულსა ზედა ღვთისა და მოძმისა მიგვიყვანს უფალთან, აღადგენს კავშირს მისსა და ჩვენ შორის და დაგვიბრუნებს სამოთხეს შინა ყოფილ ბედნიერებას, მიუხედავად მისა, ვართ გლეხი თუ თავადი, მეურნე თუ ვაჭარი, მუშა თუ მრეწველი, მოხელე თუ მკურნალი, ბუნებისმეტყველი თუ ღვთისმეტყველი, მდიდარი თუ გლახაკი, ქალი თუ ვაჟი, მოხუცი თუ ჭაბუკი...

ამისთვის, მოგილოცავთ რა ახალს წელს, გისურვებთ და გლოცავთ, – ბედნიერ იყვენით უფლისა მიერ და განმტკიცენით ყოველსა **სიტყვასა და საქმესა კეთილსა** (1 თეს. 2,17)! ამინ.

(წარმოითქვა ქვაშვეთში 1916. I. 1).

ს ი ტ ყ ვ ა  
მოსიქუალთასნორის წინოს ხსენების დღეს  
თქმული მიტრ. კალისტრატეს მიერ\*

მცხეთის ზემოთ, სადაც დღეს რკინიზგის სადგურია, ძველად გაშენებული იყო სოფელი კარსანი, ხოლო მის გასწვრივ, მტკვრის მარცხენა ნაპირზე, სოფელი კოდმანი. ამ სოფლების შესახებ დარჩენილა გადმოცემა: „კარსანელთა მართებსთ კოდმანელთა ხუთი მკვდარიო“. ეს არაჩვეულებრივი სესხი ასე აქვს განმარტებული ჩვენი წარსულის ზოგიერთ მკვლევარს: „რა მოკვდის ვინმე კაცი ბრძოლასა, ანუ თვისი დლით, მეორე ივასხის (ისესხებს) და შესჭამდიან“-ო. ზოგნი კი გვეუბნებიან: კარსანელებს „შემოკვდომიათ ხუთი კოდმანელი და, სანამ კოდმანელები სისხლს არ აიღებდნენ, ე. ი. ხუთ კარსანელს არ მოჰკლავდნენ, მანამდე ეს ვალი გადაუხდელად უნდა ჩათვლილიყო“. ასეა თუ ისე: იყვნენ ჩვენი წინაპრები კაცის მჭამელნი, თუ სისხლის აღებად შეურისმადიებელნი, ჩვენს წინაშე იშლება საზიზლარი სურათი: მეზობლები ან მკვდარს სთავაზობდნენ ერთმანეთს, – ჩვენი მკვდრებით თქვენ გამოიზარდნით, თქვენი კი ჩვენ გამოგვიგზავნეთო, ან შეურისძიებით შეპყრობილნი ყოველი ბუჩქისა თუ ხის ძირას უსაფრთებოდნენ ერთმანეთს, სანამ თავიანთი მკვდრის სისხლის ასაღებად არ დაანთხევდნენ მოძმის სისხლსა...

საბედნიეროდ, რამდენიმე ხნის შემდეგ ჩვენ ვხედავთ, მკვდრის მჭამელთა და სისხლისამღებთ შვილები ძმურად შეკავშირებულან ერთიმეორესთან, გაუზიარებიათ ურთიერთის ჭირი და ლხინი, თავდადებულად შებრძოლებიან საზოგადო მტერს, სიყვარულით შეუწყნარებიათ შორეულ ქვეყნიდან გადმოხვენილნი და მფარველობა გაუწევიათ მეზობელ ერებისათვის, ჩვენ დროში კი სახელოვნად იღვნიან მსოფლიოს მამვრალთა. ტვირთმძიმეთა სვე-ბედის გაუმჯობესებისათვის

---

\* ამ ქადაგების ტექსტი, რომელიც ჩაკერებულია ხელნაწერ კრებულიში (ფფ. 38-59), ნაწერია სხვა (შედარებით პატარა ფურცლებზე) და სხვისი ხელით, მაგრამ გასწორებულია ავტორის მიერ.

და ყველა ერების სოლიდარობისა და გათანასწოლება-გაერთიანებისათვის. თამამად შეგვიძლია ვთქვათ: მატიანეს სიტყვით, „ყოველთა ნათესავთა უმძვინვარეს და უველურეს ერის“ შვილები ბევრ თვალსაჩინო საქმეში დღეს არავის ჩამოუყარდებიან, აღმოსავლეთ ევროპასა და აზიაში მაინც...

თავისთავად ისმება საკითხი: ვინ ან რამ აიყვანა ძველ კარსან-კოდმანის შვილები ამ სიმაღლეზე, ვინ ან რამ გარდაქმნა ამ ზომამდე „უმძვინვარესი და უველურესი“ ხალხი, ვინ ან რამ დააჭერინა მათ მსოფლიოს ისტორიის მსვლელობაში თვალსაჩინო ადგილი? – იმ სუსტმა კაბადუკიის ასულმა, რომელსაც ეწოდება წმიდა ნინო და იმ „ციურმა სიტყვამ“, რომელიც ჰქადაგა ჩვენში ჰაეროვანმა ქალწულმა!...

ამ წმიდა ასულმა მოგვიტანა იესო ტკბილის სახარება, მოგვიძღვნა სიყვარულით სავსე გული, მოგვცა სახე სპეტაკი ცხოვრებისა, გვიანდერდა ჯვარი ვაზისა და მით განგვინათლა გონება, წმიდაყო ზნე-ჩვეულებანი, შეგვკრიბა ქრისტე ისეოს სახელის გარშემო, დაგვამყარა მართლმადიდებელ ეკლესიის სწავლის კლდეზე და **აღგვაშენა სახლად სულიერად** (I პეტ. 2, 5)...

ამ შედეგების მიღწევის საქმეში უდიდესი მნიშვნელობა ჰქონდა სწორედ იმ გარემოებას, რომ ჩვენში ქრისტიანობა შემოიტანა და დანერგა ქალმა. ცნობილია, – ქალის გულში დასადგურებული სარწმუნოებრივი გრძნობა მტკიცეა და ურყევი, რაიცა დასტურდება თუნდაც იმით, რომ ქრისტეს ჯვარცმისა და სიკვდილის შემდეგ მოციქულები გაიფანტნენ და მიიმაღნენ, მენელსაცხებელნი დედანი კი არ მოშორებთან მაცხოვრის ჯვარსა და საფლავს, თუმცა ჯვარცმულს გარს ეხვივნენ რომის მხედარნი და საფლავი დაბეჭდულ იყო და გარემოცულ ურიათა დასისაგან (მატთ. 27, მარკ. 15, ლუკ. 23). ამის გამო, შემთხვევით მოვლენად როდი უნდა ჩავთვალოთ ის, რომ ნინო მოციქულთა სწორმა თანამშრომლებად პირველყოვლისა აიყვანა ქალები: შროშანა, ანასტასია, სიდონია, სალმე, ნანა და სხვ. წმიდა ასულს თავიდანვე გათვალისწინებული ჰქონდა, რომ დედაკაცი, ეს ოჯახის ბურჯი და კერა, „ნანინასთან“ ერთად ჩააგონებს ნორჩ არსებას ნაზარეტელის

მცნებებს და მათ სამუდამოდ აღბეჭდავს მოზარდი თაობის გონებაში. ქართველმა დედებმაც სავსებით გაამართლეს შორსმჭვრეტელის უცხო ასულის მოლოდინი: საკუთარ რძესთან ერთად, მათ გადასცეს პატარა ქართველებს, **ღმერთი ნათელ არს და სიყვარულ** (I იოან. 1,5; 4,8), ჩვენ ყოველნი ვართ **შვილნი ღვთისანი** (რომ. 8,16; I იოანე 3,2), რის გამო **რომელს უყვარდეს ღმერთი**, (უნდა) **უყვარდეს ძმაიცა თვისი** (I იოან. 4,21) და ძმად უნდა ჩაითვალოს ყოველი მორწმუნე, ვინაიდან **წინაშე ღვთისა არა არს ურიაება, არცა წარმართება; არა არს მონება, არცა აზნაურება; არა არს რჩევა მამაკაცისა, არც დედაკაცისა** (გალ. 3,28), რომ ყველანი შექმნულ-დაბადებულნი ვართ **საქმეთათვის კეთილთა** (ეფეს. 2,10) და **თუ ვისმე არა უნებს საქმის, ნუცა სჭამნ** (2 თეს. 3,10). ამგვარი „ნანინათი“ ნელ-ნელა და თანდათანობით გამოიხატა კაციქამია-შურისმადიებელთა შვილების შეგნებაში მაცხოვრის დიადი სახე და წარმოიშვა ერი ჯვარისმტირთველი, ქრისტიანული კულტურის დარაჯი და დამცველი წინა აზიაში...

ამის შემდეგ, განა გასაგები არ არის, თუ რისთვის ატანდნენ მზითვეში ჩვენს დედებს წმიდა სახარებას?! – შვილების აღზრდის დროს, წინ წაიმძღვარე იგიო, რასაც წმ. წინოს სულიერი შვილები ბრწყინვალედ ასრულებდნენ: ახალგაზრდობის განსწავლა (არა მარტო ზნეობრივ-სარწმუნოებრივი) არ გაუშვიათ ხელიდან ჩვენი ოჯახის ბურჯებს მეცხრამეტე საუკუნის დასაწყისამდე მაინც... ტაძრებ-მონასტრებთან არსებული სკოლები მხოლოდ უფართოებდნენ ოჯახიდან მოტანილ ცოდნას იმ რჩეულთ, რომელნიც უმაღლესი სწავლის მადიებელნი იყვნენ. უმრავლესობა კი კმაყოფილდებოდა იმ ცოდნით, რომელიც დედებისაგან ქონდათ შეთვისებული. ხოლო რაოდენად გაცნობილნი იყვნენ გალილეველის სწავლასთან ჩვენი მშობლები, ამას ადასტურებს, ერთი მხრით, მათი მაღალი ზნეობა, ხოლო მეორის – ის გარემოება, რომლის მოწმეც ბევრი ჩვენგანი არის: ამ ოცი-ოცდაათი წლის წინად ჩვენში ბლომად მოიპოვებოდნენ ისეთები, რომელნიც, თუ მღვდელს ან დიაკონს სახარება-სამოციქულოს წაკითხვის დროს ენა წაუბორძიკდებოდა, ან კითხვა შეეშლებოდა, იქვე

მიეშველებოდნენ და გაუსწორებდნენ შეცდომას. დაუჯდომე-  
ლისა, ღვთისმშობლის პარაკლისისა, სერობისა და ძლისპირე-  
ბის მცოდნე-მგალობელნი (უმეტესად კი ქალები და არც  
ღრმად მოხუცებულნი) დღესაც ბევრი შეგხვდებათ რკინის-  
გზის ლიანდაგს 15-20 კილომეტრით დაშორებულ სოფლებში.

ზემოაღნიშნულთან დაკავშირებულია ერთი მოვლენა:  
წმიდა ნინო და მისი თანამშრომელი ქალები თავისი ნაზი  
გრძნობით ისე ღრმად დასწვდნენ ჩვენი ერის სულსა და  
გულს, რომ ეკლესიურ ცხოვრების გარეგან მხარესაც კი მის-  
ცეს სათუთი ელფერი. დააკვირდით ქართულ საღვთისმსა-  
ხურო წიგნების კითხვის კილოს და ის მოგაგონებთ მთის  
კალთებზე მომდინარე ანკარა წყაროს ნაზსა და მხიარულ  
წინწკარს, რომელიც სიამოვნებით ავსებს გულს და ზეცად  
ალიზიდავს გონებას. ყური დაუგდეთ ქართულ გალობას და  
უეჭველად იპოვით მზგავსებას დედის მიერ ნამღერ ტკბილ  
„ნანინასთან“, რომელიც დუხჭირი ცხოვრებით გამწარებულ  
ადამიანის სულს ამშვიდებს და აწყნარებს. გადაავლეთ თვა-  
ლი ქართული ხუროთმოძღვრების ნიმუშებს და დაინახავთ,  
რომ წმიდა ნინოს მიერ გადმოცემულ გრძნობათა ქაღალ-  
დებრივი სინარჩარე ქართველმა ერმა გადასცა თვით უსუ-  
ლო საგნებსაც კი, – მაგალითისთვის შორს ნუ წავალთ: და-  
ათვალიერეთ ერთიმეორისაგან რამდენიმე ათეული მეტრით  
დაშორებული სკამოიანთ ეკლესიისა და სამხედრო ტაძრის  
ჩუქურთმები, შეადარეთ ისინი ქვაშვეთის ჩუქურთმებს და  
ცხადათ დაინახავთ, რომ პირველსა და მეორე შემთხვევაში  
სჭარბობენ სიმძიმე, სისხვილე და სიტლანქე, ხოლო მესამეში  
სიმსუბუქე, სინაზე და სიტურფე...

ამ სახედ, წმ. ნინოს ჩვენში მოღვაწეობის დაკვირვებამ  
უეჭველყო, რომ ქრისტეს სარწმუნოების საუკეთესო გამავ-  
რცელებელია შემოქმედისაგან მოსიყვარულე გულითა და ნა-  
ზი გრძნობით დაჯილდოებული არსება-ქალი, ხოლო დამცვე-  
ლი და კერაა ოჯახი, სადაც „ქრისტეს ნათლის წმიდას ლამ-  
პარს ალაგზნებს“ ოჯახის დედაბოძი, იგივე ქალი. გარნა მო-  
ციქულთასწორის მოღვაწეობის დაკვირვება ცხადყოფს ჩვენ-  
თვის იმასაც, თუ რა გზით ანუ რა საშუალებით უნდა ვრცელ-

დებოდეს ხალხში სარწმუნოება, რომ აღსრულდეს **ნება ღვთისა**, მიზანი ქრისტიანობისა – **სინმიდე ესე ჩვენი** (1 თეს. 4,3) და დამყარდეს ქვეყანასა ზედა სასუფეველი ღვთისა...

როდესაც წმიდა ნინო ჩვენსკენ მოემგზავრებოდა, ამ დროს იმპერატორი კონსტანტინე პირველი მსოფლიო კრების წევრებს ეუბნებოდა: თქვენა ხართ ეკლესიის შინაგან საქმეთა ეპისკოპოზნი, ხოლო მე – ეკლესიის გარეშე საქმეთაო და, ცხადსაყოფელად ამ ახალი თანამდებობის ერთგულად შესრულებისა, იმპერიის შორეულ კუთხეებში დაგზავნა კრების მიერ გასამართლებული და ეკლესიიდან განკვეთილი მწვალებლები. მართლმადიდებლობისათვის ასეთი გულმოდგინება კრების მამებს სასიამოვნოთ დაურჩათ, მაგრამ მათ „დაავიწყდათ“, რომ ქვეყნის მბრძანებელთა ზრახვანი დაყრდნობილია სახელწმიფოებრივ ანგარიშებზე და ამის გამო ცვალებადია: მართლადაც, კონსტანტინემ მალე კეთილი თვალით შეხედა მწვალებლებს და მოითხოვა კრების ერთერთი მთავარი მონაწილის არიოზის მღვდელობაში აღდგენა (ალექსანდრიის ეპისკოპოზისაგან). წმ. ათანასეს უარი „ეკლესიის გარეშე საქმეთა ეპისკოპოზს“ არა სასიამოვნოთ დაურჩა და გამოიცა არა კანონიერი ბრძანება – არიოზი უნდა აღედგინა მღვდელობაში კონსტანტინეპოლის ეპისკოპოზს...

კონსტანტინეს გადააჭარბა მისმა შვილმა და მემკვიდრემ კონსტანციმ: 355 წელს მილანის კრების წევრებს მან პირდაპირ გამოუცხადა, – „რაც მე მსურს, საეკლესიო კანონიც ის არისო“. ამის შემდეგ ბიზანტიის იმპერატორები აღარ დაკმაყოფილებულან „ეკლესიის გარეშე საქმეთა ეპისკოპოზობით“: ისინი მოურიდებლათ ერეოდნენ ეკლესიის შინაურ, თვით დოღმატიურ საკითხების გადაჭრაშიც კი, – საკმარისია მოვიგონოთ მონოფიზიტ-მონოთელიტების და ხატთა მბრძოლის ხანა, რომ დავრწმუნდეთ: ბიზანტიის ქრისტიანე იმპერატორები ისეთსავე „უზენაეს მღვდელთმთავარად“ სთვლიდნენ თავს, როგორადაც რომის კერპთთაყვანისმცემელი ავგუსტები. ამან კი დიდი ზიანი მიაყენა როგორ ეკლესიას, ისე სახელმწიფოს...

სულ სხვაგვარ მიმართულებას დაუდო საფუძველი წმ.

ნინომ ქრისტიანობის გავრცელების დროს საქართველოში. მისი ცხოვრების აღმწერლის სიტყვით, წმიდა ასულს „კრძალულად მარადის ეპყრა ჯვარი იგი“, რომელიც ცოცხალი ვაზისაგან შეუქმნა და გადასცა მას (ჩვენების დროს) ღვთისმშობელმა. ეს სიმბოლური გამეორება იყო მაცხოვრის სიტყვისა: **მე ვარ ვენახი და თქვენ რტონი, რომელი დაადგრეს ჩემთანა და მე მისთანა, ამან (გა)მოიღოს ნაყოფი მრავალი** (იოან. 15, 5), ე. ი. მორწმუნე ანუ რტო თავის მოქმედების დროს უნდა დაეყრდნოს ქრისტეს ანუ ვენახს და არა სხვას ვისმე, **რამეთუ თვინიერ ქრისტესა არა რაი ძალგვიძს ყოფად არცა ერთი** (იქვე). მოციქულთასწორის ქალწულის ეჭვმიუტანელი რწმენით, ქრისტიანობა არის ისეთი შინაგანი ძალა, რომელიც გარდაქმნის ადამიანის ბუნებას იმავე სახით, რა სახითაც **ცომი**, როდესაც შეუერთდება მოსაზვლად გამზადებულ **ფქვილსა, აღაფუნებს და გარდაქმნის მას** (მატთ. 13, 33). ამისთვის, როდესაც მირიან მეფეს აღეძრა სურვილი, ქრისტიანობა შეეტანა შორის „მთიულთა, ქართა-ლელთა, ფხოელთა, გუდამაყრელთა და ნილკანელთა“ „იძულებითა და მახვილით“ და ეს აზრი გაუზიარა წმიდა ნინოს, უკანასკნელისგან მიიღო პასუხად: „არა ბრძანებულ არს უფლისაგან მახვილისა აღებაი, არამედ ჯერ არს სახარებითა და პატიოსანითა ჯვართა უჩვენოთ გზაი ჭეშმარიტი, მიმყვანებელი ცხოვრებად საუკუნოდ, და (ვსასოებ) მადლმან ღვთისამან განანათლოს ბნელი იგი გულთა მათთაი“. მოკლედ რომ ვთქვათ, წმ. ნინოს აზრით, სარწმუნოების გავრცელებისა თუ სხვა რომელიმე მის შინაურ საქმეში სამოქალაქო ხელისუფლების ჩარევა სრულებით არ არის საჭირო: დახმარების მაგიერ იგი ზიანს მოიტანს. მირიან მეფემ ეს უბრალო ჭეშმარიტება ვერ შეიგნო და, როდესაც წმ. ნინო ეპისკოპოზის იოანესა და მღვდლის იაკობის თანხლებით გაემგზავრა მთებში, მათთან, მირიანის ბრძანებით, „წარვიდა ერისთავი ერთი“, რომელმაც დაინახა რა, რომ ფხოელებმა „განუყარეს თავი“ და არ შეინყნარეს ნინოს ქადაგება, „მცირედ წარმართა მახვილი და (ფხოელთა) შიშით მოსცნეს კერპნი მათნი დაღენად“, მაგრამ თვით კი „გადაკრბეს თოშეთს“. ასეთი ნა-

ყოფი გამოიღო მირიან მეფის უადგილო გულმოდგინებამ და წმიდა ნინოს მიერ ნაჩვენებ გზიდან გადახვევამ, ფხოველები ქრისტიანობასაც გაექცნენ და სამშობლო ტერიტორიაც დააცალიელეს. ამ ცდამ საქართველოს მპყრობელი დაარწმუნა ნინოს მიერ არჩეული გზის უპირატესობაში, რის გამოც შემდეგში ხელი აღარ შეუშლია წმ. ქალწულისათვის, რომელიც მოძღვართა თანხლებით გადავიდა ერწო-თიანეთს, ჟღალეთს, ყვარელს, კხოეთს, კანარეთს, ქველდაბას და ყველგან „ასწავებდა სიტყვითა ტკბილითა სარწმუნოებას ქვეშაღმართს“ და მსმენელთაც „სიხარულით შეიწყნარეს სწავლა ნეტარის ნინოსი და ნათელ იღეს“.

ამ სახედ, ქალის ნაზი ხელით ოჯახში დანერგული ქრისტიანობა, სახარების მარგალიტებით გაბრწყინებული, ჯვართა პატიოსნითა წინამძღვარებული, სიტყვითა ტკბილითა ქადაგებული და მადლითა ღვთისათა შემოსილი, გამოვიდა ოჯახის იწრო ფარგლებიდან ფართო საზოგადოებაში, დაანახვა მას გზაი ქვეშაღმართი და იქმნა შეწყნარებული სიხარულითა „მეფეთა და დედოფალთა, მთავართა და მხედართა, და მონათა და მხევალთა სიმრავლისაგან“. ამ სწორი გზით მიდიოდა ჩვენში ქრისტიე მაცხოვრის სწავლის გავრცელების საქმე, რაიც ცხადათ ჩანს თუნდაც იქიდან, რომ ორი საუკუნის შემდეგ იოანე ზედაზნელმა და მისმა მოწაფეებმა საკმაოდ პოვეს საქართველოში არაქრისტიანებიც.

რა შედეგი მოჰყვა წმ. ნინოს მიერ არჩეული მიმართულებით ქრისტიანობის გავრცელებას? ის, რომ თავისუფალი გზით შემოსული ახალი სარწმუნოება შეიქმნა ჩვენთვის უდიდეს ზნეობრივ ძალად, რომელმაც აამოძრავა და დაიმორჩილა მთელი საქართველო და რომელიც გარდიქცა ერის სინიდისის საზომად, რასაკვირველია, არა გარეგანი რაიმე საშვალებით, არამედ ერის **გონების განახლებით** და განსჯა-განცდით, **რაი იგი არს ნება ღვთისა კეთილი, სათნო და სრული** (რომ. 12, 2). თუ ბიზანტიის მბრძანებელთა ხელში სარწმუნოება ხშირად გარდაიქცეოდა სახელმწიფოებრივი ზრახვების განსახორციელებელ იარაღად, ანდა პირადი სურვილების დასაკმაყოფილებელ საშვალებად, საქართველოს უზენაესი ხელი-



სუფლები ქრისტეს მცნებებით იკვლევდნენ გზას ცხოვრებისას და მათ მოთხოვნილებათა მიხედვით შეაფასებდნენ ხოლმე თავიანთ მოქმედებას. ამ დებულების დასასურათხატებლად მოვიგონოთ შემდეგი: ბიზანტიის იმპერატორმა კონსტანტინე მეექვსემ გადალახა საეკლესიო კანონები, არარად ჩათვალა თანამედროვე ქრისტიანების საზოგადოებრივი აზრი – ძალად შეაყენა მონაზვნად თავისი მეუღლე მარიამი და ჯვარი დაინერა თავის ნათესავ ქალ თეოდოტიაზე. ტარასი პატრიარქი სდუმდა, ხოლო სავკუდიონის ბერებმა, რამდენიმე პროვინციელმა ეპისკოპოზებმა და (შემდეგ) სტოდიელმა მამებმა იმპერატორის საქციელი ჩათვალეს უსჯულოებად და, ამის გამო, მისი ჯვარის დამწერი „დიდისა ეკლესიისა იკონომოსი“ იოსები განაძევეს თავის წრიდან. ამ წმიდა მოძღვრული მოქმედებისათვის იმპერატორებმა კონსტანტინემ და ნიკიფორემ მღვდელთმთავრები კათედრიდან გადმოაგდეს, ბერები სტანჯეს და მონასტრები აიკლეს. იმერპიის დიდ ხელისუფლებს კი მისცეს საბაბი, გაყროდენ ცოლებს და შეერთოთ სხვები, ანდა დაესვათ ხარჭები: დიდებს მიბაძეს პატარებმა და შეიბღალა ოჯახის სინმიდე...

აღნიშნულ იმპერატორთა თანამედროვე აშოტ კურაპალატმა, თითქოს მათი მაგალითით კადნიერქმნილმა, მეუღლის სიცოცხლეში სასახლეში მიიყვანა „დედაკაცი სიძვისა“. როდესაც ხანძისა მონასტრისა წინამძღვარს გრიგოლს „ესმა საქმე იგი – ამხილა პირისპირ ხელმწიფესა მას, ხოლო მან აღუთქვა ცოდვისა მის განტევებაი“, მაგრამ „ვერ დაამტკიცა (საქმით) თვისი ბრძანება, რამეთუ დაემონა გულისთქმასა“. ამის შემდეგ „ნეტარმა გრიგოლ პოვა ჟამი მარჯვე“. ოდესცა კურაპალატი შორს იყო, მივიდა სასახლეში, დაარწმუნა დედაკაცი სიძვისა, რომ იგი „შორის ცოლ-ქმართა შთაჭრილა წარსანყმედელად სულისა“, და ურჩია წასულიყო „სანატრელისა დედისა თებრონიას წინაშე“. დედაკაციც დაემორჩილა წმიდა მამის რჩევას და დაბინავდა დედათა სავანეში... როცა აშოტი ხარჭის წამოსაყვანად მივიდა მონასტერში, დედა თებრონემ არც ხარჭა დაუბრუნა და მკვეთრადაც ამხილა. აშოტი „სირცხვილეულ იქმნა მართლმხილებისა მის-

გან კდემული და მყოვარჟამ დადუმნა, ვითარცა ძლეული, რამეთუ ხორციელად ძლიერსა ხელმწიფესა სულითა ძლიერთა კაცთა სძლიეს!!“.

არ შეეძლო ქვეყნის მბრძანებელსა და ბატონს საყვარელი არსების იძულებით წამოყვანა და თვით მონასტრის, ბიზანტიის იმპერატორთა მიხედვით, პირისაგან ქვეყნისა აღგვა? ვინ შეუშლიდა ხელს, მონასტრის დედები თუ ხანძთის ბერები? ვერც ერთნი და ვერც მეორენი! ხელის შემშლელად გამოდგა აქ ქართველი ერისა და თვით აშოტის შეგნებაში განმტკიცებული „ნეტართა მათ პატივი“ და მოკრძალება „მართლმხილების“ მატარებელ ეკლესიისადმი, რომელიც დარაჯად ედგა საღვთო მცნებათა შესრულება-არშესრულებას. გარეშე ამ შეგნებისა ჩვენი ეკლესია იყო უძღური და უსუსური; მის განკარგულებაში არ ყოფილა ის ძლიერი საშვალებანი, რომლითაც თავი მოჰქონდა რომის ეკლესიას. ის ძლიერი იყო მხოლოდ და მხოლოდ თავის ზნეობრივი ძალითა და სიფაქიზით...

სწორედ ამ ზენობრივ სიფაქიზის ძალას ღირსეულად აფასებდნენ ჩვენი საუკეთესო მამულისშვილები და სწორედ მას მიმართავდნენ ხოლმე საქართველოს აშენება-აღორძინებისათვის ზრუნვის დროს. ამგვარ შემთხვევაში ისინი მოიწვევდნენ „ღვთისმოყვარეთა ეპისკოპოზთა, პატიოსანთა მღვდელთა, ღირსთა დიაკონთა, ქრისტეს მოყვარეთა მონაზონთა, დაყუდებულთა და მეუდაბნოეთა“ და ეტყოდნენ: „თქვენ ღვთის მიერ განჩინებულ ხართ მოძღვრად ჩვენდა: გამოიძიეთ ყოველი კეთილად, დაამტკიცეთ მართალი და განხადეთ ყოველი გულარძნილი (სიმრუდე). ნუ თვალახვამთ (მოერიდებით) მთავართა სიდიდისათვის, ნუცა გლახაკთა უდებყოფთ სიმცირისათვის“. ღვთივგანბრძობილი კრებაც შეუდგებოდა საქმეთა განხილვას და **პირველ ყოვლისა განაქიქებდა „უღირსთა ეპისკოპოზთა და მათვე მზგავსთა ხუცესთა“** მოქმედებას, ვინაიდან, კრებათა და ერის აზრით, **მათგან „გამოვიდოდა ყოველი უსჯულოება და ცოდვა“**. მოვიგონოთ ბაგრატ მეოთხე და გიორგი მთაწმინდელი, დავით აღმაშენებელი და რუის-ურბნისის „ძეგლისწერა“, თა-

მარ დიდი და მის მიერ მოწვეული კრება და ჩვენთვის ცხად იქმნება: როცა ეკლესია და მისი ხელისუფალნი, – ეს **ნათელი სოფლისა და მარილი ქვეყანისა** (მატთ. 5, 13-14) – ასრულებდნენ თავის პირდაპირ მოვალეობას, მაშინ საქართველოც ჰყვავოდა, ხოლო როცა ნათელი **ზნელ იქმნებოდა და მარილი განჰქარდებოდა**, ქვეყანაც კნინდებოდა და ეცემოდა. მეტის თქმაც შეგვიძლია: მაშინაც კი, როდესაც უამრავ მტრების შემოსევის გამო ქვეყანა ნახდებოდა, ზნეობა დაეცემოდა, სარწმუნოება შეიბღალეებოდა და ბოროტება გამრავლდებოდა, ტვირთმძიმეთა და მაშვრალთა ერთადერთი ნავთსაყუდელი ეკლესია იყო. თავის კრებებზე მას გამოჰქონდა განჩინებანი ტყვეთა განსყიდვისა, კაცთკლვისა, ძარცვა-დარბევისა და სხვა ბოროტების წინააღმდეგ, რითაც ასე თუ ისე აღვირს ასხამდა ქვეყნის მიმძღავრებით გამგებელთა თავაშვებულობას. ეკლესიავე იწყნარებდა და თავშესაფარს აძლევდა ზოგიერთ მებატონეთაგან გამწარებულ ყმებს, რომელნიც ეკლესიის ყმადყოფნაში პოულობდნენ ადამიანურ მოპყრობას და კმასაყოფელ თავისუფლებას. მართალია, ეკლესიის წიაღშიაც მოიპოებოდნენ სვიმონ-ქუთათელ-ჩხვიძეები, მაგრამ ეკლესიის მესვეურთა შორის არა იშვიათნი იყვნენ ბოროტებასთან ბრძოლისათვის მოწამის გვირგვინით შემკულნი ევდემოს კათოლიკოზ-დიასამიძეები.

ამ სახედ, წმიდა ნინოს მიერ სარწმუნოების გავრცელებისათვის ნაჩვენებმა გზამ ჩვენს ქვეყანას ააშორა, როგორც ბიზანტიის ცეზარო-პაპიზმი, მეფეთა საეკლესიო საქმეებში ჩარევა, ისე რომის პაპო-ცეზარიზმი, ეკლესიის მიერ სამოქალაქო საქმეების გამგებლობა და, შეიძლება ამის შეუცდომელად თქმა, დაამყარა ქვეყნის სასიკეთოდ სახელმწიფოსა და ეკლესიას შორის **თავისუფალი თანამშრომლობა**, რაც ვახტანგ სჯულმდებელმა შემდეგ სიტყვებში ჩამოაყალიბა: „მეფე ხორცის ხელმწიფეა, ხოლო კათოლიკოზი სულისაო“.

1801 წელს ჩვენში მოხდა დიდი ცვლილება: საქართველო შეუერთდა ერთმორწმუნე რუსეთს. ათი წლის შემდეგ წმ. ნინოს აღშენებულ ვენახს დაეპატრონა ახალი მოქმედი, უწმიდესი მმართველი სინოდი, რომელიც სარგებლობდა ბიზან-

ტიის თვალსაზრისისაგან გამომდინარე დებულებით: „იმპერატორი არის თავი ეკლესიისა-ო“. დიდი რუსეთის ეკლესიის თავი კი ვერ მიუდგა პატარა საქართველოს ეკლესიის სხეულს: მან მოაშორა საქართველოს „სულის ხელმწიფე“, ჩაუკეტა ტვირთმძიმეთა და მაშვრალთ ნავთსაყუდელი და წმ. ნინოს ეკლესია გადააქცია „მართლმადიდებელ აღსარების უწყების“ განყოფილებად. ჩვენი ენისა, ზნე-ჩვეულებისა და წარსულის უცოდინარი სინოდის ექსარხოსები საქართველოს ეკლესიას მართავდნენ „ბრძანებითა მისი უდიდებულესობისაითა“ და არა სჯულის კანონისა და საქართველოს ეკლესიის კრებათა ხელმძღვანელობით, ხოლო ადგილობრივი მათი თანამშრომელნი ეპისკოპოზნი და მღვდელნი, ახალი მდგომარეობით ხელფეხშეკრულნი, ველარ ახერხებდნენ თავიანთ პირდაპირ მოვალეობის შესრულებას – „მართლისა დამტკიცებას და გულარძნილისა განხდას“. ჩვენი ეკლესიის წარსული საუკუნის ორმოცდაათიან წლების დასასრულის სურათს, აი, როგორ გვიხატავს უკვდავი ილია:

„აგერა მღვდელნიც, ერთა მამანი,  
რომელთ ქრისტესგან ვალად სდებიან  
ამა ერისა სულის აღზრდანი,  
რა-რიგ გულ-ხელი დაუკრებიან?  
სად არის სიტყვა დიდის სწავლისა,  
სიყვარულის და სიმართლისა,  
რომ მათ ბაგეთგან არ მომდინარებს  
და ერს დაცემულს არ აღამალლებს?  
სად არის იგი მლაღადებელი  
ქვეყნის ხსნისათვის ჭეშმარიტება?  
სად არის იგი ბინის მდევნელი  
ჯვარცმულის ღმერთის მაღალი მცნება?“

ცხადია, ეკლესიის დამუნჯება და გულხელდაკრეფა უნდა გაგრძელებულიყო იმ დრომდე, სანამ იგი ითვლებოდა „მართლმადიდებელ აღსარების უწყებად“... ასეც მოხდა.

დადგა ახალი დრო და მან კანონის პირით გამოაცხადა:

„სარწმუნოება არის პირადი საქმე ყოველი მოქალაქისა; ყოველ მოქალაქეს შიუძლია აღიაროს ის სარწმუნოება, რომელიც მას უნდა, ანდა არც ერთი არ აღიაროს; ეკლესია ჩამოშორებულია სახელმწიფოსაგან... სარწმუნოებრივი და ანტისარწმუნოებრივი პროპაგანდის თავისუფლება მინიჭებული აქვს ყველა მოქალაქეს იმ აუცილებელი პირობით, რომ პროპაგანდა ხდებოდეს პოლიტიკურ და სოციალურ მიზანთა გარეშე; დანებსება ან თანამდებობის პირი, რომელიც ამა თუ იმ სახით წინააღმდეგობას გაუწევს ეკლესიისა და სამლოცველო სახლის გახსნას, აგრეთვე ეკლესიის მსახურს კულტის შესრულებისათვის დევნას დაუწყებს – პასუხს აგებს, როგორც თანამდებობის გადამეტებისათვის...“

მართალია, ამ ოქროს ასოებით ამოსაჭრელ სიტყვებს, რომელიც აყენებს ჩვენს ეკლესიას წმ. ნინოს მიერ მიჩენილ გზაზე, დაერთო მრავალ სამღვდლო პირთა ეკლესიისაგან ჩამოშორება და მრავალ ტაძართა დახურვა თუ დაქცევა, მაგრამ ბაგრატი-დავით-თამარის დროსაც ხომ მრავალი ხუცესი ჩამოშორდა ეკლესიას?!.. რაც შეეხება იმ ქარიშხალის სიმძაფრეს, რომელმაც გამოიწვია ალაგ-ალაგ ტაძრების დახურვა თუ დაქცევა, არც ეს არის მორწმუნეთათვის საშიში: მძაფრ ქართვეხილს თან სდევს **ნიაზი წვლილი და მას შინა არს უფალი** (3 მეფ. 19,12). ამის საბუთია ის სიტყვათა სამებაც, რომელიც დიდი ასოებით არის დაწერილი ახალი დროის დროშაზე – ძმობა, ერთობა, თავისუფლება. ეს სიტყვები წარმოშობილია წმიდა ქალწულის მიერ მოტანილ **ახალი მცნებისაგან – იყვარებოდეთ ურთიერთას** (იოან. 13, 34); **სიყვარული კი ყოვლისშემძლებელ არს, ვინაიდან იგი სულგრძელ არს და ტკბილ, ყოველსა თავსიდებნ და ყოველსა ესავენ, ყოველსა მოითმენნ... და არა სადა დავარდების** (1 კორ. 13, 4-8).

წმიდაო მოციქულთა სწორო ქალწულო ნინო, რომელმან მოღვაწეობითა შენითა „განანათლე ბნელი გულთა“ მამათა ჩვენთაი, შენ გლოცავთ და შენ გვევდრებით უღირსნი ესე ძენი და ასულნი სულიერთა შვილთა შენთანი: მოუკლებელად გარეშემიცევ ჩვენცა „სახარებითა წმიდითა, ჯვართა პატიოსნითა და მადლითა ღვთისაითა“; განაძლიერე შორის ჩვენ-

სა „ცხოვრებად საუკუნოდ მიმყვანებელი“ ურთიერთას სიყვარული და განამტკიცე ღვთისა დედისა წილხდომილსა სოფელსა შინა ქეშმარიტი ძმობა, ერთობა და თავისუფლება!...

იყავნ, უფალო, იყავნ!

(წარმოითქვა სიონში 1926. I, 27)

## სიტყვა დავით აღმაშენებლის ხსენების დღეს

*მოიხსენენით წინამძღვარნი იგი თქვენნი... და  
ბაძევდით სარწმუნოებასა მათსა (ებრ. 13, 7)*

ჰბრძანებს მოციქული პავლე და მოგვინოდს, მივბაძოთ იმ ჩვენს წინამძღვარს, ვისაც ლოცვითა და ვედრებით, ძნობითა და გალობით იხსენიებს დღეს მთელი საქართველო...

რაში უნდა გამოიხატოს მიბაძვა წმიდის მეფის დავითისა, გვიჩვენებს ზედნოდება **აღმაშენებელი**, რომელიც დაუსაკუთრა მას ქართველმა ერმა და წმიდა ეკლესიამ...

დაისახა რა მიზნად ცხოვრებისა მშობელის ერის სამსახური, წმიდა დავითი სიყრმითგანვე განიბრძნო თანამედროვე სწავლა-მეცნიერებით: საღმრთო წერილი და ღვთისმეტყველება, ვარსკვლავთმრიცხველობა და სჯულმდებლობა, ფილოსოფია და ისტორია ზედმინევნით შეისწავლა წმიდა მეფემ და დაუდვა საფუძვლად ქვეყნის კეთილდღეობისათვის ზრუნვასა და შრომას...

აკი ამისთვის იყო ნაყოფიერ და კურთხეულ ერთიცა და მეორეც, – უტყუარი ისტორია მოგვითხრობს: წმიდამან დავით კვერთხი მეფობისა აღამალლა, სარწმუნოება განამტკიცა, სამართალი დაამყარა, ზნეობა განაბრწყინვა, ცოდნა განამრავლა, ხიდნი აღაშენნა, გზანი ქვაფენილ-ჰყვნა, აღებ-მიცემობა განავრცელა, მოკლედ – საქართველო აღაყვავა და **აღაშენა...**

საყვარელნო! ამ ჟამად სამშობლო ჩვენი მოგვაგონებს

დავითის წინააღმდეგობის საქართველოს: სარწმუნოება შელახულია, ზნეობა დაცემული, ცოდნა დაკნინებული, ქვეყანა პარტახქმნილი, ერი დაქსახული და დანყლულებული...

მერმე, ვინ უნდა დასდოს ჩვენს წყლულს წამალი განმკურნებელი, დაასხას ერის ჭრილობებს ზეთი მაცხოვრებელი და შეიქმნას ქვეყნის აღმაშენებელი, თუ არა თქვენ, დავითის პატარა ძენო და ასულნო, რომელთაც წმიდა მეფე გიცისკროვნებთ გზას ცხოვრებისას და გიხატავთ გეგმას მოქმედებისას!...

მაშ, ხშირად და ხშირად **მოიხსენებით წინამძღვარი ესე თქვენი და ბაძევდით სარწმუნოებასა მისსა**. ამინ.

(წარმოითქვა ქართულ გიმნაზიის დავით აღმაშენებლის სახელობის ტაძარში 1916. I. 26; „საქართველო“, №20)

## მოდერება უფლის მირაჰმის დღეს

*ან განუტევე მონა შენი, მეუფეო,  
სიტყვისაებრ შენისა, მშვიდობით (ლუკ. 2, 29)*

ნეტარება იმ მოხუცს, საყვარელნო, რომელიც გაითვალისწინებს რა თვისი ცხოვრების გზასა, **მონამებთა გონებისათა** (რომ. 9,1), შესაძლებლად სცნობს განიმეოროს ზემორე მოყვანილი სიტყვები ღვთის მიმრქმელი მართალის მოხუცის სვიმეონისა!

ჩვენის დროის მოხუცთ კი, უმეტეს შემთხვევაში, ეშინიათ სიკვდილისა და ამ შიშით შეძრწუნებულნი ეძლევიან რაღაც გამოურკვეველ მწუხარებასა, იშხამავენ მით ცხოვრების უკანასკნელ დღეებსა, იმწარებენ სიცოცხლის დასასრულს და ყოველივე ამის გამო თვით იმოკლებენ სიცოცხლეს. ამ უნუგემო მოხუცებულობის მიზეზი არის ის, რომ ჩვენი ცხოვრების მიმდინარეობა ასცილებია იმ გზას, რომელითაც ვიდოდა, მაგალითად, მართალი მოხუცი სვიმეონი.

მახარებელი და მოციქული ლუკა აი რას მოგვითხრობს ამ დიდებული მოხუცისას: იყო კაცი იერუსალიმს, რომლისა სახელი სვიმეონ; კაცი ესე მართალი იყო და მოშიში უფლის; იგი მოელოდა ნუგეშინისცემასა ისრაელისასა, უფლის იესო ქრისტეს დაბადებას; და სული წმიდა იყო მის ზედა. და იყო მისდა უწყებული სულისაგან წმიდისა არა ხილვად სიკვდილი, ვიდრე იხილოს ცხებული უფლისა, მაცხოვარი სოფლისა, იესო ქრისტე. და ოდეს მამა-დედისა მიერ მოყვანილ იქმნა ყრმა იესო ტაძრად უფლისა, მაშინ მოვიდა მუნ იგიცა სულითა წმიდითა; მიიქვა იგი მკლავთა ზედა თვისთა, აკურთხევდა ღმერთსა და სთქვა: ან განუტევე მონა შენი, მეუფეო, სიციყვისაებრ შენისა, მშვიდობით!

დიახ! სვიმეონი იყო **კაცი მართალი**: მთელს თავის ხანგრძლივ სიცოცხლეში ემსახურებოდა სიმართლეს და განზრახ, თავის ნებით არც ერთხელ არ გადაუხვევია სიცრუის გზისაკენ; მან შეიყვარა ჭეშმარიტება და მოიძულა უსჯულოება, შეიტკბო მცნება უფლისა და თვით ცხოვრებით ჰქადაგა იგი. ამასთანავე იგი **იყო მოშიში უფლისა**, ვინათგან უყვარდა უფალი უმეტეს ყოვლისა; თვითოეულს თავის მოქმედებას იგი უქვემდებარებდა ღვთის ნებას, დღე მუდამ ზრუნავდა, **ვითარ სათნო ეყოს უფალსა** (1 კორ. 7,32). სწორედ ამისთვის ეღირსა იგი ტკბილსა და მშვიდობიანს სიბერეს, რომელიც უფალმა დააგვირგვინა აღთქმით: არა ხილვად სიკვდილი, ვიდრე საკუთარის თვალთ იხილოს საცხოვნებელად სოფლისა მოსრული იესო ქრისტე. და, აჰა, ამ სოფლითგან განსვლის წინ იგი ღირს-იქმნა მიექვა სიბერისაგან მთრთოლვარე მკლავთა თვისთა ზედა ნუგეშინისმცემელი სოფლისა, ნათელი წარმართთა და დიდება ისრაელისა, ორმეოცი დღის ყრმა იესო.

ჭეშმარიტად, ბედნიერი იყო მოხუცებულება სვიმეონისი, რის გამოც ცხოვრება მისი წარმოადგენს საუკეთესო მაგალითს ჩვენთვის, თუ გვსურს მოვიპოვოთ ამგვარივე მოხუცებულობა და შემდეგ ქრისტეანობრივი აღსასრული ცხოვრებისა. ამ შემთხვევაში უნდა კარგად გვახსოვდეს, რომ მოხუცებულებას წინაუძღვიან სიჭაბუკე და ვაჟკაცობა, რომე-



ლი დროც თუ მოვანდომეთ სიზარმაცეს და მცონარეობას, ამა ქვეყნიურ სიამოვნებათათვის ზრუნვას და სოფლიურ სიტკობებათა მოპოვებას, გინა, – ნადილის შესასრულებელად თუ არ მოვერიდებით მოძმეთა პიროვნების შელახვას და მათ ღირსებათა დამცირებას, მათ შეინროებასა და შეურაცხყოფას, უკუვაგდეთ შიში უფლისა და მცნება მისი, დავემორჩილენით ბინძურთა გულისთქმათა და ველურთა გრძნობათა ჩვენთა, – მაშინ მაგალითი მართალის სვიმეონისი ჩვენთვის იქმნება მიუწთომელი და უსარგებლო, ფუჭი და ამაო, და ეს იმიტომ, რომ ამგვარად ცხოვრება არ შეჰფერის კაცის ბუნებას და ვერ აკმაყოფილებს მის ნამდვილ მოთხოვნილებათა. დაუკმაყოფილებლობას კი თან სდევს სინანული და ქენჯნა სვინდისისა, იმედის დაკარგვა და შიში სიკვდილისა, მოლოდინი სიკვდილის შემდეგ განსჯისა და საუკუნო ტანჯვისა...

სულთა განმათავისუფლებელმან უფალმა იესო ქრისტემ დაგვიცვას ჩვენ, საყვარელნო, ამგვარის სასონარკვეთილებით აღვსილის მოხუცებულობისაგან და მეოხებითა მართლისა მოხუცებულისა სვიმეონისაიდა მოგვანიჭოს მადლი უფლის სათნო ცხოვრებისა, რათა უწინარეს ამა სოფლითგან განსლვისა წრფელის გულით და სრულის იმედით წარვსთქვათ: **ან განუტევე მონაჲ შენი, მეუფეო, მშვიდობით.** ამინ.

(წარმოითქვა ქვაშვეთში 1912. II. 2; „ქადაგებანი“, 1913, №2)

ს ი ტ ყ ვ ა

**ნმ. მთავარმონაჲმის ბიორბის ხანაზის დღეს**

*ჰრქვა უფალმან თვისთა მონაფეთა:*

*უკეთუ მე მდევნეს, თქვენცა გდევნენ (იოან. 15, 20)*

ნმ. მთავარმონაჲმე გიორგი, რომლის სალოცავ-სავედრებელად შევკრებილვართ დღეს აქა, საყვარელნო, სცხოვრობდა და მოღვაწეობდა იმ შავსა და სიბნელით მოცულს დროს,

რომელსაც ეწოდება **ხანა ქრისტეანთა დევნისა**. ყოვლად შეუძლებელია აღნუსხოს კაცმა რიცხვი წამებულ-ტანჯულ ქრისტეანთა ამ ხანის განმავლობაში და წარმოადგინოს სახე იმ ტანჯვა-წამებისა, რომელსაც მიმართავდნენ ხოლმე მათ გასანადგურებლად.

მერმე, რისთვის, რა დანაშაული მიუძღოდათ ქრისტეანებს ქვეყნის წინაშე? ვის რა ზიანი მიაყენეს, ან რა გაუფუჭეს, რომ სდევნიდნენ მათ ასე მკაცრად? ქრისტეანებმა დააშავეს ის, რომ იგინი აღიარებდნენ ქრისტეს სწავლას და ჰქადაგებდნენ **სახარებასა სასუფეველისასა** (მატთ. 4, 23); მათ ის ზიანი მიაყენეს ქვეყანას, რომ მოინდომეს კაცთა შორის **ახალის მცნების** (იოან. 13, 34) გავრცელება; მათ გააფუჭეს ის, რომ მოისურვეს კაცობრიობის ცხოვრების ახალ საფუძველზედ დამყარება და სიტყვით და საქმით ღალატებდნენ, **იყვარებოდეთ ურთიერთას** (იოან. 15, 17; I იოან. 3, 10-18).

მართალია, ყოველივე ეს წამება-ტანჯვის საბუთი არ არის, და ამისათვის დევნა იქმნება გაგიკვირდეთ კიდევ, მაგრამ წმ. გიორგის თანამედროვეთათვის აქ საკვირველი არა იყო რა, ვინაითგან იმდროინდელ ცხოვრების წესწყობილების საფუძვლად აღიარებული იყო არა ურთიერთას სიყვარული, რასაც ჰქადაგებდნენ ქრისტეანენი, არამედ უზომო და განუსაზღვრელი თავმოყვარება. თავმოყვარეობით განმსჭვალულს და ფუფუნებით განლაღებულს რომის უმაღლესს საზოგადოებას მთელი კაცობრიობა გაეყო ორ ბანაკად: ერთს ბანაკს შეადგენდნენ თავისუფლებითა და ყოველივე უპირატესობით აღჭურვილნი რომის მოქალაქენი, ხოლო მეორეს – ყოველსავე უფლებას მოკლებულნი მონა-ბარბაროსნი. თავისუფალ რომაელთა წარმოდგენით, პირველნი იყვნენ გაჩენილნი ფუფუნებისა და მბრძანებლობისათვის, ხოლო მეორენი – პირველთა ბრძანებისა და სურვილის აღსრულებისათვის. რაც უნდა ტანჯვა, მწუხარება და დამცირება დასდგომოდა უკანასკნელთ, – ეს სულერთი იყო პირველთათვის: არათავისუფალ რომის მოქალაქეს არა ჰქონდა ნება, გამოემყდარებინა თავისი გრძნობა, ვინაითგან იგი არ იყო შერაცხილი პიროვნებად, არ იყო ადამიანის უფლებით

შემოსილი არსება, არამედ იყო მონა – ნივთი და ბარბაროსი. ამ რიგად მონყობილი ყოფა-ცხოვრება იმდენად მტკიცე და შეურყეველ საფუძველზედ დამყარებულად მიაჩნდათ, რომ სხვანაირი მოქალაქობრივი მდგომარეობა ვერც კი წარმოედგინათ: თვით უგანათლებულესნი მეცნიერნი და ფილოსოფოსნი, რომელნი **იყოდეს თავთა თვისთა ბრძენ**, ჭეშმარიტად, **განცოფნეს** (რომ. 1, 22) და ამართლებდნენ, ამაგრებდნენ და ხელს უწყობდნენ ამ გვარს წეს-წყობილებას. რომის წარჩინებული საზოგადოებაც სარგებლობდა ამით და განაგრძობდა უზრუნველსა და უდარდელ ცხოვრებას: **შჭამდეს და სმიდეს, იქორწინებდეს და განქორწინებდეს, ვითარცა დღეთა მათ შინა წყლითრღვნისა** (მატთ. 24, 38)...

სწორედ ამ დროს, უეცრად და რომაელთა უმრავლესობისათვის მოულოდნელად, **განხდა ყოველსა ქვეყანასა ხმა** იესო ტკბილის მცნებათა მქადაგებელთა და **კიდეთა ქვეყანისათა სიტყვანი მათნი** (ფსალმ. 18, 4), – უცნაურნი, რომაელთათვის გაუგებარნი. გაისმა **მზისა აღმოსავალით** მომავალი **წარმართთა რამე სისულელე** (I კორ. 1, 23): **არა არს ურიაება, არცა წარმართება; არ არს მონება, არცა აზნაურება, – რამეთუ თქვენ ყოველნი ერთ ხართ ქრისტეს იესოს მიერ** (გალ. 3, 28). და ეს, რომაელთა უდიდესის ნაწილისათვის გაუგებარი **სისულელე** და უცხო **ხმა**, არამც თუ გაისმა, არამედ მან ცხოვრებაშიაც გზა გაიკვლია: **ტვირთმძიმენი და მაშვრალნი** სიხარულით მიეგებნენ მას და სიამოვნებით **აღიღეს უღელი** ქრისტესი, ვინაითგან უღელი იგი უჩინდათ **ტკბილად** და **ტვირთი** უფლისა **სუბუქად** (მატთ. 11, 29-30). ხოლო ძლიერთა ამა ქვეყნისათა **ხმა** ესე იუცხოვეს, არ შეისმინეს და ვერც შეისმენდნენ, რათგანაც ეს უცხო მოძღვრება სავსებით ეწინააღმდეგებოდა მათ რწმენას და მსოფლიომხედველობას: იგი სხვათა შორის იმასაც ჰქადაგებდა, რომ ადამიანის პირველი მოვალეობაა შრომა, მუშაობა (შექმნ. 2, 15; 3, 19) და არა უსაქმობა და განცხრომა, რომ მხოლოდ მუშაკი **არს ღირს სასყიდლისა**, საზრდელისა (მატთ. 10, 10), და თუ ვისმეს შრომა ეზარება, ანდა **არ უნებს საქმის** – იგი **ნუცა სჭამნ** (2 თეს. 3, 8-10).

ამასთანავე, ეს სწავლა პირდაპირ აღიარებდა, რომ მონა, ეს, იმდროინდელის წარმოდგენით, ოჯახისათვის ფრიად საჭირო პირუტყვი, აღარ უნდა ითვლებოდა მონად, არამედ **უფროს მონისა – საყვარელ ძმად, ხორციელადცა და უფლისა მიერცა** (ფილიმ. 16). გარდა ამისა, ეს უცნაური მოძღვრება დიდებულ რომის დიდებულის მოქალაქის უფლებას მონათა შესახებ უპირებდა შეზღუდვას და განუსაზღვრელ უფლებით შემოსილ მეპატრონეს ავალებდა **სიმართლისა და სწორისა მიცემად მონათა** და თანაც დასძენდა: **უნყოფეთ, რამეთუ თქვენცა**, ე. ი. ქვეყნის პატრონს და ბატონს რომაელს, **უფალივე გივის ცათა შინა** (კოლ. 4, 1). თუმცა მართალი იყო ისიც, რომ ეს ახალი მოძღვრება არავითარის ძალმომრეობის ჩადენას არ ურჩევდა თავის აღმსარებელთ და პირიქით ასწავებდა, **მონანი ერჩილით ხორციელთა უფალთა თქვენთა სინრფოებითა გულისა თქვენისათა, ვითარცა ქრისტესა** (I თეს. 6, 5), **ნუ ხოლო სახიერთა და ტკბილთა, არამედ უსახურთაცა** (I პეტრ. 2, 18) და: **ჯერ არს დამორჩილება არა ხოლო რისხვისათვის, არამედ გონებისთვისცა** (რომ. 13, 5). მაგრამ რომაელ-ბერძენი მაინც ვერ შეურიგდებოდა ქრისტიანობას, ვინაითგან მან ყოველი ადამიანი, მონაც და ბარბაროსიც კი, აღიარა სრულს კაცად, პიროვნებად და ძედ ღვთისა, და ამ სახედ გაასწორა მთა და ბარი, ერთჰყო და სწორჰყო ყოველნი **ქრისტეს იესოს მიერ**.

ამ ერთყოფას კი, ადვილად შესაძლებელი იყო, გამოეღო რომის მოქალაქისათვის არა სასურველი ნაყოფი, რათგანაც შეიძლებოდა მომხარეო, რომ ამ ახლადმოვლინებულს ძმას **ხორციელადცა და უფლისა მიერც**, რომელიც ემორჩილებოდა თავის პატრონს მხოლოდ **ქრისტეს იესოს მიერ**, ერთს უკუღმართ დღეს მოეხსენებინა თავის პატრონისათვის, რომ იგი, ბატონის საკუთრება და მონა, არის ძე ღვთისა, **მოსყიდული სისხლითა უფლისათა** (განცხ. 5, 9) და ამისათვის ვერ იკისრებს ბატონის ისეთის ბრძანების შესრულებას, რომელიც ამცირებს ადამიანისა და ქრისტიანის ღირსებას, და ამასთანავე, იქნება გაკადნიერებულიყო კიდევაც და თავი ემართლებინა მით, **რომ მორჩილება ჯერ არს ღმრთისა**

**უფროს, ვიდრე კაცთა** (საქ. მოც. 5, 29). ამისთანა მოძღვრებას კი ადგილი არ უნდა ჰქონოდა დიდებულის რომის იმპერიაში, ვინაითგან იგი აღაშფოთებდა სულიერს სიმშვიდეს (რომის) მოქალაქისას და საშიში იყო არსებულ წესწყობილებისათვის; ამის გამო საშური და საჭირო იყო მისი ჩაქრობა, მოსპობა, განადგურება...

აი, ეს იყო მიზეზი, რომ წარმართებამ გამოიღო თავი და გაილაშქრა ქრისტიანობის წინააღმდეგ, გამოუცხადა მას ომი, ომი უღმობელი, უმაგალითო, საზიზღარი და საშინელი, და მიიწვია თანაშემწედ აღზნებული ცეცხლი, ადუღებული კუპური, დაუქრობელი კირი, გახურებული შანთი, ლურსმით შეჭედილი ურმის თვალი, ბასრი მახვილი, მონამლული ისარი, ჯვარი, საპყრობილე, ჯურღმული, დამშეული მხეცები და მრავალი სხვა მათი მსგავსი. ამ უმაგალითო ბრძოლის დროს აშკარად დაუპირდაპირდნენ ერთმანეთს ძლიერნი და უძლურნი, მდიდარნი და გლახაკნი, ურწმუნონი და მორწმუნენი, ძველის მოძღვრებისა და ძალმომრეობის მომხრენნი და ახალის მცნების და მტრისადმი სიყვარულით განმსჭვალულნი, წარმართნი და ქრისტიანნი... მთელმა სამასმა წელმა განვლო ამ ბრძოლის დასრულებამდე და ამ საუკუნეთა მიმდინარეობაში შენირულ იქმნა უანგარიშო მსხვერპლი, მსხვერპლი უმანკო, უდანაშაულო; აღარ იყო გარჩევა დიდსა და პატარას შორის, ქალსა და კაცს შორის; ვერავითარი ღირსება, დამსახურება და მდგომარეობა ვერ იხსნიდა ქრისტიანს ტანჯვისაგან...

გარნა **ფიცხელ არს კაცთათვის ნიხნვა დეზისა** (საქ. მოც. 9, 5), შეუძლებელ არს ჭეშმარიტების დათრგუნვა და მზის სინათლის ჩაქრობა, – ვერავითარმა წინააღმდეგობამ ვერ შეაჩერა ქრისტიანობის გავრცელება: ყოველივე წვეთი ქრისტიანთა დათხეულის სისხლისა გარდაიქცა თესლად, რომელმაც აღმოაცენა ერთის მაგიერ ათი და ასი ქრისტეს მორწმუნე. რაც უფრო სასტიკად ექცეოდნენ ქრისტიანებს, – მით უფრო ვრცელდებოდა შჯული უფლისა, **თანადამონებული ღმრთისა სასწაულებითა, და ნიშებითა და ფერად-ფერადითა ძალითა** (ებრ. 2, 4). ვრცელს რომის სახელმწიფოში იშვიათად თუ მოიპოვებოდა ისეთი ალაგი, საცა არ იდი-

დებოდა სახელი იესოსი; სოფლები, ქალაქები, ჭალაკები, ჯარის ბანაკები, ციხე-კოშკები, სამმართველოები და თვით მეფის სასახლე (ფილიპ. 4, 22) სავსე იყო ქრისტეს მორწმუნეებით. ამის შემდეგ კი ქრისტიანობის დევნა შეიქმნა უაზრო და პირდაპირ მავნებელი თვით იმპერიის მთლიანობისათვის, მით უმეტეს, რომ დროთა განმავლობაში საუკეთესო ნაწილი საზოგადოებისა, მხედრობისა და თვით სამეფო პალატისა მოხიბლულ იქმნა ქრისტეს მცნებათა სიდიადით და ქრისტიანეთა წმიდა და უმნიკვლო ცხოვრებით...

ეს კარგად შეიგნო დეოკლიტიანე მეფის კარზედ აღზრდილმა და ქრისტიანების ტანჯვა-წამების სურათის საკუთარს თვალთ ხშირად მნახველმა მოციქულთასწორმა კონსტანტინე მეფემ და 312 წელს გასცა ბრძანება, რომლის ძალით ქრისტეს აღმსარებელთა დევნა შეწყვეტილ იქმნა და თვით ქრისტიანობა აღიარებულ იქმნა ნებადართულ სარწმუნოებად. ამის შემდეგ ერთბაშად შეიცვალა სანახაობა; ისინი, ვინც რამდენისამე წლის წინად ტანჯულ-წამებულნი იყვნენ ქრისტეს აღსარებისათვის, შეიქმნენ საგნად თაყვანისცემისა და ლოცვა-ვედრებისა; მათ საფლავებზე, ვისი სახელების ხსენება წინად საშიში იყო, აღეგო შვენიერნი ტაძარნი, და მათ ზღუდეთა შინა გაისმა ტანჯულ-წამებულთა სადიდებელად შეთხზულნი საგალობელნი; ის სწავლა-სიტყვანი, რომელთაც აქამომდე ყურსა ეტყოდენ ბნელსა და საუნჯესა შინა – იქადაგა და წარმოითქვა ნათელსა შინა და ერდოთა ზედა (ლუკ. 12, 3).

ერთი ამ დროს ღვთისმიერ განბრწყინებულ-დიდებულთაგანი არის წმ. მთავარმონაჲ გიორგი გაბადუკიელი, მხედართმთავარი დიოკლიტიანე მეფისა, რომლის ბრძანებითაც იგი წამებულ იქმნა ქრისტეს აღსარებისათვის 303 წელს ქალაქ ნიკომიდიას. თანახმად წმიდანის ანდერძისა, წმ. სხეული მისი დაკრძალულ იქმნა მისის მსახურის მიერ პალესტინის ქალაქს რამლასი, სადაც, ღვთის მადლით, შეიქმნა წყაროდ სასწაულთა და კურნებათა. კონსტანტინეს მეფობის დროს მორწმუნეთა მიერ აღშენებულ იქმნა პალესტინისავე ქალაქ ლიდდას ანუ დიოსპოლისში, იერუსალიმის მახლობლად, ტა-

ძარი უკვე წმიდის მთავარმონაშის გიორგის სახელობაზე და იქ გადაასვენეს სასწაულთმოქმედი გვამი მისი, თვით წმიდანის კი აღიარებულ იქმნა ეკლესიის მიერ **ტყვეთა განმათავისუფლებლად და გლახაკთა ხელის აღმპყრობლად, სწეულთა მკურნალად და მეფეთა უძლეველ წილმბრძოლად...**

სწორედ ამ უკანასკნელ მიზეზის გამო შეიყვარა წმ. გიორგი თავითგანვე ქრისტეს მტრებთან მუდამ მებრძოლმა ჩვენმა ხალხმა და შეითვისა იგი უფროს ყოველთა უცხო წმიდათა. ნიშნად მისდამი სიყვარულისა და მის სადიდებლად ძველთაგანვე განაწესა ხსენება მისი, აპრილის 23 და ნოემბრის 3-ს გარდა, ნოემბრის ათსაც, თვით ამ თვეს უწოდა გიორგობისთვე და აღაშენა მის სახელობაზე 365 ტაძარი, მათ შორის ის წმიდა ტაძარიც, რომლის საყდრის წინაშე ჩვენ შევკრებილვართ დღეს, რათა **ერთითა პირითა და ერთითა გულითა** მივმართოთ წმიდა მთავარმონაშეს ამა მცირე, მაგრამ ღმობიერებითა და სიყვარულით სავსე ლოცვით: **წმიდაო მთავარმონაშეო და ღვანლითშემოსილო გიორგი ევედრე ღმერთსა ჩვენთვის!..** ამინ.

(წარმოითქვა ქვაშვეთში 1906. XI. 10; „მწყემსი“, 1906, №22)

### ს ი ტ ყ ვ ა

## წმ. მთავარმონაშის ბიოგრაფიის ხსენების დღეს

*წმიდაო მთავარმონაშეო და ღვანლითშემოსილო  
გიორგი, ევედრე ღმერთსა ჩვენთვის!*

ამ სიტყვებით მივმართავთ ხოლმე ჩვენ, საყვარელო, ლოცვის დროს წმიდანთა საზოგადოდ და მთავარმონაშე გიორგის კერძოდ და ვსასოებთ, რომ ჩვენს ვედრებას წმიდანის შეისმენენ და თავის მფარველობას გაგვიწევენ.

ეს ჩვეულება, ლოცვის დროს წმიდანთა მონოდება, შემოდებული იყო ჯერ კიდევ ძველს აღთქმაში, რაიცა ჩანს წმ. მეფის და წინასწარმეტყველის დავითის ლოცვითგან, რომე-

ლიც ევედრებოდა უფალს ამ სიტყვებით: **უფალო ღმერთო აბრაამისა, და ისააკისა, და ისრაილისა, მამათა ჩვენთაო, დაიცევ ერთი შენი** (1 ნეშტ. 29, 18). ე. ი. უფალო, ღმერთო ჩვენო, დაიცევ ერთი შენი ვედრებითა ანუ მეოხებითა მამათა ჩვენთა აბრაამისა, ისააკისა და ისრაილისა. ეს ჩვეულება ძველის ალთქმითგან გადმოვიდა ახალს ალთქმაში და ფრიად გავრცელებული იყო უკვე მეოთხე საუკუნეში. წმ. კირილე იერუსალიმელი მოგვითხრობს, რომ მის დროს წირვაზედ მოიხსენებდნენ „პირველშესვენებულთაცა, პირველ მამამთავართა, წინასწარმეტყველთა, მოციქულთა, მონამეთა, რათამცა ლოცვითა მათითა და შუამდგომელობითა მიითვალოს ღმერთმან ლოცვაჲ ჩვენი“.

აქეთგან ცხადად ჩანს, თუ რაოდენად ძველი ჩვეულებაა წმიდანთა მიმართ ლოცვით მიმართვა. ანდა როგორ არ უნდა მივმართოთ ჩვენ ლოცვით წმიდანთა, როცა ვიცით, რომ ისინი ქვეყნად ყოფნის დროს ყოველს წამს მზათ იყვნენ სიტყვით და საქმით აღმოეჩინათ შემწეობა ჭირსა და იწროებასა შინა მყოფთათვის. საკმარისია მოვიგონოთ, თუ რაოდენი ღვაწლი დასდო წმიდა მთავარმონამე გიორგიმ ქალაქის ვლასიას მცხოვრებთ, შეინროებულთ საზარელის ვეშაპისაგან. ხოლო თუ წარმართთათვის ზრუნავდნენ წმ. მონამენი, განა ქრისტიანთ მოაკლებენ იგინი მზრუნველობასა? ჭეშმარიტად, რომ არ მოაკლებენ და აკი არც მოუკლიათ! როგორც ვიცით, მაგალითად, წმ. მთავარმონამის გიორგის ცხოვრებითგან, მან მთელი თავისი ძალღონე და სიცოცხლე შესწირა ქრისტიანეთა კეთილდღეობასა და წარმატებას. მაგრამ წმიდანებმა ეს არ გვაკმარეს, მათ ალგვითქვეს, – ამა ქვეყნით განსვლის შემდგომაც, შემწეობა და მეოხება. წმ. მოციქული პეტრე ამბობს: **უნყი, რამეთუ ადრე ყოფად არს დატევება საყოფელისა ამის ჩემისა, ვითარცა იგი უფალმან ჩემმან იესო ქრისტემ მაუნყა მე. და ვისწრაფო, რათა კაცადკაცადსა თქვენსა აქვნდეს შემდგომად განსვლისა ჩემისა მოხსენებისა ყოფა** (2 პეტრესი, 1, 14-15). ე. ი. წმიდა მოციქული როგორც სიცოცხლის დროს ზრუნავდა მორწმუნეთათვის, განაღვიძებდა მათ ცოდვისაგან და მოუწოდდა ქმნად კეთილისა, აგრეთვე, ჰპირდება, განსვენების შემდგომაც



არდავინყებას და მოხსენებისა ყოფასა და ეს ასეც უნდა იყოს: სიყვარული ისეთი ძლიერი გრძნობა არის, რომ მას ვერ აღმოფხვრის ადამიანის გულითგან ვერც დრო და ვერც მანძილი. განა შესაძლებელია მშობელმა დაივინყოს შორს წარსული, გინა დაკარგული, გინა განსვენებული საყვარელი შვილი? თუკი მშობელის მიერ საყვარელის შვილის დავინყებას ჩვენ ადამიანის ბუნების წინააღმდეგ მოვლენად შევრაცხავთ, მაშ რა საკვირველია, რომ ჩვენდამი სიყვარული და სიბრალული წმიდანებმა ამ ქვეყანაზე არ დასტოვონ და საიქიოთგანაც გადმოგვხედონ სიყვარულითა და მოწყალე თვალით!..

ეს თავისთავად ცხადია. საკითხი მხოლოდ ის არის, ძალუძსთ თუ არა წმიდანთა იცოდნენ ჩვენი ჭირი და ლხინი, ისინი ხომ ადამიანები არიან და, მაშასადამე, არა ყოვლისა მცოდნენი და არა ყოველგან მყოფნი? ვისაც საღმრთო წერილი უკითხავს და ჩაკვირვებია მას, იმისთვის ამ საკითხის პასუხი არ არის ძნელი, ვინაითგან საღმრთო წერილი მოწმობს, რომ წმიდანებმა ჯერ კიდევ ქვეყანაზედ ყოფნის დროს იცოდნენ ბევრი ისეთი რამ, როემლიც სხვებისათვის დაფარული იყო. აი, ერთი მრავალი მაგალითთაგანი. მეფეთა მეოთხე წიგნი მოგვითხრობს, რომ ელისე წინასწარმეტყველის დროს ასურის მეფე აღმხედრდა ისრაელსა ზედა და განიზრახა დაბანაკება წინდანინ არჩეულს დაფარულს ადგილს. მაგრამ წინასწარმეტყველის ელისეს რჩევით, ისრაელთა მეფემ სწორედ იმ მხრით გაამაგრა საზღვრები და ასურნი შეურაცხყოფილნი იქმნენ. ასურის მეფე რაოდენჯერმე შეეცადა სხვადასხვა მხრით დასცემოდა ისრაელს, მაგრამ ვერსად მიაღწია სანადელს. შეძრწუნდა ამის შემდგომ მეფე ასურისა, შეჰკრიბნა მხედართმთავარნი თვისნი და ჰკითხა მათ, თუ რომელი მათგანი ატყობინებს მის განზრახვებს ისრაელთა მეფეს. მაშინ ერთმა მსახურთაგანმა მიუგო მეფეს ასურისასა: **უფალო ჩემო, მეფეო, წინასწარმეტყველი ელისე, რომელი არს ისრაელსა შორის, მიუთხრობს მეფესა ისრაელისასა ყოველსა სიტყვასა, რომელსა თუ იტყოდე სანოლსა შინა საუნჯისა შენისასა** (4 მეფ. 6, 8-12).

ცხადია, რომ თუ წმიდანები სიცოცხლეშივე იგებდნენ

სხვის აზრთა და განზრახვათა, მით უადვილესია მათთვის ჩვენის ვედრების შესმენა ეხლა, როდესაც იგინი განვიდნენ ამა ქვეყნით და სულნი მათნი განთავისუფლდნენ ნივთიერების დამოკიდებულებისაგან. ეხლა განწმენდილის და განბრწყინვებულის გონების თვალთ და ყურით ისინი უკეთ ხედვენ და უკეთ ისმენენ. უფალი იესო ქრისტე გვასწავებს, რომ **წმიდანნი სწორ ანგელოზთა არიან**-ო (ლუკ. 20, 36), ხოლო, ანგელოზთა შესახებ გვეტყვის, რომ მათ შორის იქმნების **სიხარული ერთსა ზედა ცოდვილისა, რომელმან შეინანოს** (ლუკ. 15, 10). მეორე ადგილას კი მოგვითხრობს, რომ მათმთავარმა აბრაამმა უწყოდა ურწმუნოება და გულქვაობა ჯერ კიდევ ცოცხალთა ძმათა მდიდრისათა, რომელთა არა ისმინეს არცა მოსესი, არცა სხვათა წინასწარმეტყველთა, რომელნი იყვნენ შემდეგ მოსესაო (ლუკ. 16. 27-31).

არ დაგვიტევენს ჩვენ საღმრთო წერილი უმეცრად იმის შესახებაც, თუ რაოდენად ძლიერია შუამდგომელობა წმიდანთა წინაშე ღვთისა. მოციქული იაკობი გვასწავებს, რომ წინაშე ღვთისა **ფრიად შემძლებელ არს ლოცვაჲ მარილისა შეწევნად** ჩვენდაო, და ასურათხატებს ამ აზრს შემდეგის მაგალითით: **ილია კაცივე იყო მზგავსი ჩვენი, და ლოცვა ილოცა არა წვიმად, და არა წვიმა ქვეყანასა ზედა სამ წელს და ექვს თვე. და კვალად ილოცა, და ცამან მოსცა წვიმა და ქვეყანამან აღმოაცენა ნაყოფი თვისი** (იაკ. 5, 16-18).

შევისწავოთ აქეთგან ჩვენცა, საყვარელნო, თუ რაოდენ სასარგებლო არს ჩვენთვის მეოხება და შუამდგომელობა წმიდანთა და ხშირად მივმართოთ ჩვენის სამრევლოს მცველსა და მფარველს, ღვთივგანბრწინვებულს გიორგის სიღრმით გულისაით აღმონახეთქი: წმიდაო მთავარმონამეო და ღვანლითშემოსილო გიორგი, ევედრე ღმერთსა ჩვენთვის! ამინ.

(წარმოითქვა ქვაშვეთში 1908. XI. 10; „მწყემსი“, 1908, №24)

ს ი ტ ყ ვ ა  
**წმ. ბიორბის ხსენების დღეს**  
ქრისტე აღდგა!

დღეს წმიდა ეკლესია ბრწყინვალედ დღესასწაულობს მთავარმონაშის გიორგის ხსენებას ტანჯვათა გამო, რომელიც თავსიღო ქრისტეს შჯულისათვის წარმართთა მეფისა და ერისაგან. როცა ადამიანი აკვირდება წმიდანის ცხოვრების აღსასრულს, უნებლიედ ეკითხება თავის თავსა: როგორ შესძლო ამ ჩვენებრ ხორცთმესხმულმა არსებამ იმოდენი ტანჯვის დათმენა და სად მოიპოვა მისთვის საჭირო სულის ძალაო? პასუხს ამ საკითხისას ადამიანი პოულობს მხოლოდ იმ აზრთა განწყობილებაში, რომლითაც გამსჭვალული იყვნენ წმიდა მონაშენი საზოგადოდ და ძლევაშემოსილი გიორგი კერძოდ. **ქრისტე აღდგა მკვდრეთით და იქმნა იგი დასაბამ შესვენებულთა** (I კორ. 15, 20), აი, – ის შეურყეველი ქვაკუთხედი, რომელზედაც აშენდა მონაშენობა და ქრისტეანობრივი მსოფლიო მხედველობა!

ქრისტე აღდგა მკვდრეთით და თავის აღდგომით დაგვიმტკიცა, რომ ოდესმე ყველა მიცვალებული აღდგება, რომ სიკვდილით არ თავდება არსებობა ადამიანისა, არამედ იწყება განახლებული ცხოვრება. ვინაითგან ქრისტეანისათვის ეს შეურყეველი ჭეშმარიტებაა, ამისათვის საგნად ცხოვრებისა ამ ქვეყანაზედ ადამიანმა უნდა გაიხადოს ზრუნვა სიკვდილის იქითი ცხოვრებისათვის და ჯეროვნად მისთვის მომზადება. ეს მომზადება კი შეიძლება ერთადერთის საშვალეებით, – ქრისტე მაცხოვრის მცნებათა აღსრულებით, რომელთა შორის უბრწყინვალესი ადგილი უჭირავს ურთიერთა სიყვარულს: **შეიყვარო მოყვასი შენი, ვითარცა თავი თვისი** (მატთ. 22, 39). ნუ შესძნრუნდებით მისთვის, ოდეს თქვენ, ნაცვლად სიყვარულისა, მოგაგონ ტანჯვა და წამება, რამეთუ **რავდენ ვეზიარებით ვნებათა ქრისტესთა – იმოდენ გამოჩინებასა დიდებისა მისისასა გიხაროდენ და მხიარულ იყვნეთ** (I პეტ. 4, 13). ოლონდ არავის შეემთხვეს თქვენგანს ვნება და ტანჯვა, როგორც კაცის მკვლელს, გინა მპარავს, გინა ძვირის მოქმედს, გინა უცხოისა განმგეს (მტაცებელს), ხოლო უკეთუ ვნებულ და ტანჯულ იქმნეთ, ვითარცა ქრის-

ტეანენი, – **ნუ გრცხვენინ, არამედ ადიდებდით ღმერთსა ამით ნაწილითა** – ამ მხვედრითა (იქვე 15, 16). ცხადია, ამ მსოფლიო მხედველობით ხელმძღვანებულნი მონამენი ქვეყნიურ, წარმავალ და დროებით სიამოვნებისათვის არ იზრუნებდნენ, არამედ შეუდგებოდნენ ძებნას **საყოფელად ქალაქსა მერმესა** (ებრ. 13, 14), ამ მერმეს ქალაქში მოელოდნენ **დაუჭნობელსა მას დიდებისა გვირგვინსა** (I პეტრ. 5, 4) და ამის გამო სიხარულით ითმენდნენ ამ ქვეყანაზედ ქრისტეს სახელისათვის ყოველგვარ ტანჯვასა, სიკვდილსაც კი.

საყვარელნო! ჩვენ, დღეს აქ შეკრებილნიც, ხომ ქრისტიანე ვართ და რად არის, რომ ფრიად სამძიმოდ მიგვაჩნია არამცთუ წამებისა და გვემის ატანა, არამედ მცირედის მწუხარებისა და უბრალო ავადმყოფობის დათმენაც კი? იმად, რომ ჩვენ ნელ-ნელა ვივინყებთ ქრისტიანობრივ მსოფლიო მხედველობას და აღვაორძინებთ წარმართობრივსა, რომელსაც წმიდა მოციქული მოკლედ ახასიათებს ამ სიტყვებით: **ვჭამოთ და ვსვათ, რამეთუ ხვალე მოვკვდებით** (I კორ. 15, 32). ჭეშმარიტად, თუკი ადამიანს არა აქვს წარმოდგენა საიქიო ცხოვრებისა, თუკი საფლავის იქით აღარა მიაჩნია-რა, თუ დაჰკარგია იმედი მკვდრეთით აღდგომისა, მაშინ სმა, ჭამა და ხორცის ფუფუნება უნდა აღიაროს ერთადერთ საზრუნავ საგნად, მსგავსად სახარების მდიდრისა, რომელიც უგუნურებით იტყოდა თავისთვის: **განისვენე, სულო ჩემო, სჭამე და სვი და იხარებდ** (ლუკ. 12, 19).

მაგრამ... **ნუ სცთებით! ზრახვანი ბოროტნი განხრწნიან წესთა კეთილთა** (I კორ. 15, 33), და სანამ ჯერ კიდევ გვიან არ არის, შევსდგეთ, განვიწმიდოთ გონება, მოვიკრიბოთ ძალღონე, შევებრძოლოთ ზრახვათა ბოროტთა, მოუწოდოთ შემწედ და მეოხად ჩვენის ქვეყნის დიდებულ პატრონ-მფარველს, წმ. მთავარმონაშე გიორგის და მტკიცის სარწმუნოებით ღალად-ვჰყოთ: **ქრისტი აღდგა მკვდრეთით და იქმნა იგი დასაბამ შესვენებულთა**. ამინ.

(წარმოითქვა ქვაშვეთში 1912. IV. 23;  
„შინაური საქმეები”, №17; „ქადაგებანი”, 1913, №4; )

ს ი ტ ყ ვ ა  
ნმ. მთავარმონაშის ბიორჯის ხსენების დღეს

*ნმიდაო მთავარმონაშეო და  
ღვანლითშემოსილო გიორგი,  
ევედრე ღმერთსა ჩვენთვის.*

ნმ. მთავარმონაშე გიორგი, რომლის სალოცავ-სადიდებელად ჩვენ შევკრებილვართ დღეს აქა, ინოდება ნმ. ეკლესიის მიერ ტყვეთა-განმათავისუფლებლად და გლახაკთა ხელისაღმპყრობელად, სნეულთა მკურნალად და მეფეთა უძლეველ წილმბრძოლად, ე. ი. ადამიანთა საკვირველმოქმედ შემნედ და მეოხად. ამით აიხსნება ის განუზომელი პატივისცემა და შეურყეველი სასოება, რომლითაც განმსჭვალული იყო ჩვენი ერი ნმ. გიორგისადმი. ჭირსა და ლხინში იგი იხსენებდა ნმიდა გიორგის, თითქმის ყოველი ოჯახის თითონვერს მის სახელს უწოდებდა, ყოველს მთასა და ბორცვზე მის სახელზედ აშენებდა ტაძარს თუ არა, ნიშს მაინცა...

დღეს კი ამას ვერა ვხედავთ: ჭირსა და განსაკუთრებით ლხინში ნაკლებად გვაგონდება ნმ. მთავარმონაშე. ახალი ტაძრების აშენების მაგიერ, ხშირად ძველებს ვანგრევთ; ნიშებსა და ხატებს გამშვენების მაგიერ ვძარცვავთ და ვანადგურებთ, ხოლო სარწმუნოებასა და სასოებაზედ თითქოს ხელიც აგველოს.

ამის შემხედვარე ზოგიერთი ქრისტიანენი ძველს დროს იგონებენ და გულმტკივნეულად ამბობენ: ურწმუნოება გამრავლდა მისთვის, რომ დღეს ველარ ვხედავთ საკვირველებათა და სასწაულთა; ახლანდელს თაობას, რომ საკუთარის თვალით ენახა რაიმე სასწაული, უეჭველად ღვთისმოსავი და მორწმუნე იქნებოდაო. ასე მსჯელობენ მრავალნი და დარწმუნებულნიც არიან, რომ პირი მათი იტყვის ჭეშმარიტებასა...

მართლადაც, რატომ ვერა ვხედავთ ჩვენს დროში სასწაულებს? იქნება სასწაულების ძალით ურწმუნოება მართლადაც მოიხპოს? ამ საკითხის პასუხად უნდა მოვიგონოთ, რომ სასწაული ღვთის წყალობაა მორწმუნეთა მიმართ და ასეთი

სასწაული ქრისტიანეთა შორის ბევრი მომხდარა და მოხდება კიდევ, მაგრამ ურწმუნო ადამიანისათვის მათ სარწმუნოება არ მიუნიჭებიათ. ამ აზრის დასასურათებელად მოვიგონოთ ერთი ამბავი, რომელიც ყველასათვის თვალსაჩინოა, – სახელდობრ ქრისტეს სჯულის გავრცელება. ვინ გაავრცელა ეს სჯული, საითგან, ან ვინ იყვნენ მისი მქადაგებელი? ისინი იყვნენ არა განთქმულნი მეცნიერნი, არა გამოჩენილნი მჭერ-მეტყველნი, არამედ უბრალო ურიანი, ღატაკნი მეთევზურნი, მკვიდრნი ყველასაგან სასაცილოდ აღებულის გალილეასნი. მათ ჰქადაგეს სახარება ქრისტესი, ურიათაგან აღსარებული **საცთურად**, ხოლო წარმართთაგან **სისულელედ** (I კორ. 1, 23) და ამ სახარების ქადაგებისათვის განიცადეს ცემა და გვემა, ტანჯვა და სიკვდილი. მერმე რით გათავდა ყოველივე ეს? გათავდა მით, რომ ათიათასობით ურიათა და წარმართთა მიიღეს ქრისტეს სჯული და სამი საუკუნის შემდეგ წარმართული მსოფლიო-მხედველობა შეიცვალა ქრისტიანულად. აბა გვიჩვენოს ვინმემ რაიმე მსგავსი ამისი კაცთა სწავლის გავრცელების ისტორიაში?! სწორედ ამ ისტორიითგან ვიცით, რომ თუმცა კაცობრიობამ წარმოშობა უმრავლესთაგან უმრავლესნი სწავლულნი და მეცნიერნი, მაგრამ ერთის მოძღვრება ხშირად უარყოფდა მეორისას. ასე რომ, არც ერთს მოძღვრებას არ გადაულახავს სამზღვარი ორის ან სამის საუკუნისა, მაშინ როცა ქრისტეს მოძღვრება სდგას შეურყევლად და ბრწყინვალედ ანათებს აქამომდე. **ჭეშმარიტად, საკვირველ არიან საქმენი შენნი, უფალო!**

მაგრამ არამც თუ გავრცელება ქრისტეს მოძღვრებისა, არამედ თვით მისი არსებობაც კი სასწაულია. თანახმად წინასწარმეტყველებისა უფლისა ჩვენისა იესო ქრისტესისა, მისს მოძღვრებას წინააღმდეგა თვით ჯოჯოხეთი და ყოველივე ძალი და ღონე იხმარა მის წინააღმდეგ. ძალმომრეობა და ორგულობა, დევნა და მწვალებლობა ხმარებულ იქმნა ჯოჯოხეთის მიერ ქრისტეს მოძღვრებასთან ბრძოლის დროს, მაგრამ ვერც ერთმა ვერ გასჭრა: რამდენადაც განაძლიერეს დევნა ქრისტეს სჯულისა, იმოდენად უფრო განმტკიცდა და ამაღლდა იგი, ამ უმაგალითო ბრძოლითგან

ქრისტეს მოძღვრება გამოვიდა გამარჯვებული. განა ეს გამარჯვება მომასწავებელი არ არის იმისი, რომ ქრისტეს მოძღვრება მონიჭებულია ზეცით ღვთის მიერ? გარნა ურწმუნოთა ეს ვერ შეიგნეს და განაგრძობენ ამ ღვთიურ მოძღვრებასთან უნაყოფოდ ბრძოლასა!

გარდა ამისა, განა თვით ამ სარწმუნოების შემცირების დროს ცოტა სასწაულები მოხდება ხოლმე? განა თვითოეულს ჩვენგანს არ მიუღია შემწეობა ზეციურის მამისაგან სწორედ მაშინ, როცა საშველი არსაითგან არ ყოფილა მოსალოდნელი? განა იშვიათად მომხდარა, რომ ექიმთა მიერ განუკურნებლად მიჩნეულს სენს დაუნებებია ავადმყოფისათვის თავი სწორედ ამა თუ იმ წმიდანის ან ხატის მოლოცვის შემდეგ? უფლის სიტყვა: **მე თქვენთანა ვარ უკუნისამდე** (მატთ. 28, 20) არ დავარდების და სწორედ ამის გამო ახლაც ბევრი მიიღებს ღვთისაგან სასწაულებრივ შემწეობას, მაგრამ ურწმუნოება რის ურწმუნოება არის, თუ ყოველივე ღვთაებრივი და სასწაულებრივი არ უარჰყო?!

საუცხოვრო მაგალითს სასწაულთა უარყოფისას წარმოადგენს დრო ქვეყნად უფლის იესო ქრისტეს ცხოვრებისა. თუმცა უფალი იქმნოდა მრავალთა სასწაულთა და საკვირველებათა, მაგრამ იმ დროის ურწმუნონი, ფარისეველნი და მნიგნობარნი მაინც **სასწაულსა ითხოვდენ** უფლისაგან **ზეცით** (მარ. 8, 11) და თუმცა ეს სასწაულიც მიიღეს ქრისტეს ჯვარცმის შემდეგ, **ოდეს ბნელ იყო ყოველსა ქვეყანასა და დაბნელდა მზე** (ლუკ. 23, 44-45), მაინც არ დაკმაყოფილდნენ... უფალმა სხვა უმეტესი სასწაულიც უჩვენა: ჯვარცმისა და სიკვდილის მესამე დღის შემდეგ დაბეჭდულისა და დაცულის საფლავითგან აღდგა მკვდრეთით და მით ცხადჰყო თავისი ღვთაებრივობა, მაგრამ ურწმუნოებამ თავი აქაც იჩინა: მცველნი მოისყიდეს და ათქმევინეს ყოვლად უმსგავსო სიცრუე: **მონაფენი მისნი ღამე მოვიდნენ და წარიპარეს იგი, ვიდრე ჩვენ გვეძინაო** (მატთ. 28, 13): მცველებს ეძინათ, მაგრამ მპარავნი კი დაინახეს, მპარავთ ხმა არ გასცეს და ამისთვის ვერცხლი მიიღეს ჯილდოდ! განა შეიძლება ზნეობრივად ამაზედ უფრო დაცემა!?

სჩანს, სასწაულები ვერას ასწავლიან მათ, ვისი გულიც ცივია ჭეშმარიტებისათვის! გულცივთ კი ქრისტეს მოძღვრება მით უფრო არ ესიამოვნებათ, რომ იგი ჰქადაგებს აღვირსხმას ბოროტთა გულისთქმათა და ჩვეულებათა. ეს კი აინროებს მათ პირუტყულ და განუსაზღვრელს თავმოყვარეობას და თავისუფლებას. ხოლო ვინც ამ რიგად არის განწყობილი ქრისტეს სჯულისა და მოძღვრებისათვის, მისთვის სასწაულები ისეა უმნიშვნელო, როგორც ეგვიპტელებისათვის მოსე წინასწარმეტყველის დროს და ფარისევლებისათვის უფლის ქვეყნად ცხოვრების დროსა...

მაშ, ნუ გაიკვირვებთ, საყვარელნო, თუ ჩვენს დროში იშვიათად ვეღირსებით სასწაულსა, ნუ დაივიწყებთ, რომ სასწაულს ადგილი არა აქვს იქა, სადაც ღვთის მოწყალების მისაღებად ნიადაგი არ არის მომზადებული. ამიტომაც, თუ გვსურს უფალმა გაგვხადოს ღირსად სასწაულისა, უნდა განვიწმიდოთ გულნი ჩვენნი ყოველისაგან ბინისა, განვანყოთ ფერხნი ჩვენნი სლვად გზასა სიმართლისასა, ხოლო ხელნი ჩვენნი ქმნად კეთილისა. ამინ.

(წარმოითქვა ქვაშვეთში,  
1912. X. 10; „მინაური საქმეები“, 1912, №42)

### ს ი ტ ყ ვ ა

## წმ. მთავარმოწამის ბიორგის ხსენების დღეს

*ყოველმან, რომელმან აღიაროს ჩემდა მომართ  
წინაშე კაცთა, ქემანცა კაცისამან აღიაროს იგი  
წინაშე ანგელოზთა ღვთისათა (ლუკასაგან 12, 8)*

ქრისტე მაცხოვრის მკვდრეთით აღდგომის შემდეგ, მისი მოძღვრება დიდის სისწრაფით გავრცელდა დიდებულის რომის საბრძანებელში. მოციქულთა ქადაგებამ მიიპყრო ყურადღება კეისრის სახლითგან დაწყებული (ფილიპ. I, 13) უბრალო ქვეშევრდომამდე. ქალი და ვაჟი, მოხუცი და ახალ-



გაზრდა, მდიდარი და ღარიბი, ყველა ერთნაირად მოჰხიბლა იესო ქრისტეს მოძღვრების სიფაქიზემ, მშვენიერებამ და სისრულემ. სინათლისა და წინსლვის მომხრე ხალხმა იესო ნაზარეტელის მოძღვრებაში ჰპოვა მარგალიტი მრავალსასყიდლისა, რომლის შესაძენად განსყიდეს ყოველივე, **რაჲცა ედვა** (მატთ. 13, 45): წარმართული მსოფლიო მხედველობა და ამაქვეყნიური სიამე-ბედნიერება.

ქრისტეს მოძღვრების ჩქარის ნაბიჯით მსვლელობამ აღძრა მის წინააღმდეგ ბნელი ძალები, რომელთათვისაც ხელსაყრელი არ იყო მკვდრეთრით აღდგომილის იესო ნაზარეტელის მოწოდება ჭეშმარიტის ღვთის ცნობისა და ურთიერთას სიყვარულისა. კერპთ-მქანდაკებელნი, ქურუმნი, მკითხავგრძნეულნი და მსგავსნი მათნი ამხედრდნენ ქრისტეს მოძღვრების წინააღმდეგ, გაავრცელეს მორწმუნეთა თაობაზე უმრავლესთაგან უმრავლესი სიტყვა ბოროტი (მატთ. 5, 11) და აღძრეს მათ ზედა საბრძანებელის მმართველნი და მეფენი. ბნელ ძალთა მოქმედებას უნაყოფოდ არ ჩაუვლია: ყოვლად ღირსეულ ადამიანს, თვით წარმართთა მიერ პატივცემულს და ხშირად ისეთს, რომელსაც სახელმწიფო სამსახურში დიდი და ჩინებული ადგილი ჰქონია, პატივს ახდიდნენ და საშინელ ტანჯვას მიაყენებდნენ, რაკი გაიგებდნენ, რომ ის ღირსეული ადამიანი ქრისტეანე იყო. ამ უსამართლო და უმეტეს შემთხვევაში პირადის სარგებლობისათვის აღძრულის დევნის დროს მორწმუნენი იშვიათად ამჟღავნებდნენ თავიანთ ქრისტიანობას. მაგრამ, როცა საჭიროება მოითხოვდა, როცა მათგან იძიებდნენ **სიტყვასა სასოებისა მისთვის**, ისინი **განმზავებელნი იყვნენ მარადის სიტყვის მიგებად** (I პეტრ. 3, 15): ჩვენა ვართ ქრისტიანენი და ვერავითარი ძალა ვერ აგვალეზინებს ხელს ქრისტე მაცხოვრის სწავლა-მოძღვრებაზედ. წარმართნიც სცდილობდნენ ყოველივე ელონათ და ქრისტიანობა მოესპოთ: ცეცხლი და წყალი, ადუღებული კუპრი და კირი, შუბი და ხმალი, მხეცები და ჯურღმული, ყველა მოინვიეს თანაშემწედ, მაგრამ ვერას გახდნენ. ქრისტიანობას დღითი დღე ემატებოდა მორწმუნეთა რიცხვი და თანაც განმდიდრებოდა მონამეთა და აღმსარე-

ბელთა კრებულთ, ვის დროშაზედაც დიდი ასოებით ეწერა: **რომელმან აღიაროს ჩემდა მომართ წინაშე კაცთა, ძემან-ცა კაცისამან აღიაროს იგი წინაშე ანგელოზთა ღვთისათა.** ერთი ამ კრებულისაგანი იყო წმ. მთავარმონაშე გიორგი, რომლის სახელის სადიდებელ-სავედრებულად ჩვენ შევკრე-ბილვართ აქ დღესა.

რამდენადაც ძნელი იყო ქრისტეს სახელის აღსარება და მისი მოძღვრების განხორციელება წმ. მთავარმონაშის გიორ-გის ქვეყნათ ცხოვრების დროს, იმდენად ადვილი არის ეს დღეს, როდესაც ქრისტე მაცხოვრის სახელის დიდება-აღსა-რებისათვის არ მოგველის არც დევნა და არც ტანჯვა. მერე, გამოგვიყენებია კი ჩვენ, საყვარელნო, ეს ჩვენი უპირატესო-ბა? ვადიდებთ და აღვიარებთ კი ჩვენ ქრისტესა? ნუ გაიკვირ-ვებთ ჩემს საკითხსა, ნუ მეტყვით: ჩვენ რომ ქრისტეს სჯულის აღმსარებელნი ვართ, განა ეს საეჭვოაო? არა! მე ამას არ გე-კითხებით. მეც ვიცი, რომ ჩენ ყველა ნათელღებულნი ვართ და საეკლესიო და სამოქალაქო საბუთებშიც მართლმადიდე-ბელის აღსარების ქრისტიანებად ვირიცხებით! მე გეკითხე-ბით: ყველგან და ყოველთვის აღვიარებთ ხოლმე, სიტყვით და საქმით, ჩვენს თავს ქრისტიანებად? არა გვრცხვენთან ხოლმე, ხანდისხან მაინც, ჩვენის თავის ქრისტე-ღვთის მორწმუნედ გამოცხადებისა? თქვენ რომ შეგეძლოთ ამ საკითხზედ არა-ს თქმა, მეტად სასიამოვნო იქმნებოდა ჩემთვის, როგორც მოძ-ღვრისათვის, მაგრამ ვაი, რომ ყველანი ამ საკითხზედ გადაჭ-რილ პასუხად არა-ს ვერ მეტყვით, ვინათგან პასუხი იგი არ იქმნება გულწრფელი და სიმართლით სავსე!.. აბა, დააკვირ-დით: ბევრი ჩვენგანი ცხად-ჰყოფს ხოლმე თავის ქრისტიანო-ბას პირფვრის დაწერით ეკლესიის მახლობლად გავლის დროს, ანუ ზარის ხმის გაგონებისას?.. ნაცნობი ვინმე ქუჩაში რომ შეგვხვდეს და სალამი არ მოგვცეს, ანუ სალამზედ არ გვიპასუხოს, ვიტყვით, – აღარ გვკადრულობს, ჩვენი ნაცნო-ბობის ჰრცხვენიაო... ღვთის სახლის დანახვაზედ რომ არა ვსცემთ პატივს უფალსა ქუდის მოხდით და პრიფვრის დაწე-რით, – ეს რისლა ნიშანია?.. ყველა ჩვენგანი შესწირავს ხოლმე ვედრებასა და მადლობას უფალსა საზრდელის მოღების წინ

და შემდეგ, განსაკუთრებით, თუ სტუმრებიცა გვყვანან?.. ხელში რომ ნივთი რაიმე გაუვარდეს ვისმე და ჩვენ მივანოდოთ, თუ მადლობა არ გადაგვიხადა, უმადურობად ჩამოვართმევთ და უზრდელადაც შევრიცხავთ... საზრდელისა და ყოვლის კეთილის მომნიჭებელს მადლობას რომ არ ვსწირავთ, ეს რისილა მომასწავებელია?

თქვენ იტყვი: ეს წვრილმანია, პრიჯვრის წერა და სხვის დასანახავად ლოცვა-ვედრება გარეგანი მოქმედებაა, ღმერთი კი გულთამხილავია, ჩვენი გულითადი განწყობილება მან პრიჯვრის დაუნერავადაც იცის, ქუჩაში და გარეშე პირთა წინაშე ლოცვით ფარისევლებს მივემსგავსებით და შეიძლება დაცივნაც დავიმსახუროთ... რამდენად პატივსაღებია ამ გვარად თავის გამართლება? ჯერ ერთი: სარწმუნოების საქმეში წვრილმანი რამ არ არსებობს, ვინათგან გარეგან მოქმედებას თავისთავად კი არა აქვს ღირებულება, არამედ მაშინ, როდესაც ის არის გამომხატველი შინაგანის განწყობილებისა... **გინა თუ სჭამდეთ, გინა თუ სუმიდეთ, გინა თუ რასაცა იქმოდეთ, ყოველსავე სადიდებელად ღვთისა იქმოდეთ**-ო, იტყვის წმიდა მოციქული (I კორინთ. 10, 31). მეორედ: თუ ჩვენი გული სავსე და განწყობილია ღვთის სადიდებელ-სამადლობელად, განა ეს გრძნობა გარეშე მოქმედებაში არ უნდა იჩენდეს თავსა? არავის უნახავს, ჭკუასა მყოფი ადამიანი მწუხარების განცდის დროს იცინოდეს და მხიარულობდეს, ხოლო სიხარულის დროს, სტიროდეს და ჰგოდებდეს: **რაიცა გულითა გვრწამს სიმართლედ, პირითა აღვიარებთ საცხოვრებელად** (რომ. 10, 10). შემდეგ: კიდევაც რომ დაგვცინონ კეთილის საქმის ყოფისათვის, განა ეს საბუთია კეთილ საქმეზედ ხელის აღებისა? აკი მაცხოვარმა ბრძანა: **ნეტარ იყვნეთ, რაჟამს გყვედრიდენ... და სთქვან ყოველი სიტყვა ბოროტი თქვენდა მომართ სიცრუით ჩემთვის**-ო (მატთ. 5, 11). უმჯობესია გამოვტყდეთ: ჩვენ ამ დაცივნისა გვეშინია და ამისათვის სამარცხვინოდ მიგვაჩნია ჩვენი სარწმუნოების ამკარად აღსარება, გვრცხვენია უგუნური ადამიანის გაკიცხვისა, გვრცხვენია ჩვენივე სტუმრებისა, რომლებსაც ღვთის მიერ მონიჭებული პურითა და ღვინით უმასპინძლდე-

ბით, და გვაგინყდება კი ქრისტე მაცხოვრის უტყუარი სიტყვები: **რომელსა იგი სირცხვილულ უჩნდეს ჩემი და სიტყვათა ჩემთა, ძემანცა კაცისამან არცხვინოს მას, რაჟამს მოვიდეს დიდებითა მამისაჲთა ანგელოზთა თანა წმიდათა** (მარკ. 8, 39). რა უმჯობესია: უგუნურის დაცინვა, – გონიერი კაცი ადამიანს არ დასცინებს, გონიერი ცუდ საქციელს გაჰკიცხავს, დაჰგმობს, – თუ წინაშე ანგელოზთა სამარცხვინოდ გახდომა, უარის-ყოფა ჩვენი ქრისტეს იესოს მიერ და საუკუნოდ მისგან, მზისაგან სიმართლისა და წყაროსაგან ცხოვრებისა განშორება და წარწყმედა?

ნუ იყოფინ ესე, საყვარელნო! ნუ შეუშინდებით დაუმსახურებელს დაცინვასა, ნუ შევირცხვენთ ქრისტე მაცხოვრის აღსარებასა ნურც შინა და ნურც გარედ, ნურც გონიერთა და ნურც უგუნურთა წინაშე; სახედ მოქმედებისა გვაქვნიდეს ცხოვრება წმიდათა მონამეთა, რომელთა წინაედვით სიტყვა უფლისა: **რომელმან აღიაროს ჩემდა მომართ წინაშე კაცთა, ძემანცა კაცისამან აღიაროს იგი წინაშე ანგელოზთა ღვთისათა**. ამინ.

(წარმოითქვა ქვაშვეთში 1913. XI. 10; „ქადაგებანი“, 1913, №11)

### ს ი ტ ყ ვ ა

#### წმ. მთავარმოწამის ბიორბის ხსენების დღეს

*წმიდაო მთავარმოწამეო და  
ღვანლითშემოსილო გიორგი,  
ვედრე ღმერთსა ჩვენთვის!*

ამ სიტყვებით მივმართავთ ხოლმე წმ. გიორგის და ვიმედოვნებთ, მისი ვედრება უფალმა შეისმინოს და მოგვანიჭოს თავისი უხვი მონყალება. მაგრამ მოჰხდება ხოლმე, ჩვენს თხოვნას წმ. გიორგი და თვით უფალიც თითქოს ყურს არ ათხოვებდენ და არ გვისრულებდენ. ამის გამო ზოგი ჩვენგანი ნელ-ნელა გულს აიყრის ლოცვაზედ და ბოლოს სრულები-

თაც თავს გაანებებს. რამდენად მართალნი არიან ამ შემთხვევაში? და თუ მართალნი არ არიან, რა არის მიზეზი, უფალი რომ არ გვისრულებს ლოცვა-ვედრებასა?

პირველ ყოვლისა ლოცვის დროს საჭიროა ყურადღება, გულისხმისყოფა. ჩვენ კი ხშირად ვიმეორებთ ზეპირად დასწავლილ ლოცვებს, ვისმენთ სხვის მიერ წაკითხულ წმიდა სიტყვებს, ვინერთ პირჯვარსა, მოვიყრით მუხლსა, მაგრამ ყურადღება სხვა საგანზედ გვაქვს მიქცეული, გვაგონდება ცოლი და შვილი, ნაცნობნი და მეგობარნი, მათი დავალება და საჭიროებანი. აბა ჩაეკითხენით ხანდისხან თქვენს გონებასა, რას მოგვითხრობდა წირვაზედ წაკითხული სამოციქულო ანუ სახარება, და დარწმუნდებით, რომ ტაძარში დგომის დროს გონება ჩვენი სხვაგან ყოფილა.

არ მივემსგავსებით ამ შემთხვევაში ჩვენ იმათ, რომელთათვის ჰბრძანა მაცხოვარმა: **ერი ესე ბაგითა მათითა პატივ-მცემს მე, ხოლო გულნი მათნი შორად განშორებულ არიან ჩემგან, – ამაოდ მსახურებენ მე** (მარკ. 7, 6-7)?

მეორე მიზეზად ჩვენის ლოცვის უნაყოფობისა უნდა ჩაითვალოს ორგულობა, ორჭოფობა. უფლისაგან ვითხოვთ მონყალებასა, მაგრამ ეჭვი გვებადება, აგვისრულებს უფალი თხოვნას, თუ არა. უფალმა კი გვიბრძანა: **ყოველსა, რომელსა ლოცვასა შინა ითხოვდეთ, გრწმენინ, რამეთუ მოიღოთ და გეყოს თქვენ** (მარკ. 11, 24). ლოცვის დროს ჩვენს გულში არავითარ რყევას არ უნდა ჰქონდეს ადგილი ისე, როგორც არა ჰქონია გულში ეჭვი წიდოვანს დედაკაცსა, რომელმანცა სთქვა, **დალათუ სამოსელსა ოდენ მისსა** (იესოსსა) **შევეხო, ვსცხოვნდე** (მარკ. 3, 28), და შეეხო თუ არა, მყისვე განიკურნა სენისაგან თვისისა.

ჩვენ კი ასეთს სიმტკიცეს ვერ ვიჩენთ და ლოცვაც ჩვენი ჰრჩება შეუსმენელად, ვითარცა იტყვის წმ. მოციქული: **რომელი ორგულობდეს, ნუ ჰგონებს კაცი იგი, ვითარმედ რაიმე იღოს ღვთისაგან** (იაკობ. 1, 6-7).

სხვა მიზეზიც არის ჩვენის ლოცვის უნაყოფობისა. ჩვენს ლოცვას ხშირად აკლია მედგრობა, იძულება ანუ შეუდრეკელობა. მოხდება ხოლმე, ერთისა და ორის თხოვნის შემდეგ

თავს ვანებებთ ლოცვასა, თითქოს გვეხათრებოდეს ღვთის შენუხება. უფალმა კი ბრძანა: **სასუფეველი ღვთისა იიძულები, და რომელნი აიძულებენ, მათ მიიტაცონ იგი** (მატთ. 11, 12). ამ მედგრობის მაგალითს გვაძლევს ჩვენ ქვრივი დედაკაცი, რომელიც მარად დღე ევედრებოდა **მსაჯულსა სიცრუისასა: მისაჯე მე წინამოსაჯულისაგან ჩემისა, ხოლო მან არა ისმინის მისი, ვიდრე რომლად ჟამადმდე**. ამ მედგრობით გაბეზრებულმა მსაჯულმა სთქვა: **დაღათუ ღვთისა არა მეშინის და კაცთაგან არ მრცხვენის, უსაჯო მას, რათა არა მარადის მოვიდოდეს და მანყინებდეს მე**.

ამ იგავით უფალმა გვასწავლა: ნუთუ ღმერთი არ შეისმენს ლოცვასა **რჩეულთა მისთა, რომელნი ღალატებენ მისა დღე და ღამე** (ლუკ. 18, 1-7)?

ლოცვის შეუსმენლობის მიზეზად უნდა ჩაითვალოს ცოდვათა შინა ყოფნაცა. ხშირად ადამიანი უკვე ჩადენილი ცოდვის შენდობისათვის როდი ევედრება ღმერთსა, როდი სცდილობს მოიშოროს ცოდვა თავითგან, განამზადოს გული თავისი სულის წმიდის ჭურჭლად, არამედ ვედრებასა და შესანიშნავსა მიართმევს უფალსა სხვა რაიმე მოწყალებისათვის. უფალმა კი უკვე ისაია წინასწარმეტყველის პირით გაგვაფრთხილა ამგვარი ლოცვისათვის. **ოდეს განიპყრეთ ხელნი თქვენნი ჩემდამო, ბრძანებს უფალი, მივაქცინე თვალნი ჩემნი თქვენგან, და უკეთუ განამრავლოთ ვედრება, არა შევისმინო თქვენი, რამეთუ ხელნი თქვენნი სისხლით (არიან) სავსე**. ხოლო თუ გნებავთ ვისმინო ვედრება თქვენნიო, გვამცნებს უფალი, **განიბანენით, წმიდა იქმნენით, მოსპენით უკეთურებანი სულთაგან თქვენთა წინაშე თვალთა ჩემთა, დასცხერით ბოროტთაგან თქვენთა, ისწავეთ კეთილის ქმნა, გამოიძიეთ მსჯავრი, უსაჯეთ ობოლსა და განამართლეთ ქვრივი** (ისაია 1, 15-17).

რად უნდა გვეუცხოვოს ამის შემდეგ ჩვენი ლოცვის შეუსმენლობა?!

ლოცვის უნაყოფობის მიზეზად შეგვიძლია ჩავთვალოთ თხოვნის ასრულების ურგებლობა. მოჰხდება ხოლმე, ჩვენ

ვევედრებით უფალს მოგვანიჭოს ისეთი რამ, რომელიც ჩვენთვის მავნებელი თუ არა, მარგებელი მაინც არ არის. ამ გვარი თხოვნა ჩვენი წარმოსდგება იქითგან, რომ მყოფადი ანუ მომავალი არ ვიცით; ამის გამო საგანს ყოვლის მხრით ვერ გავსჭვრეტთ და ის, რაც სულიერად ზრდისათვის მავნებელია, სასარგებლო გვგონია. ესეთი განუჭვრეტელობა სჩვევია არათუ ჩვეულებრივ ქრისტიანეს, არამედ ღვთივგანბრძობიდ პირთაცა. ნმიდა მოციქული პავლე სწერს: ხშირად **მქენჯნიდა** ერთგვარი სენით. **ამისათვის**, იტყვის მოციქული, **სამგზის ვევედრე უფალსა, რათა განმაშოროს ჩემგან**, მაგრამ უფალმა მამობრივი მზრუნველობის გამო უარი უყო ნმ. პავლეს, **რათა არა აღვიმალლო**, რომ არ შემეპაროს მე ამპარტავნებაო. უფალმა უბრძანა მას: **კმა არს შენდა მადლი ჩემი, ძალი ჩემი უძლურებასა შინა იქმნების-ო**, და მოციქულიც დასცხრა ვედრებად ამ სენისაგან განთავისუფლებისათვის (2 კორ. 12, 8-9).

მოციქულთან ერთად, ჩვენც რომ უარი გვეყოს ამგვარ შემთხვევაში საკვირველი იქმნება?

უკანასკნელ, უნდა აღვნიშნოთ ისიც, რომ ხანდახან უფალი განზრახ გვიგვიანებს თავის მოწყალებასა, რათა მოწყალების მოლოდინში სულითა და გულით მივენდვნეთ მას და განმტკიცდეს ჩვენი მისდამი სასოება. საუცხოვო მაგალითს ლოცვით სასოების განმტკიცებისას გვაძლევს ქანანელი დედაკაცი, რომლისა **ასული ეშმაკეულ** იყო. გაიგო რა იმ დედაკაცმა მისლვა უფლისა ადგილთა ტვიროსისა და სიდონისათა, იმ წამსვე მიიჭრა მასთან, **ჰლალადებდა და იტყოდა: შემინყალე მე, უფალო, ძეო დავითისო, რამეთუ ასული ჩემი ბოროტად ეშმაკეულ არს, ხოლო იესო არა მიუგო მას სიტყვა**. დედაკაცის უბედურებამ მიიქცია მოციქულთა ყურადღება და მათ სთხოვეს უფალს დედაკაცისათვის, მაგრამ პასუხად უარი მიიღეს. ამ უარმა დედაკაცის სასოება კი არა შეასუსტა, არამედ განაცხოველა კიდევ: **მოუხდა იგი იესოს, თაყვანის-სცემდა მას და ეტყოდა: უფალო, შემინყალე მე**. ხოლო თავადმა ჰრქვა მას: **არა კეთილ არს მოღებად პური შვილთაგან და დაგებად ძალთა**. ამ ებრაულმა ანდა-

ზამ უმეტეს განამხნევა დედაკაცი ქანანელი და ჰრქვა იესოს: **უფალო, ძაღნიცა სჭამედ ნაბიჭვეისაგან, რომელ გადმოსცვივიან ტაბლისაგან უფალთა მათთასა. მაშინ მიუგო იესო და ჰრქვა მას: ჰოი დედაკაცო, დიდ არს სარწმუნოება შენი, გეყან შენ, ვითარცა გნებავს. და განიკურნა ასული იგი მისი მიერ ჟამითგან** (მატთ. 15, 21-28).

როგორც ჰხედავთ, საყვარელნო, თუ ჩვენი ლოცვა მიზანს ვერ მოჰხვდება, ან მით აიხსნება, რომ ღირსნი არა ვყოფილვართ ღვთის მოწყალებისა, ან კიდევ მით, რომ უფალი გვიგვიანებს თხოვნის შესრულებასა. ცხადია, ლოცვაზე ხელი კი არ უნდა ავიღოთ, არამედ ღირსეულად მოვემზადნეთ მისთვის და განვაძლიეროთ იგი. სწორედ ამიტომ გვირჩევეს წმ. მოციქული **მოუკლებლად ილოცევდით-ო** (1 თეს. 5,17), ე. ი. მუდამ გონებაში გაქვნიდეთ მცნებანი უფლისა და ყოველივე განზრახვა, სიტყვა და მოქმედება შეუფარდეთ მათ. მოუკლებელი ლოცვა დაგვაახლოებს უფალთან, ნელ-ნელა გაგვითბობს ცოდვათაგან გაცივებულს გულსა და თავის დროზედ წარმოშობს სასურველს ნაყოფსა, ისე როგორც დედამინა, მზესთან მიახლოვებით, ზამთრის სუსხით თითქოს გამხმარის ხისაგან მოგვანვდის მწიფე ნაყოფსა...

მაშ შევევედრნეთ წმ. მთავარ მონამეს გიორგის, არა დასცხრეს იგი ვედრებად ჩვენთვის და თვისი მეოხებით ღირსგვყოს ქანანელ დედაკაცთან ერთად ვისმინოთ უფლისაგან: **გეყავნ თქვენ, ვითარცა გნებავს. ამინ.**

(წარმოითქვა ქვაშვეთში 1914. IV. 23;  
„Вестник Грузинского Экзагхата”, 1914, №8)



## ს ი ტ ყ ვ ა ქ რ ი ს ტ ა ნ ს შ ო ბ ი ს ღ ღ ე ს

*შობამან შენმან, ქრისტე ღმერთო,  
აღმოუბრწყინვა სოფელსა ნათელი მეცნიერებისა...*

ჰგალობს დღეს წმიდა ეკლესია და საფუძვლიანადაც ჰგალობს: ნათელი ჭეშმარიტის მეცნიერებისა აღმოუბრწყინდა კაცობრიობას მხოლოდ ქრისტეს შობის და მისი მოძღვრების გავრცელების შემდეგ. მანამდის კი კაცობრიობა გარემოცული იყო უმეცრების წყვდიადით და მისი საუკეთესო წარმომადგენლების ცდა, – გამოეყვანათ იგი ამ უმეცრების უფსკრულითგან, რჩებოდა უნაყოფოდ. მიზეზი ამ მოვლენისა ცხადია: კაცობრიობამ დაივიწყა **მხოლო ჭეშმარიტი ღმერთი** (იოანე 17, 3) და თაყვანი სცა ცის მნათობთა და მფრინველთა, ქვეყნის ოთხფეხთა და ქვენარმავალთა, ბუნების ძალთა და მოვლენათა, და თვით ადამიანსა და მის ვნებათა. ამის გამო, საითკენაც უნდა მიეხედ-მოეხედა ადამიანს, ყოველგან ღმერთები იყვნენ დაბუდებული და მას, სიკვდილისშვილს, ნება არ ჰქონდა შესულიყო ღმერთების საყოფელ-საბრძანებელში და თავის კვლევა-ძიებით შეენუხებინა და შეურაცხეყო იგინი! კაცობრიობის უმრავლესობაც დაემორჩილა ამ რწმენას და, უმეცრების წყვდიადში გახვეული, ლოცვა-ვედრებით ეგებებოდა ბუნების მოვლენათა და მსხვერპლ-შესანირავებით ცდილობდა მოემადლიერებია მძვინვარე მხეცნი, მის მიერ ღმერთებად შერაცხილნი. ხოლო თუ ვინმე გაკადნიერდებოდა და ეჭვის თვალთ დაუწყებდა ცქერას ამგვარს ღვთისმსახურებას და, მაშასადამე, მოინდომებდა ბუნების მოვლენათა და კანონთა შესწავლას და გამოკვლევას, მას ან წუთისოფელს გამოასალმებდნენ, ან არადა აიძულებდნენ სამუდამოდ გაშორებოდა მინა-წყალს; დიდებული სოკრატი იძულებული ჰყვეს თავი მოენამლა, ხოლო ნამდვილის მეცნიერების მამა არისტოტელი სამშობლოთგან გააძევეს, როგორც ღვთის უარისმყოფელი! აგრეთვე დღე დაუყენეს ბერს სხვას და მათ შორის არისტარქოს სამო-

სელს, რომელმაც ოცი საუკუნით უწინარეს გალილეისა გამოიკვლია, რომ დედამინა ტრიალებს მზის გარშემო და არა მზე – დედამინის გარშემო.

ნათელი მეცნიერებისა აღმოუბრწყინდა კაცობრიობას მხოლოდ მაშინ, როცა გავრცელდა კაცთა შორის ჭეშმარიტი მსოფლმხედველობა, ე. ი. მაშინ, როცა გავრცელდა ქრისტიანობა... ქრისტიანობამ ჰქადაგა, რომ ღმერთი არის სული დაუსაბამო და ცხოველი, რომ მან შექქმნა ცა და ქვეყანა და ყოველი, რაიცა არს მათ შინა, რომ ადამიანს, შექქმნილს ხატად ღვთისად, ნაბრძანები აქვს შემოქმედისაგან: **აღორძინდით და განმრავლდით, და აღავსეთ ქვეყანა და უფლებით მას; და მთავრობდით თევზთა და მფრინველთა ცისათა და ყოველთა პირუტყვთა და ყოველსა ქვეყანასა, და ყოველთა ქვენარმაველთა ქვეყანასა ზედა** (შექმნ. I, 28). ამ სახედ, ის, რაც წარმართების რწმენით ღმერთად იყო შერაცხილი, ქრისტიანობამ აღიარა **სამსახურებელად კაცთა** (ფსალმ. 103, 14), გაჩენილ-დაბადებულად; განდევნა ქვეყნითგან ცრუ ღმერთები და დაავალა ადამიანს, – მთავრობა და უფლობა გაენია ქვეყანაზედ, ხოლო როგორ შესძლებდა ადამიანი ბატონობის განევას ქვეყანაზედ, ან როგორ დაიმორჩილებდა ის თევზთა ზღვისათა, მფრინველთა ცისათა, პირუტყვთა ქვეყანისათა და თვით ქვეყნის ძალებს და კანონებს, – თუ არა მათის ბუნების შესწავლით და ამ შესწავლის შედეგით სარგებლობით?! მაშასადამე, ქრისტიანობამ, ადამიანის ქმნილებათა გვირგვინად და ქვეყნის ბატონად გამოცხადებით, მიანიჭა სწავლა-ძიებას, მეცნიერებას თავისუფლება და, აი, ამ თავისუფლებით აღჭურვილი კაცობრიობა თანდათან იმორჩილებს ბუნებას და მის ძალებს. ასე რომ, დღეს იგი მბრძანებლობს არამც თუ ცხოველებს, არამედ ცეცხლსა და წყალსა, ორთქლსა და ელექტრონსა, თავისუფლად ნავარდობს ზღვის სიღრმეში და ცის სივრცეში, ეძიებს და ჰპოულობს დედამინის გულში მრავალს მისთვის საჭირო და სასარგებლო ლითონებსა და ქვებს, სთხრის გვირაბებს და გაჰყავს გზები თვალუწვდენელ მთების ქვეშ, რაოდენიმე ათასის ვერსტის სიშორეზედ თავისუფლად ელაპარაკება ერთი მეორეს და სხვა...

ყოველივე ეს აღმოუბრწყინვა სოფელსა ამ 1909 წლის წინანდ განხორციელებულის უფლის იესო ქრისტეს სწავლამ და ამ სწავლაზე დამოკიდებულმა მსოფლიომდებელობამ, რაიც წინასწარ დაინახეს და საქვეყნოდ აღიარეს მოგვთა, აღმოსავალით მოსრულთა, რომელთა, იხილეს რა ყრმა იესო, **დავარდეს და თაყვანის-ჰცეს მას, და აღიღეს საუნჯეთა მათთა, და შესწირეს მისსა ძღვენი, – ოქრო, გუნდრუკი და მური** (მატთ. 2, 11)...

საყვარელნო! მოგვთა თაყვანის-ჰცეს უფალს იესო ქრისტეს მაშინ, როცა მისი სწავლა-მოძრვრება ჯერ კიდევ არა ჰქონდათ გაგონებული და არც თავიანთ თავს უწოდებდნენ ქრისტეს მორწმუნედ, ქრისტიანებად. ჩვენ კი, ქრისტიანებადაც ვუწოდებთ ჩვენს თავს, უფლის სწავლაც გვსმენია და მის მიერ დამყარებულის მეცნიერების თავისუფლების ნაყოფითაც გვისარგებლნია. მაშ, თაყვანის-ვჰსცეთ მას წრფელის გულით, შევსწიროთ მადლობა მეცნიერების ნათელის აღმობრწყინებისათვის და გულმოდგინედ ვთხოვოთ, განაძლიეროს ჩვენში კეთილის სწავლის ხალისი, მეცნიერებისადმი ლტოლვილება და ჭეშმარიტების სიყვარული!.. ამინ!

(წარმოითქვა ქვაშვეთში 1909. XII. 25;  
„შინაური საქმეები“, 1910, №2)

### ს ი ტ ყ ვ ა ქ რ ი ს ტ ა ნ ს შ ო ბ ი ს ღ ლ ე ს

*სადა არს, რომელი იგი იშვა მეუფე ურიათანა?..  
მოვედით თაყვანისცემად მისსა (მატთ. 2, 2).*

ჰკითხულობდნენ აღმოსავლეთით იერუსალიმს მოსრულნი მოგვნი და თავიანთის საკითხით ჩვენც გვაიძულებენ, გავიგოთ, თუ საითგან, ან როგორ დაიბადა საკითხი იგი წარმართთა შორის, და რამ აიძულა წარმართნი, რომ ურიათა მეფის თაყვან-საცემად წასულან?

ამ საკითხთა გამოსარკვევად საჭიროა, მოვიგონოთ ჩვენს ყრმობაში შესწავლულნი მოთხრობანი ებრაელთა ერის ისტორიისა. ვიცით, რომ დავით და სოლომონ მეფეთა მიერ შექმნილი საკმაოდ ძლიერი სამეფო ებრაელთა, სოლომონ ბრძნის მიცვალების შემდეგ, გაიყო ორ სამეფოდ. სამწუხაროდ, სულითა და ხორციტ მონათესავე ეს ორი სამეფო ერთმანეთის მძულვარებაჲმ, მტრობამ და ომებმა იმოძენად დაასუსტა, რომ გარეშე მტრებისათვის ადვილი შეიქმნა მათი დამხობა. პირველად ბოლო მოეღო ისრაელთა სამეფოს ასურთა ხელით, ხოლო ასის წლის შემდეგ ურიათა სამეფო მოაოხრეს ბაბილონელთა. დამარცხებულნი და დატყვევებულნი ებრაელნი ზოგი გაჰყიდეს, ზოგი გადაასახლეს, ხოლო ტყვეობას გადარჩენილნი იძულებულ-ჰყვეს, თავი შეეფარებინათ ეგვიპტისა და საბერძნეთ-რომისათვის.

ამ სახედ, ებრაელთა სამეფო მოისპო, მაგრამ ებრაელთა ერი არ მოსპობილა. ტყვეობასა და უცხოებაში იგი მალე გამოფხიზლდა და შეუდგა იმ მიზეზთა გამორკვევას, რის გამოც ენია მწარე ბედი. ამ ძიება-გამოკვლევამ ისრაელი დაარწმუნა, მიზეზად შენის უბედურობისა უნდა შეირაცხოს ღვთის ურჩობა და მის მცნებათა დავინწყებაო. [მას] მოაგონდა გაფრთხილებაჲცა სჯულისმდებელის დიდი მოსე წინასწარმეტყველისა: „აჰა, ესე რა მომიცემიეს თქვენ წინაშე დღეს-დღე ცხოვრება და სიკვდილი, კეთილი და ბოროტი, – უბრძანა მოსემ ებრაელთა ერს სიკვდილის წინადღებში, – ისმინო თუ მცნებანი უფლისა ღვთისა შენისანი, და შეიყვარო შენ უფალი ღმერთი შენი, და ხვიდოდე ყოველთა გზათა მისთა, სცხოვნდეთ და გაკურთხნეს, და განგამრავლოს ღმერთმან თქვენმან... უკეთუ გარდაი-რაიმე-იცვალოს გული შენი, და არ ისმონო შენ, და შესცოდდე და თაყვანის სცემდი შენ კერპთა უცხოთა და მსახურებდე შენ მათ, გაუნყებ შენ დღეს-დღე, რამეთუ წარწყმედით წარსწყმდეთ თქვენ და არა დღეგრძელ იყვნეთ თქვენ ქვეყანასა მას ზედა, რომელი იგი უფალმან ღმერთმან შენმან მოგცეს შენ“ (მეორე სჯულთა 30, 15-18).

შეიგნო რა ისრაილმა მიზეზი თავის უბედურობისა, მყისვე შეუდგა ღვთის სჯულის საფუძვლიანად შესწავლას, საკუ-

თარის ცხოვრების მასთან დაკავშირებას და მას ზედა დამყარებას. ამგვარმა მუშაობამ გამოიღო სასურველი ნაყოფი: ისრაილი გამოცოცხლდა, ზნეობრივად გაფაქიზდა, წელი გაიმაგრა, და ტყვეობასა და უცხოებაში საპატიო ადგილი დაიჭირა. წინასწარმეტყველი დანიელი, მისი მეგობრები: მარდოქე და ესთერი ფრიად ცნობილნი იყვნენ ბაბილონსა და სპარსეთში, და მათი სჯულიც დიდს ყურადღებას იქცევდა აღმოსავლეთის წარმართთა შორის.

უკეთ მოაწყეს თავიანთი სჯულის შესწავლის და გავრცელების საქმე ურიათა დასავლეთში: ეგვიპტეში, მაგალითად, მათ აღაშენეს იერუსალიმის ტაძრის ბაღლად ახალი ტაძარი, სთარგმნეს თავიანთი საღვთო წერილი ბერძნულად და საშვალეება მისცეს წარმართთაც, გაეცნოთ ეს უფსკრული და წყარო ჭემმარიტის ღვთის ცნობისა და მის სათნო ცხოვრებისა; ვრცელის იმპერიის თითქმის ყველა ქალაქში გახსნეს სალოცავ-შესაკრებელნი, იწყეს ქადაგება და თარგმანება სჯულისა და წინასწარმეტყველთა, და საქვეყნოდ განაცხადეს, არ გვეშინიან ტყვეობა-უცხოებისა, ვინათგან მალე დადგება დრო, ოდეს შეინწყნაროს უფალმან ნემტნი ერისა თვისისანი (იერემია 23, 3), და მოუვლინოს მას კვერთხი ძირისაგან იესესა (ისაია 11, 1), რომლისა სახელი არს აღმოსავალი მართალი (იქვე, 5), ემმანუელი – ჩვენთანა ღმერთი (ისაია 7,14), დიდისა განზრახვისა ანგელოზი, მთავარი მშვიდობისა, მამა-მერმეთა საუკუნისა (იქვე, 9,6). ისრაილთა ქადაგებამ მიიქცია წარმართთა ყურადღება. იმათაც სიხარულით იწყეს ლოდინი ამ სანეტარო დროის დადგომისა. ბევრისაგან ბევრმა წარმართმა დაუტევა მამა-პაპათა სარწმუნოება და მიიღო სჯული მოსესი. ამგვარი ხალხი, **მწირის** სახელწოდებით, ბლომად მოიპოვებოდა პართიასა და მიდიაში, შუამდინარეთსა და მცირე აზიაში, ეგვიპტესა და ლიბიაში, კვირინესა და რომში, კრიტესა და არაბეთში (საქმე მოციქულთა 2, 9-11) და სულყველანი მოუთმენლად მოელოდნენ ქრისტე ღვთის გამოცხადებასა. ეს მოლოდინი მით უფრო ცხოველდებოდა, რომ უკვე მოახლოვდა დანიელ წინასწარმეტყველის მიერ აღნიშნული სამეოცდაათთა შვიდეულთა

აღსასრული. ამის გამო, იმ დროის ებრაელთა მმართველნი, მაკაბელნი, თავიანთ თავს როდი უწოდებდნენ მმართველებად, არამედ დროებით გამგედ და წინამძღვრად, ვიდრემდის აღდგეს წინასწარმეტყველი სარწმუნო (1 მაკაბ. 14, 41) და თუ ვინმე მქადაგებელი ან წინასწარმეტყველი მიიქცევდა საზოგადოების ყურადღებას, მაშინვე დაიწყებდნენ კითხვას, – ნუჟუე ეს არს ქრისტე? (მატ. 11, 3; იოან. 1, 20).

ებრაელთა და მწირთა მოლოდინი ქრისტეზე ნელ-ნელა ვრცელდებოდა წარმართთა ფართო წრეებში. მით უმეტეს, რომ [ამას] ხელს უწყობდა თვით წარმართთა ზნეობრივი ყოფა: დიდებულნი სამეფონი ეგვიპტისა, ასურეთისა, ბაბილონისა, სპარსეთისა და ალექსანდრე მაკედონელისა დაემხვნენ და ადგილი დაუთმეს რომის საბრანებელსა. რომმა თავისი ბატონობა, სხვათა შორის, იმით აღნიშნა, რომ ამ ყოფილ სამეფოთა და სხვათა, მის მიერ დამორჩილებულ, ერთა ღმერთები თავის პანთეონში მოაგროვა და, ამ სახედ, ცხად ჰყო, რომ არც ერთი მათგანი არ იყო ჭეშმარიტი ღმერთი. ამ გარემოებამ კი დაჰბადა ურწმუნოება და უმეტესი ნაწილი საზოგადოებისა ჩააგდო გარყვნილების მორევში: უზომო სმაჭამა, უზრუნველი ცხოვრება, მრუშება, მეძაობა და უკანასკნელ, საკუთარის ხელით სიცოცხლის მოსპობა, – აი, მიზანი მათის არსებობისა.

საბედნიეროდ, საუკეთესო ნაწილი საზოგადოებისა ამ შავბნელს მსოფლიო მხედველობას ვერ შეურიგდა, და დაიწყო ძებნა მხსნელისა და მშველელისა, მაგრამ წარმართობამ იგი ვერ მისცა. აი, სწორედ ამ დროს ათხოვეს მათ ყური მწირთა და ებრაელთა მოლოდინს და სასოებით დაიწყეს ცქერა აღმოსავლეთისაკენ. რომაელების მეისტორიენი: სვეტონი და ტაციტი მოგვითხობენ, რომ მათ სამშობლოში და სხვაგანაც გავრცელებული იყო თქმულება, რომ მალე აღმოსავლეთში უნდა აღმოჩნდეს ისეთი მეფე, რომელმაც უნდა დაიპყრას ქვეყნიერება და მიანიჭოს მას ბედნიერება. ამ მწერალთა მიერ გადმოცემულს თქმულებას მეტის სიცხოვლით ასურათებს რომის მგოსანი ვირგილიოსი. ის ქება-დიდებით ამკობს იმ ყრმას, რომელიც ზეცით უნდა ჩამოვიდეს ქვეყნად

და აღადგინოს ოქროს საუკუნე; მან უნდა მიანიჭოს კაცობრიობას მშვიდობა, ქვეყანას პოხიერება, დაამყაროს ლომსა და კრავსა შორის მეგობრობა, შეუმსუბუქოს ტვირთი მძიმე ხარსა და მოსწმინდოს ტანჯვის ოფლი მხვენელ-მთესველსა. ცხადია, რომ მგოსნის აღფრთოვანებას კავშირი აქვს ისაია წინასწარმეტყველის სიტყვებთან: „ყრმა იშვა ჩვენდა ძე... და მშვიდობისა მისისა არა არს საზღვარ... მაშინ ძოვდენ მგელი კრავთა თანა, ვეფხვი თიკანთა თანა განისვენებდეს, და ზვარაკი და ლომი და კურო ერთად ძოვდენ... და ხარი დათვისა თანა ძოვდეს... ლომი, ვითარცა ხარი, ბზესა ჭამდეს... ყრმამან მცირემან ხვრელსა ზედა ასპიტისასა... ხელი დასდვას და არა რაი ძვირი უყოს მას” (ისაია 9, 6-7; 11, 6-9).

ამ გვარად, განთესულთა ებრაელთა მოღვაწეობით, ღვთის განგებამ მოამზადა ნიადაგი 1912 წლის წინათ განხორციელებულის ქვეყნის მაცხოვრის მოსვლისა და ქადაგებისათვის, ხოლო იქ, სადაც ცხოველ იყო ხსოვნაც ბალამ წინასწარმეტყველის მიერ ხილულის ვარსკვლავისა იაკობისაგან (რიცხვთა 24, 17), აღმოუბრწყინვა ვარსკვლავი, რომელმაც მიიყვანა მოგვნი იერუსალიმს და ებრაელთა გამოსაფხიზლებელად აკითხვინა: „სადა არს, რომელ იგი იშვა, მეუფე ურიათა? მოვედით თაყვანისცემად მისსაო“!..

დეე, ამ საკითხმა გამოგვაფხიზლოს, საყვარელნო, ჩვენცა და, მსგავსად მოგვთა, ღირს გვყოს კანდიერებით თაყვანისცემად მისსა, რომელსაც თექვსმეტის საუკუნის განმავლობაში წრფელის გულით მსახურებდნენ მამანი ჩვენნი და ანგელოზთა გუნდთა თანა უგალობდნენ: **დიდება მაღალთა შინა ღმერთსა, და ქვეყანასა ზედა მშვიდობა და კაცთა შორის სათნოება!** ამინ.

(წარმოითქვა ქვაშვეთში 1912. XII. 25;  
„შინაური საქმეები”, 1913, №2)

## მარხვან - ალვსებისანი

### მოდერება დიდმარხვის მეორე კვირიაქისა

*შვილო, მიგეტევნენ შენ ცოდვანი შენნი (მარკ. 2, 5)*

დღეს წაკითხული სახარება მოგვითხრობს, უფალი ჩვენი იესო ქრისტე კაპერნაუნის ქალაქში ასწავებდა ერთ სახლშიო. გაიგეს თუ არა, რომ იმ სახლში იმყოფებოდა უფალი, **მეყსეულად შეჰკრბა მუნ სიმრავლე ერისა, ვიდრემდე ვერლარა იტევდა წინაშე კართა მათ.** ამ ხმამ მიანია ერთის ვისიმე განრღვეულის ყურამდეც და იმანაც მოისურვა მისლვა უფალთან, მაგრამ ვინათგან თვით არ ძალეღვა სიარული, ამისათვის შეაბრალა თავი მოყვასთა და მეგობართა და უკანასკნელთაც აიღეს ცხედარი მისი და, **ზედ-კიდებული ოთხთაგან,** მიიყვანეს იმ სახლამდე, სადაც იმყოფებოდა უფალი. იქ კიდევ სხვა დამაბრკოლებელი მიზეზი გადაელობა განრღვეულის სურვილს: **მუნ იყო სიმრავლე ერისა** და ამის გამო სახლში შესლვა შეუძლებელი იყო. ხოლო ამ გარემოებამ სრულებითაც ვერ შეარყია სარწმუნოება განრღვეულისა. მას გაუორკეცდა სურვილი უფლის ხილვისა და განუცხოველდა იმედი სენისაგან განთავისუფლებისა, რის გამოც მის მომყვანთ აიტანეს ცხედარი განრღვეულისა სახლის ბანზედ, **აღძარცვეს სართული სახლისა მის, და აღიღეს და გარდაუტევეს ცხედარი იგი, რომელსა ზედა იდვა განრღვეული იგი.** იხილა რა უფალმა ესოდენი სარწმუნოება განრღვეულისა და მის მომყვანთა, **რქვა განრღვეულსა: შვილო, მიგეტევნენ შენ ცოდვანი შენნი, აღდეგ და აღიღე ცხედარი შენი და წარვედ სახიდ შენდა.** ამ სიტყვების შემდეგ, განრღვეული აღდგა, აღიღო ცხედარი თვისი და გამოვიდა წინაშე ყოვლისა ერისა.

ყურადსაღებია, საყვარელნო, რომ უფალმა არ უბრძანა განრღვეულს: აღდეგ, აღიღე ცხედარი შენი და წარვედ სახიდ შენდა, არამედ, შვილო, **მიგეტევნენ შენ ცოდვანი შენნი.** თითქოს განრღვეული მისულიყოს მასთან არა განკურნე-



ბის სათხოვნელად, არამედ ცოდვათა შენდობის მისაღებად.

ვისაც სურს, გაიგოს აზრი უფლის სიტყვებისა, უნდა იცოდეს, თუ რა არის ცოდვა და რა კავშირია ცოდვასა და ავადმყოფობას შორის. წმიდა მოციქული იოანე ამბობს, **ცოდვა უსჯულობა არისო** (I იოან. 3, 4), ე. ი. სჯულის გარდახდომა, მცნების დარღვევაო. ხოლო სჯული ანუ მცნება მოგვცა ჩვენ უფალმან მისთვის, რომ აღვასრულოთ იგი და მოვიპოვოთ სულის სიმშვიდე და ჯანის სიმრთელე. ორსავე ამ საშვალეობას ბედნიერებისას დაჰკარგავს ხოლმე ადამიანი, როცა იგი გვერდს აუხვევს ღვთის მცნებას და დაიწყებს ცხოვრებას თავის ნებაზედ, სჯულის გარეშე.

საუკეთესო საბუთს ამ აზრის სისწორე-სიმართლისას წარმოგვიდგენენ პირველქმნილნი მშობელნი ჩვენნი, ადამი და ევა. სანამდის ისინი ემორჩილებოდნენ ღვთის მცნებას, არ იცოდნენ ავადმყოფობა, ხოლო შესცოდეს თუ არა – მყისვე მიიღეს სამართლიანი მისაგებელი: **განმრავლებით განვამრავლნე მნუხარებანი შენნი და სულთქმანი შენნი**, უბრძანა უფალმან დედაკაცს, შემცოდეს ღვთის წინაშე, **მნუხარებით შენე შვილნი შენნი**-ო (შექმ. 3, 16). ამ ბრძანების შემდეგ კი კავშირი ცოდვასა და ავადმყოფობას შუა არამც თუ აღარ შეწყვეტილა, არამედ უფრო მკვიდრდება და ძლიერდება.

ასე რომ, თავისუფლად შეგვიძლიან ვსთქვათ, ყოველივე ცოდვა, ანუ ღვთის მცნების დარღვევა გამოიწვევს ადამიანის აგებულებაში ამა თუ იმ ცვლილებას სამნუხაროდ და საუბედუროდ. ავიღოთ, მაგალითად, სმა-ჭამა. თუმცა ადამიანი უსმელ-უჭმელი ვერ გასძლებს, დასნეულდება და მოკვდება, მაგრამ უზომო სმა-ჭამაც ამგვარსავე შედეგს გამოიწვევს ხოლმე: როცა ადამიანის სტომაქი მიიღებს ზომაზედ მეტს სასმელ-საჭმელს, მაშინ იგი ველარ განაგრძობს ჩვეულებრივ მოქმედებას, იძულებულია მეტი ძალ-ღონე მოანდომოს სასმელ-საჭმელის მონელებას, შეასუსტოს სისხლის მოძრაობის სისწრაფე და ხელი შეუშალოს გულისა და ტვინის რიგზედ მუშაობას. ყოველივე ამას კი მოსდევს სტომაქის გაგანიერება, გულის ფრიალი, გონების დაჩლუნგება და, თუ

დროზე არ მოისპო მიზეზი ავადმყოფობისა – უზომო სმა-ჭამა, სიკვდილი.

როგორც სჩანს წმიდის სახარებითგან, განრღვეულის ავადმყოფობა შედეგი იყო იმის ცოდვებისა და სანამ ეს ცოდვები კიდევ ბუდობდა განრღვეულის გულში, მანამდე მისი მორჩენა შეუძლებელი იყო. სწორედ ამისთვის განათავისუფლდა უფალმა მხურვალედ მორწმუნე განრღვეული ავადმყოფობის მიზეზისაგან – ცოდვათაგან და უბრანა პირველად: **მოგეტევნენ შენ ცოდვანი შენნი** და მხოლოდ შემდგომ: **აღსდევ, აღილე ცხედარი შენი და წარვედ სახიდ შენდა.**

საყვარელნო! მსგავსად განრღვეულისა, ბევრმა ჩვენგანმა უკვე მიიღო ამ ორი კვირის განმავლობაში უფლისაგან შენდობა ცოდვათა და ზიარება უხრწნელთა სისხლისა და ხორცთა მისთა. ეს ღვთისმონყალება კი გვავალებს, თავნი ჩვენნი დავიცვათ ცოდვათაგან, რათა არა ხელახლად დაგვიმორჩილოს მან და ჩაგვაგდოს უარესს მდგომარეობაში. **აჰა, ცოცხალ იქმენ**, უბრძანა უფალმა ოცდა-ათ-თვრამეტის წლის სენისაგან განკურნებულს დავრდომილს, **ნულარა სცოდავ, რათა არა უძვირეს გეყოს შენ** (იოან. 5, 14). ამინ.

(წარმოთქმულია 1913 წ. ქვაშვეთში; „ქადაგებანი“, №3)

ს ი ტ ყ ვ ა  
დიდ პარასკევს,  
ბარდამოხსნის ბამოსკვნების შემდეგ

**ესეცა წერილი აღსრულებულ არს** (იოან. 19,30)! დიახ! აღსრულდა განგება ღვთისა, გამართლდა მოლოდინი მამათმთავართა, ცხად იქმნა წერილი წინასწარმეტყველთა: უფალმა ჩვენმა იესო ქრისტემ შესწირა თავი თვისი მსხვერპლად ყოველთა და მით გაათავისუფლა ეშმაკისა და ცოდვისაგან დამონებული კაცობრიობა! **ერთისა მის კაცისათვის**, რომელმაც დაარღვია ღვთის მიერ მიცემული მცნება, **ცოდვა სოფლად შემოხდა, და ცოდვისა ძალით სიკვდილი; და ეს-**

**რეთ ყოველთა კაცთა ზედა სიკვდილი მოიწია, რომლითა ყოველთა შესცოდეს** (რომ. 5, 12). ხოლო შეცოდება ესე იყო შეურაცხება თვით შემოქმედისა, და ამისათვის ცოდვას თან მოჰყვა წყევა და სიკვდილი, რომელთაგან გათავისუფლება კაცობრიობას ვერ ძალ-ედეა.

და აი, ძე ღვთისა, უფალი იესო, განუზომელისა კაცთმოყვარებისა და სახიერებისამებრ თვისისა, გარდამოხდა ზეცით, ხატი მონისა შეიმოსა, ქვაბსა შინა იშვა, თავი თვისი დაიმდაბლა ისე, რომ **არა აქვნდა სადა თავი მიიდრიკოს** (მატთ. 8, 20), დღე ყოველ, სიტყვით თუ საქმით, კეთილსა უყოფდა ურიათა. ხოლო მათ იგი შეურაცხყვეს, სდევნეს, შეიპყრეს, უსამართლოდ განსაჯეს, სახესა ზედა ნერწყვეს, ლელწმითა გვემეს, ყვრიმალსა სცეს, ჯვარს აცვეს, იქაც კი ემღერედეს (დასცინოდენ). ხოლო, ყოვლად მონყალემან, ყოველივე ესე დაითმინა, რათა ცოდვანი ჩვენნი თავს ედო, ჯვარსა შეემსჭვალა, [რათა] აურაცხელის ტანჯვის შემდეგ სული განეტევებინა ძელსა ზედა ჯვარისასა და ჩვენ გავეთავისუფლებინეთ ცოდვისა, წყევისა და სიკვდილისაგან!

და, აჰა, ხატი მისი, ოდეს გარდამოიღეს ჯვარისაგან: თავი მისი შემოსილია ეკლის გვირგვინით, ხელნი და ფერხნი განმსჭვალულია ლურსმითა, გვერდი განგმირულია ლახვრითა, ღანვთა ზედა ცხადად სჩანს კვალი ყვრიმალის-ცემისა, სახესა ზედა – ნერწყვისა, ბაგეთა ზედა – ნაღვლისა ძმრით გაზავებულისა... ყოველივე ეს დაითმინა უფალმა, მხსნელმა და მაცხოვარმა ჩვენთვის და ჩვენისა ცხოვრებისათვის: ჩვენმა გულმალლობამ და ამპარტავნებამ დაადგა თავსა მისსა გვირგვინი ეკლისა, ჩვენმა განცხრომისა და ფუფუნების მოყვარებამ მიაყენა მას გვემა და ყვრიმალის-ცემა, ჩვენმა სიხარბემ და გაუმაძღრობამ ასვა მას ძმარი და ნაღველი, ჩვენმა ავხორცობამ და გარყვნილებამ შემსჭვალა იგი ჯვარსა ზედა, ხოლო აურაცხელმა და სახელდაუდებელმა უსჯულეობამ ჩვენმან სტანჯა და მოჰკლა იგი...

რა შეგვშვენის ჩვენ, საყვარელნო, დღეს, ყოველივე ამის მომგონებულთ და შემოკრებულთ გარეშემო ხატისა – ჯვარისაგან გარდმოსხნილისა გვამისა უფლისა და მაცხოვრისა

ჩვენისა? ყოველივე ამის მომგონებელთ შეგვშვენის ტირილი და მხოლოდ ტირილი, მაგრამ ტირილი არა უფლისათვის, არამედ ჩვენთვის და თავთა ჩვენთათვის: **ასულნო იერუსალიმისანო**, უბრძანა უფალმა დედათა, რომელნი სტიროდნენ, ხედვიდნენ რა იესოს მიმავალს გოლგოთაზედ, **ნუ სტიროთ ჩემთვის, არამედ თავთა თქვენთა სტიროდეთ და შვილთა თქვენთა** (ლკ. 23, 28)! მაშ, ვიტყვით ჩენცა თავთა ჩვენთათვის; ვიტყვით ცოდვათათვის სიჭაბუკისათა, რომელმაც განვლო უქმად, ხორციელებრივის სიამოვნებისა და ბოროტთა განზრახვათა აღსრულების მოლოდინში; ვიტყვით ცოდვათათვის მამაკაცობისა ჩვენისა, ვინათგან იგი შევსწირეთ თავმოყვარეობას, ანგარებას და ავხორცობას; ვიტყვით ცოდვათათვის მოხუცებულობისა ჩვენისა, ვინათგან წელთა სიგრძემ ვერ თავისუფალ-გვყო ვნებათა ღელვათაგან; ვიტყვით მრავალთა და აურაცხელთა ცოვათათვის ჩვენთა, რომელთაც ჩვენ კვალად ჯვარს ვაცვამთ უფალსა და მაცხოვარსა ჩვენსა; ვიტყვით ძეთა და ასულთა ჩვენთათვის, რომელთა ქრისტიანობრივ აღზრდა-სწავლისათვის ჩვენ სრულებითაც არა ვზრუნავთ; ვიტყვით სამართლად ჩვენზედა მომავალისა რისხვისათვის; შევინანოთ შეცოდებანი ჩვენნი, დავსდვათ აღთქმა წინაშე საფლავსა შინა მდებარისა უფლისა ჩვენის გასწორებისათვის, ჩვენის საქციელის აწონ-დაწონისა და განსჯისათვის, ჭეშმარიტს გზაზედ დადგომისათვის, ქრისტეს მცნებათა აღსრულებისათვის, და შევსთხოვოთ მას, რათა სახიერებითა და კაცთმოყვარებითა თვისითა გარე წარაქციოს რისხვა მარად-დღე ჩვენზედა მომავალი, და შეგვიწყალებს ჩვენ!

(წარმოითქვა ქვაშვეთში 1913 წ.; „ქადაგებანი“, №4)

ს ა ა ღ დ გ ო მ ო ე პ ი ს ტ ო ლ ე

ნ ყ ა ლ ო ბ ი თ ა ღ ვ თ ი ს ა თ ა

მ და ბ ა ლ ი კ ა ლ ი ს ტ რ ა ტ ე

ს რ უ ლ ი ა დ ს ა ქ ა რ თ ვ ე ლ ო ს კ ა თ ო ლ ი კ ო ზ - პ ა ტ რ ი ა რ ქ ი \*

ქ რ ი ს ტ ე ა ღ დ გ ა !

ქრისტეანულ დღესასწაულთა შორის უმეტესი სიხარულით ვეგებებით ხოლმე აღდგომას, როდესაც მრავალგზის გვესმის მღვდელმსახურებაში: **ქრისტე აღდგა მკვდრით, სიკვდილითა სიკვდილისა დამთრგუნველი და საფლავების შინათა ცხოვრების მიმნიჭებელი!** და აი რატომ:

ადამიანისათვის ქვეყნიურ კეთილთა შორის სიცოცხლეზე უძვირფასესი არა არის რა, – მას ვერავითარი განძით ვერ შეისყიდით. რად უნდა ადამიანს ოქრო და ვერცხლი, თვალი და მარგალიტი, თუ თვითონ აღარ იქმნება! პირიქით, ჩვენ ყველაფერს, რაც კი მოგვეპოება, გავიღებთ, ოღონდ შევინარჩუნოთ სიცოცხლე, აღვზარდოთ, განვავითაროთ ჩვენი თავი სულიერად და ხორციელად, მივალწიოთ კეთილდღეობას, დავიჭიროთ საზოგადოებაში საპატიო ადგილი... უმეტეს შემთხვევაში ჩვენი ასეთი მისწრაფება განხორციელდება მაშინ, როდესაც ხანში შევდივართ უკვე და როდესაც ჩვენს წინაშე დგება საკითხი, – სანამდის გასტანს ჩემი სიცოცხლე, – 60, 80, 100 და იქმნება მეტ წელსაც? შემდეგ? სიკვდილი, დადუმება, უმოძრაობა, დასაფლავება, გაქრობა და მოსპობა? ეს საკითხი შიშსა და ძრწოლას მოგვეგვრის ხოლმე, და კიდევ ვეკითხებით ჩვენს თავს: ნუთუ სიკვდილის შემდეგ აღარა რჩება რა, ნუთუ იგი აქრობს ჩვენი არსების იმ ნაწილსაც,

---

\* დედანი: ცინცაძე 97, ფფ. 102-103 (ეს და კათალიკოსობის დროს წარმოთქმულ ქადაგებათა ტექსტები „სიტყვათა კრებულში“ კალენდრის რიგისაგან განცალკევებით დგას).

რომელსაც სულს ეძახიან და რომელიც ამოძრავებს სხეულს, აზროვნებას, აკვირდება გარშემო ბუნებას, სწავლობს მის კანონებს და მოვლენებს, იმორჩილებს ზღვასა და ხმელეთს, ჰაერსა და ცეცხლს და ბატონობს მათზე?

ჩვენი გონება ამ საკითხის უარყოფითად გადაჭრას ვერ ურიგდება და ეძებს გამოსავალს, საბუთს სიკვდილის შემდეგ სულის არსებობისათვის.

საბედნიეროდ, ჩვენ ვპოულობთ ამ საბუთს ორ სიტყვაში:

### **ქრისტე აღდგა!**

ამის შემდეგ იწყება აზრთა სხვაგვარი მიმდინარეობა: ვინაიდან ქრისტე აღდგა, ჩანს, სიკვდილის შემდეგ მისი სული არ გამქრალა, ის მხოლოდ დროებით განშორებია სხეულს, რათა კვლად შეერთებოდა მას. აქედან, ცხადია, არც ჩემი სული მოკვდება და თავის დროზე მეც აღვდგები. ასეთ მსჯელობის სისწორეს გვიდასტურებს წმ. მოციქული პავლეც: **ქრისტე აღდგა მკვდრეთით და იქმნა იგი დასაბამ შესვენებულთა (აღდგომისა)... პირველად ქრისტე და მერმეთ ქრისტესნი (1 კორ. 15, 20-23).**

ახლა კი გასაგებია, თუ რატომ ვეგებებით აღდგომის დღესასწაულს უდიდესი სიხარულით: იგი ჩვენი პირადი გამარჯვებაც არის სიკვდილზე: ქრისტე აღდგა, ჩვენც აღვდგებით; ქრისტე ცოცხალია, ჩვენც სიკვდილის შემდეგ ცოცხალი ვიქმნებით. მაშ, **ვიხარებდეთ და ვიშვებდეთ დღესა ამას!**

საყვარელნო! დღევანდელ ბრწყინვალე დღეს, როდესაც ტაძრებსა და სახლებშიც სრულის სიმშვიდით ვზეიმობთ ქრისტეს მიერ სიკვდილითა სიკვდილის დათრგუნვას, მადლობითა და სიყვარულით მოვიგონოთ სახელოვანი და ძღვევით შემოსილი ჩვენი არმია, რომელიც წარმატებით აწარმოებს ბრძოლას შემოსეულ მტერთან და გვაძლევს შესაძლებლობას მყუდროებით ცხოვრებისას. გულმხურვალედ შევავედროთ იგი მკვდრეთით აღდგომილ მაცხოვარს, ადრე და მალე მისცეს მას სრული გამარჯვება მოძალადეთა ზედა, და მშვიდობითა და სიმრთელით დაუბრუნოს მშობლიო კერას

უებრო მამულიშვილები, რათა მათთან ერთად განვაგრძოთ აღმშენებლობითი მუშაობა საყვარელ სამშობლოს აკლებულ-აოხრებულ ნაწილების აღსადგენ-ასაყვავებლად.

## ქრისტე აღდგა!

1943 წ. პასეჟი (№1010)

(დაეგზავნა მოძღვრებს ტაძარში  
წარმოსათქმელად. კ.-პ.კ.)

მოდვრება  
სამარიტელის კვირიაკესა

(სახარება იოანესაგან 4, 5-42)

დღეს წაკითხული სახარება მოგვითხრობს, უფალი იესო ქრისტე იერუსალიმით გაემგზავრა გალილეასო. უმოკლესი გზა მიდიოდა სამარიაზე. დილით წასული იესო და მოწაფენი მისნი შუადღისას მივიდნენ სუქარ ქალაქთან, რომლის მახლობლადაც იყო **წყარო იაკობისი**. დაღლილ-დამაშვრალი იესო ჩამოჯდა წყაროს პირას, ხოლო მოწაფენი წავიდნენ **ქალაქად, რათა საზრდელი იყიდონ**. ამ დროს წყაროსთან მოვიდა სამარიტელი დედაკაცი, რომელსაც **ჰრქვა იესო: მასუ მე წყალი**. უფლის თხოვნამ გამოიწვია ხანგრძლივი საუბარი დედაკაცთან. საუბრის დასასრულ დაბრუნდნენ მოციქულებიც და რა იხილეს მოძღვარი, გაუკვირდათ, **რამეთუ დედაკაცისა თანა იცყოდა**.

მოციქულთა გაკვირვების მიზეზი არ იყო მოძღვრის საუბარი დედაკაცთან, როგორც სამარიტელთან, თუმცა **არა შეეხნიან ურიანი სამატიტელთა**, ვინაითგან მოციქულნი თვით იყვნენ სამარიტელთა ქალაქში, სამარიტელთაგან იყიდეს საზრდელი და გზაშიც შეხვდებოდნენ სამარიტელთა. არა, მიზეზი მათი გაკვირვებისა უნდა ვეძიოთ თვით საუბარ-

ში **დედაკაცისა თანა**. რაბინთა ანუ ფარისეველ-მნიგნობართა სწავლით, რომლის გავლენისგან ჯერ კიდევ ვერ განთავისუფლებულიყვნენ მოციქულნი, მამაკაცისათვის საძრახისი იყო დედაკაცთან საქვეყნოდ, სხვის დასანახავად საუბარი, თუნდა ის დედაკაცი მისი ცოლი ანუ და ყოფილიყო. მათი შეხედულობით, დედაკაცი გზაში შეხვედრის დროს სალამის ღირსიც კი არ იყო. მით უმეტეს დასაძრახი იყო სჯულის მასწავლებლის ანუ მქადაგებლის დედაკაცთან საუბარი, ვინათგან ეს საუბარი უნაყოფოდ დარჩებოდა. „ვინც ასულსა თვისსა ასწავებს სჯულსა, ამბობდნენ რაბინები, იგი იქმს უგუნურებასა“ ანუ: „უმჯობესია ალსა ცეცხლისასა მიეცეს სიტყვანი სჯულისანი, ვინემ გადაეცეს იგი დედაკაცთა“. რაბინთა ამგვარმა სწავლამ გამოიწვია მოციქულთა გაკვირვება, თუმცა გაკვირვება ესე მათ დაიმარხეს გულში და ვერ შეჰკადრეს მოძღვარს, ჰკითხონ, – **რასა იტყვი მისთანა?**

საგანი კი, რომლისთვისაც უფალი **დედაკაცსა თანა იტყოდა**, ფრიად საგულისხმო და ყურადსაღები იყო. რაითგანაც ნყლის თხოვნით გამონვეულმა საუბარმა სამარიტელი დედაკაცი დაარწმუნა, რომ წინაშე მისა იმყოფება არა უბრალო ურია, არამედ **წინასწარმეტყველი**, მიჰმართა მას საკითხით, რომელიც, ერთის მხრით, გვაცნობს სულიერ განწყობილებას ამა დედაკაცისას, და რომელსაც, მეორის მხრით, არსებითი მნიშვნელობა ჰქონდა მრავლისაგან უმრავლესის ადამიანისათვის: **მამანი ჩვენნი**, ჰრქვა დედაკაცმან, **მთასა ამას თაყვანისცემდეს, და თქვენ იტყვიით, ვითარმედ იერუსალიმს არს ადგილი, სადა ჯერ არს თაყვანისცემა**. სჩანს, ამ საკითხის პასუხი დიდხანს უძებნია სამარიტელ დედაკაცს, მაგრამ ვერავისგან მიუღია: სამარიტელნი გარიზიმის ტაძრის ნანგრევებს სთვლიდნენ ერთადერთ ღვთის თაყვანის-საცემ ადგილად, ხოლო ურიანი იერუსალიმის ტაძარსა. დედაკაცის გონება კი ამგვარს პასუხს ვერ შეჰპრიგებოდა და მოელოდა უტყუარს, დამაკმაყოფილებელ პასუხს მესიასაგან, **რომელსა ჰრქვიან ქრისტე**. დიახ! უტყუარს პასუხს დედაკაცი იგი მოელოდა ქრისტესგან, მაგრამ, საუბედუროდ, არ იცოდა, როდის მოვიდოდა მაცხოვარი,



თუმცა სულითა და გულით დარწმუნებული კი იყო, **ოდეს მოვიდეს იგი, გვითხრას ჩვენ ყოველი.** და, აი, ამ შეურყეველის სარწმუნოებით, მესიის მოლოდინის გამო, ბედნიერჰყო სამარიტელი დედაკაცი განხორციელებულმა ჭეშმარიტებამ უტყუარის პასუხის მიცემით: **მოვალს ჟამი და აწვე არს, ბრძანა უფალმა, ოდეს ჭეშმარიტნი თაყვანის-მცემელნი თაყვანს-სცემდეს მამასა სულითა და ჭეშმარიტებითა... რამეთუ სულ არს ღმერთი, და თაყვანის-მცემელთა მისთა სულითა და ჭეშმარიტებითა თანა-აძს თაყვანის-ცემა.** ღმერთი სული არს, სული განუსაზღვრელი, ყოველგან მყოფი და ყოველისა მცოდნე, და ვინც იცნობს უფალს ამ სახედ, მას შეუძლიან, თაყვანის-სცეს მას არა თუ იერუსალიმში, გინა გარიზიმის მთაზედ, არამედ **ყოველსა ადგილსა უფლები-სა მისისასა** (ფს. 102, 22) და **ყოველსა შორის თესლსა და თესლსა** (ფს. 144, 13). ეს დიდებული სიტყვები, ღვთის სულითა და ჭეშმარიტებით თაყვანის-ცემისათვის, ურიათათვის ჯერ კიდევ უცნობი და გაუგებარი, სამარიტელ დედაკაცს სრულებითაც არ გაჰკვირვებია, რაითგანაც ამ სიტყვების მოლოდინით სულთ-იდგამდა იგი და ნუგეშინის-იცემდა, მხოლოდ მათ გაგონებას მოელოდა არა წინასწარმეტყველისაგან, რომელიც, მისის აზრით, იდგა იაკობის წყაროსთან, არამედ მესიასაგან, **რომელსა ჰრქვიან ქრისტე.** ხოლო როცა უფალმან განცხადებულად ჰბრძანა: მესია **მე ვარ, რომელი გეტყვი შენ-აო,** მოძმეთადმი სიყვარულით აღვსილმა გულმან სამარიტელის დედაკაცისამან არ ინება მარტო დამტკბარიყო ამ სანეტარო ცნობითა, – მან **დაუტევა სარწყული იგი მისი და წარვიდა ქალაქად და უთხრა კაცთა მათ: მოვედით და იხილეთ კაცი, რომელმან მითხრა მე ყოველი, რადცა ვქმენ. ნუჟკვე იგი არის ქრისტე?! სამარიტელთაც** გაიზიარეს დედაკაცის სიხარული, ისმინეს მისი, მივიდნენ იესოსთან და **ვედრებოდეს მას, რათა დაადგრეს მათთანა.** უფალმა შეიწყნარა ვედრება სამარიტელთა, წავიდა მათთან, **დაადგრა მუნ ორდღე და უფროსსა სიმრავლესა ჰრწმენა სიტყვათა მისთა.**

ამ სახედ, გამუდმებულმა ქრისტეს მოლოდინმა და სიყ-

ვარულმა ნახევრად წარმართი სამარიტელი დედაკაცი ღირსჰყო უფლის ხილვასა, მასთან საუბარსა და მისგან ღვთის სულითა და ჭეშმარიტებით თაყვანის-ცემის სწავლასა, შეჰქმნა იგი სამარიტელთათვის ქრისტეს სჯულის ქადაგად, ხოლო მოციქულთათვის რაბინთა [მიერ] დედაკაცზედ შემცდარის შეხედულობის გავლენისაგან განმათავისუფლებლად. ყოვლისავე ამისათვის, და აგრეთვე კართაგენსა და რომში ქრისტეს სწავლის გავრცელებისათვის, წმიდა ეკლესიამ განაწესა ხსენება წმ. მონამისა ფოტინესი, – ესე არს სახელი სამარიტელის დედაკაცისა, – 20 მარტსა.

მივბაძოთ ჩვენცა, საყვარელნო, წმ. ფოტინეს, ხელი შეუწყოთ ჭეშმარიტის ღვთის ცნობის გავრცელებას ჩვენს თანამოძმეთა შორის, განვამტკიცოთ ქრისტეს სჯულზედ მოზარდი თაობა და ვასწავოთ მას საკუთარის ცხოვრებით და მაგალითით – **ღვთის თაყვანისცემა სულითა და ჭეშმარიტებითა.** ამინ.

(წარმოითქვა ქვაშვეთში 1913 წ.; „ქადაგებანი“, №5)



## საპანაშვიდო და საპარაკლისო სიტყვები

სკოლა და კულტურა

### ს ი ტ ყ ვ ა სწავლის დაწყების ბამო

მოგილოცავთ, ყმანვილებო, ზოგიერთს – ჩვენს სკოლაში შემოსლვას, ხოლო დანარჩენთ – სწავლის განგრძობის დასაწყისს და წრფელის გულით გისურვებთ, მტკიცედ შეითვისოთ მომავალს წელში **გარდმოცემული თქვენდა სწავლა**, რომ ამ სწავლით განბრძნობილნი **ალიზარდნეთ ღვთის სადიდებლად, მშობელთა სანუგეშოდ და ეკლესიისა და მამულისა სასარგებლოდ!**..

ამ მოლოცვასთან ერთად, საჭიროდ ვსთვლი, მოგაგონოთ იგავი მონათა ზედა, რომელთაც მიიღეს უფლისაგან ერთი, ორი და ხუთი ტალანტი (მატ. 25. 14-30). როგორც უფალმა რამდენისამე ხნის შემდეგ მოსთხოვა მონათა თვისთა ანგარიში, თუ რა უყვეს მის მიერ მინიჭებულ ტალანტსა, აგრეთვე თქვენც, საყვარელო, წლის გასულსა მოგთხოვენ ანგარიშს, თუ როგორ გაატარეთ ეს სასწავლო წელი. როგორც უფალმა შეაქო და შერაცხა **სახიერად და სარწმუნოდ** ის ორი მონა, რომელთაც თავის შრომით განამრავლეს უფლისა მიერ მინიჭებული ტალანტი და **დაადგინა** იგინი **მრავალთა ზედა**, ისე შეაქებენ და უწოდებენ მონად კეთილად და სარწმუნოდ მათ თქვენგანს, რომელნიც კარგის ყოფაქცევით და ბეჯითობით გამოიჩინენ თავს და საფუძვლიანად შეითვისებენ გარდამოცემულს სწავლასა; მათ დაადგენენ მრავალთა ზედა, ე. ი. გადაიყვანებენ შემდეგს კლასში და აზიარებენ უმეტესსა და უვრცელესს ცოდნასა!..

სამაგიეროდ, მათ, რომელნიც მსგავსად მონისა მცონარისა და ზარმაცისა, **დამალავენ ქვეყანასა** უფლისაგან მინიჭებულ ტალანტსა, ე. ი. ცუდის სწავლით და უვარგისის ყოფა-ქცევით გამოერჩევიან ამხანაგთაგან, შერაცხენ მონად **ბოროტად და მედგარად და განხდიან ბნელსა გარესკნელსა**, ე. ი. განაშორებენ ტოლთა და მეგობართაგან და დასტო-

ვებენ იმავე კლასში, ანდა – სრულებით მოაშორებენ ამ ცოდნისა და განათლების ტაძარსა!..

რომელსამე თქვენგანს რომ არ ენიოს ეს სამწუხარო და სავაგლახო მხვედრი, შევევედროთ, ყმანვილებო, ზეციერს მამას, რათა მან კეთილჰყოს დასაწყისი ამ სასწავლო წლისა, ნაყოფიერ – მიმდინარეობა და გვირვინოსან – დასასრული მისი!.. ამინ.

(ნარმოითქვა ქართულ გიმნაზიაში  
1913, IX, 3; „განათლება“ 1913. №7)

### ს ი ტ ყ ვ ა სწავლის დაწყების გამო

ყმანვილებო! დღეს თქვენ შეკრებულხართ აქა ღვთის კურთხევის გამოსათხოვად სწავლის დაწყების წინ. ღვთის კურთხევას მით უფრო საჭიროებთ, რომ ბევრი რამ გაქვთ შესასწავლი და შესათვისებელი...

მართლაც, თქვენ უნდა შეისწავლოთ სჯული უფლისა, გარდმოცემული ღვთისმხილველ მამათმთავართა, წინასწარმეტყველთა, და მოციქულთა მიერ...

ამასთან ერთად უნდა შეითვისოთ სჯულიც უფლისა იგი, რომელიც შემოქმედმა წესად დაუდვა ბუნებას და რომლის ძალითაც მილიონობით ცის კამარაში მოციმციმე ვარსკვლავ-მნათობნი განაგრძობენ თავისებურ ცხოვრებას და არ ივიწყებენ, დაუმორჩილონ თავის გავლენას ჩვენი ხნიერი დედამიწაც...

მეტის დაკვირვებით უნდა შეისწავლოთ თავგადასავალი ამ ჩვენის სამკვიდრო დედამიწისა, მისი ანმყო და წარსული, მისი ადგილი ღვთის ქმნილებათა შორის და წესები მისის არსებობისა, მინერალები და მეტალები, მცენარეები და ცხოველები, მწერები და მფრინველები, რომლებიც მოიპოებიან დედამიწის ზურგზედ და მის გულში, ზღვის სიღრმეში და ჰაერთა სივრცეში...

განსაკუთრებით კი ყურადღებით უნდა შეისწავლოთ გვირგვინი ქმნილებისა – ადამიანი და მის მიერ აღბეჭდილი

კვალი ცხოვრებისა: როგორ და რანაირად მოახერხა მან, ღვთის მიერ სამოთხით განდევნის შემდეგ, განეთავისუფლებინა თავი ბუნების მოვლენათა და მხეცთა შიშისაგან, შეეცადა, პირიქით, მათ დამორჩილებას, სძლია ზღვა და ჰაერი, და დაადგა გზას, რათა ღვთის მიერ დანიშნულს მიზანს მოსწეოდა – გამხდარიყო უფლად და ბატონად ქვეყანასა ზედა...

თუ მიიღებთ მხედველობაში, რომ აღნიშნულის გარდა, კიდევ ბევრი რამ უნდა შეისწავლოთ, დამეთანხმებით, დიდი შრომა და მეცადინეობა გმართებსთ მომავალ სასწავლო წელში...

მერმე, ვინ უნდა შეგაძლებინოსთ ამოდენა შრომის ატანა და შეგიმსუბუქოსთ მძიმე ტვირთი? ყველაზე უნინ თქვენი მშველელი უნდა იყვნენ და არიან კიდევაც მშობელი და მასწავლებელი, – თქვენს საკეთილდღეოდ ისინი არაფერს დაიშურებენ. მაგრამ არ უნდა დაივიწყოთ, რომ ჩვენც ადამიანები ვართ და ვსაჭიროებთ შეწევნასა და ძალის მოღებას ყოველთა მშობელისა, შემოქმედისა და მასწავლებელისაგან...

მაშ, საყვარელნო, შევევდრნეთ ყოველნი მას, ტკბილსა და სახიერს, მოგვანიჭოს ძალი და სიმხნე, ზაფხულის გამო შეწყვეტილის, სწავლის განგრძობისა და უმეტესის ცოდნის შექენისა... ამინ.

(წარმოითქვა ქართულს გიმნაზიაში 1914. IX. 1;  
„განათლება“ 1914, №75)

## ს ი ტ ყ ვ ა სწავლის დაწყების გამო

ყმანვილებო! ღვთის შეწევნით, დღევანდელი დღითგან უნდა განვაგრძოთ მეცადინობა. ამ კეთილისა და ღვთის სათნო საქმისათვის ყველაფერი ხელს გინყობსთ: ეს ახლად ნაკურთხი საკუთარი ეკლესია, სადაც თქვენ შეგიძლიანთ ყოველდღე გადაუშალოდთ სული და გული ზეციერ მამას და გამოითხოვოთ **მადლი ყოვლადწმიდისა სულისა, მომნიჭე-**

**ბელი და განმადლიერებელი ძალთა სულთა თქვენთასა;**  
თვით ეს დიდებული ტაძარი განათლებისა, ჩვენის ერის საუკეთესო შვილთა მეცადინეობით თქვენთვის საგანგებოდ მოწყობილი და გამართული; თქვენი მშობლების განზრახვა – მოგანოდონ, მიუხედავად საკუთარის გაჭირვებისა, ცხოვრებისა და სწავლისათვის საჭირო საშვალეზანი; ეს კრებული სწავლისა და აღზრდის საქმეში დახელოვნებულ და გამოცდილ მასწავლებელ-აღმზრდელთა, და მრავალი კიდევ სხვა...

დიახ, ყოველივე ეს ხელს გიწყობსთ, მაგრამ, მერწმუნენით, თუ თქვენ თითონ არ გამოიჩინთ სწავლის სურვილსა და ხალისს, – ყოველივე ამას იქმნება. უფალი ხომ ყოვლადშემძლებელია, მაგრამ ისიც კიო, ამბობს ერთი წმიდა მამათაგანი, ვერ შესძლებს ადამიანის ცხოვნებას, თუ თვით ადამიანმა არ მოინდომა ცხოვნებაო. ცხადია, თუ თვით უფალი ვერ აცხოვნებს ადამიანს მისდა უნებურად, ვერც თქვენი აღმზრდელ-მასწავლებელი შესძლებენ თქვენს აღზრდა-განსწავლას, თუ თქვენ თითონ არ მოინდომებთ სწავლის შეძენას და არ შეისისხლხორცებთ იმ მოძღვრებას, რომელსაც გადმოგცემენ თქვენი მასწავლებლებნი...

მაშ, საყვარელნო, იჯმენით ეშმაკისაგან, უკუაგდეთ ახალგაზრდობის დამღუპველი სიზარმაცე, ახსენეთ ღმერთი და გულმოდგინედ შეუდექით სწავლას: ნუ გაუცრუებთ იმედს თქვენს მშობლებს, და ნუ შეარცხვენთ ნურც თქვენს თავს, ნუცა თქვენს მასწავლებლებსა!.. ამინ.

(წარმოითქვა ქართულ გიმნაზიაში 1915. IX. 1)

## **სიტყვა**

**ქართულ გიმნაზიის შენობის  
საფუძველის კურთხევის ბაგო**

საყვარელნო! რაოდენიმე თვის შემდეგ შესრულდება ასი წელიწადი, რაც პატარა საქართველო შეიქმნა დიდი რუსეთის ნაწილად. ამ მეტად გრძელის საუკუნის მანძილზე, საკუ-

თარის ცდითა და მხნეობით, ქართველ საზოგადოებას არა გაუკეთებია რა განსაკუთრებულის ყურადღების ღირსი. მართალია, ამგვარ საშვილიშვილო, საზოგადო და საქვეყნო საქმედ ბევრნი ბანკის დაარსებას სთვლიან ჩვენში, მაგრამ თქვენ კარგად მოგეხსენებათ, რომ ბანკს ბევრ მომხრეებთან ბევრი მოწინააღმდეგე[ე]ებიც ჰყავდნენ და ყვანან დღესაც. ერთადერთი საქმე, რომელსაც მთელი ქართველობა შეხვდა გულწრფელის სიხარულით და აღტაცევით, იყო და არის ჩვენს დღევანდელ მდგომარეობასთან შეხამებულ და შეთვისებულ სასწავლებელის დაარსება. დიდის ცდისა და მრავალის ბჭობა-კამათის შემდეგ ესეთი სასწავლებელი დაარსდა ამ ოციოდე წლის წინად და ეწოდა მას „სათავად-აზნაურო სკოლა“, თუმცა მის მოწაფეთა თითქმის ნახევარს სხვა წოდებათა შვილები შეადგენს და შეადგენდა. სამწუხაროდ, ამ სკოლას ეწია ბედი ღვთისრჩეულ ერისა: როგორც ძველი ისრაილი ორმოცი წლის განმავლობაში გადადიოდა ერთი უდაბნოდან მეორეში, ისე ჩვენი სკოლა თავითგანვე თითქმის ყოველწლივ გადადიოდა ტფილისის ერთი უბნიდან მეორეში, რაც მეტად აფერხებდა და აფერხებს სწავლა-აღზრდის საქმეს...

დღეს კი ჩვენ მოწმენი ვართ ქართველ ერის **ერთითა სულითა და ერთითა გულითა** ნაღვან-ნაცადის დასასრულის დასაწყისისა, დღეს საფუძველსა ვდებთ იმ საკუთარის ტაძრისას, რომელმაც თავის ზღუდეთაგან უნდა გამოუშვას მეცნიერების ნათლით შემოსილნი, სარწმუნოების ფარით აღჭურვილნი და ზნეობრივის სიფაქიზით განბრწყინებულნი ქართველი მამულიშვილები...

მაშ, მივმართოთ ყოვლადმონყალეს მხურვალე ლოცვით, მიიღოს ეს ჩვენი ერთსულოვნება და ერთგულოვნება **მსხვერპლად სუნად სუნნელად და ნაცვლად გარდამოგვივლინოს ძალი და სიმხნე** დაწყებულის საქმის ადრე და მალე დაგვირგვინებისათვის! ამინ.

(წარმოთქვა ვაკეში 1900. X. 14)

## სიტყვა ქართულ ფილარმონიულ საზოგადოების სამუსიკო სკოლის კურთხევის ბაგო

დღეს ჩვენ შევკრებილვართ, საყვარელნო, იმ აზრით, რომ შევავედროთ მამა ზეციერს შობად განმზადებული სამუსიკო სკოლა თბილისის ქართულის ფილარმონიულის საზოგადოებისა, – ის სკოლა, რომელმაც უნდა ხელი შეუწყოს ჩვენს ქვეყანაში მუსიკის ყოვლისავე დარგის ცოდნა-შესწავლა-გავრცელებას. მართალია, იმავე საქმეს კარგა ხანია ემსახურება ჩვენში რუსეთის საიმპერატორო სამუსიკო საზოგადოების თბილისის განყოფილების სასწავლებელი, მაგრამ ადგილის უქონლობის გამო ხსენებული სასწავლებელი ყველა სწავლის მსურველთ ველარ აკმაყოფილებს. ხოლო ადამიანის სულისა და გულის განმაფაქიზებელის და განმზაზნებელის მუსიკა-გალობა-სიმღერის შესწავლა ჩვენს დროს და ჩვენს ხალხს ფრიად სჭირდება, ვინაიდან, დროთა ვითარების გამო, წმიდა მოციქულის სიტყვა: **ასწავებდით და მოძღვრიდით თავთა თქვენთა ფსალმუნითა და გალობითა, და შესხმითა სულიერითა** (კოლ. 3, 16) უმრავლესობისათვის გაუგებარი შეიქმნა. საუბედუროდ, უმეტესობამ ჩვენს ქვეყანაში შეისისხლხორცა ერთგვარი მუსიკა-სიმღერა, რომელიც, სიტყვისაებრ ფსალმუნთმგალობელისა შეშვენის მხოლოდ მათ, ვინც **სმიდეს ღვინოსა** (68, 12)...

განვიხაროთ, მამ, ამ ახალის განმანათლებელ დაწესებულების შობისათვის. წრფელის გულით შევავედროთ იგი უფალს და ვსთხოვოთ ყოვლად სახიერს, რომ მოჰხედოს სკოლასა ამას მოწყალე თვალთ, ნაყოფიერ და მრავალჰყოს დღენი მისნი, განამხნეოს და განაძლიეროს მუშაკნი მისნი, განამტკიცოს მათ შორის ერთ-სულოვნობა და დაწყებულის საქმისადმი სიყვარული, და ჩვენც შეგვასწროს იმ დროს, ოდეს მათ მიერ დაარსებულის სკოლის მეოხებით ყოველნი **ვუგალობდეთ უფალსა მეცნიერებით** (ფსალ. 46, 7). ამინ.

(წარმოითქვა თვით სკოლის დარბაზში 1908. XI. 2;  
„შინაური საქმეები“, 1908, №30)



## სიტყვა ქართული თეატრის შენობის განახლების გამო

საყვარელო! ქვეყნის შემოქმედმა ადამიანი ბედნიერებისათვის გააჩინა და ამ მიზნის მისაღწევ საშუალებად სულიერთა და ხორციელთა ძალთა ვარჯიშობა, ანუ მუშაობა დაუნიშნა. მაგრამ, შურითა ეშმაკისათა, ადამიანი სცთა და მისი ბუნება დაუძღურდა, რის გამოც მუშაობის დროს იგი იღლება და, მის განსაგრძობად, საჭიროებს ძალთა მოკრებას მოსვენებისა და შექცევა-გართობის შემწეობით. და აი, ამ საჭიროების დაკმაყოფილება თავსუდვია ხელოვნებას საზოგადოთ და თეატრსა კერძოდ. ხოლო, სამწუხაროდ, ხელოვნება ხშირად ამ მოვალეობის აღსრულებას გაურბის და ადამიანს, ცხოვრების განმაკეთილშობილებელ-განმავითარებელ გასართობის ნაცვლად, გარეგანის სიმშვენიერით შემკობილს ძლიერის სანამღავით სავსე ფიალას აწვდის და თავს მართლულობს მით, რომ იგი ცხოვრების სარკეა...

ოღონდაც, ხელოვნებამ უნდა დაგვისურათხატოს ნამდვილი ცხოვრება და მისი მახინჯი მხარე, ქვენა გრძნობათა ბოხოქრობა და მრავალგვართა ვნებათა ღელვა, მაგრამ მან არ უნდა დაივიწყოს უმაღლეს ზნეობრივი მოთხოვნილება: ავს უნოდოს ავი და კარგს – კარგი, რათა ხელოვნების ტაძრითგან არ წარვიდეთ სახიდ ჩვენდა წამბილწველ-გამათახსირებელ ოცნება-წარმოდგენებით აღვსილნი, არამედ განმხნევებულნი, აღფრთოვანებულნი და განმზადებულნი ბრძოლად ბოროტისა და შედგომად კეთილისა...

მაშ, შევევედროთ ზეციურ მამას, რომ განახლებული ესე ტაძარი ხელოვნებისა ჰყოს მან ბუდედ უბინოებისა და საყოფელად სინმიდისა, ხოლო მუშაკთა მისთა მისცეს ძალი და სიმხნე აღძრვად და აღზრდად ჩვენში სიყვარულისა მისდამი, **რაოდენი არს ჭეშმარიტ, რაოდენი პატიოსან, რაოდენი მართალ, რაოდენი წმიდა, რაოდენი საყვარელ, რაოდენი სათნო და რაოდენი ქებულ** (ფილიპ. 4, 8)!... ამინ.

(წარმოთქვა არწრუნისეულ ქარვასლის თეატრში, სასახლის ქუჩაზე, 1908.XII.14; „შინაური საქმეები“, 1909, №5)

**სიტყვა**  
**სათავადაზნაურო სკოლის ღარიბმონაფეთა**  
**ღამხმარა ქალთა კომიტეტის მიერ უფასო**  
**სასადილოს გამართვის გამო**

საყვარელნო! ძველად ჩვენში ქალები სამშობლოს დიდ სამსახურს უწევდნენ ახალთაობის აღზრდით: გამოჩენილი და დიდი ოჯახების დიასახლისები თავიანთ კარზე თავის შვილებთან ერთად სხვის შვილებსაც ზრდიდნენ და უნერგავდნენ მათ გულში ღვთის შიშსა და სამშობლოს სიყვარულს. ამასთან ერთად, ეს ღვთისმიერ კურთხეულნი დედანი ახალთაობას ასწავლიდნენ ნერა-კითხვასა და ავარჯიშებდნენ მნიგნობრობის საქმეში...

ერთის საუკუნის წინად „დაჰბერა ქარმა ჩრდილოსამ“ და ძველი წესწყობილება არივ-დარივა: ახალმა დრომ ახალი საქმე გაუჩინა ჩვენს დედებს და ძველი მათი მოვალეობა გადაავიწყა იმდენად, რომ შეძლებულის ოჯახის დიასახლისნი არამცთუ სხვისი შვილებისათვის აღარ ზრუნავდნენ, არამედ საკუთარი შვილების აღზრდაც კი ჩააბარეს **სასყიდლით დადგინებულთ** (იოან. 10,12) უცხო ზნე-ჩვეულების-რწმენის გამდელებს...

მაგრამ, ნათქვამია, ქარის მოტანილს ქარივე წაიღებსო, – ამგვარ მოვლენას ადრე თუ გვიან ბოლო უნდა მოღებოდა: ნინო-შუშანიკ-თამარ-ქეთევანის ანდერძს ჩვენი დედები სავსებით ვერ დაივიწყებდნენ. და აი, ჩვენ მომსწრენი ვართ იმისი, რომ თითო-ოროლა ქართველი ქალი დაბრუნებია ძველს გზას და საგნად თავის ზრუნვისა აურჩევია ბედისაგან დაჩაგრული მონაფენი ერთად-ერთის ქართველთა ერის დღევანდელ მდგომარეობასთან ცოტად თუ ბევრად შეხამებულის სასწავლებელისა. აქამომდე ეს პატივცემულნი დედანი ცალ-ცალკე იღვნიდნენ, ცალ-ცალკე უწევდნენ დედის მაგიერობას ამ პატარა ქართველებს და უადვილებდნენ მათ სწავლის შეძენას და ცხოვრებისათვის მომზადებას. დღეს კი მათ გადაუწყვეტიათ ურთიერთა დახმარებით და შემწეობით მოავარონ კეთილი საქმე. ბევრი შრომა მოეღისთ მათ, შეიძლება ბევრი დაბრკოლებანიც გადაეღობოსთ, მაგრამ,

ღვთის მადლით, ვიმედოვნებთ, იგინი არ შეუშინდებიან არავითარ საფრთხეს და სძლევენ ყოველსავე დაბრკოლებას. ამის თავსმდებია ის, რომ მათ შორის სუფევს ერთსულოვნება, რომელიც შედეგია მიზნისა და საქმის სიყვარულისა. სიყვარული კი, სიტყვისაებრ წმ. მოციქულისა, **ყოველსა თავსიდეზნ, ყოველსა ესავნ, ყოველსა მოითმენნ, არასადა დავარდების** (1 კორ. 13,7-8)...

მამ, შევევედროთ უფალსა სიყვარულისასა, რათა აკურთხოს საქმე ესე და მოსცეს მის მეთაურთ ძალი და სიმხნე დანყებულის საქმის კეთილად გაძლოლისა და გავრცელებაგაფართოებისა! ამინ.

(წარმოითქვა სათავადაზნაურო სკოლაში 1904. XI. 21)

### **სიტყვა უფასო სასაღილოს მოწყობის გამო**

ყმანვილებო! ამ 20-30 წლის წინად სკოლაში სწავლა შეძლებულ მშობელთა შვილების უპირატესობას შეადგენდა, დღეს კი სულ სხვასა ვხედავთ: შეუძლებელ მშობელთა შვილებმა აავსეს სასწავლებლები. ეს სასიამოვნო სანახაობა დაჩრდილა ერთმა გარემოებამ, – სულიერის საზრდოს ძებნის დროს, ქონებრივად დაჩაგრულმა მშობლებმა ველარ შესძლეს ხორციელი საზრდოც მოეპოვებინათ თავიანთ შვილებისათვის, რამაც ფრიად შეაფერხა სწავლა-აღზრდის საქმე.

ამ სამწუხარო მოვლენას მიაქცია ყურადღება ყველა ქართველთა მიერ ღრმად პატივცემულ დედათა კრებულმა და დაუღალავის შრომით მოგიპოვათ უზრუნველი პური არსობისა...

ეს თქვენთვის თავდადებულნი დედანი იმედოვნებენ, რომ თქვენ კარგის სწავლით და უკეთესის ყოფაქცევით აუსრულებთ მათ მოლოდინს და შესძენთ დაბეჩავებულს სამშობლოს განათლებულ და სასარგებლო მუშაკთა. ამინ.

(წარმოითქვა ქართულ გიმნაზიაში  
1912. X. 2; „განათლება“ 1912, №8)

**სიტყვა**  
**უნივერსიტეტის გახსნის დღეს**  
**კათოლიკოს-პატრიარქის კირიონის**  
**ქართულ ბიზნაზიაში შებრძანების გამო**

თქვენო უწმიდესობავ, უწმიდესო და უნეტარესო მამამთავარო!

ამ ტაძარს, რომლის საყდარზედაც შენ ისწრაფი უსისხლო მსხვერპლის შეწირვას, მეოხად ჰყავს აფხაზთ-ქართველთა მეფე წმიდა დავითი. პატარა ქართველთა უახლოეს მფარველად შემთხვევით როდია აღჩეული მეფე-აღმაშენებელი! მომავალის თაობის აღმზრდელთა და მზრუნველთა **გულით სწამდათ და პირით აღიარებდნენ**, რომ წმიდა დავითის მაღლით, მის მიერ ერთხელ აღშენებული საქართველო კვლავ აღშენდებოდა და აჰყვავდებოდა...

სასოება ესე, მიუხედავად ჩვენზედა მოწვევულისა ცეცხლისა და მახვილისა, სიყმილისა და სრვისა თანდათან გვიძლიერდება, – წმიდის დავითის სახლსა ამას შინა დასადგურების შემდეგ საქართველომ იწყო შენება: ასექვს წელს ტყვეობაში მყოფი საქართველოს ეკლესია კვლავ თვითთავადი გახდა, ნაწილ-ნაწილად დაყოფილნი და დაქსაქსულნი ძენი მისნი ურთიერთთან შეთანხმდნენ და საქართველოს დამფუძნებელის კრების სამზადისში არიან. გადაგვარებული სკოლა **მოეგო თავსა თვისსა** და დღეს ქართულის უნივერსიტეტის საფუძველის ჩაყრით დაგვირგვინებულ იქმნების! მოკლედ, – ისტორია მეორდება და დავით აღმაშენებელის დრო გვიბრუნდება...

მხიარულ იყავ, კვლავ თვითთავადის ეკლესიის საჭეთმპყრობელობით სამშობლოს განთავისუფლების წინამორბედო, კადნიერებით შემოვედ სავანესა ამას დავით აღმაშენებლისასა და გულმოდგინედ შეგვავედრე ყოვლის შემძლებელს, რათა მოვესწრნეთ წმიდის თამარის დროის მოსლვასაც... ამინ.

(წარმოითქვა ტაძრის კარისბჭეში  
1918. I. 26; „საქართველო“, №25)

**სიტყვა**  
**კათოლიკოს-პატრიარქ ამბროსის მიმართ**  
**სამოძღვრო სასწავლებლის ბასხნის ბამო**  
**ბადახდილ კარაქლისის დროს**

თქვენო უწმიდესობავ!

დღეს სრულდება დასაწყისი საქართველოს თავისუფალ ეკლესიის ხუთი წლის მოლოდინისა: დღეს იხსნება კათოლიკოს-პატრიარქის ლეონიდის სახელობის სამოძღვრო სასწავლებელი, ეს ჩვენი ერის ცხოვრებაში უბადლო სწავლა-აღზრდის ტაძარი...

მართალია, წარსულში ჩვენ გვექონდა აკადემია-სემინარიები იყალთო-გელათში და თელავ-ტფილის-ქუთაისში, მაგრამ ის სასწავლებლები არსებითად განირჩეოდნენ ჩვენის, შობად განმზადებულის სასწავლებელისაგან: ისინი იძლეოდნენ სპეციალურ ცოდნასთან ერთად საზოგადოსაც და არსებობდნენ სახელმწიფოს მეოხებით თუ არა, მისგან მძლავრის დახმარებით მაინც, – ჩვენი სასწავლებელი კი პირდაპირ პროფესიონალურია და იმედოვნებს იარსებოს თვითთავადი ეკლესიის საკუთარი ძალღონით...

თავისთავად ცხადია, ჩვენ მოგველის მრავალი დაბრკოლებანი, მაგრამ ჩვენ ეს არ გვაშინება: უმთავრესი დაბრკოლება დაძლეულია, – სასწავლებელი უზრუნველყოფილია გამოცდილ-დახელოვნებული მასწავლებლებით, რომელნიც შეკავშირებულნი არიან მტკიცე სურვილით, მისცენ მშობლიო ეკლესიას დედა ენაზე მომზადებულნი, სპეტაკი ზნეობის სიტყვით და საქმით მქადაგებელნი მოძღვარნი...

ნაკლებად არის ჩვენი სასწავლებელი უზრუნველყოფილი მონაფეთა რაოდენობით: სიაში აღნიშნულ 12-ითგან დღეს გამოცხადდა მხოლოდ 4, მაგრამ ჩვენ გულს მაინც არ ვიტეხავთ: ქრისტე მაცხოვრის მონაფეთა რაოდენობა პირველად განისაზღვრებოდა ორი ადამიანით...

უფრო ნაკლებად არის იგი უზრუნველყოფილი ნივთიე-

რად, მაგრამ ჩვენ არც ამას უშინდებით: ვინც ზრუნავს მფრინველთათვის ცისა და შროშანთათვის ველისა, ის არ მოაკლებს თავის მადლსა და მფარველობას მოციქულებრივი სიყვარულით გამსჭვალულ მოღვაწეთ...

ამ იმედით შევცქერით ჩვენ, მეუფეო წმიდაო, მომავალს და ვსასოებთ, თქვენი უწმიდესობა დაუთმობთ ეკლესიის სიყვარულით აღსავსე გულში შესაფერ ადგილს საქართველოს ეკლესიის მომავალ დედა ბოძს...

ქრისტე აღდგა!

(წარმოითქვა საკათოლიკოსო საბჭოს დარბაზში  
1922. IV 27 [ცინცაძე 97, ფ. 88])

## საზოგადოება და პოლიტიკა

ს ი ტ ყ ვ ა

სომეხ-თათართა ბაქოში შიტაკების დროს  
მონაწილე მართლმადიდებელთა მოსახსენებლად  
ბარდახილ პანაშვილის ბამო

საყვარელნო! **დასაბამითგან კაცისმკვლელმან** (იოან. 8,44) **ცეცხლი და წუმწუმა** (შექ. 19, 24) მძულვარებისა აწვიმა ძმათა შორის კუპრისა და ნავთის მფრქვეველ ქალაქში და რაოდენიმე დღის მიმდინარეობაში მღელვარე კასპიის ნაპირას განამეფა „განძვინებული სიკვდილი“. უბრალოდა და უდანაშაულოდ მომაკვდავთა გულითგან აღმონახეთქმა შემადრწუნებელმა გმინვამ მოაღწია ჩვენის მხარის დედაქალაქადმდე, რომლის შეგნებულ შვილებმა მყის მიმართეს სულიერ მამათა და მოძღვართ მძულვარების, განხეთქილების და მკვლელობის მოსასპობად, – და არც მოსტყუვდნენ: ერთა სულიერ ხელმძღვანელთ აღიმაღლეს ხმა და შესწყდა მკვლელობა, ჩამოვარდა მშვიდობა, განჰქრა მძულვარება! ძმურის სიყვარულით აღფრთოვანებული ხალხი, განურჩევლად წოდებისა, სარწმუნოებისა და ეროვნებისა, შეკრებილა ტაძრებში და, თუ ერთ დღეს მართლმადიდებელნი ავედრებენ უფალს „ბაქოსა

შინა მოწყვედილ გრიგორიანთა და მუსულმანთ“, მეორე დღეს მუსულმანები და გრიგორიანები ლოცვა-კურთხევით იხსენიებენ შესვენებულ მართლმადიდებელთა...

ეს საზოგადო სინანული, ეს ჭირთა შინა თანაგრძნობა, ეს ურთიერთთა **სიმძიმეთა ტვირთვა** (გალ. 6,2) იმედოვან-გვყოფს, რომ 1904 წლის წინად ანგელოზთა მიერ უწყებულ **მშვიდობა და კაცთა შორის სათნოება** (ლუკ. 2,14) ნელ-ნელა ფეხს იკიდებს ჩვენში, რომ მოახლოებულ არს დრო, ოდეს **ეფრემ არა ეშურვოს იუდას და იუდამან არა აჭირვოს ეფრემს** (ის. 11,13), რომ მოვალს ჟამი, ოდეს სხვადასხვა სარწმუნოების მწყემსნი და წინამძღვარნი მიიყვანენ პირმეტყველ ცხოვართ მწყემსისა კეთილისადმი, **რათა ისმინონ ხმისა მისისა, და იყვნენ ერთ სამწყსო და ერთ მწყემს** (იოან. 10,16)!...

იყავნ, უფალო, იყავნ!

(წარმოითქვა ქვაშვეთში 1905. II. 20)

ს ი ტ ყ ვ ა  
**ბატონ-ჟმოზის მოსაკოპიოტან  
50 წლის შესრულების ბამო**

ყმანვილებო! წელთა და ჟამთა მიმდინარეობამ ისე მოაწყო ღვთის მსგავსად და ხატად შექმნულ ადამიანთა უმრავლესობის ბედილბალი რუსეთში, რომ უმცირესობამ დაიმორჩილა უმრავლესობა, წაართვა ღვთის მიერ მინიჭებული უფლებანი და გაიხადა თავის სურვილთა და გულისთქმათა აღმასრულებლად. ეს საზიზღარი და ქრისტიანეთათვის სამარცხვინო წესწყობილება რყვნიდა და ათახსირებდა ორთავე ნოდებას: ბატონები შეეჩვივნენ თვითნებობას, გულქვაობას და მუქთახორობას, ხოლო ყმანი, – ცბიერებას, სიზარმაცეს და სიცრუეს. ამის გამო, კაცთა ბედნიერების ქვაკუთხედი – ურთიერთას სიყვარული ორთავე ნოდებისათვის შეიქმნა გაუგებარი და გამეფდა მათ შორის სიმძულვარე, რომლის საკურთხეველზედ დაინთხა მრავალთა სისხლი და უმრავლესთა ჰლამობდა დაინთხევას...

ეს სახელმწიფოსა და ქვეყნის დამლუპველი წესწყობილება კარგად შეიგნო და გაითვალისწინა ღვთივგვირგვინოსანმა იმპერატორმა ალექსანდრე მეორემ და 1861 წლის თებერვლის ცხრამეტს, სწორედ იმ დღეს, როდესაც წმიდა ეკლესია დღესასწაულობს პირველის ყმათაგანმათავისუფლებელის ადამიანის, წმიდა მოციქულის ფილიმონეს ხსენებას, გამოსცა ბრძანება, რომლის ძალითაც ბატონ-ყმობა მოსპობილ იქმნა რუსეთში და მცხოვრებთა უმრავლესობას მიენიჭა უფლება საკუთარის ბედნიერებისა და წარმატების გზაზედ სლვისათვის ზრუნვისა...

მოიგონებს რა ახლანდელი თავობა ამ ჭეშმარიტად ქრისტეანულ ბრძანებას იმპერატორის განმათავისუფლებელისას, იგი მთელის იმპერიის სივრცეზედ აღავლენს დღეს მადლობის ნიშნად გულმხურვალე ვედრებას მისის სულის განსვენებისათვის, და ჩვენც მისთვის შევკრებილვართ აქ ამ ჟამად, რომ მივიღოთა მონაწილეობა საზოგადო ლოცავში, შევავედროთ უფალს სული დიდებულის ადამიანისა და ვითხოვოთ მისთვის საუკუნო ხსენება. ამინ.

(წარმოითქვა ქართულ გიმნაზიაში  
1911. II. 18; „განათლება“ 1911, №4)

### სიტყვა

#### ქავკასიის ჯარის შემოსეულ ოსმალოს მხედრობაზე გამარჯვების ბამო

საყვარელნი! ამ საშინელ ომით გამონვეულ დარდითა და მწუხარებით ისედაც შეინრებულთ, რამდენიმე დღის წინად მწუხარება გაგვიორკეცდა: კარს მოდგომილი მტერი საზღვარს გადმოსცდა, ქვეყანას შემოესია და ცეცხლითა და მახვილით ჩვენის დედაქალაქისაკენ გამოექანა... გონება დაგვენშო, გრძნობა დაგვიჩლუნგდა, – ხსნის მოპოვებას გაქცევით ვაპირებდით...

სწორედ ამ დროს სოფლის ჭეშმარიტმან მხსნელმან, **მზემან სიმართლისამან** და **ვარსკვლავმან იაკობისაგან** (მა-



ლაქ. 4,2; რიცხ. 24,17) მისის განხორციელების დღისათვის გულნი განგვიტფო და მომავალის წყვდიადში იმედის სხივი გამოგვიშუქა, – ქრისტეს მოსავმა მხედრობამ მტერი უკუაქცია და საშობაო ზღვენი მოგვართვა...

მისცეთ, წმიდის მოციქულის მცნების თანახმად, **მადლი ღმერთსა** და შევევედროთ, **მარადის მძლეველ გვეოს ჩვენ** მტერთა ზედა **ქრისტეს იესოს მიერ** (2 კორ. 2,14)... ამინ.

(წარმოითქვა თავადაზნაურთა საკრებულოს დარბაზში 1914. XII. 24)

ს ი ტ ყ ვ ა  
**ქართველ მოხალისეთა რაზმის საომრად  
ბამბზავრების ბამო**

მამულისშვილნო! უფალმან მგზავრობა თქვენი აკურთხოს, მარჯვენე განაძლიეროს, მედგარი მტერი უკუგაქცევინოსთ და შინ მშვიდობით დაგაბრუნოსთ!..

გვიხარის, რომ ქვეყნის დასაცველად მიემგზავრებით საკუთარის სურვილით და არა იძულებით: ამით მიემსგავსებით მამაპაპებს, იმ ძველ მღევ-გმირებს, რომელთა დროშაზედ დიდის ასოებით ეწერა, – **ქვეყნის კეთილდღეობისათვის თავის განირვა და თავისუფლებისათვის სულის დადება**. აკი ამის გამო შეგვინახეს და გადმოგვცეს ეს სამოთხის მსგავსი ქვეყანა, რომელსაც დღეს კარს მოსდგომია მტერი და აკლებასა და ანიოკებას უპირებს!..

ნუ იყოფინ! ნუ შევრცხვებით წინაპართა წინაშე, ნუ დავინანებთ სიცოცხლეს მამულის საკეთილდღეოდ, ნუ დავივინყებთ დიდებულის შოთას სიტყვებს, – სჯობს სიცოცხლესა ნაძრახსა სიკვდილი სახელოვანი!..

დედაღვთისა, რომლის მხვედრია ქვეყანა ესე, იყოს თქვენი მფარველი, ხოლო მთავარმონამე და ღვანლითშემოსილი გიორგი შემწე და წინამძღომელი... ამინ.

(წარმოითქვა მესანგრეთა ყაზარმის ეზოში 1915. I. 25)

## ეპიტაფიები

ს ი ტ ყ ვ ა  
ნიკოლოზ ბარათაშვილის ნეშტის  
ბანჯიტიან ბაღმოსვენების ბაგო

*მეცნიერებად იგი ღმრთისად ცხად  
არს... რამეთუ უხილავი იგი მისი...  
ქმნულთა მათ შინა საცნაურად იხილვების...  
სამარადისოდ იგი ძალი მისი და ღმრთეებად  
(რომ. 1. 19-20)*

აჰა, წინაშე ჩვენსა ნეშტი ნიკოლოზ ბარათაშვილისა, რომლის პიროვნების სიდიადეს ჩვენ თუმცა ვგრძნობთ, მაგრამ ჯერ კიდევ ვერ გამოგვირკვევია, – ვსასოებთ, ახლო თუ არ არის, შორს მაინც არ უნდა იყვეს ის დრო, როდესაც ბარათაშვილს შევისწავლით, შევიგნებთ და ჯეროვან ადგილს მივაკუთვნებთ ჩვენი ერის „უკვდავთა“ შორის... დღეს კი, საყვარელნო, თქვენს ყურადღებას მივაქცევ ერთ გარემოებას!...

ჩვენ ვიცით, რომ ნიკოლოზ ბარათაშვილი მოღვაწეობდა მიმდინარე საუკუნის 30-40-იან წლებში, რომ იგი დაახლოვებით გაცნობილი იყო რუსეთის თანამედროვე მოწინავე მწერლებთან და მათთან ერთად განიცდიდა იმდროინდელ ევროპიელ მწერალთა კერპის, ბაირონის გავლენას. ამ გავლენის ქვეშე მყოფი მწერლები კი, თუ პირდაპირ არ უარყოფდნენ ქრისტიანულ მსოფლიომხედველობას, ყოველსავე შემთხვევაში გულცივად და გულგრილად ეპყრობოდნენ სარწმუნოებას და მას, ვისთანაც გვაკავშირებს სარწმუნოება... ზემონათქვამის შემდეგ, თუ დავაკვირდებით ბარათაშვილის ნაწერებს, ცხადად დავინახავთ განსვენებულის ნიჭის თავისებურებას და იმ განსხვავებას, რომელიც არსებობდა ბარათაშვილსა და მის თანამედროვე მწერალთა შორის, – მაშინ როცა სხვები ვერ ასცდნენ „სასწარკვეთილი“-ს პოეზი-

ის ნაკლულოვანებას, ბარათაშვილმა განაშვენა და განასპე-  
ტაკა ეს პოეზია, ფრთები შეასხა და სული ჩაუდგა მას.

საზოგადო მიმართულება „სასონარკვეთილი“ მწერლე-  
ბისა გამოიხატებოდა გაურკვეველ საგნის ამოოდ ძებნით  
შექმნილ სევდასა, ნალველსა და ცრემლებში, და ბოლოვდე-  
ბოდა უიმედობით... თავისებურ შვებასა და ნუგეშს ისინი გა-  
ნიცდიდნენ მხოლოდ ბუნების ნიაღში, რომლის გარეშე არც  
არა სწამდათ, არცა რა სჯეროდათ!..

პირველი შეხედვით, ნიკოლოზ ბარათაშვილი არ განირ-  
ჩევა ამგვარი მწერლებისაგან: როგორც ისინი, ბარათაშვი-  
ლიც ხშირად გრძნობს, რომ ის არის

„ნალვლიანი“,

„მწუხარ და სევდიანი“,

რომ მას თან დააქვს

„ჩუმი ნალველი“,

„განიცდის სანუთროს ვნებას“,

„მარტოობას სულისას“,

„არლარა აქვს მას ნდობა სოფლის“,

რის გამოც „მას ელტვიან სიამენი სოფლისა“,

არის „მწირი სოფლისა, დამაშვრალი მისითა ღელვით“,

„ნარელო მას მშვიდობა სულისა“,

„აღერია წრფელი ზრახვანი“,

დაშთენია: „კვნესა გულისა“.

როგორც „სასონარკვეთილი“, ისე ბარათაშვილიც ბუნე-  
ბაში ეძიებს ნუგეშს:

„სევდიანი ფიქრთ გასართველად“,

მიდის „წყალის პირს“

და მუნ „ეძიებს ადგილს განსასვენებლად“.

„იქ ლბილს მდელიზოდ სანუგეშოდ

ინამებს ცრემლით“

და: „იდაყვ-დაყრდნობილ ყურს უგდებს

წყლისა ჩხრიალსა“!...

მაგრამ „მოდუდუნე მტკვარი“ აღუძრავს პოეტს მეტად  
მწარე ფიქრებს, რის გამო იგი აკვირდება ადამინათა ცხოვ-  
რებას და რას ხედავს?!

„ჩვენი ცხოვრება“  
„იყო ფუჭი და მხოლოდა ამაოება...“  
„თვითონ მეფენიც..., რომელთ უმაღლეს  
ამა სოფლად არღა არის სხვა რამ დიდება,  
შფოთვენ და დრტვინვენ“,

და „ალიძერიან იმავ მინისტვის,  
რაც დღეს თუ ხვალ თვითვე არიან!“  
„მაგრამ თუ ერთხელ უნდა სოფელს ბოლო მოეღოს,  
მაშინ ვილამ სთქვას მათი საქმე,  
ვინ სადღა იყოს“?!

როგორც ვხედავთ, ბარათაშვილი ახლოა, აიღოს ხელი  
ყოველსავე რწმენაზე, მზად არის, წარიკვეთოს იმედი... მაგ-  
რამ ამგვარი დასკვნა შეცდომა იქნება: ყოველივე ზემოაღ-  
ნიშნული პოეტს ათქმევინა „ანკარა მტკვარმა“, რომლის  
ზვირთებს ფრიად წააგავს მსწრაფლწარმავალი და ცვალება-  
დი ჩვენი ცხოვრება... ნამდვილად კი შემოგარე ბუნებაში  
მგოსანს სხვა „მეგობარიც“ ჰყავს, რომელსაც მიმართავს

ხოლმე, ოდეს გულს მოანვეება „ვაება“ და „დაეხურება“ იგი:  
„ჰოი, მთანმიდავ, მთაო წმიდავ, ადგილნი შენნი...“  
„ვითარ შევნიან, როს მონამენ ცვარნი ციურნი,...“  
„რა სანახავი წარუტყვეს თვალთა მაშინ შენს ტურფას  
სერზედ მდგომარეს!

ძირს გაშლილს ლამაზს ველსა ყვავილნი მოჰფენენ, ვითა  
ტაბლას წმიდასა,  
და ვით გუნდრუკსა სამადლობელსა, შენდა აღკმევენ  
სუნნელებასა...“

ესრეთ ჰშვენიის წმიდა მთა, მაგრამ მის მწვერვალზე ასუ-  
ლი ბარათაშვილის გონება არ კმაყოფილდება ამ მშვენებით,  
არამედ

„ფიქრი მისნი ცისადმი მიისწრაფიან“

და ამისათვის იგი მიმართავს ცას:

„მე, შენსა მჭვრეტელს, მავინწყდების სანუთროება.  
გულისთქმა ჩემი შენს იქითა ეძიებს სადგურს,  
ზენაართ სამყოფთ, რომ დაშთოს აქ ამაოება...“

აი, აქ წყდება კავშირი ნიკოლოზ ბარათაშვილსა და იმ

მწერლებს შორის, რომელთა წრეს იგი ეკუთვნის: უკანას-  
კნელნი ბუნების იქით ვერა რას ხედვენ, ნ. ბარათაშვილი კი  
ბუნებაში და ბუნების შემწეობით ეძიებს და პოულობს მას,  
ვისაც ძალუძს შვების მიცემა:

„მთაო ცხოველო,...

ვინ მოგიხილოს, რომელ მყისვე თვისთა ფიქრთ შვება  
არა იპოვნოს და არ დაჰხსნას გულსა ვაება.“

ამ სახედ, ნ. ბარათაშვილმა, წმიდა მოციქულის სიტყვის  
თანახმად (რომ, 1, 19-20), ბუნება აღიარა ხმად ღვთისა კაც-  
თა მიმართ, წიგნად, სადაც ამოიკითხა, რომ შვება და ლხენა  
შეუძლია მიანიჭოს ადამიანის გულს მხოლოდ მან, ვინც არის  
მიზეზი ბუნების და თვით ადამიანის გაჩენისა, რის გამო პო-  
ეტი გულმხურვალედ მიმართავს ყოვლადმოწყალეს შემდე-  
გის ლოცვით:

„ღმერთო მამაო, მომიხილე ძე შეცთომილი  
და განმასვენე ვნებათაგან ბოროტ-ღელვილი!“

„ცხოვრების წყაროვ, მასვ წმიდათა წყალთაგან შენთა,  
დამინთქე მათში საღმობანი გულისა სენთა!  
არა დაჰქროლონ ნავს ჩემსა ქართა ვნებისა,  
არამედ მოეც მას სადგური მყუდროებისა!“

ყოვლადმოწყალემაც შეისმინა მგოსნის ვედრება და უჩ-  
ვენა ადგილი, სადაც ადამის შვილს შეუძლიან მოიპოვოს  
განმაცოცხლებელი და ნუგეშინის-მცემელი ძალა:

„ვპოვე ტაძარი, – ამბობს პოეტი, – შესაფარი,  
უდაბნოდ მდგარი;

მუნ ენთო მარად უქრობელი წმიდა ლამპარი“...

„მწირი სოფლისა, დამაშვრალი მისითა ღელვით,  
მუნ ვეძიებდი განსვენებას წრფელითა ზრახვით“.

„გულსა, მოკლულსა...“

ლამპარი წმიდა განმიტფობდა ციურის სხივით!“

„მუნ გუნდრუკის წილ

შევსწირავდი წმიდას სიყვარულს...“

„ამა სიამით, ნეტარებით, ესრეთ აღვსებულს,  
მეგონა, ვხედავ სასუფეველს, აქ დაშენებულს!“

ამნაირად, როცა ბარათაშვილის წრის მწერლები გაურ-

ბოდნენ ტაძარსა და მის სინმიდესაც, ჩვენი უკვდავი მგოსანი სწორედ აქეთ მოეშურებოდა „ჭმუნვარების განსაქარვებლად“, აქ პოულობდა გონება მისი „სადგურს მყუდროებისას“, აქ ეძღვნებოდა მის „გულსა შვება“ და ამიტომაც იგი ინვევს მთაწმიდისა და ტაძრისაკენ ყველას, ვის აღერივნენ „წრფელნი ზრახვანი“, ვის „ჭმუნვარება შემოესევის“, ვინც „დამაშვრალა სოფლისა ღელვით“, ვინც დაუკარგა „მშვიდობა სულსა“, ვინც ცხოვრების გზაზედ იგრძნო „შემოდამება“, – რომ აქ მოიძიონ შემოგარე ბუნების

„იქითი სადგური“,  
„ზენარი სამყოფი“,  
„დაივიწყონ სანუთროება“,

მიიღონ სულისა და გულის აღმაფრთოვანებელი საუკეთესო მომავლის იმედი, –

„გათენდება დილა მზიანი  
და ყოველს ბინდსა ის განანათლებს!“...

ამ იმედით განირჩევა ნიკოლოზ ბარათაშვილი თავის წრის მწერლებისაგან; ამ თვალთ შესცქერის იგი, ვით ჭეშმარიტი ქრისტიანე, შემოგარე ბუნებას და ამ თვალთახედვითი ისრით აღჭურვას გვასწავლის ჩვენ.

სწორედ ამისთვის თაყვანსა სცემს „ბედის სამზღვრითგან“ დღეს „მშობელ მამულში“ მოსვენებულს მის ნეშტსა ეს მოზღვავებული „ნათესავთ“ კრებული და მადლიერის გულის სიღრმითგან დაღადებს: საუკუნოდ იყოს ხსენება შენი, სულმნათო მგოსანო და იშვიათო მასწავლებლო! ამინ!

(წარმოითქვა დიდუბეში 1893. IV. 25)

ს ი ტ ყ ვ ა  
ბ ი ო რ ბ ი დ ა ვ ი თ ი ს ქ ი ს ქ ა რ თ ვ ე ლ ი ო ვ ი ლ ი ს  
ბ ა რ დ ა ს ვ ა ლ ბ ი ს ბ ა მ ო

*ნეტარ არს გზა ეგე, რომელსა წარმართებულ ხარ  
შენ დღეს, რამეთუ ადგილი განსასვენებელი მოგელის შენ.*

სამნუხაროა სიკვდილი ყოველი ადამიანისა, მაგრამ უფრო სამნუხაროა იგი მაშინ, როცა მიცვალებული ჩვენი კეთილი და მახლობელია. ამისთვის, გავიგებთ რა სიკვდილს ჩვენის მოძმისას და საყვარელ ადამიანისას, მივეცემით ხოლმე დიდს მნუხარებას და გლოვასა, ვიშსა და ვაებასა. ხანდისხან ჩვენი მნუხარება იმდენად დიდია, რომ ორში ერთსა ვრჩეობთ და წრფელის გულით ვიტყვით ხოლმე: ან ეს რად მოკვდა, ან ჩვენ რაღად დავრჩითო; უმჯობესი იქმნებოდა, ჩვენც ამასთან ერთად დავხოცილიყავითო, ანდა, – ნეტავი ჩვენ მოვმკვდარიყავით და ეს ცოცხალი ყოფილიყო. ამას გვალაპარაკებს არა ფარისევლური ანგარიში რაიმე, არამედ ჭეშმარიტი სიყვარული მიცვალებულისა...

ერთი სიტყვით: სიკვდილი საყვარელის და მახლობელის არსებისა იმდენად თავშესაზარია, რომ ჩვენ თითქოს გვავიწყდება კიდევაც, – ვინა ვართ ან რანი ვართ?! გვავიწყდება, რომ ვართ კაცნი, სიკვდილის შვილნი, მიწითგან შექმნილნი და მიწადვე მიქცევადნი! შეიძლება თქვას ვინმემ: ეს ასეც უნდა იყოსო, სიკვდილს სიხარულით ხომ არ უნდა მივეგებნეთო, მაშ სიკვდილი საშიშარი აღარ ყოფილაო?! თუ გამოვარკვევთ საგანს, თუ ანგარიშს მივცემთ ჩვენს ჭკუასა და გონებას, მაშინ მართლადაც დავრწმუნდებით, რომ სიკვდილი სამხიარულო თუ არ არის, არც თუ საშიშარია!..

რა არის სიკვდილი, საითგან და როგორ წარმოდგა იგი? ამ შვიდი ათასის წლის წინად ღმერთმა შექმნა კაცი **ხატად თვისად**, ხოლო **მსგავსება** ღვთისა თითონ კაცს უნდა მოეპოვებინა და, თუ იგი მოიპოვებდა მსგავსებას ღვთისას, მაშინ შეიქმნებოდა ხორციელადაც უკვდავი. მაგრამ კაცმა არ ინება თავითგანვე შესდგომოდა გზას, რომელიც მიიყვანდა

მას ღვთის მსგავსებადმდე, – არ ინება სულიერი შრომითა და ღვანლით მოეპოვებინა ხორციელებრივი უკვდავება! მან მოინდომა პირდაპირ გაღმერთება, მოინდომა ის, რაც მისთვის მიუწთომელი იყო, და ამისთვის სანადელს ვერ მიწვდა, დაკარგა კი მშვიდობა სულისა და სიმრთელე სხეულისა, დაავადმყოფდა, დასნეულდა. ამის შემდეგ, რალა საჭირო იყო სნეულისა და ავადმყოფის კაცის ხორციელებრივი უკვდავება, ან ამ პირობებში უკვდავება ემჯობინებოდა კი სიკვდილსა?! დიალაც, რომ არა, და ამისთვის ყოვლადმონყალე ღმერთმა კვალად მოუვლინა კაცს მონყალება თვისი და უბრძანა: ვინაითგან შენი ხორციელებრივი უკვდავება სულიერი და ხორციელი ტანჯვა იქმნება შენთვისო, ამისთვის – **მინა ხარ და მინადვე მიიქეციო**. აი დღე, რომლითგანაც სიკვდილი ფლობს ყოველთა კაცთა ზედა და ყოველი და ყოველივე ემორჩილება მას...

როგორც ხედავთ, საყვარელნო, სიკვდილი არამც თუ სავალდებულო ყოფილა კაცისათვის, არამედ საჭირო და სანატრელიც. მამ რალად ვტირით და რალად ვგოდებთ? იქმნება ვტირით და ვგოდებთ მისთვის, რომ გვემინია: ვაი თუ საუკუნოდ დავკარგეთ ჩვენი ძვირფასი და საყვარელიო, ვაი თუ ველარ გვეღირსოს მისი ნახვაო? დიახ! ყველაზედ საშიშარი და შესაზარი სწორედ რომ ეს შიშია! თუ მოყვასი და ძვირფასი ჩვენი გვმორდება საუკუნოდ, თუ იმას ვერასოდეს ველარ ვიხილავთ, თუ ის დაიკარგა ჩვენთვის სამარადისოდ, თუ ის შეუერთდა მინას ისე, როგორც კვამლი შეუერთდება ხოლმე ჰაერსა და იქ ქრება, მაშინ სიკვდილზედ უსაშინელესი და კაცზედ უუბედურესი აღარა ყოფილა რა ქვეყანაზე. მაგრამ, არა, ამის წინააღმდეგია თვით ჭკუა და გონება კაცის, რომელნიც ვერ ურიგდებიან ამ აზრსა; ამისივე წინააღმდეგია თვით ენა, რომელიც სიკვდილს უწოდებს განსვენებას, მიძინებას; ამის წინააღმდეგია თვით საღმრთო წერილი, რომელიც ჰბრძანებს: **არა გვენებას უმეცრება თქვენი, ძმანო, შესვენებულთა მათთვის, რათა არა სწუხდეთ, ვითარცა იგი სხვანი, რომელთა არა აქვთ სასოება; რამეთუ უკეთუ გვრწამს, ვითარმედ იესო მოკვდა და აღდგა, ეგრეცა**



**ღმერთმან შესვენებულნი იგი იესოს მიერ მოიყვანნეს მისთანა (1 თესალ. 4. 13-14) და კვალად: ამინ, ამინ გეტყვი თქვენ, რამეთუ რომელმან სიტყვანნი ჩემნი ისმინნეს და ჰრწმენეს მომავლინებელი ჩემი, აქენდეს მას ცხოვრება საუკუნო, და სასჯელსა იგი არა შევიდეს, არამედ გარდაიცვალოს იგი სიკვდილისაგან ცხოვრებად (იოან. 5. 24).** აქეთგან ცხადად ჩანს, რომ ეს შიშიც უსაფუძვლო ყოფილა: კაცი კი არ კვდება, კი არ ისპობა, არამედ გარდაიცვლება სიკვდილისაგან ცხოვრებად, ე. ი. სიკვდილის საშვალეებით გარდასახლდება საცხოვრებელად სასუფეველსა ღვთისასა. და ამისი თავმდეები არის თვით მაცხოვარი ჩვენი, უფალი იესო ქრისტე, რომელიც მოკვდა და აღდგა და აღადგენს ყოველსავე მორწმუნესა მისსა...

კვალად იტყვის ვინმე: ვიცი, კარგად ვიცი, სიკვდილი თვით იმისთვის, ვინც მოკვდა, განსვენებაა შრომისა და მწუხარებისაგან, ვაებისა და ბოროტებისაგან, სასიამოვნო მიძინებაა; ისიც ვიცი, რომ ძალითა ღვთისათა იგი კვალად აღდგება თვისივე სხეულით და მოყვასნი და მახლობელნი ვიხილავთ ერთმანეთს და მივეცემით შვებასა და სიხარულსა განუსაზღვრელსა, მაგრამ გულსა და სულს გვინუხებს ის, რომ ადრე იყო სიკვდილი მისი, ჯერ კიდევ საჭირო იყო იგი მოყვასისა და ოჯახისათვის. ხშირად გვესმის, ხოლმე, ამგვარი საყვედური და თითქოს საფუძვლიანიც არის ის. ვინ არ იცის, მაგალითად, თუ რამდენად სასარგებლო ადამიანი იყო ან განსვენებული გიორგი დავითის ძე: ღვთისა და ეკლესიის მოყვარე, მამულისა და სამშობლოს ერთგული, ოჯახისა და ცოლშვილისათვის თავდადებული, განათლებისა და მწიგნობრობის მოტრფიალე, მღვდელთა და მონაზონთა პატივისმცემელი, ქვრივთა და ობოლთა განმკითხველი, პატიოსნებით აღსავსე, დაუღალავი მუშაკი და საუკეთესო წარმომადგენელი ძველის ქართველის დარბაისელი მამაკაცისა. ვის გულს არ მოხვდა ცივად ამბავი ამის სიკვდილისა, ვის არ ეუცხოვა გარდაცვალება ამისი? ყოველივე ეს ჭეშმარიტებაა, მაგრამ ვინა ხარ შენ, ადამიანო, რომ იყვედრები და უკმაყოფილებას აცხადებ წინააღმდეგ მისა, რომელმანაც გა-

**ნაჩინა დაწესებულნი ჟამნი და საზღვარის დადებანი დამკვიდრებისა პირსა ზედა ქვეყანისასა ყოველთა ნათესავთა კაცთასა** (საქ. მოც. 17, 26) და რომელიც ფლობს ცხოველთა და მკვდართა ზედა. ნუთუ გგონია შენ, ადამიანო, რომ ის პირნი, რომელნიც საჭიროებენ ან განსვენებულის სიყვარულსა და ტრფიალებას, შენთვის უფრო მახლობელნი არიან, ვინემ მისთვის, ვინც გააჩინა და დაჰბადა იგინი? ნუთუ დაობლებულისა და შენუხებულის ოჯახის შემწე და ნუგეშინისმცემელი ხარ შენ და არა ის, ვინც **მფრინველთა ცისათა, რომელნი არა სთესვენ, არცა მკიან, არცა შეიკრებენ საუნჯეთა, ზრდის** (მატთ. 6, 26)?! მაშასადამე, დღეთა ცხოვრებისა ჩვენისათა მფლობელი, ქვრივთა და ობოლთა პატრონი და შემწე ღმერთია და მან, **მამამან ჩვენმან ზეცათამან, იცის რა გვიხმს ამათ ყოველთაგან** (მატთ. 6, 32), უწყის, რა უმჯობესია ჩვენთვის, სიკვდილი თუ სიცოცხლე, ობლობა თუ დედამამიანობა, სიქვრივე თუ ცოლოსნობა-ქმრიანობა. ამისთვის, მნუხარება და ტირილი, ვიში და გოდება არის საჭირო არა მიცვალებულთათვის, რომელთა ქრისტეს მიერ მიიძინეს და განისვენეს, არამედ ჩვენთვის და ცოდვათა ჩვენთათვის, რომელთა სიმრავლე აღდგება წინაშე ჩვენსა და ვერ შესაძლებელად ჰყოფს ჩვენდა შემთხვევად წმიდათა შორის განსვენებულთა მოყვასთა და მახლობელთა ჩვენთა. აი ეს არის და უნდა იყოს კიდევაც ჩვენთვის სამნუხარო და სატირალი და სხვა კი არა რა.

მაშ, საყვარელნო, მივმართოთ მხურვალე ლოცვით ყოველად მონყალესა ღმერთსა, რათა მან, სახიერმან, აღხოცოს ყოველნი ცოდვანი და უსჯულოებანი ან შესვენებულისა მონისა თვისისა გიორგისა და დაანესოს სული მისი წიაღთა შინა აბრაამ, ისაკ და იაკობისათა; ხოლო ჩვენ, დაშთომილნი სანუთოსა ამას სოფელსა, გვიხსნას ყოვლისაგან ჭირისა, რისხვისა და ინროებისა, სამართლად ჩვენ ზედა მოწვეწუნლისა. ამინ.

(წარმოითქვა დიდუბეში 1901. IX. 30; „მწყემსი“, 1901, №20)

ს ი ტ ყ ვ ა  
ილიას ბარდასპალეზის ბაგო

*მოიხსენებით წინამძღვარნი იგი თქვენნი...  
და ჰბაძევდით სარწმუნოებასა მათსა (ებრ. 13. 7)*

გვამცნობს მოციქული პავლე და ჩვენც, აღმასრულებელი ამა მცნებისა, შევკრებილვართ დღეს ილიას სულის მოსახსენებლად. წინადაც მრავალჯერ შევკრებილვართ ამ ტაძარში ამა თუ იმ პატივცემულის პირის სულის მოსახსენებლად, მაგრამ ასეთი მწუხარება ვერ შეგვიმჩნევია: დღეს, დიდს თუ პატარას, ქალსა თუ ვაჟს, განუსაზღვრელის მწუხარების ნიშანი აღბეჭვდია სახეზედ. დღს თითქმის ყველას დავინყებია საკუთარი ჭირი და ვარამი და ყველა ილიას დაკარგვას გლოვობს: ილია აღარა გვყავს, ილია მოგვიკლესო, – გესმის ყოველმხრივ...

ამ მოვლენის მიზეზი ცხადია: ყველა ქართველს ილია მიგვაჩნდა არა თუ მარტო დიდებულ მწერლად, ანუ ფასდაუდებელ მგოსნად, გინა თუ გამოჩენილ და სასიქადულო საზოგადო მოღვაწედ, არამედ, და უმთავრესად, გზის მაჩვენებელად, ჭკუის მასწავლებლად, ანუ, სიტყვისაებრ საღმრთო წერილისა, – **წინამძღვრად**. ჭემმარიტად, „ჭმუნვასა და სინარულში“ იგი იყო ჩვენი ნუგეშის „შთამგონებელი“ და შვებობის მომცემი, ხოლო „ფიქრის, საქმის, შრომის დროსა“ ხომ იმას ბადალიც არა ჰყავდა: მისი რჩევა და დარიგება უსასოდქმნილს იმედს ჩაუნერგავდა გულში და ბედისაგან განლაღებულს განსაცდელისა და საფრთხისაგან დაიხსნიდა...

მაგრამ დღეს ილია აღარა გვყავს, ილია მოგვიკლეს, ილია მოგვაშორეს და მოგვაშორეს სწორედ მაშინ, როცა მისი ქველობა და გამოცდილება ფრიად საჭირო იყო იმ მამულისათვის, რომლის აყვავება-აღორძინებაზედ იგი ოცნებობდა სიყრმიდამ მოხუცებულებამდე, მოგვაშორეს უეცრივ და მოულოდნელად. დღეს

„ის აღარ ჰყავის ამ ბნელ ქვეყანად,  
ეხლა ის არის მცხოვრები ცისა...“

რა დაგვშთენია დაობლებულთ? ნუთუ მარტო ტირილი და გოდება, სულთქმა და წუხილი? არა! მართალია ილია მოგვიკლეს, ილია მოგვტაცეს, მაგრამ მოკლეს ილიას ხორცი და არა სული: „კაცია-ადამიანის“, „გლახის ნაამბობის“, „აჩრდილის“, „დიმიტრი თავდადებულის“ და მრავალ სხვათა შემქმნელი ვერ მოკვდება ქართველთა ერის ხსოვნაში; ქართველთა ერთი ვერ დაივიწყებს მას, ვინც მუხლმოდრეკილი და ღმობიერად ევედრებოდა მამაზეციერს:

„მსურს განმინათლდეს ცით ჩემი სული  
შენგან მამცნების სიხარულით ამენთოს გული“;

ვერ მოკვდება ჩვენს გონება-მეხსიერებაში ის, ვინც  
„წმინდა სიტყვას უშიშრად მოჰფენდა ხალხში“.

მუდამ დაუვიწყარი იქნება ის, ვინც მოზარდ თაობის აღმზრდელებს დაჟინებით უქადაგებდა:

„საზრდოდ ხმარობდე ქრისტესა მცნებას,  
შთააგონებდე კაცთა სიყვარულს,  
ძმობას, ერთობას, თავისუფლებას, –  
რომ სიკეთისთვის გული უთრთოდეს  
და მომავლისთვის ბედთანა ბრძოდეს“;

საუკუნოდ სახსენებელი იქნება ის, ვინც გამუდმებით გვიკარნახებდა:

„ვაჟკაც იგია, ვინც მართალს  
ეტყვის ქვეყანას მცდომსაო,  
ვინც არ შეუდრკა მრავალსა,  
ხშირად მართლისთვის მწყრომსაო,  
ვინც კრავს უმანკოს ეკრძალვის  
და პირში უდგა ლომსაო“.

ჩვენი გონებიდან ვერ ამოიშლება სახელი მისი, ვინც დღე-მუდამ გვეუბნებოდა:

„კაცად მაშინ ხარ სარგები,  
თუ ეს წესი წესად დარგე:  
ყოველ დღესა შენს თავს ჰკითხო –  
აბა მე დღეს ვის რა ვარგე?“

სამარადისოდ უკვდავი იქნება ხსოვნა მისი, ვისაც

„ერის წყლული უჩნდა წყლულად,  
ენოდა მის ტანჯვით სული,  
მის ბედით თუ უბედობით  
დადაგვია მტკიცე გული“...

ჩვენი ვალია, ილიას ნათქვამ-ნაანდერძევი საქმედ ვაქცი-  
ოთ, ცხოვრებაში განვახორციელოთ და მით ილიას სულიც  
გავახაროთ და ჩვენს თავსაც სარგებლობა მოუტანოთ, ვინა-  
ითგან **სარწმუნოება თვინიერ საქმეთასა მკვდარ არს** (ია-  
კობ. 2, 20), ანუ, როგორც თვით ილია ამბობს:

„ცხოვრებას აცისკროვნებს სული საქმით მეტყველი“...

ხოლო ამ შავსა და უბედურს დღეს კი ვინუგეშოთ თავი  
მით, რომ

„არ არის მკვდარი, ვინც მოჰკვდეს  
და ხალხს შესწიროს დღენია,  
მკვდრად იგი თქმულა, ვისაც აქ  
სახელი არ დარჩენია...“

ამინ!

(წარმოითქვა ქვაშვეთში 1907. IX. 1; „ისარი“, 1907, №193)

## ს ი ტ ვ ა ყოვლადსამღვდლო აღიქსანდრის ბარდასვალების ბამო

მეუფეო წმიდაო! ეს უამარი ხალხი, რომელიც გარს ახვე-  
ვია ჯერ კიდევ გაუციებელს შენს ცხედარს და მოელის შენ-  
გან უკანასკნელს ლოცვა-კურთხევას, შეუკრებია აქ ნათელ-  
სა **საქმეთა შენთა კეთილთა**, რომელთა შენს სიცოცხლეში  
უხვად სთესდი, მწყემსო კეთილო! მაგრამ ამა საქმეთა ჩა-  
მოთვლით მე არა მსურს შენი შენუხება: შენ არ გიყვარდა  
შენს საქმეებზე ლაპარაკი. მე ვკადნიერდები და მოვავაგონებ  
შენს პატივმცემელთ ერთს მხარეს შენის მოღვაწეობისას,  
სახელდობრ, – შენს ზრუნვას ბერმონაზონობის განახლები-  
სათვის ჩვენში...

მართალია, დღეს ბერმონაზონობას პატივი აღარა აქვს საზოგადოების თვალში, მაგრამ ამის მიზეზი არის ის, რომ მონაზონობის უმეტესობამ უღალატა თავის პირდაპირ დანიშნულებას. დღეს თუ მონაზონობის უმრავლესობას შეადგენენ უსაქმოდ ცხოვრების მოყვარენი, წინად ასე როდი იყო. წინად მონაზონობა და საზოგადო ასპარეზზედ მოღვაწეობა სინონიმები იყვნენ. წინად ქართველი თუ სტოვებდა დედას და მამას, დებსა და ძმებს, სახლ-კარსა და მეზობლებს და მიდიოდა მონასტერ-უდაბნოში, იგი ამ შემთხვევაში თავის თავისთვის როდი ზრუნავდა, არამედ თავს სწირავდა მამულს, ვინრო ფარგლითგან გამოდიოდა ფართო ასპარეზზედ სამუშაოდ, ხელს უწყობდა ერის განვითარებას, განსწავლას, გათვითცნობიერებას, განძლიერებას და განფაქიზებას; პატრონობდა ქვრივ-ობოლთა და გლახაკ-დავრდომილთ, იმედს უწერგავდა გულში და ნუგეშს სცემდა ტვირთმძიმეთა და მაშვრალთ, ამხილებდა და შეაჩვენებდა ძლიერთა ქვეყანისათა, როცა იგინი გარდაუხვევდნენ ჭეშმარიტებისა და სიმართლის გზასა. ამისთვისაც იყო, რომ სანამ ბერმონაზონობა თავის დანიშნულებას ემსახურებოდა და მოვალეობას ასრულებდა, – საქართველოც იზრდებოდა და ჰყვავოდა, ხოლო როცა ბერმონაზონობა დაეცა, – საქართველოც დაქუცმაცდა, დანანევრდა, დაეცა...

ყოველივე ეს გათვალისწინებული გქონდა, მეუფეო წმიდაო, და ამიტომაც შენი ძალღონე შეალიე ჭეშმარიტის ბერმონაზონობის აღდგენას და განახლებას ჩვენში და ამ განახლებისათვის ზრუნვა შენ ქვათა და აგურთაგან, ჭერთა და კედელთაგან თვით ბერმონაზონთა სულსა და გულზედ გადაიტანე. შენ ჩაავონე და შეაგნებინე ბერმონაზონთ, რომ სულის ცხოვნება მარტო ლოცვით არ მოიპოვება, რომ სულის საცხოვნებელად ლოცვასთან ერთად საჭიროა გარჯა-მუშაობა მოყვასთა სასარგებლოდ. ამისთვის, თუმცა შენ მიერ შეყვარებულის შიოს ბერმონაზონების უშრომლად ცხოვრება შენი უხვის შეწირულობით უზრუნველყოფილია, მაგრამ შენ მაინც შეასწავლე და შეაყვარე მათ მეფუთუკრეობა, მევენახეობა და მებოსტნეობა. შენ თითონ გაიჩინე ბოსტან-ვენახი,

სადაც მადლით შემოსილთ ხელთა შენთა დღემუდამ უმუშავ-  
ნია ამ მოხუცებულობის დროსაც კი. შენმა მაგალითმა ისე  
იმოქმედა ბერმონაზონებზედ, რომ ყოველმა მათგანმა გაი-  
ჩინა ბოსტან-ვენახი, რის გამოც დღეს ამ უდაბნოს ამშვენე-  
ბენ და აცოცხლებენ ეპისკოპოზის, მაქსიმეს, შიოს და ილა-  
რიონის ბოსტან-ვენახი. ამ საზოგადო მუშაობამ დაყუდებუ-  
ლი საბა ბერიც კი გაიტაცა და მასაც აუღია ხელში ნალდი და  
თოხი და შესდგომია ტყის გამონმენდას და ნიადაგის დამზა-  
დებას ბოსტან-ვენახის გასაშენებლად...

შეასწავლე და შეაყვარე რა ბერმონაზონთ შრომა-მუშაო-  
ბა, შენვე მოუპოვე მათ საუკეთესო ნერგი და თესლეულობა  
იმ პირობით, რომ ახალის მოსავლისაგან თესლეულობა გაევე-  
რცელებიათ მეზობლად მდებარე სოფლებში. შენ მიერ დადე-  
ბულის პირობის ბერმონაზოთაგან შესრულება, როგორც და-  
საწყისი მონასტრის სოფლისადმი სამსახურისა, შენ გახარებ-  
და და გახალისებდა, და ამის გამო განზრახული გქონდა და-  
არსება ახლო მომავალში ყველასათვის მუდამ კარლია ნიგთ-  
საცავის და აფთიაქისა, ხოლო შემდეგ, ბრძანე შენ თვის ნი-  
ნად, იქმნება ქსენონის დაარსებაც მოვახერხოთო, – ბევრი  
ხალხი იხოცება სოფლებში უნამლოდ და უპატრონოდ...

ამ რიგად, შენ დააყენე შენი მონასტერი, შენი შიო, წარ-  
სულის დროის მონასტერთა სლვის გზაზედ, და თუ შენმა მო-  
ადგილეებმა არ გადაუხვიეს შენ მიერ გაკვლეულ-გაკაფულს  
გზას, ადვილად შესაძლებელია, რომ ჩვენი მონასტრები  
კვლავ განახლდნენ, განძლიერდნენ და შეიქმნენ ტვირთმძი-  
მეთა და მაშვრალთა გზის მაჩვენებლად, პატრონად და  
მფარველად შენის, ალექსანდრე აღმადგენელო, მეოხებით!..

აი, ამ წარსულის დიდების აღდგენის და განახლების გზა-  
ზედ დაყენებისათვის გცემთ, მეუფეო, პატივს; ქედსა და  
მუხლს ვიდრეკთ შენის ცხედარის წინაშე, სასოებით ვეამბო-  
რებით მადლით შემოსილს შენს მარჯვენას და ვევედრებით  
იესო მაცხოვარს, რომ მან, სახიერმან, დაანესოს უმანკო და  
ცხოველი სული შენი საყოფელთა მართალთასა, აღგრაცხოს  
შენ რჩეულთა თვისთა თანა, ხოლო ჩვენზედ მოიღოს მოწყა-

ლება და არ გამოგვილიოს შენისთანა მადლით [და] ღვანლით შემოსილნი მამულიშვილნი!.. ამინ.

(ნარმოითქვა შიომღვიმის მონასტერში 1907. XI. 16;  
„მწყემსი“ 1907, №22 და ზ. ჭიჭინაძის მიერ გამოცემულ წიგნში:  
„სიტყვები და წერილები ყოვლადსამღვდელო ალექსანდრეზე“)

### სიტყვა

#### ბრიგოლ ორბელიანის ბარდასვალებაითგან ოსტახუთის წლის შესრულების გამო\*

*უკეთუ ძირი იგი წმიდა არს, –  
რტონიცა მისნი (რომ. 11, 17)*

იტყვის წმიდა მოციქული პავლე და ამ სიტყვათა ჭეშმა-რიტებას ცხადად აჩვენებს ცხოვრება და პირადობა ჩვენის სასიქადულო მგოსნის გრიგოლ ორბელიანისა, ვინაითგან ის სულის სიმტკიცე, გრძნობათა სინაზე, მსოფლიომხედველობის სივრცე, ჩვეულების სიფაქიზე, მოქმედების სიქველე, მისწრაფების სიცხოველე, ლხინთა შვება, ჭირთა დათმენა და ფერადფერადთა სათნოებათა სიუხვე და თვით სიბერესიკვდილამდე შენარჩუნება, – ნაყოფი იყო იმ საღის სარწმუნოებრივის გრძნობისა, რომელიც შთაენერგა მის გულში მშობელს დედას, სულმნათ ხორეშანს, იმ ხორეშანს, რომელიც „როცა პატარა გრიგოლს ეძინა, მის თავზედ ლოცულობდა და წმიდა აიაზმას ასხურებდა მძინარეს“...

„ჭეშმარიტად თავყანისმცემელი ღვთისა, ამბობს მგოსანი, არა იქადის ბედნიერებასა თვისსა და არა კარგავს სასოებასა,

---

\* ამ ტექსტის კორექტურაზე მუშაობის დროს ხელთ გვექონდა ჟურნალ „მწყემსის“ (1908, №7-8, გვ. 4-6) ის ეგზემპლარი (პარლამენტის ბიბლიოთეკა 303/09), რომელშიც მოცემულია საავტორო კორექტურა და რედაქცია post factum. წინამდებარე ტექსტი გასწორებულია აღნიშნული ეგზემპლარის მიხედვით. მოცემული ვარიანტის ავტოგრაფთან შედარება სამომავლო საქმედ წარმოგვიდგება.



როდესაც მსწრაფლ-წარმავალის ცხოვრების გზაზედ უბედურება რამ შეემთხვევა. ამ ცრუ ქვეყანაში ყოველივე წარმავალი და მომაკვდავია, დაშთებთან მხოლოდ კეთილნი საქმენი, რომლებითაც მოსავი ღვთისა უნდა წარუდგეს ბოლოს ყოველისშემძლებელისა სამართალსა. და ვაი იმას, ვინც ყოველივე ესე უწყოდა და არ შეასრულა! ხოლო დიდება უკვდავებისა მას, ვინც მტკიცედ და შეურყეველად ადგა ხსნის გზასა“...

ცხადია, რომ ამგვარად მჰაზროვნებელი მგოსანი აროდეს გადაუხვევდა ღვთის მიერ ნაჩვენებს ცხოვრების გზასა და მთელს თავის ძალღონეს მოახმარებდა მოძმეთათვის შრომასა და მეცადინეობასა. და აკი ამისთვის იყო, როცა მგოსანმა მიიღო ისეთი დიდი ადგილი, რომელიც ნაკლებ შრომასა და ზრუნვას მოითხოვდა მისგან, – ჩიოდა: „თანამდებობა ჩემი არის მშვიდობიანი, უშფოთველი, უზრუნველი, სავსე ამაოების ცხოვრებითა, რომელსაც ვერ შევჩვევივარ აქამომდის და იქნება ვერც სიკვდილამდის შევეჩვიო“-ო. იმ შემთხვევაში კი, როცა შრომა არ დაუგვირგვინებოდა შესაფერისად, გულს არ იტეხდა და კვალად განაგრძობდა მუშაობას: „მაქვს სასოება და იმედი ღვთისა მიმართ, სწერს იგი თავის დღიურში, მფარველობა მისი ცხადად ვიგრძენ რავდენჯერმე. და ამისათვის არ ვწუხვარ, გინა სადა გადამაგდოს მე ბოროტმან მხვედრმან ჩემმან“. „დიდება მალალთა შინა ღმერთსა, რომლისა ნებითა ბრუნავს სოფელი ესე და ყოველი მას შინა მსოფლიო მიდის დანიშნულ მისგანვე გზაზე“, – სწერს იგი რუსეთის ჯარის ოსმალოზედ გამარჯვების შემდეგ...

უფრო ცხადად და მკაფიოდ ეს ღვთისა მიმართ სასოება მგოსნისა გამოჩნდა მაშინ, როცა შამილმა დაატყვევა მისი ახლო ნათესავები. ეს ნათესავთა ტყვედ წასხმა მან ჩასთავალა ღვთისა მიერ მოვლენილ სასჯელად. თუმც ყველა ღონე მიიღო მათ განსათავისუფლებლად, მაგრამ დატყვევებულთა ბედილბალი მაინც უფალს მიანდო: „სასჯელი ესე ღვთისაგან მომერგო, სწერდა იგი შამილს, და მეც არ ვდრტვინავ, მისს წმიდა ნებას ვემორჩილები“... და უფალმაც არ დააგდო სასოება მისი!

განიცადა რა მგოსანმა, თუ რა დიდი მნიშვნელობა ჰქონდა საღ სარწმუნოებრივ გრძნობას მის პირად ცხოვრებაში,

მოინდომა ამ გრძნობის განვრცობა-განვითარება მოზარდ თაობის გულშიაც. „მე მინდა, სწერს იგი თავის რძალს, რომ შენი ვაჟის ნორჩი გული სარწმუნოებით იყოს განმსჭვალული, რომლის გარეშე კაცი ამ ქვეყნად უბედურია. მსურს, რომ ჩემი ძმისწული მართლმადიდებელი (სარწმუნოებითა) და ევროპის მეცნიერებით განათლებული, საფრანგეთის ახალ ფილოსოფიის ბინიერების იდეებით ნაურყვნელი ქართველი იყოს“... ჩანს, პოეტის აზრით, ქართველობა, ევროპის მეცნიერებით განათლება და მართლმადიდებელი სარწმუნოება – განუყრელი უნდა იყვნენ ურთიერთ შორის...

და ვინაითგან ამას ვერ ხედავდა იგი სამოციან წლებში სამოღვაწოდ ახლადგამოსულთა წრეში, – იერემიასებრ გოდებდა და აღშფოთებით სწერდა, რომ ახალ მოღვაწეთა მეოხებით,

„ყრმანი სანყალნი,  
უბინო გულნი,  
სწავლად მოსულნი, ნახდნენ ზნეობით!..  
უსასოება,  
ურწმუნოება  
უმანკო გულში ღრმად ჩაუნერგეს;  
„ლოცვა რად გვინდა?  
„ღმერთი რად გვინდა?  
„ჩვენი გონება არს ჩვენი ღმერთი!..  
და დაინყევლა  
თქვენი აქ მოსვლა“, –

ეუბნება მგოსანი უარყოფითი ფილოსოფიის მიმდევარ მოღვაწეთ,

„და თქვენი სიბრძნის ნაყოფი – შხამი! ...  
ღმერთი არ არის?  
შენთვის ნუ არის!  
შენ რა განუხებს, რომ სუფევს სხვისთვის?!“...

ამის გამო პოეტი თვისი ტკბილის ლექსებით ხშირად გამარტებს ქრისტიანულის სარწმუნოების მნიშვნელობას და გვეუბნება, რომ ჭეშმარიტი სარწმუნოება

1. აღაფრთოვანებს ადამიანის გონებას:

„ღმერთო, ვინ მისწვდეს შენგან ქმნილს,  
მის ფერუთვალავს შვენებას?  
სიბნელეს აქრობ ნათელით,  
სიკვდილით ჰბადავ ცხოვრებას!“...

2. უჩვენებს ადამიანს გზას ცხოვრებისას და აღძრავს მას ქმნად კეთილისა და დევნად ბოროტისა:

„რა არის ჩვენი სიცოცხლე,  
თუ არა საქმე კეთილი?  
თუ არ აღვადგენთ დაცემულს,  
არ ვექმნეთ ნუგეშმცემელი?  
თუ არა ვსდევნით ბოროტსა,  
მართლის არა ვართ მფარველი?!  
სხვის კვნესა თუ არ გვანუხებს,  
სხვისა არ გვესმის ტკივილი?!  
ამ აზრის გულსა დანერგვით  
ვსდევნიდეთ სულმოკლეობას!  
ვსდევნიდეთ ძალას დამჩაგვრელს  
და მისსა უსამართლობას!  
ვსდევნიდეთ კაცის ნამპილწველს,  
უნმინდურ ანგარებას[ა]!  
ვსდევნიდეთ ყოველს, რაც უშლის  
კაცისა სულის მალლობას!..“

3. მიანიჭებს შვებას ტვირთმძიმეთა და მაშვრალთ, განასპეტაკებს მათ სულსა და გულს, და უღვიძებს ადამიანურ გრძნობებს. სახარების სიტყვებით, ამბობს გრიგოლის მუშა ბოქულაძე,

„ზოგჯერ თუმცა არ მესმის,  
მაგრამ გულს კი უხარია მის სმენა!  
სულს მიმაგრებს ძალი ნუგეშმცემისა,  
ზეციურის მადლით განათლებული!  
გულში ჰქერება ლელვა სიბოროტისა...  
ვგრძნობ სიმშვიდეს... ლოცვაებსა ვიგონებ...  
მაგონდება დღენი ყმანვილობისა,  
ხმა დედისა, მისი ტკბილი ალერსი...  
თვალწინ ვხედავ დიდხანს დავინწყებულთა

და აღარ ვსწყევ ჩემს შობის დღეს, ჩემს ბედსა!...  
მაშინ შრომაც დიდად მიადვილდება,  
და მას ღამეს მძინავს ისე მშვიდობით,  
თითქოს ჩემს ქოხს დაჰფრინვენ ანგელოსნი!“...

ამას გვასწავლიდა, ამას გვიქადაგებდა ჩვენი საყვარელი მგოსანი, მაგრამ საზოგადოებამ იმას სულ სხვაგვარი მასწავლებლობა მიანერა: ჩვენში მიღებულია ის აზრი, რომ გრიგოლ ორბელიანი მქადაგებელია შვება-ლხენის კულტისა, მალმერთებელია ნუთიერის სიამოვნებისა...

ზემოდ ნათქვამის შემდეგ ნუთუ ეს დასაჯერებელია, ანდა მართალია?! მართალი და დასაჯერებელი აქ ის არის, რომ გ. ორბელიანი სიამოვნებას, შვებას და ლხენას საჭიროდ სთვლის ადამიანისათვის და არ უარყოფს მათ. მაგრამ, თუ სიამოვნებათა განცდა ცოდვაა, მაშ რად ეძიებს მას მთელი კაცობრიობა, რად ესწრაფება მას დიდიცა და პატარაც, მეცნიერიცა და უმეცარიც, მდიდარიც და ღარიბიც? საიდან ჩანს, რომ ამა ქვეყნიურ სიამოვნებათა განცდა ცოდვა იყვის? განა თვით საღმრთო წერილი, რომელიც საფუძვლიანად ჰქონდა შესწავლული და შეთვისებული გრიგოლს, არ გვეუბნება: **ღვინო ახარებს გულსა კაცისასა** (ფსალმ. 103, 15) და: **სიცილსა ჰყოფენ პური, ღვინო და ზეთი**, რომელი **შვებულჰყოფს ცოცხალთა** (ეკლეს. 10, 20)? იგივე საღმრთო წერილი არ იტყვის: **იხარებდი, ჭაბუკო, სიჭაბუკესა შენსა...** მაგრამ **ვიდოდი გზათა შინა უფლისა შენისათა უბინოდ** (იქვე 10, 10)? და კვალად: **მიეცით თაფლუჭი მყოფთა მნუხარებას შინა, და ღვინო სმად მყოფთა ტკივნეულებათა შინა, რათა დაივიწყონ სიგლახაკე და ტკივილი არა მოიხსენონ მერმელა** (იგავნი სოლომ. 91, 5-7)? განა თვით მაცხოვარმა არ ინება მისლვა ქორწილსა კანად გალილიასა და განგრძობა მებინახეთა შვება-ლხენისა წყლის ღვინოდ შეცვლით (იოან. 2, 1-11)? განა მან არ გვიბრძანა: **ეძიებდით პირველად სასუფეველსა ღმრთისასა და სიმართლესა მისასა და ესე ყოველი** (ქვეყნიური საშვებელნი) **შეგეძინოს თქვენ** (მატთ. 6, 33)?

ჩანს, სიამოვნებათა განცდა არ არის ცოდვა, თუ იგი არ

დაიმორჩილებს ადამიანს, არ დაატყვევებს მის თავისუფალს სულსა და არ შელახავს მის აზნაურებას! **ყოველივე ჯერ არს ჩემდა**, იტყვის წმიდა მოციქული პავლე, **არამედ არა ყოველი უმჯობეს არს; ყოველივე ჯერ არს ჩემდა, არამედ მე არავისსა ხელმწიფებასა დავემორჩილო** (1. კორ. 6, 12). ჩვენი მგოსანიც ხომ უპირველეს ყოვლისა გვასწავებს და ალგვძრავს ძებნად სასუფეველისა, ქმნად კეთილისა, დევნად ბოროტისა და აღრჩევად უმჯობესისა?!...

მაშ, საყვარელნი, ავხადოთ ჩვენს სასიქადულო მგოსანს ეს ცილისწამება, გადავაფართო ზენარი დავიწყებისა ნებსითა და უნებლიეთა შეცოდებათა მისთა, შევავედროთ იგი იესოს ტკბილსა და აღვიბეჭდოთ გულის ფიცარზე შემდეგი მისი სიტყვები, რომელშიდაც ჩაქსოვილია ამ დიდებული ქართველის მსოფლიომხედველობა:

„მიეცით ნიჭსა გზა ფართო,  
თაყვანისცემა ღირსებას;  
ნიჭს აძლევს ზენა მხოლოდ კაცს  
და არა გვარიშვილობას.  
კაცი ის არის, ვინც არის  
ზეგარდმო მაღლით ცხებული;  
მის მხოლოდ ღვანლი არს კეთილი,  
मित მხარე დამშვენებული...“

და მერმედ:

„იგი აღვიდეს მაღალსა მას მთასა წმიდასა,  
ღვთისა დიდებით გალობითა ნათელმოსილი,  
ვინც ამ სოფლის დიდებასა, მზეებრ მნათობსა,  
მონებრ არ მიჰსდევს, სცნობს რა  
მისს შუქს ფუჭ-წარმავალსა,  
ვინც ძლიერებას ხმითა მაღლით ამცნო სიმართლე,  
და ძმას დაცემულს მისცა ხელი და აღადგინა...“

ამინ.

(წარმოითქვა ქვაშვეთში, სადაც გრიგოლი ასაფლავია, 1908. III. 23; „მწყემსი“, 1908, №7-8)

ს ი ტ ყ ვ ა  
ეზნატე ინგოროვილის გარდასვალუხიდან თხუთმეტის  
წლის შესრულუხის ბამო

ამ წმიდა ტაძარში ჩვენ შევეკრებილვართ დღეს, საყვა-რელნო, იმ აზრით, რომ შევავედროთ უფალს სული ეგნატე ინგოროყვასი. შესვენებულთა მამათა და ძმათათვის ლოცვა-ვედრება სიყვარულისა და მადლობის ნიშანია საზოგადოდ, და ქართველი საზოგადოებაც, ეგნატეს ნაყოფიერის სამწერლო მოღვაწეობისათვის მადლობელი, შესწირავს დღეს საზოგადო ლოცვას. ეს ცხადია ყველასათვის...

მაგრამ, ეგნატე ინგოროყვა შესანიშნავია არა მარტო სამწერლო მოღვაწეობით, არა, იგი ღირსია პატივისცემისა და ყურადღებისა, როგორც მტკიცე ხასიათის ადამიანი, რომელმაც დაგვიმტკიცა, რომ გამუდმებულის შრომითა და მეცადინეობით მცირე განათლების პატრონსაც შეუძლია გაიკვლიოს გზა ცხოვრებისა და შეიტანოს სამშობლოს საღაროში შესამჩნევი განძი...

ეგნატე დაიბადა ღარიბს ოჯახში და ღარიბსავე სკოლაში მოახერხეს მისი მიზარება, მაგრამ, საუბედუროთ თუ საბედნიეროთ, ამ სკოლითგან იგი ადრე დაითხოვეს და ანბანის ძლივს მცოდნე ეგნატე დარჩა უმწეო-უპატრონოთ. ბევრი, ძალიან ბევრი ამ გვარს შემთხვევაში ეცემა სულით და სამუდამოდ იღუპება ცხოვრების მორევში. ეგნატე კი სულ სხვაფერ მოიქცა: მან არ მიაძინა სწავლის შეძენის სურვილი, არამედ გააორკეცა შრომა და შეუდგა ორიოდ გროშის მოპოვებას იმ განზრახვით, რომ განეგრძო სწავლა საზღვარს გარეთ, რათა ფართო სწავლით აღჭურვილს შესძლებოდა რაიმე შემწეობა აღმოეჩინა „მოსე მწერალთა“ და მისთანათა მიერ დაჩაგრულ თანამემამულეთათვის. მართალია, სურვილი სავსებით ვერ უხორციელდება ეგნატეს, მაგრამ იგი გულს მაინც არ იტებს: შეუდგება წიგნების კითხვას, რომ ამ სახით მაინც დაიკმაყოფილოს სწავლის წყურვილი; ხოლო წიგნებისა და ცხოვრებისათვის საჭირო საშვალეებას იგი პოულობს დღიურის მუშაობით...

თუმცა ამ გამუდმებულმა შრომამ მის სხეულს გამოუღია ძალღონე, მაგრამ, სამაგიეროთ, ეგნატემ შეიძინა გამოცდილება, ცხოვრების ცოდნა, თავისუფლება, დამოუკიდებლობა და სიმტკიცე ხასიათისა. ამ სახით მომზადებული ეგნატე გამოდის სამწერლო ასპარეზზე: თავის მართალის და ძლიერის სიტყვით და გაალმასებული კალმით შეებრძოლება ძალმომრეობას და ბოროტებას, და მყისვე იპყრობს მკითხველის საზოგადოების ყურადღებას და თანაგრძნობას...

სუსტის ხასიათის ადამიანს ამ გვარს შემთხვევაში გაიტაცებდა განდიდების სურვილი, თავმომწონება, პატივისმოყვარება, ამპარტავნება, – ეგნატეს კი ამას ვერ ვამჩნევთ. ის არ იცვლება, ის იგივე ეგნატეა, რომელსაც თავიდანვე დასახული ჰქონდა მიზნად შრომა პატიოსანი და უანგარო, განუწყვეტელი და გულწრფელი: პატივისცემისა და ყურადღებისათვის ზრუნვა კი მან გულითგან ამოიღო და თვით საზოგადოებას მიანდო...

და აჰა, ეს ამოდენა ხალხი დღეს შეკრებილა ეგნატეს პატივისაცემად და მადლობის მისაძღვნელად. [და ჩვენც] ვავედრებთ მამაზეციერს ამ წყნარს, თავმდაბალს და უანგარო ადამიანს, და ვთხოვთ, ეგნატესებური სწავლისა და შრომის სიყვარული მუდამ ცხოველყოს ჩვენ შორის! ამინ.

(წარმოითქვა ქვაშვეთში 1909. V. 17. „დროება“ №108)

### ს ი ტ ყ ვ ა

## დ. ზ. სარაჯიშვილის სულის მოსახსენებლად ქართულ განმანათლებელ საზოგადოებათა მიერ ბარდახდლილის პანაშვილის წინ

*უკეთუ ვინმე თვისთათვის... არა მოღვაწე იყოს,  
სარწმუნოებად უარუყოფიეს და არს  
იგი ურწმუნოდსა უძვირეს (1 ტომ. 5, 8)*

აი მცნება, რომელსაც მსახურებდა თავის სიცოცხლეში დავით ზაქარიას ძე სარაჯიშვილი, ვის გამოც შეკრებილან დღეს ამა წმიდა ტაძარში ქართველის ერის განმანათლებელ

საზოგადოებათა წარმომადგენელნი! ყველა თქვენგანმა უნ-  
ყის, რომ განსვენებულმა დავითმა შეუწყვეტელის და დაულა-  
ლავის შრომით მოკლე ხანში მოიპოვა იშვიათი ქართველთა  
შორის სიმდიდრე. ასე მალე შეძენილი სიმდიდრე კი თითქმის  
ყოველთვის წარმოშობს ორს ცუდს ჩვეულებას: მოძმეთა წი-  
ნაშე ამპარტავნება-მედიდურობას და მხოლოდ პირადის ბედ-  
ნიერებისათვის ზრუნვას. დავით სარაჯიშვილმა კი თავი წა-  
ართვა ორსავე ნაკლულევანობას და მით უკვდავყო თავისი  
სახელი. ქონებრივად და გონებრივად მაღალის საზოგადოე-  
ბის წევრებთან გასწორებულს და მათთან დღემუდამ საქმის  
დამჭერს, არასოდეს არ შეუწყვეტია კავშირი დაბალ ხალხთან.  
ყველასათვის ხელმისაწვდომი, თავდაბალი და მოსიყვარულე,  
იგი ხალხის ქირით იტანჯებოდა და მისის ლხინით იხარებდა.  
არა სხვა მდიდარზე ნაკლებ მზრუნველი პირადის ბედნიერე-  
ბისათვის, იგი არ ივინყებდა უმრწემესთა ძმათა წაღმართ  
გზაზე დაყენებას. მუდამ მომგონებელი თავის წარსულისა,  
იგი სიტყვით ან საქმით გვიჩვენებდა, რომ საფუძველი ერის  
ბედნიერებისა არის შრომა და ცოდნა. და სწორედ ამ შრომის  
სიყვარულისა და ცოდნის გავრცელებისათვის მშობელს ხალ-  
ხში, იგი არ იშურებდა არც საკუთარ ძალ-ღონეს, არც შრო-  
მით შეძენილ ქონებას. მრავალთ, დღეს აქა მდგომარეთაგანს  
და უმრავლესთ სხვაგან მყოფთ, მისის შემწეობით შეუძენიათ  
განათლება და გაუკვლევიათ გზა ცხოვრებისა...

მაგრამ განსვენებულს დავითს ეს არ აკმაყოფილებდა:  
უნდოდა, მისის შემწეობით თუ საკუთარის მეცადინეობით  
განათლების მიმღებთ, განათლება გაეგრცელებინათ მშო-  
ბელს ერში, რომლის უდიდესი ნაწილი ჯერ კიდევ **აჩრდილ-  
თა სიკუდილისათა დამკვიდრებულ და ბნელსა შინა მა-  
ვალ** არს (ისაია. 9, 2). ამისთვის, რომ შეემსუბუქებინა მოქ-  
მედთათვის მოღვაწეობა, მუდამ ღია ჰქონდა თავისი გულისა  
და სახლის კარები მათთვის, და ამხნევებდა მუშაკთ მხურვა-  
ლე სიტყვით და უხვის დახმარებით. განსაკუთრებულს მის  
ყურადღებას კი იქცევდნენ ის ქართველთა შორის მოქმედნი  
განმანათლებელნი დაწესებულებანი, რომელთაც მიზნად  
დაუსახავთ ძველის საქართველოს დიდებულის სულის კვე-



თების ნაყოფთა შესწავლა, შეგროვება, გავრცელება, თუ აღ-  
დგენა, რისი მოწმე უნდა იქმნეს მომავალი ჩვენი საერო მუ-  
ზეუმი, აღსაგებელი განსვენებულის მიერ შემოწირულის  
თანხით, და არს და იქმნება მცხეთის სვეტიცხოველის და  
სამთავროს ტაძრები და ამა ქვაშეთის დიდებულნი ბჭენი.  
ჭემმარიტად, რომ ყველა ეს დაწესებულებანი მას მიაჩნდა  
**თვისად** და, თანახმად წმიდის მოციქულის მცნებისა, **მოლ-  
ვანე იყო** მათთვის. და აი, სწორედ ამ მოღვაწეობისათვის,  
ქართველთა ერის ყველა განმანათლებელ საზოგადოებათა  
წარმომადგენელთ მოუყრიათ აქ თავი და ცხარის ცრემლით  
იგლოვენ და სტირიან სასიქადულო წვერისა და უებრო მამუ-  
ლიშვილის დაკარგვას...

საყვარელნო! მართალია, ჩვენი დანაკლისი ფრიად დიდი  
და საგრძნობელია, მაგრამ ქრისტიანთ არ შეშვენის მიცვა-  
ლებულთათვის უნუგეშო ტირილი და გოდება, არამედ მად-  
ლობა და ლოცვა ღვთისა. ჩვენც შევწიროთ მადლობა ზეცი-  
ერს მამასა დავით სარაჯიშვილის ქვეყნად მოვლენისათვის  
და შევევედრნეთ, რომ სგავსი მისი კვალად მონიჭებოდეს  
ქვეყანასა ჩვენსა არა ერთი და ორი. ამინ.

(წარმოითქვა ქვაშეთში 1911. VI. 24. „შინაური საქმეები“, №24;  
„განათლება“ №7 და ცალკე გამოცემულ წიგნში: „დავით სარაჯიშ-  
ვილის სახსოვრად“ – რუსული თარგმანით [გვ. 230-234])

ს ი ტ ყ ვ ა  
ნიკოლოზ ბასარაიონის ძის ლოლოზარძის  
ბარდასვალების ბამო

*კაცადკაცადი იქმოდენ კეთილსა თვისითა ხელითა,  
რათა აქვნდეს მიცემად, ვის იგი უხმდეს (ეფეს. 4, 28)*

მიუწერს წმიდა მოციქული პავლე ქრისტიანეთა და მით  
გვასწავებს, რომ პატიოსანი შრომით მოპოვებული ქონება  
ქრისტეს მორწმუნემ უნდა არა თუ მოიხმაროს დასაკმაყო-

ფილებელად თვისთა მოთხოვნილებათა, არამედ გაუნაწილოს კიდევ მათ, **ვის იგი უხმდეს**, ე. ი. ვინც მოკლებულია საშვალებას, მოიპოვოს პური არსობისა საკუთარის შრომითა. ეს სწავლა მოციქულთა იმდროინდელ ადამიანთათვის ახალი და თითქმის გაუგებარიც იყო, ვინაითგან წარმართობას ქველმოქმედება არა სწამდა და დაჩაგრულთა ბედილბალი ნაკლებად აწუხებდა. ღარიბ-ღატაკის შეხვედრა ცუდნიშნად იყო მიჩნეული და სიბრალულის ნაცვლად გამოიწვევდა ხოლმე ზიზღსა და შიშის ზარსა. ამ ცრუმორწმუნოებას და გულქვაობას განათლებული საზოგადოების წარმომადგენელი თავისებურად ასაბუთებდნენ კიდევ: რასაცა გაიღებ გლახაკისათვის, იმას აკლებ შენს თავსა, ხოლო მიმღებს ხელს უწყობ, განაგრძოს თავის ტანჯული სიცოცხლე, რომელიც, რაც ადრე შესწყდება, მით უკეთესიაო...

ეს სიბნელით მოცული მსოფლიო-მხედველობა ქრისტიანობამ უარყო, აღიარა რა ადამიანის მკვდრეთით აღდგომა და საიქიო ცხოვრებისათვის ამ ქვეყნადვე სამზადისის საჭიროება. ამ სწავლით აქაურ სიცოცხლეს განსაზღვრული ღირებულება მიეცა, რათგანაც საიქიოსათვის მომზადება ადამიანს შეუძლიან მხოლოდ მაშინ, როცა სააქაოს მის სიცოცხლეს და საიქიოსათვის სამზადისს ძლიერი რამ დამაბრკოლებელი მიზეზი არ გადაელობება. ამგვარ დამაბრკოლებელ მიზეზად ხორცშესხმულის არსებისათვის უპირველეს ყოვლისა უნდა ჩაითვალოს სადგურის, სამოსლის და სულისა და ხორცის საზრდოს უქონლობა...

მკვდრეთი აღდგომის მქადაგებლებმა მყისვე ათხოვეს ყური ამ გარემოებას და გარკვევით აუხსნეს წარმართთა და ურიათაგან მოქრისტიანებულთ, თუ როგორ უნდა მოპყრობოდნენ ნივთიერად დაქვეითებულ თანამორწმუნეთ: **ჰხსნილჰყავ ხელი შენი ძმისა მის შენისა ნაკლულევანისათვის** (მეორე შჯულ. 15, 11); **ნუ ვიყვარებით სიტყვითა ხოლო, გინა ენითა, არამედ საქმითა და ჭეშმარიტებითა** (1 იოან. 3, 17); **სახმართა წმიდათასა ეზიარებოდეთ** (რომ. 12, 13); **ურთიერთას სიმძიმე იტვირთეთ** (გალატ. 6, 2); **მოწყალებას გაიღებდით, ნუ მწუხარებით, ნუცა უნებლებით** (2

კორ. 9. 7), **არამედ მხიარულებით** (რომ. 12. 8). ამ მოციქულთა დარიგებამ გამოიღო ჯეროვანი ნაყოფი: ქრისტიანებმა იწყეს შეგროვება თავიანთის წვლილისა და დადება მისი ფერხთა თანამოციქულთასა (საქ. მოც. 4. 35) ნაკლულევანთა საჭიროების აღსავსებულად...

რაც მეტი დრო გადიოდა მოციქულთა შემდეგ, მით უფრო ფართოვდებოდა და ვითარდებოდა მათ მიერ დაწყებული და ნაკურთხი ნმიდა საქმე: მორწმუნეთა საზოგადოებამ მალე შეიგნო ურთიერთას სიმძიმის ზიდვის და სიყვარულის ძლიერება და მხნედ შეუდგა შეუძლებელ წევრთა ხორციელთა და სულიერთა საჭიროებათა დაკმაყოფილებას. საზოგადო საქმეში მონაწილეობის მიღებას ყველა ცდილობდა და იძლეოდა, რის მიცემაც შეეძლო: ზოგი ცოდნას და შრომას, ზოგი კი ნივთიერ საშვალეებას. მოქმედების ასპარეზს წარმოადგენდნენ ეკლესიები და მონასტრები, რომელთა ზღუდეთა შორის თავს იყრიდნენ საუკეთესო მამულიშვილნი...

გავიდნენ დრონი და მონასტერ-ეკლესიებმა დაჰკარგეს დაუშრეტელი წყარო ცხოვრებისა, – მორწმუნეთა მიერ შეწირული მამულები, და ამის გამო იძულებულნი გახდნენ ნაკლულევანთა საჭიროებათა დაკმაყოფილებისათვის ზრუნვა დაეთმოთ მათ კედელთა გარეშე მყოფი ქრისტიანეთათვის, რომელთაც, იმავე სიყვარულით განმსჭვალულთ, შეადგინეს სხვადასხვა საქველმოქმედო და საგანმანათლებლო საზოგადოებანი. ასე იყო სხვაგან და ასევე მოხდა ჩვენშიაც...

წინაშე ჩვენსა მდებარე ცხედარი ნიკოლოზ ლოლობერიძისა მოწმეა მისი, თუ საუკეთესო შვილნი ჩვენის ქვეყნისა რაოდენად გრძნობდნენ საჭიროებას ჩვენის ერის ქონებრივად და გონებრივად დაქვეითებულის ნაწილისათვის ზრუნვისას და რა ღონისძიებას ხმარობდნენ ამ საჭიროების დაკმაყოფილებისათვის. განსვენებული ნიკოლოზი ერთი იმ მცირერიცხოვან პირთაგანია, რომელთაც ქართულის დროგამოშვებითი გამოცემის საქმე მტკიცე ნიადაგზად დააყენეს და დააარსეს ქართველთა შორის წერა-კითხვის გამავრცელებელი საზოგადოება, და ცოტად თუ ბევრად შეუმსუბუქეს მშობელის ერის შვილებს სწავლის და ცოდნის შეძენა.

იგი, როგორც ჭეშმარიტი ქრისტიანე, მთელს თავისს ხანგრძლივს სიცოცხლეში იქმოდა კეთილსა თვისითა ხელითა, რათა აქენდეს მიცემად, ვის იგი უხმდეს, და დასასრული ამა ქვეყნად მოღვაწეობისა დაავგირგვინა თავის ქონების დიდის ნაწილის შეწირვით განმანათლებელ საზოგადოებისათვის. ეს უხვი შეწირულება, რამდენათაც თვალსაჩინოდჰყოფს განსვენებულის ნიკოლოზის სულის ქრისტიანულ განწყობილებას და ზნეობრივ სიფაქიზეს, იმდენადვე ავალებს ჩვენს განმანათლებელ საზოგადოებათა მხნედ მოღვაწეობას...

ამისათვის, შევსთხოვოთ, საყვარელნო, უფალს, რომ მან, თანახმად მისის მცნებისა, მოძმეთათვის მონყალე სული მონისა მისისა ნიკოლოზისა შეინყალოს და სიკცპოებით განასვენოს, ხოლო ჩვენ განმანათლებელ საზოგადოებათა მისცეს ძალი და სიმხნე ნიკოლოზ ღოღობერიძისთანა მამულიშვილთა მოლოდინის გამართლებისა. ამინ.

(ნარმოითქვა ქვაშვეთში 1912. I. 3;  
„შინაური საქმეები“. 1912, №7)

ს ი ტ ყ ვ ა  
ნიკოლოზ ზაზაძეს ძის სხვადაძის  
ბარდასვალების გამო

განუხვენე, უფალო, სულსა მონისა შენისასა!

ჭეშმარიტად ყოველი ადამიანი მონა არის უფლისა და მოიღებს მისგან ხუთს, ორს, გინა ერთს ტალანტს, **მსგავსად ძალისა თვისისა** (მატთ. 25. 15). განსვენებული ნიკოლოზ ცხვედაზეც, რომლის ლოცვა-კურთხევით მოსახსენებლად შევკრებილვართ აქა, იყო მონა ღვთისა და მოიღო უფლისაგან უწინარეს ყოვლისა ტალანტი მასწავლებლობისა, რომელიც **აქმნია** მან ჯერ მის აღმზრდელ ტფილისის საულიერო სემინარიაში და შემდეგ ტფილისის ქალთა ინსტიტუტში და წმ. ნინოს სასწავლებელში. თუმცა მასწავლებლობის სარბი-

ელზედ მოღვანეობა ფრიად ძნელია, ვინაითგან ნორჩი და სა-  
თუთი არსება მასწავლებელმა დიდის სიფრთხილითა და  
თავგანწირულებით უნდა აღზარდოს **მამაკაცად სრულად,  
საზომად ჰასაკისა სავსებისა მის ქრისტესისა** (ეფეს. 4,13),  
მაგრამ განსვენებულმა ნიკოლოზმა ღირსეულად განვლო  
ერთხელვე არჩეული სარბიელი ხსენებულ სკოლებში და და-  
იმსახურა მონაფეთა და ამხანაგთა სიყვარული, ხოლო უფ-  
როსთაგან პატივისცემა და მოხუცებულობის დროს უზრუნ-  
ველად ცხოვრების საშვალეა...

ჩვეულებრივი ადამიანი ამ ვინრო ფარგლით შემოხაზულ  
სარბიელზედ მოღვანე კმაყოფილი იქმნებოდა, ხოლო ღირ-  
სეულად განვლის შემდეგ, შეუდგებოდა მყუდრო ცხოვრები-  
სათვის ზრუნვას. ნიკოლოზ ცხვედაძე კი ჩვეულებრივის  
ადამიანის მსოფლიომხედველობამ ვერ დააკმაყოფილა,  
რადგანაც უფლისაგან დაჯილდოებული იყო არა ერთის ხო-  
ლო ტალანტითა: მასწავლებლობის უღლის ზიდვის დროს,  
იგი ემსახურებოდა მშობელს ქვეყანას თუ ჟურნალ-გაზე-  
თებში საჭირობოროტო საგნებზე წერილების მოთავსებით,  
თუ მოქალაქეთა საბჭოს ხმოსნის სახით, თუ ქართველთა  
ერის ემბაზის – სვეტიცხოვლის და სამთავროს ტაძრის გა-  
ნახლების დროს მუშაობით და მოციქულთასწორთა მირიან  
მეფისა და ნანა დედოფლის საფლავის გამშვენებით და სხ.  
მაგრამ ეს ცხოველის სულის პატრონი ადამიანი ვერც ამ  
მრავალფერადმა მოქმედებამ დააკმაყოფილა, – მას სწყუ-  
როდა მშობელი ერი განათლების სწორე გზაზე დაეყენებინა.  
მან კარგად იცოდა, რომ წინად ჩვენს ქვეყანაში განათლების  
საქმე სხვანაირად იყო მოწყობილი: თითქმის ყველა ეკლესი-  
ისა და მონასტრის ეზო წარმოადგენდა საერო სასწავლე-  
ბელს, სადაც მოზარდი თავობა დახელოვნებულის ოსტატე-  
ბის, მღვდელთა და მონაზონთა მეოხებით დედაენაზე ითვის-  
ებდა ცნობას ღვთისა, ადამიანისა და გარეშემო ბუნებისას.  
მეცხრამეტე საუკუნეში კი ეს საერო სასწავლებელნი გან-  
ჰქრნენ, ხოლო მათ მაგიერნი ან არა ჩანდნენ, ან მიუწთო-  
მელნი შეიქმნენ ჩვენის ერისათვის, – სასწავლო ენის უცო-  
დინარობა და ქონებრივად დაქვეითება მოსწავლეთა მშობ-

ლებისა შეადგენდა ამ მოვლენის მიზეზსა. ყოველივე ეს გაითვალისწინა მოძმეთათვის გულშემატკივარმა ახალგაზრდა მასწავლებელმა ნ. ცხვედაძემ, და მცირერიცხვოვან თანამოაზრებთან ერთად შეუდგა წერა-კითხვის გამავრცელებელის და თავადაზნაურთა ღარიბ მონაფეთა შემწე საზოგადოებათა დაარსებას და მათ მიერ დასახულ მიზანთა განხორციელებას. მიუხედავად იმისა, რომ ნ. ცხვედაძე ღატვირთული იყო არსობის პურის მოსაპოვებელად სამუშაოთი, იგი შეიქმნა ორისავე საზოგადოების საქმეთა მიმდინარეობის მთავარ მესაჭედ. და სულ მოკლე დროში დაარსდა სოფლად წერა-კითხვის სკოლები, ხოლო ტფილისში საშვალო განათლების სასწავლებელი, – ეს ჩვენი ძვირფასი გიმნაზია...

დააყენა რა სწორს გზაზედ წერა-კითხვის საზოგადოების სკოლათა მსვლელობა, მან განსაკუთრებითი ყურადღება მიაპყრო ამ ტაძარს განათლებისას, და გადასწყვიტა უზრუნველყო იგი ყოველმხრივ, უმთავრესად კი საკუთარის შენობის შექმნით: „სანამ გიმნაზიას საკუთარს შენობას არ მოუპოვებ და არ დავაზინავებ ყოვლის მხრით გამართულს სახლში, მანამ ვერ მოვისვენებო“, იტყოდა ხოლმე განსვენებული... ბევრს, ძალიან ბევრს მოხუცებულის ახირებად მიაჩნდათ მის მიერ გიმნაზიისათვის საჭირო ადგილის ძებნა და სასწავლებლის შენობის გეგმის დამზადება: „ნიკო ცხვედაძეს უნდა უფულოდ სასახლე ააშენესო“, გაისმოდა გარშემო. ხოლო განსვენებული ამ დაცინვას თითქოს ვერც კი ამჩნევდა. იგი **დღე და ღამე იქმოდა** (1 თეს. 2,9) და საქმესა მას ღვთისად ჰგონებდა: **არა თუმცა უფალმან აღაშენა სახლი, ცუდად შვრებიან მაშენებელნი მისნი**-ო (ფსალ. 126,1), ხშირად გაიგონებდით მისგან. უფალმაც აკურთხა შრომანი და რუდუნებანი (1 თეს. 2,9) მისნი, და უკვე რამდენიმე წელიწადია, ჩვენი სასწავლებელი მოთავსებულია ამ შეუპოვარის ხასიათისა და დაუცხრომელის შრომისმოყვარე ადამიანის თაოსნობით აგებულ სასახლეში...

ამ ჟამად კი ჩვენ ვიმყოფებით იმ დარბაზში, რომლის სულის წმიდის სამუდამო სადგურად გარდაქცევას და წმ. მეფის დავით აღმაშენებლის სახელზედ ტაძრად კურთხევას

განსვენებული მოელოდა ყმანვილის ხალისითა და აღტაცებით. ამ განუხორციელებელის სურვილის შესრულება და ამ სასახლის შენარჩუნება სკოლისათვის მან უანდერძა მის თანამშრომელთა და სასწავლებელის მესვეურთა, რომელნიც, უეჭველია, არა უგულბებელჰყოფენ სკოლისათვის თავდადებულის მოხუცის მოლოდინს და უკანასკნელს სურვილსა...

თქვენ კი, საყვარელნო მოწაფენო, ნურასოდეს ნუ დაივინყებთ განსვენებულის ნიკოლოზის თქვენდამი სიყვარულს, თქვენდა საკეთილდღეოდ უანგარო განუწყვეტელ შრომას და მუდმივ წმ. მოციქულის სიტყვით დარიგებას, – გიყვარდეთ თქვენი სამშობლო **არა სიტყვითა ხოლო, გინა ენითა, არამედ საქმითა და ჭეშმარიტებითა** (1 იოან. 3,18). ეხლა კი, შეევედრნეთ უფალსა, რომ მან დაანესოს სული განსვენებულის ნიკოლოზისა მართალთა თანა და მიანიჭოს მას გვირგვინი უკვდავებისა. ამინ.

(წარმოითქვა ქართულ გიმნაზიაში 1911. XI. 2; „შინაური საქმეები“, 1911, №37; „განათლება“, 1911, №11)

ს ი ტ ყ ვ ა  
ი ა კ ო ბ ს ი მ ო ნ ი ს ძ ი ს გ ო ბ ა ხ ა შ ვ ი ლ ი ს  
ბ ა რ დ ა ს ვ ა ლ ე ბ ი ს ბ ა მ ო

*ვემნეთ კაცი ხატად და მსგავსად ჩვენდა და  
მთავრობდეს იგი... ქვეყანასა ზედა  
(შექმნ. 1, 26)*

ჰბრძანა უფალმა, და მითვე მიანიჭა ადამიანს ბატონობა ყოველსავე ქვეყნიურ ქმნილებაზე. ამ დიდებულის მოწოდებისათვის აღჭურვა იგი საჭირო საშვალეებითა, შთაბერა რა **მტვერისა ქვეყანისაგან** შექმნილს სხეულს **სული** სიცოცხლისაჲ (შექმნ. 2. 7). სულის ნიჭთა შინა დასდო [უფალმა] საფუძველი ადამიანის ქვეყანაზედ ბატონობისათვის, დაავალა რა ამ ნიჭთა განვითარება და განათლება ღვთის ცნობით, გა-

რეშემო ბუნების და მის მოვლენათა კანონების შესწავლით, – ცხოვრებისათვის გამოსაყენებლად. პირველქმნილი ადამიანი, იცნობდა რა ჭეშმარიტს ღმერთსა და აღასრულებდა რა მის სწავლა-ბრძანებას, იყო ბატონი და უფალი ყოვლისავე ქვეყნიერის ქმნილებისა. მხოლოდ ღვთის მცნების გარდასლვამ გამოიწვია შედეგად ადამიანის სულიერ ძალთა დაჩლუნგება და ქვეყნის ბატონის ბუნების მოვლენათა და მხეცთა მიერ შეშინება და დამორჩილება. მაგრამ ყოვლადმონყალე უფალმა არა უგულვებელჰყო ცოდვილი ადამიანი, მოუვლინა მაცხოვრად საყვარელი ძე თვისი, უფალი ჩვენი იესო ქრისტე, რომელმაც დაუძღურებული ადამიანი გამოიხსნა ცოდვისა და მისი შედეგისაგან, დაუბრუნა მას ძალი და ხელმწიფება ქვეყანასა ზედა და წარავლინა მონაფენი თვისნი ქადაგებად სასუფეველისა ღვთისასა (მატთ. 10,1; მარკ. 16,15-18; ლუკ. 9,1-2)...

განსვენებული იაკობ გოგებაშვილიც, ვითარცა ერთი მონაფეთაგანი უფლისა ჩვენისა იესო ქრისტესი, გულდასმით შეუდგა ამა სასუფეველის ქადაგებას თანამოძმეთა თვისთა შორის პირველისავე დღითგან სკოლითგან გამოსლვისა. თავდაპირველად მოღვაწე მცირე ფარგლით შემოხაზულ ასპარეზზედ, – სასულიერო სასწავლებელში, – შემდეგ იგი შეიქმნა მთელის ჩვენის ერის მასწავლებლად. თანახმად იესო ქრისტეს მცნებისა, მან უარჰყო თავი თვისი (მარკ. 8,34), აღიღო ჯვარი მასწავლებლობისა და შეუდგა მშობელის ერის ღვთის მსგავსებისა და ქვეყანაზედ გაბატონების გზაზედ დაყენებას. ბევრი შრომა, ბევრი საყვედური, ბევრი შეურაცხება და ბევრი დაბრკოლება განიცადა განსვენებულმა, მაგრამ შეუდრეკელად განაგრძობდა მუშაობას მშობელის ერის საკეთილდღეოდ. ამ განუწყვეტელმა შრომამ და თავდადებულმა მოღვაწეობამ იაკობის სიცოცხლეშივე გამოიღო ჯეროვანი ნაყოფი: ათი ათასობით და ასი ათასობით ვრცელდებოდა ხალხში მის მიერ შედგენილი წიგნები და ხალხმაც შეიგნო ამ წიგნების მნიშვნელობა...

ამ წიგნთა შორის განსაკუთრებულს ყურადღებას მიიქცევს „ბუნების კარი“. აცნობს რა ამ წიგნით მოსწავლე ახალ-



გაზრდობას კერძოდ და ჩვენს ერს საზოგადოდ ბუნების მოვლენათა და მათ კანონებსა და მიზეზებს, განსვენებული იაკობი მკითხველთა ყურადღებას აღამაღლებს მიზეზთა მიზეზისადმი, ხოლო ჩვენის ერის ძველი ცხოვრების მოთხრობით ამტკიცებს იმ უტყუარ აზრსა, რომ სანამ ჩვენი ერი ღვთისმოსავი და მოშიში იყო, მანამ არ გამოლევია ბაგრატი-დავით-თამარები...

ასე ესმოდა განსვენებულს იაკობს თავისი მოვალეობა მასწავლებლისა და ამ სახედ ასრულებდა მაცხოვრის ბრძანებას ღვთის სასუფეველის ქადაგებისათვის, და ფრიად სწუხდა, რომ ამ უკანასკნელ დროს ჩვენში შესამჩნევად იკლო ღვთის სასუფეველის ქადაგებისათვის ზრუნვამ. ამ მოვლენას იგი სთვლიდა ფრიად სამწუხაროდ და შიშობდა, ვაი თუ სარწმუნოებრივ გულგრილობას ზედ მოჰყვეს ზნეობის დაცემა და ერის გადაგვარების გზაზე დადგომაო. სამაგიეროდ, სიხარულით აღფრთოვანდებოდა ხოლმე, თუ სადმე შეამჩნევდა სარწმუნოების დაცვისა და ზნეობის განფაქიზებისათვის ზრუნვის ნიშნებსა: ამ ორიოდე წლის წინად ხშირად ნახავდით განსვენებულს იაკობს ამ ტაძრის გალავანში, ან კიდევ გვერდით ბაღში, სიამოვნებით თვალყურის მგდებელს ტაძრის კედლების ზრდისა და ჩუქურთმებით შემკობისათვის. „მიხარის, როცა ვხედავ ამ ტაძრის მამა-პაპათა მიერ შემუშავებული გეგმით შენებას, იქნება, ღვთის შეწევნით, მათი სარწმუნოებრივი გრძნობაც განცხოველდეს ჩვენშიო“, იტყოდა ხოლმე მოხუცი. უკანასკნელ დღეებში კი, როცა მახლობლებმა უამბეს, შენს სადღეგრძელოდ და სენისაგან განსაკურნებელად საქართველოს კუთხეებში პარაკლისები გადაუხდიათო, მოხუცი, მიუხედავად ძლიერის ტკივილებისა, დამშვიდდა, გამხიარულდა და სიამოვნებით წარმოსთქვა: „მადლობა ღმერთს, ჩემთვის ლოცულობენ, ეს კარგი ნიშანია, ვინაითგან სხვისთვის ლოცვა მარტო ზნეობრივად განვითარებულ არსებათა კუთვნილებათაო“...

საყვარელნო! შეკრებილება თქვენი საქართველოს ყოველი კუთხითგან მოწმეა თქვენი განსვენებულის იაკობისადმი პატივისცემისა და სიყვარულისა... ნუ მოაკლებთ ამ სიყვა-

რულს ნურც იაკობს და ნურც იმ საქმეს, რომელსაც თვისი ძალონე შესწირა იაკობმა. შეუწყეთ ხელი მშობელს ერში ჭეშმარიტის ცოდნის გავრცელებას, განამტკიცეთ ჯვარის-მტვირთველ ერში ღვთის ცნობა, ჰქადაგეთ საკუთარის ცხოვრებით ქრისტეს სარწმუნოება, განაცხოველეთ უფლისადმი სასოება, შეიმოსეთ **ურთიერთის სიყვარული, რომელ არს სიმტკიცე სრულებისა** (კოლ. 3,14), რათა ყოველი ჩვენგანი იქმნას მზგავს ღვთისა, ეუფლოს ქვეყანას და მთავრობდეს **თევზთა ზღვისათა, მფრინველთა ცისათა, და ყოველთა პირუტყვთა, და ყოველსა ქვეყანასა და ყოველთა ქვენარმავალთა ქვეყანასა ზედა** (შექმნ. 1,28). და ყოველივე ამით განამხიარულეთ ჩვენის ქვეყნის კეთილდღეობისათვის მრავალჯერ მწუხარების განმცდელი სული იაკობ გოგებაშვილისა!.. ამინ.

(წარმოითქვა ქვაშვეთში 1912. VI. 10; „შინაური საქმეები“ №25)

ს ი ტ ყ ვ ა  
აღიქსანდრე სოლომონის ძე ხახანაშვილის  
ბარდასვალების გამო

*ღვანლი კეთილი მომიღვანების,  
სრბაჲ აღმისრულების,  
სარწმუნოებაჲ დამიმარხავს (2 ტიმ. 4, 7)*

სრული სიმართლით შეიძლება ითქვას შენთვის, ძვირფასო აღიქსანდრე, ეს სიტყვები მთავარმოციქულის პავლესი! შენ, საშუალო სასწავლებელში სწავლის დროსვე გარკვეული გქონდა, თუ რომელ ასპარეზზედ აღასრულებდი შენს სამძიმო სრბასა. შენ მაშინვე აირჩიე ცხოვრების საგნად მშობელი ერის წარსული დიდების შესწავლა და ამ დიდების გამომხევება შენიანთა და უცხოთა საცნაურად და სარგებლად. ამ წმიდა საქმეს ემსახურებოდი შენ 25 წლის განმავლობაში და თითქმის აისრულე კიდევ გულის წადილი: შენი წყალობით

ჩვენი ერთს კულტურა საკმაოდ შეუძლიანთ გაიცნონ სხვა ხალხთა შვილებმა და შენმა თანამემამულეებმა...

ეცნობოდნენ რა ჩვენი ერის დიდებულ წარსულს უცხოელნი, მადლიერი გრჩებოდნენ და შენს სახელს პატივით და დიდებით ახსენებდნენ, ჩვენ კი, შენი სისხლი და ხორცი, უმეტეს შემთხვევაში ვერც კი გიცნობდით: აბა გადმოგვხედე შენი გონიერი თვალით და ჩვეულებრივის გულწრფელობით სთქვი, – ბევრს ჩვენგანს ნაუკითხავს ნახევარი, ანუ მეოთხედი მაინცა შენი ნაწერი? აბა მოიგონე, გულკეთილო ადამიანო, ბევრი ჩვენგანი გინახავს შენს ლექციებზე ამ ხუთიოდე წლის წინად რომ ჩამოხველ ჩვენს დედაქალაქში და მიუხედავად შენის ავადმყოფობისა აღტაცებით გვაცნობდი ჩვენი ერის თავგადასავალსა? და განა მარტო აქ ვიჩენდით გულგრილობას შენის საყვარელის საგნისადმი შენნი თანამოძმენნი? არა, საუბედუროდ, არც იქ, თვით მეცნიერების ტაძარში იყავ შენ განებივრებული ქართველთა ყურადღებით; რამდენჯერ მომხდარა, რომ შენს ლექციას დასწრებითა მარტოდენ ორი სამი მსმენელი?..

მაშ რა გამოძრავებდა, რა გახალისებდა, რა გაიძულებდა ამოდენა შრომისათვის? მარტოდმარტო განუსაზღვრელი და უანგარო სიყვარული მამულისა და მისი მომავალისა, ის სიყვარული, რომელიც **არა ეძიებნ თვისასა, ყოველსა თავსიდებნ, ყოველსა მოითმენნ**, ვინაითგან **ყოველი ჰრწამნ** (1 კორ. 13,5-7). შენმა განუზომელმა მამულის სიყვარულმა აგაღებინა ხელი პირადი ბედნიერებისათვის ზრუნვაზე და დაგიბადა რწმენა, რომ თუ დღეს არა, – ხვალ, ან ზეგ მაინც შეიგნებენ შენი მამულიძვილნი სამშობლო ისტორიისა და ლიტერატურის შესწავლის საჭიროებას, და ხვალინდელის ქართველობისათვის არა ზოგავდი თავს და შრომობდი სიცოცხლის უკანასკნელ წუთებამდე. ახლანდელ თაობას კი შორითგან გვიტყეოდი, რომ ჩვენი უკუღმართის ცხოვრების შავს სინამდვილეს არ მოეკლა შენში რწმენა და სიყვარული მომავალი თაობისადმი. ამისთვის არ იყო, რომ არ შორდებოდი მოსკოვს, მიუხედავად შენი მეგობრების რჩევისა, – ნადი სამშობლოში, თორემ მოსკოვი მოგიღებს ბოლოსო! და აი,

ასრულდა მათი წინასწარმეტყველება: ჩრდილოეთის სუსხი-  
ანმა ჰაერმა და გამუდმებულმა შრომამ მოგისპო სიცოცხლე  
და დღეს ვხედავთ **ხატად ღვთისა დაბადებულსა შვენიერე-  
ბასა შენსა შეურაცხად, უპატიოდ და უსახურად!**...

მაგრამ მიმოიხედე გარშემო, ალექსანდრე, და დაინახე ეს  
დიდებული სანახაობა: გვირგვინები, ლენტები, ბრწყინვალე  
შეკრებულება მღვდელთა და ერთა! რამ მოუყარა ყველა ამას  
აქ თავი? რა ამბავია? ნუთუ შენმა მემამულიშვილებმა შევიგე-  
ნით ჩვენი შეცთომა, უკუვაგდეთ ჩვეულებრივი გულცივობა  
და აღვიარეთ სათაყვანებლად შენი წმიდათა წმიდა? ნუთუ  
შენმა ჩვენში ჩამოსლვამ გაგვიღვიძა მიფერფლილი სიყვარუ-  
ლი სამშობლოსადმი, აღგვიძრა სურვილი შევისწავლოთ შენ-  
გან მამაპაპათა თავგადასავალი, მათი ნაღვან-ნამუშაკარი და  
განგვსჭვალა მტკიცე გადანყვეტილებით შეუერთდეთ მათ  
ცოდნისა, შრომისა და რწმენის კავშირით? უფალმა აკურ-  
თხოს, მაშ, შენი აქ მოსლვა! **გარდამოიხილე ზეცით, ღმერ-  
თო, და იხილე და მოხედე ვენახსა ამას, და განამტკიცე ესე,  
რომელ დაასხა მარჯვენემან შენმან** (ფსალ. 79, 14-15)!

გარნა, ნუ მიწყენ, ჩვენი უწყინარო ალექსანდრე, ამ შენ-  
თან უკანასკნელად გამოსალმების დღეს ერთი რამ კიდევ  
მოგახსენო: მე მომსწრე ვარ გრიგოლ ორბელიანის, დიმიტრი  
ბაქრაძის, ნიკოლოზ ბარათაშვილის, გაბრიელ ეპისკოპოზის  
და ილია ჭავჭავაძის დასაფლავებისა! იცი, რა პატივით და  
დიდებით მივასვენეთ ეს ჩვენი ქვეყნის მნათობნი საფლავის  
კარამდე? მერმე? მერმე ისა, რომ დღეს აღარც მათი საფლა-  
ვეები გვახსოვს და ვეღარც მათ თხზულებათა სრული კრებუ-  
ლის გამოცემა მოვახერხეთ, – ვერ მოვიცალეთ! ჭეშმარი-  
ტად, **ზრუნვამან ამა სოფლისამან და საცთურმან სიმდიდ-  
რისამან შეაშთვეს** (მათ. 13,22) ჩვენს გონებაში მათი ხსოვ-  
ნა და გულში კიდევ მათი სიყვარული! მაშ, ნუ დაგვძრახავ,  
მრავალის ჭირის დამთმენო (2 ტიმ. 2,3) ალექსანდრე, თუ  
მეორმოცე დღეს შენი გარდაცვალებისა ათიოდე ქართველის  
მეტმა ვერ გინახულოს, ხოლო წლის თავზე ოცზე მეტმა ვერ  
მოვიცალოთ დიდუბეში მოსასვლელად! ნურც იმისთვის დაგ-  
წყდება გული, თუ შენს თხზულებათა მეორედ გამოცემადმდე

დიდმა დრომ განვლოს, ჩვენ ჯერ კიდევ მოუმზადებლები ვართ ნამდვილი მოქალაქეობრივის ცხოვრებისათვის!..

შეგვინდევ, ჩვენო ტკბილო ალექსანდრევ, და მერწმუნე, რომ ეს გარდამავალი ხანა ადრე თუ გვიან გაივლის, რომ მოვა სხვა დრო, დრო თავის შეგნებისა, და მაშინ შენს ნაშრომ-ნაწერსაც დააფასებენ; დრო, ოდეს შენ მიერ დათესილი თესლი აღმოცენდება და აღორძინდება (მარკ. 4, 27) და გამოიღებს ნაყოფსა რომელიმე ასსა, რომელიმე სამეოცსა და რომელიმე ოცდაათსა (მატთ. 13, 23). მაშინ შენს საფლავსაც მოსძებნიან, შენს ნაწერსაც გამოსცემენ, და ლითონისა და ყვავილების გვირგვინების მაგიერ მოგიძღვნიან სიყვარულისა და მადლობის თაიგულსა. მანამდე კი განისვენე შენის სასო ღვთისმშობლის საფარვლის ქვეშე და ინუგეშე თავი წმიდის პავლე მოციქულის სიტყვებით: **ღვანლი კეთილი მომიღვანებიეს, სრბაჲ აღმისრულებიეს, სარწმუნოებაჲ დამიმარხავს, და მიმელის მე გვირგვინი, რომელი მომცეს მე მართალმან მან მსაჯულმან.** ამინ.

(წარმოითქვა ქვაშვეთში 1912. VIII. 5. „შინაური საქმეები“ №36)

ს ი ტ ყ ვ ა

ა. ვ. ქუთათელაძის ბარდასვალეზის ბამო

*დალათუ ბევრ მზარდულ გესხენ...  
არამედ არა მრავალ მამა (1 კორ. 4, 15)*

სწორედ ჩვენის დროისათვის უბრძანებია წმ. მოციქულს პავლეს, ვინაითგან ჩვენს დროში ხშირად და ძაიან ხშირადაც აღმზრდელობა-მასწავლებლობა მხოლოდ არსებობის პურის მოსაპოებელ საშვალებად შექმნილა. მიმოიხედეთ გარეშემო და ადვილად დაინახავთ, რომ გუშინდელი მასწავლებელი დღეს მოღვანეობს ისეთს სარბიელზედ, რომელსაც არავითარი კავშირი არა აქვს მასწავლებლობა-აღმზრდელობასთან!..

სასიამოვნო გამონაკლისს წარმოადგენდა ამ მხრით ახ-

ლადგანსვენებული არისტობულ ვასილის ძე ქუთათელაძე. უმაღლესი სწავლით აღჭურვილი და თვალსაჩინო მოხელის ადგილის დაჭერის ადვილად შემძლებელი, იგი თავითგანვე შეუდგა მასწავლებლობა-აღმზრდევლობას და 27 წლის განმავლობაში ენით თუ კალმით განუწყვეტელად ეწეოდა ამ მძიმე ტვირთის ზიდვასა. ყოველგან, სადაც კი განგებამ არგუნა მოღვაწეობა, არისტობულმა იჩინა თავი ჭეშმარიტის მამობრივის მზრუნველობით მონაფეთადმი, რის გამოც უკანასკნელთ მიჩნეული ყავდათ იგი თავის მესაიდუმლედ და მზრუნველ-მფარველად: არ ყოფილა შემთხვევა, რომ მონაფეთ დაეფართ რაიმე თავიანთ „არისტო“-საგან და არ გაეზიარებინათ საყვარელის მასწავლებლისათვის ყმანვილური ჭირი და ლხინი. ამყარებდა რა ამ გვარს განწყობილებაზედ მონაფეთთან თავის მოღვაწეობას, განსვენებული არისტობული მთელის თავისი არსებით შეეცადა გადაეცა მათთვის, როგორც ცოდნა სამშობლო ენისა, ისტორიისა და მწერლობისა, ისე ის განუზომელი სიყარული მამულისადმი, რომლითაც თვით იყო განმსჭვალული. ხოლო ვინაითგან სასწავლებელის მიერ განსაზღვრული დრო ამ ცოდნისა და სიყვარულის გარდასაცემად არისტოს არ ჰყოფნიდა, ამისთვის მან გამოიგონა ახალი საშვალეა გათვალისწინებულის მიზნის მისაღწევად: კვირა-უქმე დღეებში შეაგროვებდა ხოლმე მონაფეთებს და მათთან ერთად გაემგზავრებოდა ამა თუ იმ ტაძარის, ანუ მონასტრისკენ. თავდაპირველად განსვენებული მონაფეთებს წირვა-ლოცვას მოასმენინებდა, რომლის დროს ხშირად თითონ გალობდა და კითხულობდა საეკლესიო წიგნებს, ხოლო მას უკან შეუდგებოდა ძველის დროის ნაშთის აღწერა-შესწავლას. ენაწყლიანი და ტკბილმოუბარი, ისე გაიტაცებდა ხოლმე მსმენელებს წინამდებარე ძეგლის აღწერის დროს მამაპაპათა თავგადასავალით და სამშობლოს ბედიღბლით, რომ ყურადმღებელთ სრულებით ავიწყდებოდათ სასამელ-საჭმელი და დაღლა-მოქანცულობა...

სწავლის ამ გვარის გადაცემით, ჩვენის ქვეყნის საუცხოო ბუნების წიაღად, ისტორიულ ნაშთთა წინაშე, არისტო-

ბულმა მოხიბლა არა მარტო თავისი მონაფენი, არამედ მათი მშობელ-ნათესავნი და სულ გარეშე პირნიც, რის გამო ბევრისაგან ბევრმა ქართველმა ინახულა და მოილოცა არისტობულის ხელმძღვანელობით ჩვენი ქვეყნის სხვადასხვა ტაძარ-მონასტერი. ამ ნახვა-მოლოცვას კი შედეგად მოჰყვა წმიდის თამარ მეფის მიერ აღგებულის ბეთანიის საუცხოვო ტაძრის დაქცევა-განადგურებისაგან გადარჩენა და განახლება, ხოლო არისტობულის პატარა ქართველთა მასწავლებლისაგან დიდრონ ქართველთა მასწავლებელ-ხელმძღვანელად გადაქცევა. ჭეშმარიტად, **მცირედსა ზედა დადგენილი** შეიქმნა იგი **მრავალსა ზედა დადგენილად** (მატ. 25,21). და ეს მრავალნი და დიდრონნი მადლობის ნიშნად დღეს შეკრებილან ამ წმიდა ტაძარში, რათა ქართულ გიმნაზიის მცირეწლოვან მონაფეებთან ერთად შეავედრონ ზეციერს მამას მშობელის ერისა და ეკლესიის სიყვარულით აღტყინებული სული არისტობულ ქუთათელაძისა, და შესთხოვონ, არისტობულის მიერ დათესილმა თესლმა მოსცეს ქვეყანასა ჩვენსა ნერგი კეთილი და მრავალნაყოფიერი!.. ამინ, ამინ!

(წარმოითქვა ქვაშვეთში 1912. XI.18; „განათლება“ 1912 №10)

### ს ი ტ ყ ვ ა

### ქ. ს. მესხის ბარდასწავლების გამო

დღეს მოზღვავებული ხალხი უკანასკნელის ამბორის ყოფით ეთხოვება იმ ადამიანს, რომელიც ჩვენის ქვეყნის ყველა კუთხეში გათქმულია მსახიობის სახელით, თუმცა სხვა ღვანლიც მიუძღვის სამშობლოს წინაშე. ჩვენის სცენის მოღვაწეთათვის ფრიად სანუგეშო უნდა იყოს ამოდენა ხალხის თავის მოყრა იქ, სადაც ბევრისაგან ბევრი მსახიობს სცენაზედ სთვლის საზოგადოების გამართობელ, გამამხიარულებელ არსებად, ხოლო სცენის გარეშე თითქოს უმნიკვლო ზნეობით შემკულის საზოგადოების არა-სრულ-უფლებიან წევრადა. ნუ გეუცხოვებათ ეს სიტყვები, ვინაითგან ამგვარი შეხე-

დუღება სცენასა და მსახიობზე არ შეადგენს მარტო ქართველთა საკუთრებას, არამედ არსებობს უფრო განათლებულ ერთა შორისაც: როცა ქალაქ ჟენევაში განიზრახეს სამუდამო სცენის დაარსება, წინააღმდეგ გახდა სხვათა შორის განთქმული ჟან ჟაკ რუსო. ის სწერდა ერთ მეგობარს, თეატრი ადამიანს ვნებათა ღელვას უცხოველებს, აქეზებს წუთიერის სიტკბოების განცდისათვის, ანებივრებს და უღვიძებს, განსაკუთრებით ახალგაზრდობას, ქვენა გრძნობათა. თვით თეატრი დარბაისელ ადამიანთათვის საჭირო დაწესებულება კი არ არის, არამედ თავშესაფარია უსაქმო პირთათვის, რომელთა დავინწყებით თავიანთი ვინაობა და მოვალეობა და არ იციან, რა უყონ თავისუფალ დროსაო. სხვები, განსაკუთრებით მორალისტები, კიდევ უფრო შორს მიდიან. ისინი სამუდამო სცენას ზნეობრივ დამღუპველად სთვლიან, როგორც მსახიობთა, ისე თეატრში მოსიარულე საზოგადოებისათვის, რათგანაც თეატრი აჩვევს ძლიერ გრძნობათა განცდას და მიმდინარე ცხოვრების უკუღმართობას ჩვეულებრივ მოვლენად არაცხვინებსო...

საბედნიეროდ, სცენის საუკეთესო მოღვაწეთა მეცადინეობით, ეს შეხედულება ირყევა და ფეხს იკიდებს სხვაგვარი, – თეატრმა საზოგადოება უნდა გაართოს და თანვე უნდა აღზარდოს, აღამაღლოს, გააკეთილშობილოს. ამ დიადი მიზნის მისაღწევად კი თეატრი საუკეთესო იარაღი და საშვალეობაა: ის თავის ზღუდეთა შორის ჰკრებს ყველა ნოდებისა და ჰასაკის წარმომადგენლთ, აკავშირებს მათ სიყვარულისა, გინა მძულვარების ერთგვარად განცდის გრძნობითა და უღვიძებს შეგნებას ადამიანის მაღალის დანიშნულებისას..

მართალია, მსახიობი სცენაზედ ჩვენ გადმოგვცემს არა თავის აზრსა, გვიხატავს სხვის მიერ შექმნილ სურათსა, მაგრამ ძლიერის მეტყველებით, მოძრაობით და მოქმედებით სულს უდგამს, სისხლსა და ხორცს ასხამს მწერლის ნაწარმობსა; იგი ამ სახედ ქვეშარიტი გამგრძობი და დამამთავრებელია ავტორისა. მაგრამ სანამ მსახიობი ამ სიმაღლეს მიაწევდეს, თვით გაიზრდებოდეს, საჭიროა მისთვის ბევრი შრომა, დიდი გულმოდგინება და განუწყვეტელის სწავლის ხალისი...



სწორედ ამ იშვიათ თვისებით იყო შემკული წინაშე ჩვენსა მდებარე, ქართული სცენის მესვეური და დაუვინყარი მსახიობი კოტე მესხი. მიუხედავად იმისა, რომ განსვენებული თავის სასცენო მოღვაწეობის დასაწყისშივე ირიცხებოდა ჩვენის ერის სასიქადულო მოღვაწეთა გუნდში და თავითგანვე განთქმული იყო როგორც ქართული სცენის „ლამპარი“ და „ბუმბერაზი“, იგი განუწყვეტილად, უკანასკნელ ჟამამდე, შრომობდა თვითგანვითარებისა, სათეატრო საქმის საუკეთესოდ შესწავლისა და სამშობლოს წინაშე ერთხელვე თავსნადების მოვალეობის საუმჯობესოდ შესრულებისათვის. ამ მიზნით მან, ხელმოკლე და ნივთიერად შეინროებულმა ადამიანმა, არა ერთხელ ინახულა რუსეთისა და ევროპის თეატრები და იქ მოიძია მასწავლებლები. აკი ამისთვის იყო, რომ მისი მონაწილეობა ამა თუ იმ პიესაში თავდებად ხდებოდა პიესის საუკეთესოდ შესრულებისა და საზოგადოებას სიამოვნებით მიისწრაფოდა თეატრისაკენ, და ბრუნდებოდა იქითგან კმაყოფილი და მადლიერი. ამ გრძნობათა ნაკადმა სამის წლის წინად მთელს საქართველოს ადღესასწაულებინა კოტეს ოცდაათის წლის მოღვაწეობა, ხოლო დღეს ცხარის ცრემლით აატირა იგი. გლოვით მოცულის ქვეყნის საერთო ტირილს მეტის სიმწვავით განვიცდით ჩვენ, რომელთაც წილად გვხვდა საკუთარის ხელით მივაბაროთ მიწას ძვირფასი ნეშტი...

განვაზავოთ, საყვარელნო, ეს საზოგადო გლოვა მხურვალის ლოცვით: უფალო, უკვდავჰყავ სახელი კონსტანტინე მესხისა ზეცათა შინა, ხოლო ქვეყანასა ზედა გაგვიმრავლე მის მსგავსნი მსახიობნი და სცენის მოღვაწენი!..

ამინ.

(წარმოითქვა 1914. V. 18 ქვაშვეთში)

## ს ი ტ ყ ვ ა აკაკის ბარდასპალეზის გამო

პატარებო! ყველა თქვენგანს რამდენიმე მასწავლებელი ჰყოლია: ერთი გასწავლიდათ წერა-კითხვას, მეორე – ანგა-

რიშს, მესამე – საღვთო შჯულს, მეოთხე – კიდევ რომელსამე სხვა საგანს. სკოლაში მყოფ მასწავლებელთა გარდა ჩვენ გვეყვანან ისეთი მასწავლებლები, რომელნიც გვასწავლიან სამშობლოს სიყვარულს, მისი ჭირისა და ლხინის განაწილებას, მისი განათლებისა, განსწავლისა და აყვავებისათვის ზრუნვასა და შრომას...

ამგვარ მასწავლებელთა შორის უპირველესი ადგილი ეჭირა ჩვენში იმ დიდებულს მოხუცს, რომელიც თითქმის ყველას თქვენგანს საკუთარის თვალთ გინახავთ და რომელსაც აკაკი ერქვა. მისი საუცხოვო ლექსები თქვენ ზოგი გისწავლიათ, ზოგი წაგიკითხავთ და იცით, თუ ვინ იყო აკაკი. ვამბობ, იყო მეთქი მისთვის, რომ აკაკი დღეს ცოცხალი აღარ არის: ის მიიცვალა ამა თვის 26, სწორედ იმ დღეს, რა დღესაც სული ჩააბარეს უფალს დიდებულმა მეფემ დავით აღმაშენებელმა და სულმნათმა გაბრიელ ეპისკოპოზმა.

ვინაიდან შეუცთომელი და უცოდველი არვინ არის ქვეყანაზე, შევევედროთ უფალს, შეუნდოს ჩვენს დიდებულ მასწავლებელს აკაკის ყოველი შეცოდება, რომელიც მას ჩაუდენია სიტყვით თუ საქმით, ნებით თუ უნებურად, ცოდნით თუ უცოდინარობით და არ მოაკლოს ჩვენს ედემის მსგავს სამშობლოს აკაკისთანა მასწავლებლები! ამინ

(წარმოითქვა ქართული გიმნაზიის ტაძარში 1915. I. 28)

## ს ი ტ ყ ვ ა აკაკის ბარდავალეზის ბამო

*დედის საღმობას ნუ დაივინყებ  
(ი. ზირაქი 7, 29)*

ჰბრძანებს უფალი და ეს სიტყვა დიდებულ მამულიშვილს აკაკის გულის ფიცარზედ ჰქონდა აღბეჭდილი...

თითქმის სამოცის წლის განმავლობაში იგი „მალამოს“ სდებდა **დედის საღმობას** და აღვიძებდა „ძველ ტურფას“ „საღათას ძილისაგან“...

მართალია, ზოგნი ჰნატრობდნენ „მკვდარივით მძინარის“ „სიკვდილს“, მაგრამ დედის „თავსმდგომმა“ „ჭირისუფალმა“ საქვეყნოდ გამოაცხადა: „არ მომკვდარა, მხოლოდ სძინავს და ისევე გაიღვიძებს... ბევრის ბრძოლით დაღალულსა ეჭირვება მოსვენება“...

მაშ, დასცხერიტ, ორგულნო, და იშვებდით, მოყვასნო: „გულსა სწამს და ჭკუას სჯერა, რომ ჯერ კიდევ არ გამქრალა მომავლის ბედისწერა“...

ამ მომავლის ბედისწერის მოლოდინში დაუცხრომელმა მუშაკა „ცხოვრების გზა გალია“ და „სიტკობოზედა მწარე მეტი დალია“; თანამგზავრ ჰყავდა „მწუხარება და ჭირი“, მაგრამ, იტყვის, „სულ ვიცინი, არ ვსტირი“...

იცინოდა, იშვებდა, განიხარებდა მისთვის, რომ „იხილა უცხო სიზმარი“, „ნახა, რომ ქვეყნად ჩამოსულიყო ნინო, ქეთევან და თვით თამარი“. „ზეცად აღეპყრათ სამთავეს ხელი“ და „ავედრებდნენ“ „დედასა ღვთისას“ ჩვენს „საქართველოს“ „დიდჭირნახულსა“...

საოცარის სანახაობით ნუგეშინისცემულს ერის მესაიდუმლეს დარდი გაუქარწყლდა, „გულს იმედი დაესახა“ და აღარ „ტიროდა“...

არც ჩვენ შეგვფერის, საყვარელნო, ტირილი ფასდაუდებლის ცხედრის ნინაშე: თუმც თვით მგოსანი ვერ მოესწრო, მართალი სვიმეონივით, **მაცხოვარების** ხილვას, მაგრამ **დედის სალმობათა არ დავინყება** მან გულს ჩაუნერგა მთელს ქართველობას და შემოიკრიბა იგი გარემოსთვისა, ვითარცა **ახალწერგნი ზეთისხილისანი** (ფსალმ. 127, 4)...

ეს კი „წინამორბედი“ „ანგელოზთ გუნდის საგალობელის“ აღსრულებისა:

„მოეც კურთხევა ზეცით, მაღალო,  
და გარდმოსახე ძლიერად ჯვარი,  
რომ აღადგინო ქართველთა ერი,  
დღეს დაცემული და ცოცხალ-მკვდარი“...

იყავნ! იყავნ!

(წარმოითქვა ქვაშვეთში 1915. II. 1;  
„სახალხო ფურცელი“, №202)

**ს ი ტ ყ ვ ა**  
**თ. ვარლამ ლევანის ძის გელოვანის სულის**  
**მოსახსენებლად ბარდახილის პანაშვილის წიგნ**

*უფროსი ამისა სიყვარული არავის აქვს,  
რათა სული თვისი დასდვის  
მეგობართა თვისთათვის (იოან. 15, 13)*

ჰბრძანა მაცხოვარმა და ეს სიტყვა გაიხადა გზის მაჩვენებლად ან განსვენებულმა თ. ვ. ლ. გელოვანმა...

ენვია რა სამშობლოს განსაცდელი, ვარლამ გელოვანი მყისვე გაეშურა დასავლეთისაკენ და თავგანწირულად უმსუბუქებდა ტანჯვას თავისუფლებისათვის მეზრძოლთა. ხოლო როცა ომის ცეცხლი გაჩაღდა ქვეყნის სამხრეთით, მამულიშივლილი გამოექანა ჩვენსკენ და აქ **დასდვა სული თვისი მეგობართა თვისთათვის...**

არც საკვირველია: ვარლამ გელოვანი იყო ღვიძლი შვილი ქართველის ერისა, რომელიც მეოთხე საუკუნითგან შეიქმნა ქრისტეს მოსავ და ჯვარის მტვირთველ ერად. ამ ერის წარსულში გელოვანები ბევრნი ყოფილან, დღესაც მოიპოვებინან...

მათის შარავანდედით გაბრწყინებულა ქვეყანა, აღზრდილა ახალთაობა და განმტკიცებულა მამულიშვილობა...

მაშ შევსთხოვოთ უფალს, მიიღოს ვარლამის და მზგავსთა მისთა მეგობართათვის სულის დადება მსხვერპლად კეთილ სურნელად, და ნაცვლად გარდამოუვლინოს ქვეყანას ჩვენსა მშვიდობა, დღეგრძელობა და ყოველსა შინა კეთილსა წარმატება. ამინ.

(წარმოითქვა ქვაშვეთში 1915. 22.II;  
„სახალხო ფურცელი“, 1915, №220)

ს ი ტ ყ ვ ა  
ნიკო ლომოურის ბარდასვალების ბამო

*მოიხსენენით წინამძღვარნი იგი თქვენნი...  
და ბაძევლით სარწმუნოებასა მათსა (ებრ. 13,7)*

გვამცნებს წმიდა მოციქული. ჩვენც შევეკრებილვართ აქ იმ **წინამძღვრის** მოსახსენებელად, რომლის **სარწმუნოების სიმბოლოში** ხაზგსმით იყო აღნიშნული, – მშობელის ხალხის შესწავლისა და განათლებისათვის ზრუნვა...

პატარაობითგანვე კარგად მცნობი ჩვენის ხალხის ძირისა და ლხინისა, ცოდნისა და უცოდინარობისა, სარწმუნოებისა და ცრუმორწმუნოებისა განსვენებული ნიკო ლომოური სკოლის ზღუდეთაგანვე შეუდგა ქართველის მკითხველის საზოგადოების გაცნობას, თუ რას წარმოადგენდა სამოცდაათიან წლებში წარსულის საუკუნისა ჩვენი ხალხი და რა ესაჭიროებოდა მას...

სწავლის დასრულების შემდეგ მინვეული ახლად დაარსებული სათავადაზნაურო სკოლის გამგედ, განსვენებული თავს ანებებს ამ ფრიად საპატიო და თვალსაჩინო სამსახურს, ვინაითგან იგი აშორებდა სოფელსა და ხალხს; მიეშურება გორისაკენ და იჭერს ალაგს ქართულის ენის მასწავლებლისას საოსტატო სემინარიაში...

ეს ადგილი თავისთავად არარას წარმოადგენდა, მაგრამ განსვენებულს ნიკოს აძლევდა საშვალებას, ჩაენერგა მომავალ სახალხო მასწავლებელთა გულში ქართველის ხალხის სიყვარული და ქართულის ენის პატივისცემა. მოწაფეთაც დაუფასეს ამაგი, – მის მიერ განვრთნილი ახალგაზრდობა მოეფინა ქართლ-კახეთს და **ერმან მავალმან ბნელსა შინა იხილა ნათელი დიდი** (ისაია 9,2) თუ არა, მცირის უმეტესი მაინცა...

ამ სასიამოვნო მოვლენით გამხნეებულმა ნიკომ შრომა გააორკეცა და თავის საუცხოვო მოთხრობებით ყოფილ მოწაფეებს კერძოდ და ქართველობას საზოგადოდ აღუნუსხა ჩვენის ხალხის დროის შესაფერისი საჭიროებანი და მოთხოვნი-

ლებანი, და ამ მხრივ გაგვინია ჭეშმარიტი წინამძღვრობა...

დღეს ამ წინამძღვარმა განისვენა და განგრძობა მოვალეობისა, რომელი თავს ედო, ჩვენ გვიანდერძა...

მერმე, შევძლებთ ამ ანდერძის შესრულებას? გაუნევთ ქართველ ხალხს ნიკო ლომოურობას?

ამ საკითხის პასუხს მომავალი მოგვცემს. დღეს კი შევევედრნეთ ზეციერ მამას, მოგვანიჭოს ჩვენ ამ საქმისათვის საჭირო ძალი და სიმხნე, ხოლო ნიკო ლომოურს – სასუფეველი ცაათა. ამინ.

(ნარმოითქვა ქვაშვეთში 1915. IV. 19;  
„სახალხო ფურცელი“ №263)

### სიტყვა

#### ალ. ჭიჭინაძის ბარდასვალეზის გამო

ყმანვილებო! ამ არაჩვეულებრივ დღესა და ჟამს ჩვენ შევკრებილვართ აქა მადლობითა და ლოცვა-კურთხევით მოსახსენებლად მის სახელისა, ვინც ჯერ კიდევ გუშინ მამობრივის სიყვარულით დაგტრიალებდათ და თქვენის კეთილდღეობისათვის ზრუნვაში განუტევა სული. თქვენ უკვე გაგებული გექნებათ, რომ ნუხელ, საღამოს ექვს საათზედ, უეცრად გარდაიცვალა ჩვენი მეთაური და გიმნაზიის გამგე ალექსი ბესარიონის ძე ჭიჭინაძე...

განსვენებული, საყვარელნო, ფასდაუდებელი ადამიანი იყო არა მარტო ამ სასწავლებლისა, არამედ მთელის ჩვენის ერისათვის, როგორც მის განათლებისა და განსწავლის მოტრფიალე და მესვეური. უმაღლესის სასწავლებლის იურიდიულის ფაკულტეტის დამთავრების შემდეგ, ალექსის შექმლო ფრიად საპატიო ადგილი დაეჭირა როგორც სახელმწიფო სამსახურში, ისე ვექილთა წრეში ჩარიცხვით, მაგრამ განსვენებულის ყურადღებას სულ სხვა რამ იზიდავდა, – პატარა ქართველების უმწეო ყოფა იმდროინდელ სასწავლებლებში. ამის გამო ქუთაისის ერთ-ერთ განაპირა უბანში განსვენებულმა დააარსა საკუთარი სკოლა, რომელსაც დილითგან სა-

ლამომდე თავს ევლებოდა. ეს პატარა სკოლა სისწრაფით იზრდებოდა და სულ მალე მასწავლებელ-მოსწავლეებიანათ შეესისხლხორცა ქუთაისის ახლადგახსნილ სათავადაზნაურო გიმნაზიას, რომელსაც სახელოვნად განაგებდა რამდენსამე წლის განმავლობაში განსვენებული. ქუთაისითგან ის მოწვეულ იქმნა ჩვენის გიმნაზიის უფროსად, სადაც რვა წლის მოღვაწეობის შემდეგ დროებით შესწყვიტა სამსახური, თითქოს მისთვის, რომ ამ სამის წლის წინად კვლავ ეკისრნა მისი საჭეთმპყრობელობა...

რაგვარის სიყვარულით და ერთგულებით ეწეოდა განსვენებული აქ სამსახურს, თქვენ კარგად იცით; ყველაზე ადრე ის მოდიოდა გიმნაზიაში და უკანასკნელი ტოვებდა მის კარმიდამოს. ამგვარმა ორმოც წელზედ უმეტესმა მოზარდის თაობის საკეთილდღეოდ განუწყვეტელმა შრომამ, სკოლის კედლებში თუ მის გარედ, სამწერლო ასპარეზზედ თუ სჯა-ბაასში, გაიღია ქართველ ბავშვების საბედნიეროდ გაჩენილის ადამიანის სიცოცხლე, და გუშინ მეტყველი და მოქმედი ალექსი ბესარიონის ძე დღეს წინაშე ჩვენსა სძევს უსიტყვოდ და უმოძრაოდ...

მაგრამ, ყმანვილებო, ადამიანის სული უკვდავია: ალექსი ბესარიონის ძის სულიც თქვენს შორის ტრიალებს და ყურს ჩაგჩურჩულებსთ: გაისარჯეთ, ჩემო კარგებო, იშრომეთ, ისწავლეთ, შეიარაღდით ცოდნით, გაუწიეთ სამშობლოს [...] მისთვის თავდადებულთა მაგიერობა და მით გამახარეთ მეცა და ძვირფასი საქართველოც...

ეხლა თქვენ იცით, ვაჟებო, შეასრულებთ ალექსის ამ უკანასკნელ რჩევა-დარიგებას, თუ არა!

იყავნ, უფალო, იყავნ!

(წარმოითქვა გიმნაზიის ეკლესიაში 1917. I. 28;  
„საქართველო“, 1917, №24)

## ს ი ტ ყ ვ ა ი რო დ ი ო ნ ე ვ დ ო შ ვ ი ლ ის ბ ა რ დ ა ს ვ ა ლ ე ბ ის ბ ა მ ო

ნმიდა მოციქულის მცნება – **ჰქადაგე სიტყვა... ამხილე... და ნუგეშინის ეც ყოვლითა სულგრძელებითა** (2 ტიმ. 4. 2), ერთის მხრით, და წინაშე ჩვენსა მდებარე პოეტის იროდიონ ევდოშვილის მეგობრის (ნოე ჩხიკვაძის) მხილება – „ერის მგოსანს თუ აფასებდით, გზას რად უხშობდით“-ო, მეორის, – გვაძულებს, ვიკითხოთ: ქართველ საზოგადოებას მართლაც ხომ არ უძევს წილი ვისიმე ნიჭის ჩახშობაში, შეფერხებაში და განვითარების შეჩერებაში?..

თუ გულწრფელად დავაკვირდებით დასმულ საკითხს, უეჭველად მივალთ იმ დასკვნამდე, რომ ამ მხრით უცოდველნი არა ვართ... მოგეხსენებათ, ჩვენს ქვეყანაში ღვთის მიერ ნიჭით დაჯილდოვებულ ადამიანთა რიცხვი მცირე არ არის. ჩვენ კი, შევამჩნევთ თუ არა ნიჭიერ ახალგაზრდას, ერთმანეთს ვახარებთ ხოლმე: აღმოგვიჩნდა დიდებული პოეტი, დაგვებადა შეუდარებელი კომპოზიტორი, განგებამ გამოგვიგზავნა იშვიათი ხელოვანი, აღმოგვიბრწყინდა სწორუპოვარი მეცნიერი და სხ. ასეთი შეხვედრა თავბრუს ახვევს ზოგიერთ ახალგაზრდას, აჩვევს სიზარმაცეს, უღვიძებს სურვილს განდიდებისას, წინ ელობება საჭიროებას სწავლის განგრძობისას, უინროებს მსოფლიომხედველობას, აქეზებს ადრე იგემოს სიამენი ამა სოფლისა და უჩლუნგებს ღვთისაგან ბოძებულ ნიჭს სწორედ მაშინ, როდესაც უნდა მიეღწია უაღრეს ხარისხამდე...

გაუწიოთ ანგარიში, საყვარელნო, ამ უტყუარ მოვლენას, დიდაც მივეგებნეთ სიხარულით ღვთის მიერ ბოძებულის ტალანტის აღმოჩენას, მივსცეთ ნიჭსა „გზა ფართო, თაყვანისცემა ღირსებას“, მაგრამ ამასთანავე ნუ მივეცემით ნაადრევ აღტაცებას, ნუ შეუშლით ხელს გაზვიადებული ქებათა-ქებით ახალგაზრდა მოღვაწეთა განსწავლას, განვითარებას და მომწიფებას...

დღეს კი მადლობა შევსწიროთ უფალს საყვარელის პოეტის იროდიონის მოვლენისათვის, იმ პოეტის, რომლის



ბრწყინვალე ნიჭი, აღმოშუქდა რა ძლიერად, თავის მსვლელობაში ვერ შეაფერხა მრავლისაგან უმრავლესმა დაბრკოლებამ და დაუბრუნდა ზეციერ მამას განმრავლებული და განსპეტაკებული... ამინ.

(წარმოითქვა ქვაშვეთში 1916. V. 7; „საქართველო“ №104)

ს ი ტ ყ ვ ა  
თავდორე დავითის ძის ჟორდანიას  
ბარლახვალუბის ბამო

საყვარელნო! წარსულის საუკუნის მეორე ნახევარში ისე დატრიალდა ჩვენი ქვეყნის ბედის ჩარხი, რომ ქართველის ერის შვილები ქართველ სამღვდელოების კრებულის შესავსებლად დაარსებულ სასწავლებელში მოკლებულნი იყვნენ ქართულის ენის და საქართველოს ისტორიის შესწავლის საშვალებას: მთელი კვირის განმავლობაში ქართულს ენას დათმობილი ჰქონდა ორი თუ სამი საათი, ისიც ჟამნ-დავითნის საკითხავად. ხოლო, თუ რა ხალისით ჰკითხულობდენ ამ წმიდა წიგნებს სემინარიელები და რა საფუძვლიანად ითვისებდენ სამშობლო ენას, ცხადად ჩანს ნეტარხსენებულის გაბრიელ ეპისკოპოზის განკარგულებითგან: მღვდლის ხარისხის მაძიებელ სემინარიელთ სულმნათი ყოვლადსამღვდელო გაენათის მონასტერში გზავნიდა, – „სწავლულთა“ განსასწავლად „უსწავლელთა“ მიერ...

ასეთი უნუგეშო მდგომარეობა დიდხანს გასტანდა, ჩვენს ერს რომ არ მოვლინებოდა სამშობლოს სიყვარულის საღვთო ცეცხლით აღტყინებული, დღეს წინაშე ჩვენსა უსიტყვოდ მდებარე თეოდორე დავითის ძე ჟორდანია. ამ მჭერმეტყველმა და შორსმჭვრეტელმა მამულიშვილმა, მრავლითა **შრომითა და რუდუნებითა, მღვიძარებითა** და იძულებითა, სათანადო მთავრობას დააარსებინა სემინარია-სასწავლებლებში ქართულის ენის და ისტორიის კათედრა, ხოლო მონაფეთა გულში აღანთო ცეცხლი სამშობლო ენის და წარსულის

სიყვარულისა. მიუხედავად იმისა, რომ თევდორეს მიერ წარდგენილი პროგრამმა წითელი მეღვინით გაამეოთხედ-მეხუთედეს, ეს გონიერი მასწავლებელი მაინც ახერხებდა, პარალელებისა და კონტრასტების შემწეობით, შეესწავლებინა მონაფეთათვის ქართული ლიტერატურა უძველესის დროითგან მეცხრამეტე საუკუნის მიწურულამდე. ხოლო საეკლესიო წიგნების და ისტორიის შესწავლა ისე დააყენა, რომ არა ერთსა და ორს საუკეთესო მონაფეს აღუძრა სურვილი მოძღვრის ხარისხში ემსახურნა მშობელ ერისათვის და მიეყო ხელი მის თავგადასავალის და გონების ნაწარმოების საფუძვლიანად შესწავლისათვის...

გაამაგრა რა ამ მხრით ქართული ენისა და ისტორია-ლიტერატურის შესწავლის საქმე სასულიერო სასწავლებლებში, დედაენისთვის თავდადებული მამულიშვილი გაეშურა სამშობლოს იმ კუთხისაკენ, სადაც მისი სათაყვანო საგანი საფრთხეში იყო ჩავარდნილი: სამეგრელოში საეკლესიო სკოლების გამრავლებით და იქ ქართულის ენის განმტკიცებით, მან მოუნადირა ამ სკოლას ხალხის გული და იძულებულყო სამოსწავლო უწყებაც, შემოეღო თავის სკოლებში ქართული ენა...

ამავე დროს, ეს დაულალავი მუშაკი გვიწერდა ქართულის ენის გრამატიკას, გვიკრებდა „ქრონიკებს“, გვიდგენდა კატალოგებს, გვისტამბავდა მონოგრაფიებს, გვიმაგრებდა მეცნიერულ ნიადაგზედ დამყარებულის მოხსენებებით სამშობლო ეკლესიის თავისუფლების საკითხს, ებრძოდა სამშობლოს მტრებს და, სამაგიეროდ, განიცდიდა **ჭირთა ქალაქთა შინა და უდაბნოთა ზედა, ნათესავთაგან და ძმათა მტყუართაგან** (2 კორ. 11, 26)...

სწორედ ამ ჭირთა განცდისათვის და სამშობლოს კეთილდღეობისათვის ღვანლით შემოსისათვის ყოფილნი შენნი მონაფენი, ძვირფასო მასწავლებლო, შემოგვკრებილვართ ჯერ კიდევ გაუცივებელის შენის გვამის გარშემო, დაგტირით თავსა და მადლიერის გულის სიღრმითგან ლოცვას აღვაველნთ ყოველთა მოძღვრისა და მასწავლებელის წინაშე: განუსვენე, ქრისტე მაცხოვარ, მონასა შენსა და მოძღვარსა

ჩვენსა თეოდორეს და შეუნდე ამას ყოველნივე შეცოდებანი მისნი, ნებსითნი და უნებლიეთნი... ამინ.

(წარმოითქვა ქვაშვეთში 1916. X. 29; „საქართველო“ №244)

### ს ი ტ ყ ვ ა

## ამიერკავკასიის კომისარიატის წევრის კიტა (ივანე) აბაშიძის ბარდასვალეზის ბამო

### დაუფიწყარო კიტავ!

დიდი წინასწარმეტყველი მოსე, რომლის წინამძღვრობით მონობისაგან განთავისუფლებული ისრაილი შევიდა აღთქმულის ქვეყნის სანახებში, აღიყვანა უფალმან **თხემსა ზედა ფასგისასა**, უჩვენა მომავალი სამკვიდრო მისის ერისა და უბრძანა: აჰა ესე რა, **თვალთა შენთა იხილეს ქვეყანა ესე, ხოლო ვერ შეხვიდე შენ მუნ** (მეორე შჯუღლთა 34,1-4)!..

შენც, ძვირფასო მამულიშვილო, წინამძღვრობითა შენითა შეიყვანე კირთების ქვეშე ყოფილი ერი ქართველი თავისუფლების სამფლობელში, თვით აღყვანილ იქმენ თხემსა ზედა ერის საჭეთმპყრობელობისასა, გააორკეცე შრომა მის უფლებათა განსამტკიცებლად და აღტყინებით მოელოდი და შეჰზაროდი ტვირთმძიმეთა და მაშვრალთა განსვენებას, მაგრამ მოულოდნელად მოგესმა: **თვალთა შენთა იხილეს ქვეყანა ესე, ხოლო ვერ შეხვიდე შენ მუნ!**..

რათა, რისთვის? მისთვის, რომ **განყოფანი მსახურებათანი** უფლისაგან არს (1 კორ. 12,5), რომელმანცა **განაჩინა დაწესებულნი ჟამნი და საზღვარის დადებანი** (საქმე მოც. 17,26) მოღვანეობისათვის კაცთასა! ჩანს, ღვანლთა განმანაწილებელმან მოქალაქობა შენი, ვით დიდისა მის წინასწარმეტყველისა, კმასაყოფელად სცნო, წუთიერსა ცხოვრებასა შენსა საზღვარი დასდო, ხორციელად ტანჯვითა შენითა სული შენი სპეტაკჰყო, და ამა სოფლითგან განსვლისას ხმა გიყო: **მიეც დიდებისაგან შენისა** ახალ ისუთა, ნავეს ძეთა, გა-

რემოს შენსა შემოკრებილთა. **დაასხ** მათ ზედა **ხელნი შენნი, რათა სიტყვითა პირისა** უფლისათა **ვიდოდინ თვით და ძენი** (რიცხ. 27,18-21) ქართველისანი, და განისვენე იმ იმედით, რომ ახალნი მოღვაწენი სავსებით დაიპყრობენ „აღთქმულ ქვეყანას“ – თავისუფლებას, **ნაკლულთა განაგებენ** (ტიტ. 1,5), **მშიდობასა და სათნოებასა** (ლუკ. 2,14) განამტკიცებენ და ურთიერთას პატივისცემასა, თანხმობასა და სიყვარულსა დაამყარებენ!..

იყავნ, უფალო, იყავნ!

(ნარმოითქვა სიონში 1917. XII. 23)

### ს ი ტ ყ ვ ა

#### **ნ. ი. მაქარაშვილის და ბ. რ. ჩიქვაძის ზარძოლის ველითბან ჩამოსვენების ბამო**

საყვარელნო, ნუხელ, პანაშვიდის შემდეგ, ერთ-ერთს ამ ცხედართაგანს თავს დასტიროდა ვინმე ბანოვანი. როცა გული იჯერა ტირილით და დაცარიელებულ ტაძრითგან გასვლა დააპირა, შემამჩნია და მკითხა: მიუხედავად იმისა, რომ მე მორწმუნე ადამიანი ვარ, ვერ გამიგია ერთი რამ, – რად იხოცება ახალგაზრდები მაშინ, როდესაც ზოგიერთნი მოხუცინი სიკვდილს თითქოს დავიწყებიაო? ვინაითგან ეს საკითხი საზოგადო ხასიათისაა, მოვალედ ვსთვლი ჩემს თავს, განვიმეორო ჩემ მიერ მიცემული პასუხი:

ადამიანისათვის სიკვდილი სავალდებულოა, – **წინაუძს კაცთა ერთგვის სიკვდილი** (ებრ. 9,27), ხოლო თუ ცხოვრების მიერ შეუბილწველნი, უწმინდესის მისწრაფებით განმსჭვალულნი და ქვეყნისათვის საჭირო ახალგაზრდანი გვეცლებიან ხელითგან მაშინ, როდესაც მოხუცინი განაგრძობენ სიცოცხლეს, – ეს ჰხდება ჩვენ სულიერად განსაფრთხობელად, ზნეობრივად გასასწორებელად, განსაფაქიზებელად.

ცოტა ხნით ყური მათხოვეთ! ოთხი წელიწადია **გამძვინ-**

**ვარებული სიკვდილი** გამეფებულა შინ და გარეთ, მას ვაჟ-კაცთაგან ქვეყანა დაუცალიერებია და სისხლის მორევით დედამინის პირი მოურწყავს... ოთხი წელიწადია ქვეყნისათვის თავდადებულთა ცოლი და შვილი, დედა და მამა, დანი და ძმანი განიცდიან შიმშილსა და წყურვილსა, შიშლოებასა და ყინულსა. ჩვენ კი, ყოველივე შემთხვევაში ბევრი ჩვენგანი, – ვისაც ჯერ კიდევ არ მოგვხვედრია ომის ღვთაების ულმობელი ლახვარი, დღემუდამ დროს ვატარებთ კაფე-შანტანებში და ჩაიხანებში, კლუბებში და კინომატოგრაფებში და იქ ვტოვებთ ჩვენს ავლა-დიდებას და ჯანმრთელობასაც... ცხოვრების სინამდვილეს ვარიდებთ თვალსა, ვაყურებთ ნახევრად გაღვიძებულს სინიდისსა და მივცემივართ ზნეობრივ ძილსა, რომელსაც თანდათან მივყევართ ზნეობრივის სიკვდილისაკენ... სწორედ ამ სიკვდილის კარზედ მყოფთ განგება გვაფრთხილებს, – ხელითგან გვაცლის ქვეყნის იმედთა და მშობელთა ნუგეშს. – აი, ამგვარ უმანკო მსხვერპლთა!...

თუ მოიგონებთ, რაოდენი მწუხარება და კეთილშობილური გრძნობა აღიძრა ჩვენს გულში ამ სამი დღის განმავლობაში, დამეთანხმებით, რომ წინაშე ჩვენსა მდებარე ჭაბუკთა ნუთისოფლის უდროვოდ გამოსალმებამ ჩვენ ცხოვრების ჭირ-ვარამს ბევრად თუ ცოტად ჩამოგვაშორა; სულიერად განგვაფრთხო, ზნეობრივად გამოგვაფხიზლა, – თუ ყველანი არა, ზოგიერთნი მაინც; თუ სამუდამოდ არა, რამოდენიმე ხნით მაინც! ნათქვამის შემდეგ, უნდა გასაგები იყოს, რად იხოცებიან „უდროვოდ“ ახალგაზრდანი.

ვიცი, მეტყვით: შენი განმარტება იქნება სწორიც იყვეს, მაგრამ იგი ვერ დაედება მაკურნებელ მალამოდ მშობელთა დამწვარ გულსა, მაგ სიტყვებით შენ ვერა სცემ ნუგეშს მწუხარებისაგან ცოცხალმკვდარ დედასა! გიპასუხებთ: მე ვერ გავკადნიერდები იმოდენად, რომ თავს ვიდვა ნუგეშისცემა ამა გმირ-ჭაბუკთა მშობელთა, – მათი ნუგეშისმცემელი არის ის, ვინც უფლებს ცხოველთა და მკვდართა ზედა... მე თქვენთან ერთად ქედს მოვიდრეკ იმ დედის სულისკვეთების წინაშე, რომლის პირმშომ, მიიღო რა სარდლის ბრძანება, გაბ-

რწყინებულის სახით ახარა დედას: მივდივარ სამშობლოს  
თავისუფლების დასაცავად და დამლოცეო, და მანაც დალო-  
ცა ბრძოლის ცვალებად ბედობლიან ველზედ წასასვლელად  
ოჯახის ბურჯი და დედის იმედი...

ამგვარ დედებს ჩვენი ნუგეში არ ეჭირვება; ჩვენ გვმარ-  
თებს პირიქით მათი მიბაძვა და მათთაებრ შვილების აღ-  
ზრდა და განვრთნა! ამინ.

(წარმოითქვა ქვაშვეთში 1918. I. 19)

## სიტყვა ვლადიმირ გობჩიას ბარდასვალეზის ბამო

*ვიდრე ჟამი გაქვთ, იქმოდეთ  
კეთილსა ყოველთა მიმართ  
(გალ. 6, 10)*

მცნებად დაგვიდო წმ. მოციქულმა და ეს მცნება ღრმად  
ჰქონდა აღბეჭდილი გულის ფიცარზედ წინაშე ჩვენსა მდებარე  
ვლადიმირ გობჩიას: მშობელი მხარე და რუსეთის ყოფი-  
ლი სამფლობელო, სამხრეთ-დასავლეთი ფრონტი და არ-  
ზრუმ-ერძინჯიანის მიდამოები მოწმობენ მისის თავგანწი-  
რულის შრომისათვის **ყოველთა მიმართ კეთილის საყოფე-  
ლად!**...

ამ წმიდა ადგილითგან კი აღვნიშნავ შემდეგს: ყოველ-  
თათვის ზრუნვის დროს, განსვენებულს არ ჰქონდა დავინყე-  
ბული ჩვენი ერის სარწმუნოებრივი მოთხოვნილებაც, რომ-  
ლის საჭიროებათა დაუყონებლივ დაკმაყოფილება მან გა-  
დაჭრით მოითხოვა (მე პირადად ვარ ამის მომსწრე) ამა წლის  
თებერვლის ცხრას ამიერკავკასიის კომისარიატის ოფიციალ  
სხდომაზედ. შეკითხვაზედ, თუ რაზედ ამყარებს ის ამ მოთ-  
ხოვნილებათა დაკმაყოფილების აუცილებლობას, განსვენე-  
ბულმა განაცხადა: ჩვენი მოვალეობაა, ხელი შეუწყოთ ყვე-  
ლას, ვინც საღ სარწმუნოებრივ სწავლას ავრცელებსო...

ჭემმარიტად, ჩვენში რომ საღის სარწმუნოებრივის სწავლისათვის ეზრუნათ, დაეცვათ მტკიცედ ქრისტეს სჯული, პატივისცემით მოჰპყრობოდნენ სხვის სარწმუნოებას, – აჭარა არ ჩამოგვეშორებოდა, ინგილო-მაჰმადიანები და ინგილო-ქრისტიანები ძმურად იცხოვრებდნენ ერთმანეთში და თვით ვლადიმირ გობერია დღეს აქ უსულოდ მდებარე არ იქნებოდა, – ბოროტი ხელი მას სოცოცხლეს არ მოუსპობდა!...

შევისწავოთ: ღვთის განგება კიდევ გვაფრთხილებს! ის გვეუბნება: ქრისტეს დიადის მცნების – ურთიერთას სიყვარულის – გარეშე ცხოვრება შეუძლებელია და, ამისათვის, თუ გნებავთ, განთავისუფლებულ საქართველოში განვითარდეს თავისუფალი მოქალაქობა, ხელი შეუწყეთ საღის სარწმუნოებრივ-ზნეობრივის სწავლის გავრცელებას. მტკიცედ სდევით ქრისტეს მცნებაზე და **ვიდრე ჟამი გაქვთ, იქმოდეთ კეთილსა ყოველთა მიმართ!**... ამინ.

(ნარმოითქვა ქვაშვეთში 1918. 23. VI;  
„ახალი სიტყვა“, 1918, №8)

ს ი ტ ყ ვ ა  
მიტროპოლიტის ანტონის (გიორგაძის)  
ბარდასვალების ბაშო

მაღალყოვლადუსამღვდელოესო მწყემსთმთავარო!

შენმა მოულოდნელად გარდაცვალებამ გლოვის ზენარი გადააფარა ამერ-იმერთს და, ამ მოზღვავებულ მორწმუნე ერთან ერთად, მრავალ შენს პატივისმცემელს მიაყენა უღრმესი მწუხარება, უგზოობის გამო რომ ვერ მოსულან ამ ცხედრის თავყანისსაცემად და შენგან უკანასკნელის ლოცვა-კურთხევის მისაღებად!..

რით დაიმსახურე, მეუფეო, ესეთი სიყვარული?

ნუთუ მით, რომ იყავ მაღალხარისხოვანი სამღვდელო პირი? მეუფეო წმიდაო! მღვდელთმთავრები წინადაც გარდაგ-

ვცვლია, მაგრამ ასეთი გულწრფელი მწუხარება იშვიათად განგვიცდია...

ნუთუ მით მიიქცეი ქართველთა ყურადღება, რომ იყავ მჭევრმეტყველი მქადაგებელი?.. სიყრმის მეგობარო! გაბრიელ ფილოსოფოს-ოქროპირის მომსწრეთ და თანამემამულეთ განა ვინმე გააკვირვებს ენამზეობით?!

იქმნება შენმა ქველმოქმედებამ მოგიგო ქვეყნის გული?.. დიახ! გიყვარდა ქველის საქმე, მაგრამ შენი „უკიდურესი სილარიბე“ ხომ ოფიციალურადაც დადასტურებულია! ცხადია, ვერც ამ გზით მოიპოვებდი საზოგადო სიყვარულს!..

მაშ, სად ვეძიოთ ამ სიყვარულის მიზეზი?! შენს მგრძობიარე და მოსიყვარულე გულში, მეუფეო და მწემსთმთავარო! **გული** შენი, სიტყვისაებრ პავლე მოციქულისა, **განვრცობილ იყო** ყოველთათვის, შენს გულში ყველა გრძობდა და თავს **არა შეინრებულად** (2 კორ. 6,11-12), ვინაითგან **შჯულსა ქვეშე მყოფთა თანა, ვითარცა შჯულსა ქვეშე მყოფ იყავ; უშჯულოთა თანა, ვითარცა უშჯულო; უძლურთა თანა, ვითარცა უძლური**, – მოკლედ: **ყოველთა ექმნებოდი ყოვლად, რათა ყოველი შეიძინნე, აცხოვნნე** (1 კორ. 9,19-22), განუსვენნე, ნუგეშინისეც, ჭირთა და ინროებათაგან განარინნე!..

მეუფეო წმიდაო! გვრწამს და აღვიარებთ, რომ უკვდავი სული შენი და **გული** დღესაც **განვრცობილ არს** საჭიროებათათვის შენის მშობელის ერისა, რომელიც, გარეშეთაგან თავისუფალი და თვითთავადი, შინ დაჰმონებია ძმათმძულვარებას: ძენი და სულნი მისნი ამხედრებულან ურთიერთის წინააღმდეგ და ლამის მშობელი დედა, შენი საყვარელი საქართველო, კვლავ მტრის გულისად გაჰხადონ!..

მწყემსთმთავარო! ამ ბოროტების ძლევა ჩვენ მარტო ვერ ძალგვიძს, აქ საჭიროა ძალი ზეგარდამო, ძალი ზეციური, ძალი ღვთიური, რომელსაც მრავალჯერ უხსნია სამშობლო ჩვენი განსაცდელისაგან!..

მაშ, **ისწრაფე**, მღვდელთმთავარო, **სმენად** (იაკ. 1,19) ქვეყნის ჭირისა, წარსდეგ წინაშე დიდსა მღვდელთმთავარსა, აღაპყარ მისდამი ხელნი შენნი და შენებრ კადნიერებით და



სასოებით შეღალაღე: **გარდამოიხილე ზეცით, ღმერთო, და იხილე, და მოჰხედე ვენახსა ამას, და განამტკიცე ესე, რომელ დაასხა მარჯვენემან შენმან** (ფსალ. 79,14-15)!.. ამინ.

(ნარმოითქვა ქუთაისის საკათედრო ტაძარში 1918. IX. 24)

ს ი ტ ყ ვ ა  
**კათოლიკოზ-პატრიარქის ლეონიდის  
ბარდასვალების ბამო**

უნმიდესო მამათმთავარო!

უკანასკნელის ხუთის წლის განმავლობაში არაერთხელ ბრძანებულხარ მონმედ ჩემის აზრის სხვაობისა, ამა თუ იმ საგანზე მსჯელობის დროს!..

ნება მომეცი, გამოსალმების დროსაც არ უღალატო ძველს ჩვეულებას, არ დავეთანხმო შენთა პატივისმცემელთა უმრავლესობას და, მიუხედავად იმ ეკლის გვირგვინისა, რომლითაც შემოსილი იყო შენი მუდამ სამშობლოს საკეთილდღეო ზრახვებით აღსავსე თავი, გინოდო უბედნიერეს თანამედროვე ქართველთა შორის პიროვნებად!..

მართლდაც, სიყრმით შენითგან **ნადები გულისა შენისა და ვედრება შენი ღვთისა მიმართ** იყო საქართველოს სულიერისა და ხორციელის მონობისაგან განთავისუფლება, თანამემამულეთა **საცხოვრებელად** (რომ. 10,1), და აჰა, **თვალთა შენთა იხილეს მაცხოვარება** (ლუკ. 2,30) ერისა შენისა!..

განა, ამაზედ უმეტესი ბედნიერება შეიძლება?! ეს ბედნიერება მით უფრო დიდი და ღრმა არის, რომ შენ სამშობლოს ბედ-იღბლის უბრალო მაყურებელი კი არ იყავ, – მისი თავისუფლების შენობის ერთ-ერთი **თავსაკიდური ლოდი** ხარ (ეფეს. 2, 20)!..

შენ, მაცხოვრის მცნებისაებრ (ლუკ. 14,26-27), დაუტყვევდე და მამა, სახლი და კარი, უარჰყავ თავი თვისი და შეიმოსე მონაზონობა მისთვის, რომ მრთელი შენი ძალით და

ლონით, შეგნებით და არსებით შეგემზადებია და დაგეჩქარებია მშობელი ერის ტყვეობისაგან განთავისუფლება! მერმე, რამდენი სასიამოვნო, თუ შეიძლება ასე ითქვას, ტანჯვა განიცდია და შრომა შეგინირავს ამ წმიდა საქმისათვის: საკმარისია მოვოგონოთ, რომ საქართველოს ყოველი კუთხე, – ქართლი და კახეთი, ფშავ-ხევსურ-მთიულეთი და საინგილო, იმერეთი და სვანეთი, გურია და აჭარა, სამეგრელო და აფხაზეთი ფეხით მოგივლია, და ყველგან უხვად გითესნია თესლი კეთილი, – სიყვარული, სათნოება და თავისუფლება!..

ძლიერთა ქვეყანისათა საშიშრად მიიჩნიეს ამგვარი შენი მოღვაწეობა, განსაკუთრებით, როცა თვით პეტრეს ქალაქში ცხადად დაინახეს შენი შეუდრეკელობა და სოლოვეცკის მონასტერში დატუსაღებით დაგემუქრეს, მაგრამ ამითაც რომ ვერ შეგაშინეს, იმერეთიდან ოდიშში გაგისტუმრეს!.. გარნა, დაჰხე ღვთის განგებას: სწორედ ჭყონდიდელს ერგო ბედნიერება, – 1917 წლის მარტის 12 აელო ხელში საქართველოს განთავისუფლებულ ეკლესიის საჭეთმპყრობლობა!..

ჩაუდექ რა სათავეში განთავისუფლებულ ეკლესიას, მოქარგული ენა შენი არ დაგიცხრვია **ჟამითი თუ უჟამოდ** (2 ტიმ. 4,21) ქადაგებად: ეკლესიის დამოუკიდებლობა იქმნება სრული მხოლოდ მაშინ, როცა დამოუკიდებელი გახდება თვით საქართველოო, და ამ დამოუკიდებლობის მოპოვებისათვის ინვეფდი ყველა ქართველს, განურჩეველად ჰასაკისა, სქესისა და სარწმუნოებისა!...

ესეც ხომ აგისრულდა: წმიდის ექვთიმე ათონელის ხსენების დღეს – 1918 წლ. მაისის 26 – საქართველომ თვით იცნო თავისთავი დამოუკიდებელად, ხოლო ნინოობა დღეს – 1921 წლ. იანვრის 27 – ეს თვითცნობა იურიდიულად დაადასტურეს უაღრესი კულტურის მატარებელმა ერებმა!.. ნუთუ ამ გვარ მოვლენათა განცდა მხვედრი არ არის მხოლოდ და მხოლოდ იშვიათი ბედის მოღვაწეთა?! ნუთუ ეს დიდების შარავანდედი არ ჰფარავს შენს ტანჯვის გვირგვინსა და მისი ცხოველმყოფელი სხივი არა ჰკურნებს ეკლისგან მოყენებულ იარებსა?!.

ყოვლისავე ამის გამო ვსასოებთ, აქ ბედნიერს იქაც ნე-

ტარება მოგელის: შენ უფლება მოსილი ხარ, კადნიერებით წარუდგე პირუთენელსა მსაჯულსა და განუცხადო, – **ღვან-ლი კეთილი მომიღვანებიეს, სრბაი აღმისრულებიეს, სარ-წმუნოება დამიმარხავს**, ამისთვის მომეც მე **სიმართლისა იგი გვირგვინი**, რომელი განმზადებულ არს ყოველთა მათ-თვის, ვინც **შეიყვარა** და სიტყვით და საქმით ჰქადაგა კაცთა ნათესავის მაცხოვრებელი მოძღვრება და **გამოჩინება** (2 ტიმ. 4, 7-8) შენი!... ამინ!

(უნდა წარმოთქმულიყო სიონში 1921. VII. 17, მაგრამ ღვთის-მსახურების მეტად გვიან გათავების გამო არ თქმულა)



## ეპისტოლე

### წყალობითა ღმერთისაითა

### მდაბალი კალისტრატე

### კათოლიკოზ-პატრიარქი სრულიად საქართველოსა

### საყვარელთა შვილთა საქართველოს ეკლესიისათა ქრისტე აღდგა!

ჩვენამდე მოაღწია ცნობამ, რომ ზოგიერთ ყოფილ მღვდლებს უჩუმრად დაუნყიათ ქრისტიანულ წესების შესრულება, შეუტანიათ არევ-დარევა საეკლესიო ცხოვრებაში და განუზრახავთ ნდობა დაუკარგონ კანონიერად დადგინებულ მღვდელმსახურთ.

ამ ცხოვართა სამოსლით მოვლინებულ, ხოლო შინაგან მტაცებელ მგელთა (მატთ. VII. 15) მაგალითით უსარგებლიათ ზოგიერთ საერო პირებს და შესდგომიან საეკლესიო წესების თავისებური გაგებით შესრულებას. ზოგიერთ თქვენგანს, საყვარელნო, ეს **ცრუ მოძღვარნი** (2 პეტ. II. 1), რომელნი არა ჰმონებენ (მსახურებენ) **უფალსა ჩვენსა იესო ქრისტეს, არამედ მუცელსა თვისსა** (რომ. XVI. 18), **რომელ არს ღმერთი მათი** (ფილიპ. III. 19), შეგიწყნარებიეს ვითარცა მსახურნი ქრისტესნი.

ცრუმოძღვრებთან ერთად თავი უჩინიათ ცრუწინასწარმეტყველთა (მატთ. VII. 15) და ქადაგთა, რომელნიც თითქოს ზეგარდმო შთაგონებისა გამო მუქარით გაფრთხილებენ: თუ ბავშვების მონათვლას დააყოვნებთ, უეჭველად დაიხოცებიანო.

ბავშვებს რომ მონათვლა უნდა, ეს ქრისტეანთათვის ჭეშმარიტებაა, მაგრამ შვილებს უნდა ვნათლავდეთ არა სიკვდილის შიშით (ებრ. II. 15) (სიკვდილი არ არჩევს მონათლულს მოუნათლავისაგან), არამედ ქრისტე მაცხოვრის მცნებაზე დაფუძნებულ შინაგანი შეგნებით: **რომელსა ჰრწმენეს და ნათელილოს, იგი ცხოვნდეს** (მარკ. XVI. 16; შეად. იოან. III. 3).

თავიანთი გაფრთხილება-ქადაგებით **მისან-მოზღაპრეთ** (1 მეფ. XXVIII. 9) მიზნად დაუსახავთ ცთუნების შეტანა თქვენ შორის. ჭეშმარიტ არს სიტყვა უფლისა: **აღდგნენ ცრუ წინასწარმეტყველნი, რათა აცთუნონ, უკეთუმცა შეუძლეს, რჩეულნიცა** (მარკ. XIII. 22).

იგივე მისან-ქადაგნი ჩააგონებენ მორწმუნეთ, თითქოს წმინდანები განრისხებულ იყვნენ მათზე და რისხვის თავიდან ასაცილებლად და წმინდანების ღმობიერსაყოფელად საჭირო იყოს ზვარაკების დაკვლა.

საყვარელნო! სისხლიან მსხვერპლის შეწირვა განწესებული იყო ძველ აღთქმაში, მაგრამ იგი მოასწავებდა ქრისტე მაცხოვრის მიერ ჯვარზედ სისხლის დანთხევას, გამოსახნელად ჩვენდა ცოდვისა, წყევისა და სიკვდილისაგან (ებრ. IX. 1-12; ეფეს. I. 7; გალ. III. 13; ებრ. II. 14-15). თავის თავად კი **მსხვერპლნი და შესაწირავნი ვერშემძლებელ იყვნენ**

ცოდვით შეპყრობილ შემწირველთა გულითად სრულყოფად (სინიდისის დამშვიდებად) (ებრ. IX. 9), იგინი მხოლოდ განამტკიცებდნენ შემწირველთა შორის რწმენასა და სასოებას მომავალ მაცხოვრისადმი. ამისთვის ვაცთა და ზვარაკთა (ებრ. IX. 12) მსხვერპლად შეწირვის ამ ჟამად მქადაგებელნი აუქმებენ ქრისტეს მიერ გაღებულ მსხვერპლის მნიშვნელობას, ანუ, როგორც იტყვის ნმ. მოციქული, ცალიერყოფენ ჯვარსა ქრისტესსა (1 კორ. I. 17) და გვტოვებენ ჩვენ ცოდვისა ქვეშე (რომ. III. 9).

ნუ იყოფინ: ქრისტე ერთგზის (მსხვერპლად) შეინირა ჩვენთვის და მოგვანიჭა საუკუნო გამოხსნა (ებრ. IX. 12, 28), განგვინესა უსისხლო მსხვერპლის – პურის და ღვინის შეწირვა, ბრძანა რა: ამას ჰყოფდით მოსახსენებლად ჩემდა (ლუკ. XII. 17-20; მათ. XXVI. 28; 1 კორ. XI. 23-25).

გლოცავ თქვენ, შვილნო ჩემნო საყვარელნო!

ეკრძალენით, ნუ ვინმე ღვთისმგმობელთა და ქრისტეს უარისმყოფელთა ვაცთუნნეს თქვენ (მატ. XXIV. 4); განაშორენით თავნი თქვენნი ცრუმოდღვართა, ცრუწინასწარმეტყველთა, მისან-მეზღაპრეთა და ქადაგთაგან. მიიქეციით სარწმუნოებრივ მოთხოვნილებათა დასაკმაყოფილებლად კანონიერად დადგინებულ მოძღვართა მიმართ, რომელნიც განაგებენ ქრისტეს საიდუმლოთა და რომელთაც ბოძებული აქვთ ადგილობრივ მღვდელმთავართა ან ჩვენ მიერ ხელმონერილი სიგელი, რათა მათგან შესრულებულ ღვთისმსახურებით მოიღებდეთ მადლსა და ნყალობასა უფლისა ჩვენისა იესო ქრისტესსა. ამინ.

1936 წ. აპრილის 28. №347.

ტფილისი



## ნუგზარ პაპუაშვილი

### კალისტრატე სინსაქე სარწმუნოების, მოქალაქეობისა და კულტურის შესახებ

„მოიხსენებით წინამძღვარნი იგი თქვენნი, რომელნი გეტყოდეს თქვენ სიტყვათა მათ ღვთისათა, და ჰხედევდით გამოსლვასა მას ცხოვრებისა მათისასა და ჰბაძევდით სარწმუნოებასა მათსა“  
ებრ. 13,7

*ხსოვნა და სახელი*

კათალიკოს-პატრიარქ (შემოკლებით: კ-პ) კალისტრატე ცინცაძის ცხოვრების, მოქალაქეობისა და ნაღვან-ნაამაგარის ჯერისამებრ წარმოჩენა სასურველი და საშური ამოცანაა, რათა დღევანდელმა და მომავალმა თაობებმა გაიცნონ, გააცნობიერონ და არ დაივიწყონ ამ პიროვნების დამსახურება ეკლესიის და ქვეყნის წინაშე. ჩვენთვის კარგადაა ცნობილი, რომ ის დიდხანს ემსახურებოდა საზოგადოების სულიერი და გონებრივი განვითარების საქმეს: იყო საეკლესიო და საზოგადო მოღვაწე, მოძღვარი და პედაგოგი, თვალსაჩინო მკვლევარ-მეცნიერი, პატრიოტი და ჰუმანისტი.

ჩვენი დროის ადამიანები, რომლებიც მას მოესწრნენ, რომლებსაც მასთან პირადი ურთიერთობა ჰქონიათ და რომლებიც მის სამოძღვრო-საღვთისმეტყველო და სამეცნიერო შემოქმედებას რამდენადმე მაინც იცნობენ, აღიარებენ, რომ მან, კათალიკოს-პატრიარქმა კალისტრატემ, არამცირედი როლი შეასრულა კულტურისა და მეცნიერების ბევრი თანამედროვე მოღვაწის აღზრდა-განვითარების საქმეში. საყოველთაო ავტორიტეტმა, რომელიც მას ჰქონდა, ხელი შეუწყო თანამედროვე ქართულ საზოგადოებაში სულიერი იმპულსებისა და, კერძოდ, ქრისტიანული სულისკვეთების შენარჩუნებას. ამის გამო ბუნებრივად იჩინს თავს სურვილი, ვიცოდეთ, თუ კონკრეტულად რაში გამოიხატება ის როლი და დამსახურება, რითაც მან ესოდენ დიდი პატივისცემა და სიყვარული მოიხვეჭა.

წინამდებარე თხზულება კ-პ კალისტრატე ცინცაძის ნაამაგარის შედარებით ფართო ჭრილში მიმოხილვას ისახავს

მიზნად. ამ სურვილით გავეცანით მის პირად საარქივო ფონდს, რომლის ძირითადი ნაწილი საქართველოს სსრ მეცნიერებათა აკადემიის კ. კეკელიძის სახელობის ხელნაწერთა ინსტიტუტმა შეიძინა 1965 წელს და დაამუშავა უფროსმა მეცნიერმა თანამშრომელმა ელისო აბრამიშვილმა. იქ წარმოდგენილი მასალა (დოკუმენტები) ითვალისწინებს კალისტრატე ცინცაძის ცხოვრებისა და შემოქმედების თითქმის ყველა უბანს და საინტერესო ცნობებს გვანოდებს XIX-XX საუკუნეების მოვლენებთან დაკავშირებით ისტორიის, კულტურისა და მეცნიერების სხვადასხვა დარგში. შეძლებისდაგვარად შევისწავლეთ აგრეთვე კ. ცინცაძის მდიდარი ლიტერატურული მემკვიდრეობა და ოფიციალური დოკუმენტები, გავითვალისწინეთ მოგონებები და შთაბეჭდილებანი მისი უწმიდესობის ნაცნობ-ახლობელთა, თანამოღვაწეთა თუ აღზრდილთა, რომლებიც დიდის სიყვარულითა და გულწრფელობით გვიამბობენ მათივე წინამძღვრის ქრისტესმიერ თავდადებაზე, ზნეობრივ მაგალითზე, საღ საწრწმუნოებასა და ღრმა მორწმუნეობაზე.

აქვე შევნიშნავთ, რომ ჩვენი ძირითადი წყაროა კ-პ კალისტრატე ცინცაძის პირადი საარქივო ფონდი (დაცული ხელნაწერთა ინსტიტუტში), რომლის თითოეულ ნომერს (საქმეს) ქვემოთ ასე დავიმონებთ: (ცინცაძე 1, 2 და მისთ.)<sup>1</sup>.

### *ყმანვილკაცობა და სიჭაბუკე*

სრულიად საქართველოს კათალიკოს-პატრიარქი კალისტრატე მიხეილის ძე ცინცაძე (შინაური სახელი ბავშვობაში: ბიჭიკო; ლიტ. ფსევდ.: К. Георгиевский, А. Седой, კ. მ. ეკაშვილი) დაიბადა 1866 წლის 12 აპრილს ვანის რაიონის (იმჟამად ქუთაისის მაზრა) სოფ. ტობანიერში.

მისსავე მოგონებათა ნიგნში ვკითხულობთ:

„მშობლები ჩემნი იყვენ დიაკონი (1867 წლის ივნისის 30 შემდეგ მღვდელი) მიხეილ დავითის ძე და ეკატერინე (ეკა) მამუკა გოგორიშვილის ასული. მამაჩემს განათლება ჰქონდა მიღებული ჯრუჭის მონასტერში (მიტროპოლიტ დავით წერეთლის კარზე), იყო საუცხოვოდ მცოდნე საეკლესიო წიგ-

ნებისა, მამათა ცხოვრებისა და საღვთო წერილისა (განსაკუთრებით ძველი აღთქმისა), იყო ტკბილად მგალობელი (მომღერალიც) და შეუდარებელი მოკამათე, რისთვისაც ფრიად პატივცემული იყო ქუთაისელ ებრაელთაგან: არა იშვიათად ნახავდით მას ქუთაისის „ბულვარში“ ადგილობრივ ებრაელთა შორის მჯდომარეს და გართულს ცხარე კამათში ძველი აღთქმის ამა თუ იმ დებულებათა გამო. გარდაიცვალა 1882 წელს, თებერვლის 8/20, ორმოცდაშვიდი წლისა. დედა იყო შრომის მოყვარე ადამიანი, საჩინო-საჯავახოში განთქმული დარაიების, სარტყლების, კაბალახების და საჩოხეების დამზადებით და აბრეშუმის პარკის მოწვეით; მისი ხელით დარგული რამდენიმე ასეული ბუჩოლა (თუთა) დღესაც ამშვენებენ ყოფილ ჩვენს ეზო-მიდამოს. ამას გარდა ის ყოველგან (სხვის მამულშიაც) რგავდა თუთასა და კაკალს და ამყნიდა მსხალსა და ვაშლს, საცა მოხვდებოდა (განსაკუთრებით გზის პირას): მგზავრი პირს „გაისველებს“ და კურთხევას შეუთვლის დამრგველ-დამყვნელსაო. იყო ჭრა-კერვის მცოდნე და მუდამ ჰყავდა „შეგირდებად“ სოფლის პატარძლები და გასათხოვარი ქალები. გარდაიცვალა 1918 წლის აპრილის პირველ დღეებში, 80 წლის“ (ცინცაძე 109, ფ. 2).

კეთილმორწმუნე მშობლების წყალობით მომავალი კათალიკოსი სიყრმითგანვე ეზიარა ქრისტეს რჯულს; უფროსმა დამ ექვსი წლისას შეასწავლა ხუცური ანბანი და დავითნი. ასეთი გულმოდგინებისათვის მამამ მას იაკობ გოგებაშვილის „ბუნების კარი“ აჩუქა. სწავლას მონყურებული ყმანვილი მედავითნეობასაც სკოლამდელი ასაკისა შეუდგა და მღვდელმსახურების მადლს იმთავიდანვე მიეახლა.

ერთხელ ტობანიერში ყოვლადსამღვდელო გაბრიელი (ქიქოძე) ჩაბრძანდა. მწყემსმთავარმა მაშინვე შეამჩნია ყმანვილ კალისტრატეს კეთილშობილება და ცოცხალი გონება, რის გამო ის წირვის შემდეგ თავისთან მიიხმო, გაესაუბრა, რამდენიმე ლოცვა და ფსალმუნიც ათქმევინა, მოეფერა და მამამისს ურჩია, ბავშვი უსათუოდ შეეყვანა სასულიერო სასწავლებელში.

1875 წელს მშობლებმა ყმანვილი კალისტრატე ქუთაისის სასულიერო სასწავლებელს მიაბარეს, რომლის წარჩინებით დამთავრების შემდეგ მან, 1882 წელს, თბილისის სასულიერო



სემინარიას მიაშურა, სადეაც ნიჭიერმა ახალგაზრდამ სულიერი წრთობის ახალი საფეხურები განვლო.

თბილისის სასულიერო სემინარია (დაარსებული 1817 წელს) ჩვენში იმხანად ერთადერთი სასწავლებელი იყო, სადაც კვალიფიციური პედაგოგების შემწეობით შეგირდები საფუძვლიანად განისწავლებოდნენ მეცნიერების მრავალ დარგში: ქართულ ლიტერატურასა და დიდაქტიკას ქართულ სიძველეთა დამსახურებული მკვლევარი თედო ჟორდანიას კითხულობდა, ღვთისმეტყველებას – დეკანოზი პავლე სვეტლოვი (შემდგომში კიევის წმ. ვლადიმერის სახელობის უნივერსიტეტის პროფესორი და ბევრი ფუნდამენტური საღვთისმეტყველო ნაშრომის ავტორი). აქვე მწიფდებოდა აზრი საქართველოს ეკლესიის ავტოკეფალიის აღდგენისა.

ახალგაზრდების ეროვნულ შეგნებაზე განსაკუთრებული გავლენა თ. ჟორდანიას მოუხდენია. „აუტანელ პირობებში უხდებოდა მუშაობა თ. ჟორდანიას, – გვიამბობს შეგირდი, – სემინარიაში გადმოყვანისას (1883 წ.) პავლე ეგზარხოსს მიეცა მისთვის წინადადება – შეედგინა ქართული ენის პროგრამა და წარედგინა მისთვის. ჟორდანიასაც შეუდგენია საუცხოვო პროგრამა, – ანბანის შემოღებიდან საქართველოში ილიასა და აკაკის თხზულებათა შესწავლით დამთავრებული. ეგზარხოსს, მთანმიდელთა მოღვაწეობის შემდეგ, გამოუტოვებია ყველაფერი გარდა რუსთველისა, გურამიშვილისა და ბარათაშვილისა. ეს პროგრამა მე თითონ მინახავს, სემინარიის საქმეებში საპედაგოგო საბჭოს წევრობის დროს<sup>2</sup>... პირველ ხანებში ჩვენ ძალიან გვაკვირვებდა ჟორდანიას „უსისტემობა“. დაიწყებდა ის, მაგალითად, საუბარს გურამიშვილზე და მიაყოლებდა, – „რუსეთშივე მოღვაწეობდა ერთხანს ბესიკიო“ და გაგვაცნობდა იმ მწერალსაც, – „ბარათაშვილის გარდაცვალებაზე ესა და ეს დაწერა ილიამ“ და ახლა ილიას ნაწერებზე დაიწყებდა საუბარს. მერე მივხვდით, რომ უსისტემობა დიდი სისტემა იყო: „კონტრაბანდულად“ გვაცნობდა იმ მწერლებს, რომლებზედაც მას აღკრძალული ჰქონდა ხმის ამოღება“ (ცინცაძე 109, ფ. 17-18).

ჭაბუკი გულისხმიერებით შეუდგა სასულიერო განათლებას. არ აცდენდა მღვდელმსახურებას: ლოცულობდა ჟამისა-

მებრ და გულსავსედ. ამასთანავე ერთგულებდა სტუდენტთა ყველა კეთილ წამოწყებას: მონაწილეობდა სემინარიელთა ეროვნულ-განმათავისუფლებელ მოძრაობაში, იყო თანამდგომი ახალგაზრდა მწერალთა წრისა (ე. წ. სალიტიერატურო საღამოებისა, რომელიც სამოქალაქო ისტორიის მასწავლებლისა და წიგნთსაცავის გამგის, იოსებ მექანარიშვილის, ხელმძღვანელობით ეწყობოდა) და, ასე გასინჯეთ, დრამატულ ჯგუფშიც კი მონაწილეობდა როგორც მსახიობი<sup>3</sup>. მას სემინარიის ბიბლიოთეკარის თანაშემწედ მუშაობისას დასაწვავად გამზადებულ წიგნებს შორის შეუნიშნავს სიძველეთა და ხელოვნებით გამორჩეული ხელნაწერი და წარუდგენია ის თედო ჟორდანიასათვის, რომელსაც შეუნახავს ეს წიგნი; მისთვის „სვანური ხელნაწერი“ უწოდებია<sup>4</sup> და VIII-IX სს-ით დაუთარილებია (იხ. მისივე, Описание: №19). ესაა ერთობ მნიშვნელოვანი ხელნაწერი, რომელიც ცნობილია „სვანური მრავალთავის“ სახელით (ხელნაწ. ინსტ. А-19), თუმცა მისი თავგადასავლის ხსენებული ეპიზოდი სპეციალურ ლიტერატურაში ჯერჯერობით აღნიშნული არ არის.

მან სასულიერო სემინარიაშივე მიყო ხელი ლიტერატურულ შემოქმედებას: სადებიუტო მხატვრულმა თარგმანებმა „ნარევი“ და „არაჩვეულებრივი შურისძიება“, რომლებიც მთარგმნელის ხელმოუწერლად გამოქვეყნდა ჟურნალში „თეატრი“ (1887, №12 და №13-14) კრიტიკოსთა მოწონება დაიმსახურა. ჩანდა, რომ ახალბედს მომადლებული ჰქონდა სიტყვიერების ხალასი ნიჭი: ენა – ბუნებითი და ნათელი; მეტყველება – დახვეწილი და ლალი. და მართლაც: მჭევრმეტყველების ღირსეული ტრადიციების მიდევნით მან დიახაც რომ უმნიშვნელოვანესი ადგილი დაიმკვიდრა ქართული ჰომილეტიკის ისტორიაში (შედარებით ვრცლად იხ. ქვემოთ). კათალიკოს კალისტრატეს ნაწერებში ჩანს აზრის ბუნებრივი ქმნადობა, სიტყვათა ძალდაუტანებელი დინება. ხალხურობის თვალსაზრისით მისი ენა აკაკი წერეთლის მეტყველებას მოგვაგონებს: მისთვისაც უცხოა თხრობის სტილიზაცია – ე. წ. ინდივიდუალიზებული და, ამდენად, ხელოვნური სტილი, თვითმიზნური ემოციები. მისი უწმიდესობის წერით მეტყველებაში ემოციას აზრისა და სიტყვის ბუნებრივი ჰარმონია

ნარმოშობს. ახალგაზრდა ლიტერატორის ენა იმთავითვე ამგვარად დაუპირისპირდა ჩვენს საეკლესიო ცხოვრებაში დიდწილად გავრცელებულ მეტყველების სტილს: ძველქართული სალიტერატურო ფორმების მოზღვავეებით შეიქმნას გარდასული სამყაროს ილუზირება, რასაც, როგორც წესი, სიყალბის ბეჭედი აზის. კათალიკოს-პატრიარქმა კალისტრატემ სიტყვიერი შემოქმედებით (მეტადრე, ქადაგებით) წარმოაჩინა ახალი ქართული ენის რელიგიური სიმდიდრე და საღვთისმეტყველო შესაძლებლობები<sup>5</sup>.

1888 წელს სემინარიის პედაგოგთა საბჭომ კურსდამთავრებული კალისტრატე ცინცაძე სახელმწიფოს ხარჯით კიევის სასულიერო აკადემიას წარავლინა.

უმალესმა სასწავლებლმა (სწავლობდა ისტორიის მიმართულებით) მომავალი მოძღვარი მდიდარი საღვთისმეტყველო-ფილოსოფიური ცოდნით აღჭურვა. ფილოსოფიას დოც. (შმდ. იმავე აკადემიის რექტორი და პროფესორი) დ. ი. ბოგდაშევსკი (იგივე ჩერნიგოვის მთავარეპისკოპოსი ვასილი) კითხულობდა. მან (კალისტრატემ) შეისწავლა კლასიკური ენები (ძველი ბერძნული და, განსაკუთრებით, ლათინური) და სლავური, გაეცნო კულტუროსან ერთა წარსულს, ისტორიოგრაფიის იმდროინდელ დონეს, არქეოლოგიისა და მეცნიერული ლიტურგიკის მიღწევებს (ლექტორი სახელგანთქმული პროფესორი ალექსი ათანასეს ძე დიმიტრიევსკი). აკადემიის წარჩინებული მსმენელი თავადაც ეწეოდა სერიოზულ მეცნიერულ მუშაობას.

### *პირველი ნაბიჯები მეცნიერებაში და პირად ცხოვრებაში*

ერთ ლექციას აღუძრავს მისთვის სურვილი, სადისერტაციო თემა საქართველოს ისტორიიდან აერჩია. ამის შესახებ იგი გვთავაზობს საყურადღებო მოგონებას: 1888 წლის სექტემბერში რუსეთის სამოქალაქო ისტორიის პროფესორს, ვლადიმერ ზენონის ძე ზავიტნევიჩს, წაუკითხავს ლექცია რუსეთის დიდ მთავარ ვლადიმერზე (†1015). მას უთქვამს; რუსეთის მთავარმა ბიზანტიის იმპერატორს გაუგზავნა მაშველი ჯარი

აჯანყების ჩასაქრობად... და აჯანყებულ ბარდა სკლიაროსის მხარეზე ქართველთა ჯარიც იბრძოდაო: ისინი ფოკას, შენილბული მოლაღატის, მთავარსარდლობის ქვეშ იყვნენო. „ველარ მოვითმინე, – გვიამბობს კ-პ კალისტრატე „მოგონებანში არა-შორეული წარსულიდან“ (ნაწყვეტები), – ქართველების მოღვაწეობის ასეთი შეფასება (გაზეპირებული მქონდა აკაკის „თორნიკე ერისთავი“ და ეს საკმარისად მიმაჩნდა ისტორიის „ცოდნისათვის“) და, გათავდა თუ არა ლექცია, გავყე პროფესორს „კორიდორში“ და მოვახსენე: „თქვენ ქართველები „ბუნტოვ-შჩიკის“ მომხრედ გამოიყვანეთ, სინამდვილეში კი ბიზანტიის ტახტი მარტო ქართველებმა გაამაგრეს მეთქი“. მე, რასაკვირველია, არ ვიცოდი, რომ სკლიაროსთან ბრძოლის დროს ქართველები ფოკას მთავარსარდლობის ქვეშ იბრძოდნენ და, როცა თვით ფოკამ აღმართა აჯანყების ალაში, ქართველები განაგრძობდნენ მასთან ყოფნას, რადგან ეჭვი არ მოსლვოდათ ფოკას განდგომაში. პროფესორი შეკრთა, გაჩერდა ერთ ადგილას და დამიწყო საუბარი. არაჩვეულებრივ მოვლენას სტუდენტებმაც მიაქციეს ყურადღება და გარს შემოგვეხვიენ. უვიცის გამბედაობით მივმართე პროფესორს: „თქვენ არც კი გიხსენებიათ თორნიკე ერისთავი, რომელმაც გადაარჩინა საფრთხეს სამეფო გვარეულობა და იმპერიის მთლიანობა მეთქი“.

– მართალია, არ მიხსენებია, რადგან მას არ იხსენიებენ ჩემი წყაროები იახია და ასოლიკიო, თქვა პროფესორმა.

ინტუიციურად მივხვდი, რომ იახია და ასოლიკი უცხოელი მწერლები უნდა ყოფილიყვნენ და განვაგრძე:

– რაღა უცხო მწერლებს დაეყრდენით და ქართული წყაროები დასტოვებთ ყურადღების გარეშე მეთქი?

– მე ქართული არ ვიცო.

– ფრანგული ხომ იცით: ჩვენს წიგნთსაცავებში რამდენიმე ცალია „ქართლის ცხოვრებისა“ ფრანგულ ენაზე მეთქი.

– არ მქონია შემთხვევა გავცნობოდი „ქართლის ცხოვრებას“. ამის შემდეგ კი გავცნობი, თუ თქვენც დამეხმარებითო. ჩამომართვა ხელი და დააპირა წასვლა.

– მე როგორ უნდა დაგეხმაროთ მეთქი? შევეკითხე.

– საკანდიდატო თხზულებას დაგანერინებთ საქართვე-

ლოს ისტორიიდან და თქვენი თხზულებიდან გავეცნობი ქართულ წყაროებსო...

1891 წლის გაზაფხულზე პროფ. ზავიტნევიჩს შეეტანა აკადემიის საბჭოში ჩემთვის მოსაცემად ასეთი თემა: „**Давид Возобновитель квк церковный и политический деятель**“, მაგრამ ეს თემა რექტორატს არ დაუმტკიცებია... შეშინებოდათ სიტყვისა „**политический**“, თუმცა შემდეგ ნელში ეს თემა ზავიტნევიჩმა ი. ფერაძისათვის ადვილად გაიყვანა“ (ცინცაძე 109, ფ. 31-34).

არქეოლოგის, პროფ. ნ. ი. პეტროვის, დავალებით კ. ცინცაძემ სტუდენტობისას შეისწავლა და დაამუშავა გოლიცინისეული ხელნაწერი დოკუმენტისა „**Посольство стольника Толочанова и дьяка Иевлева в Имеретию 1650-52**“. საქართველოს სამოქალაქო და საეკლესიო ისტორიისათვის ამ პირველხარისხოვანი წყაროს შესახებ სტუდენტ კალისტრატე ცინცაძის „**ბიბლიოგრაფიული შენიშვნა**“ გამოქვეყნდა გაზეთში „**Нрвое Обозрение**“ (1890, 21.IV, №2178)<sup>6</sup>, რითაც შენიშნულ და გასწორებულ იქნა რიგი ტექსტოლოგიური შეცდომა, რაც ხსენებული ძეგლის ადრინდელ გამოცემაში შენიშნებოდა. აღნიშნული პუბლიკაცია კალისტრატე ცინცაძის დებიუტი გახლდათ, რითაც ის სამეცნიერო საზოგადოებისა და მკითხველთა ფართო წრის წინაშე ღირსეულად წარსდგა.

**შენიშვნა:** ეს ხელნაწერი რამდენიმეჯერაა დაბეჭდილი: როგორც ამას თვით კ-პ კალისტრატე ცინცაძე გვაუწყებს, იგი პირველად გამოუქვეყნებია ისტორიკოს ნ. ნოვიკოვს XVIII საუკუნეში, შემდეგ – ნ. ნიკოლაძეს 1888 წელს გაზეთში „**ნოვოე ობოზრენიე**“ (გაგრძელებით, რამდენიმე ნომერში). ამ ძეგლს ქართველი მკითხველი გაეცნო მღვდელ მელიტონ კელენჯერიძის რეფერატით, რომლის პირველი ნაწილი სათაურით „**იმერეთი 1650 წელს**“ დაიბეჭდა საღვთისმეტყველო-ფილოსოფიურ ჟურნალში „**განთიადი**“ (1913, №1, გვ. 221-244). ავტორმა (კელენჯერიძემ) იქვე მიუთითა სტუდენტ კ. ცინცაძის ხსენებული შრომის ღირსებაზე; მკითხველებს რეფერატის ბოლომდე მიყვანა აღუთქვა, მაგრამ უცნობ მიზეზთა გამო ჟურნალმა არსებობა ვერ გააგრძელა, აღნიშნული მიმოხილვაც დაუმთავრებელი დარჩა. ეგვევ დოკუმენტი მეცნიერულად კვლავ გამოსცა პროფ. მ. პოლიევქტოვმა (იხ. „**Посольство**

*стольника Толочанова и дьяка Ивлева в Имеретию“, 1926, გვ. 114-192), ხოლო ქართულად თარგმნა და გამოკვლევითურთ გამოაქვეყნა პროფ. იასე ცინცაძემ: ალექსი იევლევის 1650-1652 წწ. იმერეთის სამეფოში ელჩობის საანგარიშო აღწერილობა, თბ. 1969; ტოლოჩანოვის იმერეთში ელჩობის მუხლობრივი აღწერილობა, თბ., 1970).*

ჩანს, კ. ცინცაძის მითითებულმა ნაშრომმა („შენიშვნამ“) კიევის სასულიერო აკადემიის პროფესორ-მასწავლებლების დიდი მოწონება დაიმსახურა. ამის დასტურად უნდა ჩაითვალოს ის ფაქტიც, რომ პროფესორმა პეტროვმა, რომელიც აკადემიის არქეოლოგიურ მუზეუმსაც განაგებდა, მე-3 კურსის სტუდენტი თავის თანაშემწედ დანიშნა. იმიერიდან კ. ცინცაძის გარეშე მუზეუმში შესვლის უფლება არავის ჰქონდა.

კალისტრატე ცინცაძის მეცნიერული ალლო და დიაპაზონი სრულყოფილად წარმოჩნდა მონოგრაფიაში, რის საფუძველზე კიევის სასულიერო აკადემიის სამეცნიერო-სადისერტაციო საბჭომ მას ღვთისმეტყველების კანდიდატის სამეცნიერო ხარისხი მიანიჭა. ამ ნაშრომის სათაური ასე უღერს: „Иверская церковь в период Сассанидов [იბერიის ეკლესია სასანიანთა პერიოდში] (265-570), кандидатское сочинение Каллистрата Цинцадзе, Киев, 1891-1892 учеб. год“ (შავი პირი: ცინცაძე 96)<sup>7</sup>. ამ ნაშრომში, ცოდნასა და აკადემიზმთან ერთად, ავტორის რელიგიურ-მამულიშვილური მრწამსიც გამოჩნდა, რაც მშობელი ქვეყნისა და ეკლესიის ბედ-იღბალზე დაფიქრებული მამულიშვილების გულსა და გონებას იმედის სხივით ალავსებდა და არწმუნებდა მათ, რომ ღვთისმეტყველების ამ ახალი კანდიდატის სახით სამშობლოს ღირსეული მამულიშვილი მოევლინა.

თხზულება წყაროების მეცნიერული ანალიზის საფუძველზე განიხილავდა საქართველოს ეკლესიის ძველ, ე. წ. ანტიოქიურ პერიოდს (III-VI სს.). იგი 300 გვერდს მოიცავდა და დაყოფილი იყო 4 თავად: I – ქრისტიანობის შემოსვლა და განმტკიცება საქართველოში; II – საეკლესიო მმართველობა (იერარქია) და სამართალი; III – სასულიერო განათლება და IV – რელიგიურ-ზნეობრივი ცხოვრება. ავტორი წინასიტყვაობივე აღნიშნავდა, რომ, თუმცა წინამდებარე ამოცანის სრულყო-

ფილად შესრულება უცხოურ მონაცემთა ზედმინევნით შესწავლის გარეშე შეუძლებელია, იგი „მიდის რისკზე“ და დისერტაციის ამოცანად მიიჩნევს, შეძლებისამებრ გამოავლინოს, შეკრიბოს და კვალიფიკაცია მისცეს ქართულ ენაზე არსებულ ყველა დოკუმენტსა თუ საკითხთან დაკავშირებულ გამოკვლევას და, ამდენად, გააადვილოს შემდგომი ეტაპი ხსენებული ამოცანის გადანყვეტისა. დისერტანტი იქვე შენიშნავდა, რომ მისთვის კვლევის ობიექტად ვერ გახდება ლაზიკას (ძველი კოლხეთის) სამეფო, რადგან დასავლეთ საქართველოს საეკლესიო ცხოვრებაში VIII-IX საუკუნეებამდე საკუთრივ ქართული ელემენტი არ შეინიშნება. თხზულებაში საუბარი იყო ისტორიოგრაფიის მიერ მანამდე დაუმუშავებელი რიგი პრობლემის შესახებ, კერძოდ, ანდრია პირველწოდებულისა და წმ. ნინოს სამისიონერო მოღვაწეობის სადავო საკითხებზე. ავტორი ვრცლად ეხებოდა ივერია-ანტიოქიის მაშინდელ ეკლესიურ ურთიერთობასა და ისტორიული მონაცემებითვე უარყოფდა სომხეთის საკათალიკოსოსადმი საქართველოს დაქვემდებარების ვერსიას; აშუქებდა იმჟამინდელი ცხოვრების საინტერესო მხარეებს: ვახტანგ გორგასლის საშინაო და საგარეო პოლიტიკას, სირიელ მამათა მოღვაწეობასა და სამონასტრო ცხოვრების პირველ ნაბიჯებს საქართველოში, აგრეთვე: საეკლესიო სამართალს, ადგილობრივ საეკლესიო კრებებს, მთავარეპისკოპოსთა სიას, ეკლესიის იერარქიულ აღნაგობასა და სხვა. აღნიშნული გამოკვლევა საუკეთესოდ ცნეს და ჯეროვნად შეაფასეს აკადემიის პროფესორებმა ი. ი. მალიშევსკიმ (რუსეთის ეკლესიის ისტორიის ლექტორმა) და ა. ა. ოლესნიცკიმ (იხ. „მწყემსი“, 1892, №13-14, გვ. 10-11).

პატრიოტი თანამემამულეების იმედები გამართლდა.

1892 წლის ზაფხულში კალისტრატე ცინცაძემ აკადემიის კურსი დაასრულა, ეკლესიის ისტორიის განხრით სამეცნიერო ხარისხი მოიპოვა და სასულიერო წოდების მისაღებად სამზადისს შეუდგა. იგი ბერობაზე ოცნებობდა, მაგრამ ცხოვრება სხვა გზით წარიმართა. ერთხელ, როდესაც მეგობრებთან ერთად კიევის ქუჩებში დასეირნობდა, მან თვალი შეავლო მშვენიერ ასულს, რომელიც მოეწონა და მის მიმართ სიყვარული გულში ჩაუჯდა. მცირე ხნის შემდეგ იგივე

ჭაბუკი ერთ-ერთ წვეულებაზე იმავე ასულს, ასევე შემთხვევით, პირისპირ შეხვდა და გაიცო. გაირკვა, რომ ესაა გერმანიის მოქალაქე – ოფელია ტომასი, რომელიც კიევში ერთ დიდგვაროვან ოჯახს გუვერნანტად და გერმანული ენის მასწავლებლად მიუწვევია. ქართველმა ჭაბუკმა გერმანელ ქალიშვილს ხელი შესთავაზა, თანხმობა მიიღო და მართლმადიდებელ ეკლესიაში მასთან ჯვარი დაინერა (პატარძალმა ქართული სახელიც შეიძინა: ნინო). ამის შემდეგ კალისტრატე ცინცაძე მეუღლესთან ერთად სამშობლოში დაბრუნდა, რათა ღვთისა და მოყვასის სამსახურის უღელს შეებოდა.

### *მღვდელი და მოძღვარი*

1893 წლის 1 თებერვალს კალისტრატე ცინცაძე დიდუბის ღვთისმშობლის ეკლესიის წინამძღვრად დაინიშნა; იმავე წლის 11 აპრილს ხელდასხმულ იქნა დიაკვნად, 18 აპრილს – მღვდლად. 1903 წლის 19 ნოემბერს ის გადაიყვანეს ქაშვეთის (ქვაშვეთის) წმიდა გიორგის სამრევლოში და ამ ეკლესიის წინამძღვრად დანიშნეს. ამავე ეკლესიის წინამძღვრობისას, 1909 წლის 14 მაისს, მას დეკანოზის პატივი ებოძა.

1893 წელს გაზეთ „ივერიაში“ (№152, 28.VII) გამოქვეყნდა მისი სამეცნიერო სტატია: „რომელს წელს მიიღეს ქრისტიანობა ქართველებმა?“, რითაც ახალგაზრდა მკვლევარმა განიხილა წმ. ნინოს მოციქულებრივი მოღვაწეობის ქრონოლოგიური საკითხები და, ლიტერატურული წყაროების შეჯერებისა და კალენდარული მაჩვენებლების გათვალისწინების შემდეგ, გამოთქვა მოსაზრება, რომლის თანახმად საქართველოში ქრისტიანობა ოფიციალურად 335 წელს უნდა შემოეღოთ, ხოლო წმიდა ნინოს აღსასრული 340 წესაა სავარაუდებელი<sup>8</sup>.

აღნიშნული გამოკვლევა წინასწარმეტყველებდა იმ მეცნიერულ სახელსა და კარიერას, რისთვისაც შეეძლო მიეღწია უაღრესად ერუდირებულ ხუცესს, მაგრამ, თუმცა მამა კალისტრატეს ისტორიულ-არქეოგრაფიული კვლევა-ძიება არასდროს შეუწყვეტია, მისი მოღვაწეობის ძირითადი სარბიელი მაინც ეკლესიის თანადროული და თანაც პრაქტიკული საქმიანობა იყო. აქვე უნდა აღვნიშნოთ, რომ კალისტრა-



ტე ცინცაძის სამეცნიერო და საეკლესიო-საზოგადოებრივი მოღვაწეობა მუდამ განუხრელად უკავშირდებოდა ერთმანეთს: ერთმანეთისაგან მათი გამიჯვნა და ცალ-ცალკე განხილვა შეუძლებელია.

სამოღვაწეო ასპარეზზე გამოსვლისთანავე ცხადი გახდა, რომ კ. ცინცაძე სამოციანელთა ანუ „თერგდალეულთა“ კვალს მიჰყვებოდა. ამ თაობის ნაწილის მიერ წამოყენებული აზრი საქართველოს ხსნისა და გადარჩენის საქმეში ეკლესიის როლის წინა რიგში დაყენების შესახებ ახალი როდი იყო: XVII-XVIII სს-ის მიჯნაზეც ეროვნული ინტელიგენციის მესვეურებმა ქართული კულტურისა და საზოგადოებრივი აზროვნების საზრდოდ, საქართველოს თვითმყოფადობის შენარჩუნების საუკეთესო საშუალებად ადგილობრივი ეკლესიის ეროვნული სულისკვეთებით გამსჭვალვა მიიჩნიეს და სამოქმედო გეგმაც ამ იდეების შესაბამისად განსაზღვრეს.

მოდღვრად დადგინების დღიდან კალისტრატე ცინცაძე იღვწოდა, რათა ჩვენს ეკლესიას გაემდიდრებინა თეოლოგიური მონაპოვარი და აელორძინებინა საღვთისმეტყველო მეცნიერების ის ტრადიცია, რომელმაც ანტონ I კათალიკოსისა და მისი სკოლის შემდეგ (XIX საუკუნის I მეოთხედიდან) თავისუფალი და დამოუკიდებელი ეკლესიის არარსებობის პირობებში ერთგვარად მიიძინა.

ახალგაზრდა ღვთისმეტყველის გამოჩენა ერის წინაშე ამგვარ გამოღვიძებას მოასწავებდა: 1893 წლის 25 აპრილს (მღვდლად ხელდასხმიდან მეორე დღეს) 27 წლის ხუცესი ღირსეულად წარმოუდგა ნიკოლოზ ბარათაშვილის კუბოსთან სრულიად საქართველოსაგან შემდგარ საზოგადოებას (ამ დროს წარმოთქმული ქადაგების ხელნაწერი ინახება ხელნაწერთა ინსტიტუტში, კათალიკოს კალისტრატეს პირად საარქივო ფონდში: №97. იგი პირველად დაიბეჭდა საქართველოს საპატრიარქოსთან შიდამოხმარების წესით გამოცემულ „საღვთისმეტყველო კრებულში“: 1980, №2, გვ. 63-68, მეორედ – „ჯვარი ვაზისაში“, 1981, №1, გვ. 28-29)<sup>9</sup>. მოძღვარმა პოეტის შემოქმედება საღვთისმეტყველო-ფილოსოფიური საზრისით განმარტა; ჭეშმარიტი ხელოვანის სულში ქრისტიანულ გულისფეთქვას მიაგნო და აღიარა, რომ ნ. ბა-

რათაშვილის შემოქმედების არსი სამყაროში მთვლემარე ღვთიური სანყისის შემეცნებაა: „ნიკოლოზ ბარათაშვილი, – გვასწავლიდა იგი, – ბუნებაში და ბუნების შემწეობით ეძებს და ჰპოვობს მას, ვისაც ძალუძს შვების მოცემა... ამ სახედ, მოციქულის სიტყვის თანახმად (რომაელთა 1, 19-20), მან ბუნება აღიარა ხმად ღვთისა კაცთა მიმართ – წიგნად, სადაც აღმოიკითხა, რომ შვება და ღვთისა შეუძლია მიანიჭოს ადამიანის გულს მხოლოდ მან, ვინც არის მიზეზი ადამიანისა და თვით ბუნების გაჩენისა“. ნიკოლოზ ბარათაშვილის მსოფლმხედველობის ამგვარი გააზრება ქართულ სალიტერატურო კრიტიკაში ახალი სიტყვა იყო.

ღვთისმსახური ახალ სამწყსოში, ქაშვეთის სამრევლოში, შესვლის პირველსავე დღეს მრევლს ჭეშმარიტ მეცნიერებას ამცნებდა და აღიარებდა: „ვინც წინად სათავეში ედგა სწავლა-განათლების საქმეს, დღეს უკან ჩამორჩა სხვა წოდებას... საქმე ისე მოენყო, რომ სასულიეროსათვის სრულიად საკმარისად სთვლიდნენ ჟამნ-დავითნ-კონდაკის ცოდნას და ვაივაგლახით ხელის მოწერას საეკლესიო საბუთებზედ“. მოძღვრის თქმით, ამ ეროვნულმა უბედურებამ ხელი შეუწყო ცრუგანათლებას, რომლის მესვეურნიც ეკლესიის დასაგმობად იმარჯვებდნენ სამღვდლოთა ამგვარ უუნარობას; გაჰყვიროდნენ: რჯული მოძველდაო და განგებ უგულუბელყოფდნენ ეროში რელიგიის შესუსტების ნამდვილ მიზეზს – თავისთავადი, დამოუკიდებელი ეკლესიის არარსებობას, რის გამოც ხალხში ურწმუნობამ და უზნეობამ დაისადგურა. „რა ეშველება, რა წამალი დაედვის ამ ავადმყოფობას. ვინ უნდა უპატრონოს *ერსა ბნელსა შინა მავალსა და დამკვიდრებულსა აჩრდილთა თანა სიკვდილისათა* (ისაია 9, 2)?“. სვამდა კითხვას მოძღვარი და ასე უპასუხებდა: „ვინაიდან სარწმუნოება დასცა და ზნეობა დაამხო ცრუმეცნიერებამ და ცრუგანათლებამ, მეცნიერებამ და ჭეშმარიტმა განათლებამ უნდა კვლავ აღადგინოს იგინი. ამის გამო, ყოველს ჭეშმარიტად განათლებულ ქართველს ვალად აძევს, დაუბრუნოს უმრწემესთა ძმათა თვისთა ის, რაც წაართვა მათ უმეცრებამ და ცრუგანათლებამ, დაუბრუნოს *ერსა ქრისტიანესა, ერსა ჯვარისმტვირთველსა, ერსა ქრისტესთვის ნამებულსა* მამაპა-

პური სარწმუნოება და შეულახველი, ჩირქმოუცხებელი და სპეტაკი ზნეობა...“ (სამრევლოში პირველად შესღვისა გამო, „ივერია“, 1904, №7)<sup>10</sup>.

ფერიცვალებისა და განახლების სახარებისეული მოძღვრება მამულიშვილთ ეროვნული ენერჯის გამოღვიძების იმედს ჰმატებდა. მღვდელმოდღვარი კალისტრატე ბერმონაზვნობას ქვეყნის ძლიერების წყაროდ სახავდა და საქართველოს ხვედრს ეროვნული მონასტრების ბედს უკავშირებდა. 1907 წელს, ყოვლადსამღვდელო ალექსანდრე ოქროპირიძის გარდაცვალების გამო თქმული სიტყვით, იგი გემოდღვრავდა: „მართალია, დღეს ბერმონაზვნობას პატივი აღარა აქვს საზოგადოების თვალში, მაგრამ ამის მიზეზი ის არის, რომ მონაზონთა უმეტესობამ უღალატა თავის პირდაპირ დანიშნულებას. დღეს თუ ბერმონაზონთა უმრავლესობას შეადგენენ უსაქმოდ ცხოვრების მოყვარენი, წინად ასე როდი იყო. წინად მონაზონობა და საზოგადო ასპარეზზედ მოღვაწეობა სინონიმები იყვნენ. წინად ქართველი თუ სტოვებდა დედას და მამას, დებსა და ძმებს, სახლ-კარსა და მეზობლებს და მიდიოდა მონასტერ-უდაბნოში, იგი ამ შემთხვევაში თავისთავისთვის როდი ზრუნავდა, არამედ თავს სწირავდა მამულს, ვინრო ფარგლიდან გამოდიოდა ფართო ასპარეზზედ სამუშაოდ, ხელს უწყობდა ერის განვითარებას, განსწავლას, გათვითცნობიერებას, გაძლიერებასა და გაფაქიზებას; პატრონობდა ქვრივობოლთა და გლახაკ-დავრდომილთ, იმედს უნერგავდა გულში და ნუგეშსცემდა ტვირთმძიმეთა, მაშვრალთ ამხნევებდა და შეაჩვენებდა ძლიერთა ქვეყნისათა, როცა იგინი გადაუხვევდნენ ჭეშმარიტებისა და სიმართლის გზასა. ამისათვის იყო, რომ სანამ ბერმონაზვნობა თავის დანიშნულებას ემსახურებოდა, საქართველოც იზრდებოდა და ჰყვაოდა, ხოლო როცა ბერმონაზვნობა დაეცა, – საქართველოც დაქუცმაცდა, დანაწილდა, დაეცა...“ (იხ. „მწყემსი“, 1907, №22, გვ. 5; სიტყვები და წერილები ყოვლადსამღვდელო ალექსანდრეზე, ზ. ჭიჭინაძის გამოცემა, თბ., [1910]).

## საზოგადო და საეკლესიო საქმეთა სამსახურში

თავმდაბალი და განათლებული მამულიშვილი მღვდელი იმთავითვე სახარებისეული სიყვარულით იღვწოდა და არ გადადგმულა მნიშვნელოვანი ნაბიჯი ერის სულიერი წინსვლისა, საკუთარი კვალი რომ არ დაერჩინა მას სიტყვითა თუ საქმით. კ. ცინცაძე იყო საეკლესიო მუზეუმის თანამშრომელი (მდივანი, 1897-1921), ქართული საღვთისმსახურო წიგნების შემასწორებელი კომისიის წევრი (1896-1917); ამავდროულად გახლდათ მცხეთის ტაძრების აღორძინების კომიტეტის წარმომადგენელი (მდივანი), ქართული ფილარმონიული საზოგადოების დამაარსებელთაგანი; აქტიურად მონაწილეობდა საქართველოს საისტორიო და საეთნოგრაფიო საზოგადოების მუშაობაში; წარგზავნილი იყო სამღვდლოების დეპუტატად თბილისის ქალაქის საბჭოში 1895-1903 და 1916-1917 წლებში; თბილისის გუბერნიაში ერობის შემოღებისათვის თათბირში 1909 წელს და ამგვარსავე თათბირში ამიერკავკასიისათვის 1916 წელს. იგი წერილებს აქვეყნებდა იმდროინდელ პერიოდიკაში: „მწყემსი“, „ივერია“, „დროება“, „შინაური საქმეები“, „საქართველო“, „განათლება“, „თეატრი“, „ისარი“ და სხვა.

„ბიბლიის ქართული თარგმანისა და საეკლესიო წიგნების შემასწორებელი კომიტეტი“, რომლის დამსახურება ეროვნული ფილოლოგიის წინაშე უდავოა, განსწავლულ სასულიერო პირთა შემადგენლობით გასული საუკუნის დასასრულს ჩამოყალიბდა. მისი მიზანი იყო, ძველი ქართული ხელნაწერებისა და ბერძნულ-სლავური ორიგინალის გათვალისწინებით გაეწივებინა ჟამთა სვლისა თუ რედაქტორ-გადამწერთა უმეცრების შედეგად დამახინჯებული ბიბლიური და ლიტურგიკული ლიტერატურა, რათა ქართულ მღვდელმსახურებას ამრიგად აენყო ფეხი ლიტურგიკული მეცნიერების თანამედროვე მიღწევებისათვის. კომიტეტს უნდოდა აგრეთვე თანამედროვე ვითარების შესაბამისად რამდენადმე გაემარტივებინა საეკლესიო ცხოვრება. ეს მიზანი საქართველოს უმაღლესმა საეკლესიო ორგანომ შემდგომ აშკარად გამოხატა. სრულიად საქართველოს საკათოლიკოსო საბჭოსა-

გან (1922 წლის ოქტომბრის 19-ის სხდომის №47 უფრნალის თანახმად) გამოცემულ ფურცელში ვკითხულობთ: „დადგადრო, როდესაც ეკლესია დაუყონებლივ უნდა შეუდგეს მის მიერ წინასწარ დასახული მიზნების განხორციელებას; განიწმიდოს მონარქიული რეჟიმის ზეგავლენის ნაშთებისაგან, შეუფარდდეს ჩვენი ხალხის სულისკვეთებას, განმარტივდეს თანამედროვე ცხოვრების მოთხოვნილებათა მიხედვით, მაგრამ ისე კი, რომ ხელუხლებელი დარჩეს ქრისტე მაცხოვრის დიადი მოძღვრების არსებითი მხარე“.

ამ რთული და პასუხსაგები საქმის ჯეროვნად შესრულება გააადვილა XIX ს-ის დასაწყისიდან დასავლეთ ევროპასა და რუსეთში დაწყებულმა ქართველოლოგიურმა კვლევა-ძიებამ, რომელმაც ქართველი სწავლულებიც გამოაფხიზლა და გაააქტიურა. ამ მიზნით საქართველოში აღნიშნული საუკუნის შუა წლებში რამდენიმე სამეცნიერო-საგანმანათლებლო ორგანიზაცია ჩამოყალიბდა, რომელთაგან პირველ რიგში უნდა დავასახელოთ „ქართველთა შორის წერა-კითხვის გამავრცელებელი საზოგადოება“ და თბილისის საეკლესიო მუზეუმი. ამ ორგანიზაციებმა ცხოველი ენერგიითა და ინტერესით წამოიწყეს ისტორიულ-არქეოლოგიური კვლევა-ძიება. წინა საუკუნის ჩინებულმა ადამიანებმა, – ერის წარსულის ერთგულმა მკვლევარებმა: აკად. მარი ბროსემ, პლატონ იოსელიანმა, თედო ჟორდანიამ, პროფ. ალექსანდრე ცაგარელმა, პროფ. ალექსანდრე ხახანაშვილმა, პროფ. ვლადიმერ ბენეშევიჩმა, ეპ. ალექსანდრემ (ოქროპირიძემ), ეპ. (შემდ. კ-პ) კირიონმა (საძაგლიშვილმა), აკად. ნიკო მარმა, ექვთიმე თაყაიშვილმა, დეკ. ბესარიონ ნიჟარაძემ, დეკ. პოლიევქტოს კარბელაშვილმა, არქიმანდ. (შემდ. კ-პ) ამბროსიმ (ხელაიამ) და სხვებმა მოიძიეს, შეისწავლეს და ნაწილობრივ გამოაქვეყნეს კიდევ ქართული ბიბლიისა და სასულიერო მწერლობის სხვა დარგის უძველესი ნიმუშები. განსაკუთრებული მნიშვნელობა და საერთაშორისო რეზონანსი ჰქონდა ღვთისმეტყველების მაგისტრის დეკ. კორნელი კეკელიძის მიერ ქართული ლიტურგიკული ძეგლების მეცნიერულ გამოცემებს: *Литургические грузинские памятники в отечественных книгохранилищах и их научное значение*, Тифлис, 1908; *Иеруса-*

лимский канонарь VII века (грузинская версия), Тиф., 1912; Древне-грузинский архиератикон, под ред. и с предисл. прот. К. С. Кекелидзе, Тиф., 1912.

მლდ. კ. ცინცაძე ხსენებული საქმის ერთ-ერთი თაოსან-თაგანი იყო. მან გულდასმით ჩაასწორა ქართული „კონდაკის“ ბოლო (1884 და 1898 წწ.) გამოცემები (ცინცაძე 133). რიგი ბუნდოვანი, თითქმის უაზრო წინადადება იქნა მის მიერ გამართულ-დახვეწილი, თეოლოგიური თვალსაზრისით გამართლებული და მლოცველთათვის ადვილალსაქმელი. მისეული შრომის პრინციპის ნათელსაყოფად რამდენიმე მაგალითს მოვიხმოთ: „მოგვმადლენის“ კვერქესში მუხლი „აღუსრულოთ ვედრება ჩვენი უფალსა“ ბერძნული დედნისა და XIII საუკუნის ქართული „კონდაკის“ გათვალისწინებით ასე იქნა ჩასწორებული: „აღვასრულოთ ვედრება ჩვენი უფლისა მიმართ“; იმავე კვერქესში: „ქრისტიანობითნი აღსასრულნი ცხოვრებისა ჩვენისანი, უჭირველნი, ურცხვენელნი...“ – ასე: „ქრისტიანობითი აღსასრული ცხოვრებისა ჩვენისა, უჭირველი, ურცხვენელი...“. მსგავსადვე იქნა რედაქტირებული კურთხევანიც: პანაშვიდის იკოსში ფრაზა „ვინაცა დაკლვისა ჩვენისა გოდებასა ვგოდებთ“ კორექტირებულ იქნა ფორმით: „ვინაცა დაფლვისა ჩვენისა გოდებასა ვგოდებთ“ და ბევრი სხვა ამგვარი.

უდავოა, რომ მღვდელმსახურების დონე მნიშვნელოვნადაა დამოკიდებული საკითხავთა ტექსტის ავ-კარგზე. სტილის, პუნქტუაციის თუ ორთოგრაფიის მოუნესრიგებლობა ხელს უშლის მკითხველს გაიგოს, შეიმეცნოს საეკლესიო საიდუმლოს არსი. თუკი მსმენელი მოსმენილს ვერ გაიგებს, საეკლესიო საკითხავების ეკლესიაში წაკითხვას რა აზრი ექნება?! ცხადია, მოსმენილის ვერგაგების შემთხვევაში ვერც კერძო და ვერც საეკლესიო-საზოგადო მსახურება მიზანს ვერ მიაღწევს. ამიტომ, მღვდელმსახურების დონის ასამაღლებლად, თბილისის ზოგიერთ ეკლესიაში იმთავითვე იქნა შემოღებული კონდაკის ჩასწორებული ვარიანტი. კომიტეტმა ლიტურგიკული წიგნების ახალი რედაქცია-კორექციით გამოცემა საშურ საქმედ დასახა და ქმედითი ნაბიჯებიც გადადგა (უფრო ვრცლად: ეპ. დავითი, ახლანდელი კონდაკის

ტექსტის შესწორების საჭიროება ძველი კონდაკების მიხედვით და საეკლესიო წიგნების მხედრული ასოებით დაბეჭდვის შესახებ, თბ. 1910; დეკ. კ. კეკელიძე, ანტონ კათოლიკოზის სალიტურლიკო მოღვაწეობიდან, თბ. 1914, გვ. 4. ამ ნაშრომის მეორე გამოცემა: მისივე, ეტიუდები ძველი ქართული ლიტერატურის ისტორიიდან, IV, 1957, გვ. 175-186).

ზემოთ ხსენებული ნაბიჯების დასტურად დავასახელებთ რამდენიმე ფაქტს. 1908 წელს ებ. პეტრეს, დეკ. კ. კეკელიძისა და მლდ. კ. ცინცაძის რედაქტორობით ქართულ ენაზე პირველად გამოქვეყნდა „სამღვდელმთავრო კონდაკი“ – ბერძნულ-სლავურ ორიგინალთან შეჯერებული და ენობრივად გამართულ-დახვეწილი. იმავე კომიტეტის დახმარებით „ბრიტანიულ და უცხო ქვეყნის ბიბლიურმა საზოგადოებამ“ 1912 წელს თბილისს გამოსცა „ახალი აღთქმა“ (აკად. აკ. შანიძე ამ გამოცემის რედაქტორად დეკ. კ. ცინცაძეს ასახელებს. იხ. მისივე, ანტონ I-ის გავლენა სალიტერატურო ქართულზე, თბ. 1964, გვ. 74).

მაშინდელი საზოგადოების ნაწილი უარყოფითად შეეგება ხსენებული კომიტეტის საქმიანობას. ზოგმა პრესითაც კი გამოხატა გულისწყრომა (იხ. ჟურნალები: „შინაური საქმეები“, ქუთაისი, 1909, №20; 1910 №2,3,20; „განათლება“ 1912, №1; „სახალხო გაზეთი“, 1912, №502). ოპონენტების აზრით და თქმით, „ჩვენ წინაპრებს ათასი წელიწადი ჰქონიათ ნათარგმნი სამღვთო წერილი, შემოუნახავთ იგი ექვთიმე და გიორგი მთაწმინდელის შემდეგ მტკიცედ და შეურყევლად“ („განათლება“, 1912, №1, გვ. 3); „ამიტომაც თავგამოდებით ღირსია დავიცვათ ძველად ნათარგმნი სამღვთო წერილი, რათა ისტორიული კავშირი არ მოისპოს ჩვენსა და ჩვენს წინაპართა შორის“-ო (იქვე, გვ. 6). მლდ. ს. მჭედლიძე მისდამი რწმუნებულ ორგანოში „შინაური საქმეები“ (1909, №20), „ხელის“ ფსევდონიმით გამოსვლისას, ჩასწორებული კონდაკით შესრულებულ მღვდელმსახურებას „ახალი წირვის“, „ახალი სიტყვების“, „ახალი ენის“ შემოღებას უწოდებდა და „გულნაკლული“ აღნიშნავდა: „საეკლესიო წიგნების ჩასწორება ნაჩქარევია და საეჭვო“. იგი არ ეთანხმებოდა რედაქტორს, რომელმაც „აღუსრულოთ...“ „აღვასრულოთ“ შეცვალა: პირველი „უფრო მკაფიოდ გამოხატავს მოწოდების მიზანს“-ო და ა. შ.

ასეთ „დაეჭვებასა“ და გამოლაშქრებას კომიტეტმა პრესითვე უპასუხა. დეკ. კ. ცინცაძემ იმავე „შინაურ საქმეებში“ (1909, №36, 37) გამოაქვეყნა სტატია სათაურით „მცირე შენიშვნა ბ. ხელის მხილების გამო“, რითაც ხაზი გაუსვა, რომ ყურის შეჩვევა, თუნდაც სიყრმითგანვე, არაა საფუძველი, ხელი ავიღოთ შეცდომების გასწორებაზე. „ხელსა“ და მის თანამოაზრეთ განუმარტა კომიტეტის მიზანი და მუშაობის მეთოდი: საფუძველები, რითაც ხელმძღვანელობდნენ ლიტურგიკული წიგნების რედაქტირებისას. „მოგვმადლენის“ კვერექსის შესახებ აღნიშნა, რომ „აღვასრულოთ...“ ფორმის უპირატესობას მხარს უჭერენ ქართული კონდაკის თვით კლასიკური ხანის ხელნაწერები და, რაც მთავარია, მღვდელმსახურების თეორიული საფუძველები: „თუ დავუკვირდებით წირვა-ლოცვის იმ მომენტს, როდესაც იხმარება ეს კვერექსი, გავიგებთ, რომ ამ მოწოდებით დიაკონი (ანუ მღვდელი) აცნობებს მვედრებელთ, დროა საზოგადო ღვთისმსახურება (წირვა, ცისკარი, მწუხრი) გავათავოთო... სიტყვებით: „აღვასრულოთ ვედრება ჩვენი უფლისა მიმართ“ გამოვთქვამთ იმ აზრსა, რომ ეს ჩვენი ვედრება ჩვენთვისვე არის საჭირო. ხოლო თქმით: „აღუსრულოთ ვედრება ჩვენი უფალსა“ გამოდის, რომ, თუმცა ჩვენ ვევედრებით უფალსა, მაგრამ თვით უფალიც საჭიროებს ჩვენს ვედრებას... პირველ თქმაში ადგილი აქვს ნებაყოფლობითს განწყობილებას, ხოლო მეორე თქმაში – იძულებითს. მაგრამ საქმე იმაშია, რომ ვედრება უფლისა მიმართ ვალდებულება კი არ არის, არამედ ისეთივე მოთხოვნილებაა ჩვენის სულიერის არსებისა, როგორც აზროვნება, უბნობა, გალობა და სხ. ვედრება, წმ. იოანე ოქროპირისა, გრიგოლ ნოსელისა და ეფრემ ასურის აზრით, არის საუბარი უფალთან, ზეადვლენა მისდამი გონებისა და გულისა, და ამისათვის მისი ვალდებულებად დასახვა ისეთივე უაზრო იქმნება, როგორც სუნთქვის, მოძრაობის, სმა-ჭამის მოვალეობად შერაცხვა. ხოლო, თუ სადმე ვედრებას მოვალეობად და არა ჩვენის სულიერის არსების პირდაპირ მოთხოვნილებად სთვლიან, იქ შეუძლებელია „სარწმუნოების აღდგენა“, იქ შესწორებული კი არა, არავითარი კონდაკი აღარ არის საჭირო“.

კონსერვატორებისა და სკეპტიკოსების პოზიციათა არა-



ობიექტურობის მხილების მიზნით ჟურნალში „განათლება“ (1912, №2, გვ. 147-155) გამოქვეყნდა არქ. პიროსის (კომისიის თავმჯდომარის), დეკ. კ. ცინცაძის, დეკ. კ. კეკელიძისა და იუსტინე აბულაძის სტატია „კურთხევის დაბეჭდვის გამო ბ. ბ. კეთილისმოსურნის, ალ. ხახანაშვილის და სხ. წერილების პასუხად“ (გამოცემულია ბროშურადაც, გადმობეჭდილია ნიგნში: კ. კეკელიძე, ეტიუდები ძველი ქართული ლიტერატურის ისტორიიდან, XIII, 1974, გვ. 152-160). ეს წერილი გამოხატავს იმდროინდელი ქართველი სამღვდელოების ინტელექტუალური ნაწილის საღვთისმეტყველო დონეს, სულიერ სიღრმესა და განწყობილებებს. ამ ერთობლივი შრომით, რომელიც მე-20 საუკუნის ქართული საღვთისმეტყველო-ფილოლოგიური სკოლის უმნიშვნელოვანეს შენაძენად უნდა ჩაითვალოს, ხაზგასმულია, რომ კომიტეტის საქმის ჯეროვანი დაფასება შეუძლიათ მხოლოდ იმ პირთ, „რომელთაც 1) იციან ეკლესია და მისი ვითარება, 2) გაეგებათ – რა არის დოღმატი და რა არის კულტი, 3) ისტორიულად შეუგნიათ ღვთისმსახურება, 4) შეუსწავლიათ ქართული და სხვა ქრისტიან ერთა სალიტურგიკო მწერლობა და 5) შეუთვისებიათ ქართულ ხელნაწერების სული და სტილი. ამის გამო ადვილად წარმოსადგენია, თუ რა ღირსების უნდა იყოს იმ ადამიანის კრიტიკა, რომლის უმწვერვალეს კრიტიერიუმს შეადგენს მხოლოდ „ყურის შეჩვევა“ იმისა, რასაც უაზროდ გაჰკივის ეკლესიაში წერა-კითხვის ნახევრადმცოდნე მედავითნე; იმ ადამიანისა, რომელსაც ვერ გაურჩევია საეკლესიო წიგნი საღმრთო წიგნში და „კურთხევანს“, მაგალითად, სამღვთო წერილის წიგნს უწოდებს (კურსივი ჩვენია, – ნ. პ.). ჩვენდა სამარცხვინოდ უნდა აღვიაროთ, რომ, როგორც საქმით ჩანს, ესლაც იმავე საფეხურზედ ვყოფილვარ, რომელზედაც იდგა რუსეთი მეჩვიდმეტე საუკუნეში, როდესაც „რასკოლნიკთა“ მეთაურები ფანატიკურად გაიძახოდნენ: „До нас положено, лежи оно так во веки веков. Православным надо помереть за один азъ“. სტატიის ავტორები განუმარტავენ საზოგადოებას, რომ კულტი არ არის დოღმატი, „რომელიც ცვალებადობის კანონის გარეშე დგას“; რომ მღვდელმსახურება და ეკლესიის სხვა გარეგანი მხარე არსად და არას-

დროს გაყინულა, არ ქცეულა დოგმად; „რომ მართლმადიდებელი ეკლესია სრულიადაც არ უარყოფს ლიტურგიკულ განვითარებას. პირიქით, ღვთისმსახურების ისტორია წარმოადგენს განუწყვეტელ ევოლუციონურ ძაფს, რომელიც გაბმულია მოციქულთა საუკუნის და ჩვენ დროთა შორის. ეს რომ ასე არ იყოს, ისტორიაში ხომ ადგილი აღარ ექნებოდა ძველი იერუსალიმის, სპონდიელთა მონასტრის, სოფია წმიდის, სტოდიელთა მონასტრის, მთაწმიდელთა და საბა წმიდის ტიბიკონებს, რომელნიც თავიანთ ელფერს აძლევდნენ ღვთისმსახურებას, შესაფერ წესებს თხზვიდნენ, თავისებურ ყალიბში ასხამდნენ საეკლესიო წიგნებს! მეცნიერებაში უძველესად მიჩნეული, ეგრედ წოდებული, ბარბერინის ევხოლოგიონი რომ გადაათვალიეროთ, დაინახავთ, ის წესები, რომელთა ჯეროვნად აღსრულებას ეხლა საათობით უნდა დრო, იქ განისაზღვრება მხოლოდ რამდენიმე ლოცვით. გადასინჯეთ ბერძნული, სლავიანური და ქართული სხვადასხვა დროის სალიტურგიკო ხელნაწერები და თქვენ დაინახავთ, რომ მათში დაცული წეს-განგებანი იმდენად განსხვავდებიან ერთმანერთში შინაარსითაც და ენითაც, რომ მათი კლასიფიკაციაც კი შეუძლებელია“.

როდესაც ეკლესიის პრაქტიკულ და თეორიულ საკითხებში ეს განსწავლული ადამიანები ამჩნევდნენ და ასწორებდნენ ქართულ სამღვდელმსახურო წიგნებში არსებულ შეცდომებს, დასძენდნენ: „ჩვენ, როგორც წევრნი მართლმადიდებელის ეკლესიისანი, ვალდებული ვართ, ერთითა პირითა და ერთითა გულითა ვაქებდეთ და ერთობით აღვიარებდეთ სამებასა ერთ-არსებასა და განუყოფელსა. ამისათვის ჩვენი ლოცვების, წეს-რიგის და წიგნების რედაქცია უნდა ეთანხმებოდეს მსოფლიო ეკლესიის პრაქტიკას; მსოფლიო ეკლესიასთან ერთობა და თანხმობა ის დროშა იყო, რომლის ქვეშ მუშაკობდნენ ჩვენი წინაპარნი...“.

ქართული საღვთისმსახურო წიგნების ჩამასწორებელმა კომიტეტმა, მრავალგვარ სიძნელეთა მიუხედავად, არქ. პიროსის, დეკ. კ. ცინცაძისა და დეკ. კ. კეკელიძის რედაქტორობით 1915 წელს გამოცა „პარაკლისი სუეტიისა ცხოველისა და კუართისა საუფლოისა“ (მხედრული ანბანით). იმავე

ნელს მოსკოვში დაისტამბა „კურთხევნის“ დაზუსტებული ვარიანტი, რომლის წინასიტყვა გვაუწყებს: „...ვინაითგან ნაშრომი წმიდისა გიორგისი (მთანმიდელისა) ჟამთა ვითარებაჲმან და გადამწერთა უმეცრებაჲმან სასტიკად განჰრყვნა და შებღალა, ლოცვითა და კურთხევითა უნეტარესის კათალიკოზის დომენტიისათა (1705-1724) კურთხევანი კუალად ითარგმნა მწყემსთმთავრის კვიპრიანე სამთავნელის მიერ. თარგმანი კვიპრიანესი უცვალებელად იბეჭდებოდა 1712 წლითგან ვიდრე დღეთა ჩვენთადმდე. ხოლო ოდეს აღსარებულ იქმნა საჭიროება ქართულ კურთხევანის ახლად დაბეჭდვისა, ღვანლითა და მოსწრაფებითა დეკანოზთა კალისტრატე ცინცაძისა და კორნელიოს კეკელიძისათა იგი შეფარდებულ იქმნა წმიდა გიორგის თარგმანის ხელნაწერთა და თანამედროვე ბერძნულ-სლოვენურ კურთხევანს და გასწორებულ იქმნა დიდითა რიდითა და კრძალულებითა...“. მაგრამ აღნიშნულ წიგნს სავალალო ბედი ეწია. აი, რას გვაუწყებს თავად კათალიკოს-პატრიარქ კალისტრატეს მინაწერი ამ გამოცემის ერთი ეგზემპლარის სატიტულო ფურცელზე: „კურთხევანი ესე დაისტამბა... მოსკოვს 2000 ცალი, მაგრამ არცერთი ეგზემპლიარი ჩვენში არ ჩამოსულა: პიტირიმე მიტროპოლიტს მოუსურვებია მისი გადათვალიერება, – შეცდომა ხომ არ არის რაო, – მაგრამ დარჩენოდა გადაუთვალიერებელი. ამის გამო სინოდს ვერც ფასი განესაზღვრა და ვერც ყდა გაეკეთებია ყდსამღვდელო პიტირიმის გადათვალიერების მოლოდინში. დამზადებული ფურცლები 1917 წელში მოისპო. დარჩა კორექტურული ფურცლები, რომელთაგან გამოვიდა ერთი ცალი სრული (ის გადავეცი პროფ. კ. კეკელიძეს უნივერსიტეტის მუზეუმში დასაცავად), მეორე კი – დეფექტური – წინამდებარე“<sup>11</sup>. ამავე „კურთხევნის“ გამოცემის საქმე კ. ცინცაძის შემდგომ, მიტროპოლიტობისას (1927 წელს), უტვირთავს. გაუმზადებია კიდეც დასასტამბად, მაგრამ აღნიშნული მიზანი ვერ განუხორციელებია.

1928 წელს კ. ცინცაძეს, უკვე მიტროპოლიტს, საკათალიკოსო სინოდისათვის წარუდგენია მის მიერვე ზემოთ მითითებული პრინციპების გათვალისწინებით ჩასწორებულ-გამართული, რამდენადმე შემოკლებული და გამარტივებული

რედაქცია „იოანე ოქროპირის წირვის წესისა“, თუმცა გამოქვეყნება ვერ მოხერხებულა. აქვე აღვნიშნავთ, რომ ობიექტურ მიზეზთა გამო დასახელებულმა კომიტეტმა გეგმები და ამოცანები (მაგალითად, დაემუშავებინა და გამოეცა ანტონ კათოლიკოსის „თვენ-სადღესასწაულო“) სანახევროდაც ვერ შეასრულა. კ-პ კალისტრატეს პირად საარქივო ფონდში წარმოდგენილია მის მიერ ჩასწორებული „ჟამნი“, „კონდაკი“, „დავითნი“ და ამ თვალსაზრისით სხვა საინტერესო მასალა, რაც პროფესიონალი მკვლევრის თვალსა და ინტერესს ელოდება.

### *განათლებისა და კულტურის სამსახურში*

განსაკუთრებით თვალსაჩინო და დასაფასებელია კათალიკოს-პატრიარქ კალისტრატე ცინცაძის პედაგოგიური მოღვაწეობა: ასწავლიდა საღვთო რჯულს თბილისის სათავადაზნაურო და ვაჟთა პირველ გიმნაზიებში, ლევანოვსკის კერძო გიმნაზიაში; თანამშრომლობდა სასულიერო სემინარიის პედაგოგიურ საბჭოში. იგი შრომობდა განათლების კერების დაარსება-განმტკიცებისათვის. მან შეადგინა და გამოსცა დამხმარე სახელმძღვანელო საღვთო რჯულისათვის: ლოცვანი და შემოკლებული კატეხიზმო (გამოიცა ექვსჯერ: 1908-1914). ეს წიგნი უმნიშვნელოვანესი შენაძენია ქართული სამოძღვრო და პრაქტიკული ღვთისმეტყველებისა. თბილისის სასულიერო სემინარიის მოძღვრის, არქ. (შემდ. ეპისკოპოს) პიროსის, მიერ შედგენილი სახელმძღვანელო: *ა(რქი-მანდრიტი) პ(იროსი), სახელმძღვანელო მართლმადიდებელ ეკლესიის კატეხიზმოს შესასწავლად, ნაწილი პირველი, – სჯულმოძღვრებითი, ტფ., 1911* დეკ. კ. ცინცაძემ თემატურად განავრცო და დახვეწა; ლოცვან-საგალობლები და კითხვა-მიგებანი მართლწერის იმდროინდელ ნორმათა დაცვით გამარა; დოგმა-მოძღვრებანი მშვენიერი ქართულითა და ადვილალსაქმელი ფორმით გადმოსცა, რის გამოც ეს წიგნი მოცემული საგნის პედაგოგების მიერ საუკეთესო სახელმძღვანელოდ იქნა მიჩნეული. კ. ცინცაძემ ასევე მოამზადა პროგრამები მათთვის, რომლებსაც სასულიერო სემინარია არ და-

უმთავრებიან, მაგრამ მედავითნედ და დიაკვნად სამსახურის სურვილი მაინც აქვთ (გამოიცა თბილისში 1907 წელს; ეგზემპლარები ინახება ავტორის პირად საარქივო ფონდში და საპატრიარქოს ბიბლიოთეკაში).

1900 წლის 14 ოქტომბერს მამა კალისტრატემ აკურთხა ქართული გიმნაზიის საძირკველი და სამადლობელი პარაკლისის შემდეგ ამ სიტყვებით მიესალმა განათლების კერის აღშენებას: „ჩვენ დღეს საფუძველს ვდებთ იმ ტაძრისას, რომელმაც თავის ზღუდეთაგან უნდა გამოუშვას მეცნიერების ნათლით შემოსილნი, სარწმუნოების ფარით აღჭურვილნი და ზნეობრივის სიფაქიზით გაბრწყინებულნი ქართველი მამულისშვილები“ (ცინცაძე 97, ფ. 89). ღვთისმსახურებას ესწრებოდნენ: ნ. ცხვედაძე (გიმნაზიის დამაარსებელი), ს. კლდიაშვილი (არქიტექტორი), ე. თაყაიშვილი (პროფესორი) და არ. ქუთათელაძე (პედაგოგი). ყველამ ერთხმად ადღეგრძელა საძირკველი ქართული გიმნაზიისა.

ღმერთმა ფრთანი შეასხა მამულიშვილთა ოცნებას და ქართველ მეცნიერებს აღნიშნული გიმნაზიის წიაღ უნივერსიტეტის დაარსება შთააგონა. 1918 წლის 26 იანვარს, დავით აღმაშენებლის ხსოვნის დღეს, სრულიად საქართველოს კათალიკოს-პატრიარქმა კირიონმა გიმნაზიის ტაძარში საზეიმო წირვა გამოიყვანა და აკურთხა ქართული უნივერსიტეტი. მაშინ, წირვაზე, დეკანოზი კალისტრატე მისი უწმიდესობის თანამსახური იყო. მან, აღნიშნული გიმნაზიის მღვდელმოდღვარმა, სანატრელი დღე, – დღე უნივერსიტეტის კურთხევისა და გახსნისა, – ტაძრად შემობრძანებისას, ეკლესიის კარიბჭეშივე, მიულოცა ერის სულიერ მამას. აი, მისი სიტყვები, მაშინ წარმოთქმული: „ამ ტაძარს, რომლის საყდარზედაც შენ ისწრაფვი უსისხლო მსხვერპლის შეწირვას, მეოხად ჰყავს აფხაზთ-ქართველთა მეფე წმიდა დავითი. პატარა ქართველთა უახლოეს მფარველად შემთხვევით როდია აღრჩეული მეფე-აღმაშენებელი! მომავალის თაობის აღმზრდელთ გულით სწამდათ და პირით აღიარებდნენ, რომ წმიდა დავითის მაძლით, მის მიერ ერთხელ აღშენებული საქართველო კვლავ აღშენდებოდა და აყვავდებოდა... სასოება ესე, მიუხედავად ჩვენზედა მოწვევულისა ცეცხლისა და მახ-

ვილისა, სიყმილისა და სრვისა, თანდათან გვიძლიერდება, – წმიდის დავითის სახლსა ამას შინა დასადგურების შემდეგ საქართველომ იწყო შენება: ას ექვს წელს ტყვეობაში ყოფილი საქართველოს ეკლესია კვლავ თავისთავადი გახდა, ...გადავარებული სკოლა მოეგო თავსა თვისსა და დღეს ქართულის უნივერსიტეტის საფუძველის ჩაყრით დაგვირგვინებულ იქმნების! მოკლედ, ისტორია მეორდება და დავით აღმაშენებლის დრო გვიბრუნდება. მხიარულ იყავ, კვლავ თვითთავადის ეკლესიის საქეთმპყრობელობით სამშობლოს განთავისუფლების წინამორბედო. კადნიერებით შემოვედ სავანესა ამას დავით აღმაშენებლისასა და გულმოდგინედ შეგვავედრე ყოვლისშემძლებელს, რათა მოვესწრნეთ წმიდის თამარის დროის მოსლვასაც. ამინ“ (გაზ. „საქართველო“, 1918, №25)<sup>12</sup>.

1922 წლის 27 აპრილს, საქართველოს გასაბჭოება-გაკომუნისტებისა და ამ ქვეყანაში არნახული ანტისაეკლესიო-ანტირელიგიური რეჟიმის დამყარების შემდეგ, როდესაც ეკლესიიდან სამღვდლო პირთა გადინების პროცესი დაიწყო, კათალიკოს-პატრიარქმა ამბროსიმ (ხელაიამ) მოახერხა და თბილისში სამოძღვრო კურსები გახსნა. ამ სასწავლებლის დირექტორად მან, საკათალიკოსო საბჭოსთან შეთანხმებით, დეკანოზი კალისტრატე ცინცაძე დანიშნა. იმჟამად ასეთი სასწავლებლის დაარსება დიდმნიშვნელოვანი მოვლენა იყო. 1918 წლის ზაფხულში გააუქმეს თბილისის სასულიერო სემინარია. საკათალიკოსო საბჭო იძულებული გახდა დაეთმო, რადგან ვარაუდობდა, რომ მღვდელმსახურთ მოამზადებდა სემინარიის შენობის წიაღ (ახლანდელი მე-9 საავადმყოფო) დაარსებული გიმნაზია და, შემდეგ, სახელმწიფო უნივერსიტეტი, სადაც, ეკლესიის მესვეურთა განზრახვით და, კერძოდ, კათალიკოს-პატრიარქ კირიონ II-ის (საძაგლიშვილის) წინადადებით, უნდა ჩამოყალიბებულიყო, ევროპული ტრადიციის მიხედვით და იქაური უნივერსიტეტების მსგავსად, ღვთისმეტყველების ფაკულტეტი. მაგრამ, იმდროინდელ ხელისუფლებაში ათეისტურად განწყობილი პარტიებისა და პიროვნებების მოსვლის გამო, არც ამ ოცნებას ეწერა დღე. ერთადერთ იმედად სამოძღვრო კურსების დაარსება რჩებოდა, თუმცა ამ იდეის ხორცშესხმა ვითარების კიდევ უფრო გაუარესების გა-

მო ერთობ პრობლემატურ საკითხად გამოიყურებოდა. ამიტომ აღნიშნული სასწავლებლის დაარსებას სიხარულით შეეგებნენ საქართველოს მართლმადიდებელი ეკლესიის ჭირისუფალნი. შედგა კურთხევისა და გახსნის ცერემონიალი, როდესაც, სამადლობელი პარაკლისის შემდეგ, სასწავლებლის დირექტორმა და წინამძღვარმა დეკ. კალისტრატე ცინცაძემ თქვა: „...ჩვენ მოგველის მრავალი დაბრკოლებანი, მაგრამ ეს არ გვაშინებს; უმთავრესი დაბრკოლება დაძლეულია – სასწავლებელი უზრუნველყოფილია გამოცდილ-დახელოვნებული მასწავლებლებით, რომელნიც შეკავშირებულნი არიან მტკიცე სურვილით, მისცენ მშობლიო ეკლესიას დედა ენაზე მომზადებულნი, სპეტაკი ზნეობის სიტყვითა და საქმით მქადაგებელნი მოძღვარნი... ნაკლებად არის ჩვენი სასწავლებელი უზრუნველყოფილი მოსწავლეთა რაოდენობით (სიაში აღნიშნული 12-დან დღეს გამოცხადდა 4), მაგრამ ჩვენ გულს მაინც არ ვიტეხთ – ქრისტე მაცხოვრის მოწაფეთა რაოდენობა პირველად განისაზღვრებოდა ორი ადამიანით. უფრო ნაკლებად არის იგი უზრუნველყოფილი ნივთიერად, მაგრამ ჩვენ არც ამას უშინდებით: ვინც *ზრუნავს მფრინველთათვის ცისა და შროშანთათვის ველისა*, ის არ მოაკლებს თავის მადლსა და მფარველობას მოციქულებრივი სიყვარულით გამსჭვალულ მოღვაწეთ... ამ იმედით შევცქერით ჩვენ მომავალს” (ცინცაძე 97, ფ. 88). მაგრამ, მიუხედავად ამგვარი შემართებისა, სასწავლებელმა მხოლოდ 1923 წლის იანვრის 12-მდე გასტანა: 13-ში დააპატიმრეს დირექტორი (ასწავლიდა კანონიკასა და ღვთისმსახურებას) და დეკანოზი ილია შუბლაძე (ღვთისმეტყველების მოძღვარი), რის გამოც სწავლის პროცესი ჩაიშალა და სასწავლებელმა არსებობა შეწყვიტა<sup>13</sup>.

მოძღვარი კალისტრატე საქართველოს განათლების სისტემის სრულყოფისათვის არ იშურებდა თეორიულ ცოდნასა და ალღოს. იგი ხშირად ხელმძღვანელობდა საღმრთო რჯულის მასწავლებელთა თათბირ-სემინარებს, გამოთქვამდა საყურადღებო შენიშვნებსა და დასკვნებს, ხვენდა ამ საგნის სასწავლო პროგრამებს გიმნაზიებისათვის, აგრეთვე საეპარქიო და სამრევლო სკოლებისათვის.

კალისტრატე ცინცაძემ სიტყვა სწავლა-აღზრდის მეთო-

დოლოგიის განხრითაც თქვა. იგი ყრმათა აღზრდის იმ პრინციპს უჭერდა მხარს, რომელიც ქართულ პედაგოგიკაში ჰქადაგეს ბერმა სულხან-საბა ორბელიანმა და პოეტმა დავით გურამიშვილმა, რაც დაადასტურა ეპისკოპოსმა გაბრიელმა (ქიქოძემ). ეს პრინციპი უმთავრესად მოზარდთა ზნეობრივ ნვრთნას გულისხმობდა: ბავშვმა იმთავითვე უნდა შეითვისოს კეთილი ხასიათი – სიმართლე, სიმშვიდე, კრძალვა-მორჩილება, საქმის სიყვარული. ამასთანავე „გარეგანი ზრდილობა და დარბაისლობა მხოლოდ მაშინ არის მოსაწონი და საქები, როდესაც იგი შეერთდება სულიერსა, შინაგანსა ზრდილობასა თანა“ (სიტყვა განზრდისათვის შვილთა. ქადაგებანი იმერეთის ეპისკოპოსის გაბრიელისა, I, ქუთაისი, გამოცემა მეოთხე, 1913, გვ. 459). ხსენებული მღვდელმთავარი – განთქმული მოძღვარი და ფსიქოლოგი, ისე როგორც XVII-XVIII სს-ის ხსენებული მოაზროვნეები – ზოგ შემთხვევაში აღსაზრდელთა ფიზიკურ დასჯასაც (телесное наказание) იწონებდა (Слово, произнесенное в церкви Кутаисской классической гимназии. Слова и речи Гавриила, епископа Имеретинского, Кутаис, 1893, стр. 440-444). ზოგმა პედაგოგმა ეჭვის თვალით შეხედა აღზრდის ამ მეთოდს და პრესაში გაბრიელ ეპისკოპოსის მიმართ კრიტიკული (თუმცა მოკრძალებული) შენიშვნაც გამოითქვა. თბილისის სასულიერო სემინარიის პედაგოგ ილია ფერაძის აზრით, ბავშვთა ფიზიკური დასჯა ეწინააღმდეგება სახარების სულისკვეთებას. ამიტომაც, მისი თქმით, „ბოლო უნდა მოეღოს მას, როგორც ძველი დროის გადმონაშთს, კუთვნილს ქრისტიანობამდელი პედაგოგიკისას“; თანამედროვე ცივილიზაციას სხვა პრინციპები და სხვა მიდგომები აქვსო (Ил. Ферадзе, Мысли Преосвященного Гавриила, Епископа Имеретий, о воспитаний детей по его проповедам, жрн. «Духовный Вестник Грузинского Экзархата», 1896, №21, გვ. 16-24 და №23-24, გვ. 9-26). მღდ. კ. ცინცაძემ, ახალგაზრდა პედაგოგმა, გამოაქვეყნა შენიშვნა ხსენებული აზრის შესახებ და აღნიშნა, რომ ილ. ფერაძემ – კიევის სასულიერო აკადემიის კურსდამთავრებულმა და ღვთისმეტყველების კანდიდატმა – არაჯეროვნად განმარტა გაბრიელ ეპის-



კობოსის პედაგოგიური შეხედულებანი. მოძღვარი დაეყრდნო საღვთო წერილს, რომელიც მოგვმართავს: „შვილო, უფლისგან წვრთნას ნუ უგულებელყოფ და მის მხილებას ნუ წაუყრუებ, რადგან ვინც უყვარს, იმას წვრთნის უფალი. სცემს ყოველ შვილს, ვისაც ღებულობს“ (ებრ. 12,5-6), და მიუთითა: ბავშვთა დასჯა გარკვეულ ვითარებასა და შემთხვევაში მართებული მეთოდია; იგი სულაც არ ეწინააღმდეგება სახარებას, რადგან მისი (ამ მეთოდის) საფუძველი უაღრესად ჰუმანურია და მიზანი – ქრისტიანული (Свящ. К. Цинцадзе, Заметка..., жрн. «Пастырь», 1897, №5-6, გვ. 5-6).

ღირსი მოძღვარი, ეპ. გაბრიელის მსგავსად, მოზარდთა ზნეობრივ-ინტელექტუალური ფორმირების საქმეში დიდ მნიშვნელობას აკუთვნებდა დედას, ქალს ზოგადად. მისი შთაგონებითა და თანადგომით ჩამოყალიბდა „ღარიბ მოწაფეთა დამხმარე ქალთა კომიტეტი“, რომელმაც შესამჩნევი ამაგი დასდო ობოლ და ხელმოკლე ოჯახის შვილთა განათლებას. კომიტეტი ეხმარებოდა მათ სასმელ-საჭმელით, ტანსაცმლით, წიგნებით და, რაც მთავარია, მორალურად. ერთ-ერთ საქველმოქმედო სადილზე, რომელიც ამ ორგანიზაციამ სათავადაზნაურო სკოლის ღარიბი მოსწავლეებისათვის გამართა, კ. ცინცაძემ, როგორც საღვთო რჯულის მოძღვარმა, შეახსენა ქართველ დედეებს მათ წინაპართა ზნეობრივი საქმენი. „ძველად ჩვენში, – აღნიშნა მან პარაკლისის შემდეგ, – გამოჩენილი და დიდი ოჯახების დიასახლისები თავიანთ კარზე თავის შვილებთან ერთად სხვის შვილებსაც ზრდიდნენ და უნერგავდნენ გულში ღვთის შიშსა და სამშობლოს სიყვარულს. ამასთან ერთად, ეს ღვთის მიერ კურთხეულნი დედანი, ახალ თაობას ასწავლიდნენ წერა-კითხვასა და ავარჯიშებდნენ მწიგნობრობის საქმეში... ერთის საუკუნის წინად „დაჰბერა ქარმა ჩრდილოსამ“ და ძველი წეს-წყობილება არივ-დარივა: ახალმა დრომ ახალი საქმე გაუჩინა ჩვენს დედებს და ძველი მათი მოვალეობა გადაავიწყა იმდენად, რომ შეძლებულის ოჯახის დიასახლისნი არამც თუ სხვისი შვილებისათვის აღარ ზრუნავდნენ, არამედ საკუთარი შვილების აღზრდაც კი ჩააბარეს *სასყიდლით დადგინებულთ* (იოან. 10, 12) უცხო ზნე-ჩვეულების-რწმენის გამდელებს. მაგრამ, ნათ-

ქვამია, ქარის მოტანილს ქარივე წაიღებსო, – ამგვარ მოვლენას ადრე თუ გვიან ბოლო უნდა მოღებოდა... და, აი, ჩვენ მომსწრე ვართ იმის, რომ თითო-ოროლა ქართველი ქალი დაბრუნებია ძველს გზას და საგნად თავის ზრუნვისა აურჩევია ბედისაგან დაჩაგრულნი მონაფენი... ბევრი შრომა მოელისთ მათ, შეიძლება ბევრი დაბრკოლებანიც გადაეღობოსთ, მაგრამ, ღვთის შეწევნით, ვიმედოვნებთ, ისინი არ შეუშინდებიან არავითარ საბრთხეს და სძლევენ ყოველსავე დაბრკოლებას...“ (ცინცაძე 97, ფ. 92).

სასწავლო წლის დამდეგს, სავედრებელ-სამადლობელი პარაკლისის დროს, მამა კალისტრატე ქადაგებით მიმართავდა ყმანვილებს: შთააგონებდა ადამიანის მონოდების საგანს, – ჩვენდამი მომადლებულ ღვთისმიერ ძალთა წარმოჩენასა და ამ ძალთა კეთილწარმართებას. ადამიანის უზენაესი სურვილია სიცოცხლე, ღმერთმა ბედნიერებისათვის გააჩინაო იგი, ოღონდ საჭიროა, გავიგოთ: რა არის ბედნიერება? „უფალი ხომ ყოვლადშემძლებელია, – ასწავებდა ის ქართული გიმანზიის შეგირდებს, – მაგრამ ისიც კი, ამბობს ერთი წმიდა მამათაგანი, ვერ შესძლებს ადამიანის ცხოვრებას, თუ თვით ადამიანმა არ მოინდომა ცხოვნება“. ამისათვის, – დასძენდა, – „უნდა შეისწავოთ სჯული უფლისა, გარდმოცემული ღვთისმხილველ მამათმთავართა, წინასწარმეტყველთა და მოციქულთა მიერ, და... სჯული იგი, რომელიც შემოქმედმა წესად დაუდვა ბუნებას და რომლის ძალითაც მილიონობით მოციმციმე ვარსკვლავ-მნათობნი განაგრძობენ თავისებურ ცხოვრებას. მეტის დაკვირვებით უნდა შეისწავლოთ თავგადასავალი ამ ჩვენის სამკვიდრო დედამიწისა, მისი ანწყო და წარსული, მისი ადგილი ღვთის ქმნილებათა შორის და წესები მისი არსებობისა, მინერალები და მეტალები... განსაკუთრებული ყურადღებით უნდა შეისწავლოთ გვირგვინი ქმნილებისა – ადამიანი და მის მიერ აღბეჭდილი კვალი ცხოვრებისა: როგორ და რანაირად მოახერხა მან, ღვთის მიერ სამოთხიდან განდევნის შემდეგ, განეთავისუფლებინა თავი ბუნების მოვლენათა და მხეცთა შიმისაგან. შეეცადა, პირიქით, მათ დამორჩილებას; სძლია ზღვა და ჰაერი, და დაადგა გზას, რათა ღვთის მიერ დანიშნულ მიზანს მისწეოდა – გამ-

ხდარიყო უფლად და ბატონად ქვეყანასა ზედა“ (სიტყვა სწავლის დაწყების გამო, თქმული ქართულ გიმნაზიაში, „განათლება“, 1914, №7, გვ. 551-552).

ამგვარი, რწმენითა და სიყვარულით გამთბარი, ქადაგებით მამა კალისტრატეს ბევრჯერ მიუმართავს ახალგაზრდებისათვის („განათლება“: 1911, №4; 1912, №8; 1913, №7; „საქართველო“, 1916, №20, 24; „შინაური საქმეები“, 1911, №37 და სხვა); მათ სულსა და გულში ბევრჯერ გაუღვიძებია სწავლის ხალისი, ბევრი დაუფიქრებია სასიკეთოდ. ქართული პედაგოგიკის ისტორიისათვის მნიშვნელოვანია ჩვენი სასიქადულო პედაგოგებისადმი ძღვნილი მისმიერი ეპიტაფიები ანუ, რომ დავაზუსტოთ, დაკრძალვის დღეს წარმოთქმული სიტყვები: ლუარსაბ ბოცვაძისადმი, ა. ნათაძისადმი („განათლება“, 1916, №8-9), არ. ქუთათელაძისადმი, ი. გოგებაშვილისადმი („შინაური საქმეები“, 1912, №25), ნ. ცხვედაძისადმი („შინაური საქმეები“, 1911, №37; „განათლება“ 1911, №11) და სხვა.

ხუცესის თავმიძღვნილ პედაგოგიურ საქმიანობას ამკობდა მაღალი ზნეობა და გულისხმიერება აღსაზრდელთადმი. კეთილ მოძღვარს ღრმა პატივისცემით მოიხსენიებდნენ კომპოზიტორი ზაქარია ფალიაშვილი, აკადემიკოსები: შალვა ნუცუბიძე, კორნელი კეკელიძე, ექიმი დიმიტრი ხუნდაძე, მხატვარი ლადო გუდიაშვილი და ქართული კულტურის მოღვაწეთა თაობები, რომლებიც მამა კალისტრატეს წირვა-ლოცვითა და ქადაგებებით ეზიარნენ სათნოებასა და განათლებას.

კათალიკოს-პატრიარქი კალისტრატე ცინცაძე ქართული ხელოვნების დიდი მოამაგე იყო. იგი ეროვნული კულტურის იმ მესვეურთა გვერდით იდგა, რომლებიც ღრმად განიცდიდნენ კრიზისს ამ დარგში და ეძიებდნენ მისგან თავდალწვევის გზებს. ამიტომაც ეხმაურებოდა და ესალმებოდა ყველა ნაბიჯს, რაც კი ჩვენი ერის ესთეტიკურ გამოღვიძება-გაფაქიზებას მოასწავებდა. ამ თვალსაზრისით ღირსშესანიშნავი მოვლენებისადმი მიძღვნილი ქადაგების მეშვეობით მღვდელ-მოძღვარი განმარტავდა ხელოვნების (თეატრისა თუ მუსიკის) ჭეშმარიტ არსს – მის საფუძველსა და საბოლოო მიზანს, ადგილს ადამიანის სულიერ ცხოვრებაში და ამრიგად ამყარებდა მის მორალურ ავტორიტეტს საზოგადოების თვალში.

ჩვენს ხელთაა ქართული თეატრის შენობის განახლების გამო მის მიერ თქმული სიტყვის ტექსტი („შინაური საქმეები“, 1909, №5), რომელშიც მოძღვარი გვამცნობს: „ქვეყნის შემოქმედმა ადამიანი ბედნიერებისათვის გააჩინა და ამ მიზნის მისაღწევ საშუალებად სულიერთა და ხორციელთა ძალთა ვარჯიშობა ანუ მუშაობა დაუნიშნა. მაგრამ, შურითა ეშმაკისათა, ადამიანი სცთა და მისი ბუნება დაუძღურდა, რის გამოც მუშაობის დროს იგი იღლება და, მის განსაგრძობად, საჭიროებს ძალთა მოკრებას, მოსვენებას... და, აი, ამ საჭიროების დაკმაყოფილება თავსუდვია ხელოვნებას საზოგადოდ და თეატრსა კერძოდ. ხოლო, სამწუხაროდ, ხელოვნება ამ მოვალეობის აღსრულებას ხშირად გაურბის და ადამიანს, ცხოვრების გამაკეთილშობილებელ-განმავითარებელ გასართობის ნაცვლად, გარეგანის სიმშვენიერით შემკობილს ძლიერი სანამღავით სავსე ფიალას აწვდის და თავს მართლულობს მით, რომ იგი ცხოვრების სარკეა... ხელოვნებამ უნდა დაგვისურათხატოს ნამდვილი ცხოვრება და მისი მახინჯი მხარე, ქვენა გრძნობათა ბოხოქრობა და მრავალგვართა ვნებათა ღლევა, მაგრამ მან არ უნდა დაივიწყოს უმაღლესი ზნეობრივი მოთხოვნილება: ავს უწოდოს ავი და კარგს – კარგი, რათა ხელოვნების ტაძრითგან არ წარვიდეთ სახიდ ჩვენდა წამბილწველ-გამათახსირებელ ოცნება-წარმოდგენებით აღვსილნი, არამედ გამხნევებულნი, აღფრთოვანებულნი და განმზადებულნი ბრძოლად ბოროტისა და შედგომად კეთილისა... მაშ, შევევედროთ ზეციერ მამას, რომ განახლებული ესე ტაძარი ხელოვნებისა ჰყოს მან ბუდედ უბინოებისა და საყოფელად სინმიდისა, ხოლო მუშაკთა მისთა მისცეს ძალი და სიმხნე აღძრვად და აღზრდად სიყვარულისა მისდამი, *რაოდენი არს წმიდა, რაოდენი საყვარელ, რაოდენი სათნო და რაოდენი ქებულ* (ფილიპ. 4, 8)“.

ქართული თეატრმცოდნეობის ისტორიისათვის ერთობ ფასეულია აგრეთვე კ-პ კ. ცინცაძის მიერ დეკანოზობისას ქაშვეთის ტაძარში თქმული სიტყვა ცნობილი მსახიობის, კონსტანტინე (კოტე) მესხის, გარდაცვალების გამო 1914 წლის 18 მაისს. ალბათ ბევრი კვალიფიციური სპეციალისტიც კი მოანერდა ხელს მის ამ სიტყვაზე. და, ვინაიდან იგი გამოუქვეყნე-

ბელია, ჩვენ შედარებით სრულად წარმოვადგენთ მის ტექსტს:  
„...ჩვენი სცენის მოღვაწეთათვის ფრიად სანუგეშო უნდა იყოს ამოდენა ხალხის თავის მოყრა იქ, სადაც ბევრისაგან ბევრი მსახიობს სცენაზედ სთვლის საზოგადოების გამართობელ, გამამხიარულებელ არსებად, ხოლო სცენის გარეშე თითქოს უმნიკვლო ზნეობით შემკულის საზოგადოების არასრულ-უფლებიან წევრადა. ნუ გეუცხოვებათ ეს სიტყვები, ვინაითგან ამგვარი შეხედულება სცენასა და მსახიობზე არ შეადგენს მარტო ქართველთა საკუთრებას, არამედ არსებობს უფრო განათლებულ ერთა შორისაც: როცა ქალაქ ფენევაში განიზრახეს სამუდამო სცენის დაარსება, წინააღმდეგი გახდა სხვათა შორის განთქმული ჟან ჟაკ რუსოც. ის სწერდა ერთ მეგობარს, თეატრიო, ადამიანს ვნებათაღელვას უცხოველებს, აქეზებს ნუთიერის სიტკბოების განცდისათვის, ანებივრებს და უღვივებს, განსაკუთრებით ახალგაზრდობას, ქვენა გრძნობათა. თეატრი დარბაისელ ადამიანთათვის საჭირო დაწესებულება კი არ არის, არამედ თავშესაფარია უსაქმო პირთათვის, რომელთა დავინწყებიათ თავიანთი ვინაობა და მოვალეობა და არ იციან, რა უყონ თავისუფალ დროსო. სხვები, განსაკუთრებით მორალისტები, უფრო შორს მიდიან, ისინი სამუდამო სცენას საზოგადოების ზნეობრივ დამლუპველად თვლიან... რაითგანაც თეატრი ადამიანს აჩვევს ძლიერ გრძნობათა განცდას და მიმდინარე ცხოვრების უკუღმართობას ჩვეულებრივ მოვლენად არაცხვინებსო... საბედნიეროდ, სცენის საუკეთესო მოღვაწეთა მეცადინობით, ეს შეხედულება ირყევა და ფეხს იკიდებს სხვაგვარი, – თეატრმა საზოგადოება უნდა გაართოს და, თანავე, უნდა აღზარდოს, აღამაღლოს, გააკეთილშობილოსო. ამ დიადი მიზნის მისაღწევად კი თეატრი მართლაც საუკეთესო იარაღი და საშვალეა: ის თავის ზღუდეთა შორის ჰკრებს ყველა წოდებისა და ჰასაკის წარმომადგენელთ, აკავშირებს მათ სიყვარულისა, გინა მძულვარების ერთგვარად განცდის გრძნობითა და უღვიძებს შეგნებას ადამიანის მაღალის დანიშნულებისას... მართალია, მსახიობი სცენაზე ჩვენ გადმოგვცემს არა თავის აზრსა, გვიხატავს სხვის მიერ შექმნილ სურათსა, მაგრამ ძლიერის მეტყველებით, მოძრაობით და

მოქმედებით სულს უდგამს, სისხლსა და ხორცს ასხამს მწერლის ნაწარმოებს; იგი ამ სახედ ჭეშმარიტი გამგრძობი და დამამთავრებელია ავტორისა. მაგრამ სანამ მსახიობი ამ სიმალლეს მიაღწევდეს, თვით გაიზრდებოდეს, საჭიროა მისთვის ბევრი შრომა, დიდი გულმოდგინება და განუწყვეტელის სწავლის ხალისი... სწორედ ამ თვისებებით იყო შემკული წინაშე ჩვენსა მდებარე...“ (ცინცაძე 97, ფ. 166-168).

1908 წელს დეკანოზ კალისტრატე ცინცაძის, კომპოზიტორ ზაქარია ფალიაშვილის, ლიბრეტისტ პეტრე მირიანაშვილისა და დეკანოზ ანტონ თოთიბაძის თაოსნობით საქართველოში პირველად ჩამოყალიბდა „ფილარმონიული საზოგადოება“, რომლის მიზანი ქართული გალობისა და, საერთოდ, სერიოზული მუსიკის განვითარება-პოპულარიზაცია იყო. ამ საზოგადოების მიერ იმავე წელს დაარსდა „სამუსიკო სკოლა“, რომელიც მამა კალისტრატემ აკურთხა და აღნიშნა: „...ადამიანის სულისა და გულის განმაფაქიზებელის და განმააზნებელის მუსიკა-გალობა-სიმღერის შესწავლა ჩვენს დროსა და ჩვენს ხალხს ფრიად ესაჭიროება, ვინაიტგან, დროთა ვითარების გამო, წმიდა მოციქულის სიტყვა – „ასწავებდით და მოძღვრიდით თავთა თქვენთა ფსალმუნითა და გალობითა და შესხმითა სულიერითა“ (კოლ. 3, 16) – უმრავლესობისათვის გაუგებარი შეიქმნა. საუბედუროდ, უმეტესობამ ჩვენს ქვეყანაში შეისისხლხორცა ერთგვარი მუსიკა-სიმღერა, რომელიც, სიტყვისაებრ ფსალმუნთმგალობელისა, შეშვენის მხოლოდ მათ, ვიეთნიც სმიდეს ღვინოსა (68, 13). განვიხაროთ, მაშ, ამ ახლის განმანათლებელის დაწესებულების შობისათვის; წრფელის გულით შევავედროთ იგი უფალს და ვთხოვოთ, მოჰხედოს სკოლასა ამას მონყალის თვალთ, ნაყოფიერ და მრავალ ყოს დღენი მისნი, განამხნეოს და განადღიეროს მუშაკნი მისნი, განამტკიცოს მათ შორის ერთსულოვნება და დაწყებულის საქმისადმი სიყვარული, და შეგვასწროს იმ დროს, ოდეს, მათ მიერ დაარსებულის სკოლის მეოხებით, ყოველნი უგალობდეთ უფალსა მეცნიერებით (ფსალმ. 46, 8) („შინაური საქმეები“, 1908, №30, გვ. 12).

ზაქარია ფალიაშვილმა მამა კალისტრატეს თხოვნით ქაშვეთის ეკლესიისათვის 1910 წელს შეადგინა მგალობელთა

გუნდი და ნოტებზე გადაიღო „ნმ. იოანე ოქროპირის წირვის წესი“. დიდმა ქართველმა კომპოზიტორმა თავისი ნაწარმოების „აბესალომ და ეთერის“ პრემიერაზე დიდ ქართველ საეკლესიო მოღვაწეებთან ერთად საგანგებოდ მიიწვია განსწავლული მღვდელმობღვარი: იმ დღეს კათოლიკოს კირიონსა და მიტროპოლიტ ლეონიდეს, რომელთაც დალოცეს ქართული ეროვნული ოპერის პირველი ნაბიჯები, გვერდში ედგათ დეკანოზი კალისტრატე<sup>14</sup>.

### *ეკლესიის თავისუფლებისა და საეკლესიო რეფორმებისათვის*

კათალიკოს-პატრიარქ კალისტრატე ცინცაძეს განსაკუთრებული წვლილი მიუძღვის საქართველოს ეკლესიის ავტოკეფალიის აღდგენის საქმეში. 1894 წელს საეკლესიო ჟურნალში «Пастырь» გამოქვეყნდა (№№ 2,3,4,7,9,11,13,14, 19,23) მისი სამეცნიერო სტატია „საქართველოს ეკლესიის ავტოკეფალია“, რომელშიც გამოკრთოდა ამ ეკლესიის დამოუკიდებლობის აღდგენის აზრი, რაც იმდროისათვის ერთერთი პირველი გაბედული სიტყვა იყო აღნიშნულ საკითხზე. ამ წერილმა გააძლიერა საპროტესტო ხმა, რომელიც გაისმოდა საქართველოს ეკლესიის ავტოკეფალიის გაუქმების დღიდან (1811 წ.). ამიტომაც გამოუწვევია მის პუბლიკაციას ეგზარქოსის გულისწყრომა. ავტორი იხსენებს: „ჯერ წერილი ნახევრადაც არ იყო დაბეჭდილი, რომ ვლადიმერ ექსარხოსმა დაიბარა მამა დავითი (დეკანოზი ლამბაშიძე; რედაქტორი, ნ.პ.) და დაემუქრა: თუ წერილი არ დამთავრებულა იმით, რომ საქართველოს ეკლესია არასდროს არ ყოფილა დამოუკიდებელი, ჟურნალსაც დაგიხურავ და შენც საქართველოდან გადაგასახლებო. შეძრწუნებული მოხუცი მოვიდა ჩემთან და შემომჩივლა თავისი მდგომარეობა. ვურჩიე, დაბრუნებულიყო ექსარხოსთან და მოეხსენებინა, – წერილი ნაწილია ვრცელი თხზულებისა, რომელიც კრიტიკულად განხილული აქვთ ორ დამსახურებულ პროფესორს, თვით ექსარხოსის ყოფილ მასწავლებლებს – ი. მალიშევსკისა და ოლესნიცკის და კიევის სასულიერო აკადემიის კონფერენციის მიერ ცნობილია პოლიტიკურად არასაშიშრად. მალიშევსკისა

და ოლესნიცკის სახელებმა დაამშვიდეს განრისხებული მღვდელთმთავარი, გადაარჩინეს ხიფათს რედაქტორ-გამომცემელი, რისხვა კი ავტორზე იქმნა გადატანილი, – რა დროს ავტოკეფალიაზე ლაპარაკიაო“.

ვლადიმერ ეგზარქოს რუს სამღვდელთა შორის თანამგრძობნი გამოუჩნდნენ, რომელთაგან განსაკუთრებით აქტიურობდა არქ. ნიკანდრო. მან გაზეთში „კავკაზ“ (1905, №148, 155) გამოაქვეყნა სტატია სათაურით „საქართველოს ეკლესიის ავტოკეფალიის შესახებ“, რითაც უარყოფდა საქართველოს ეკლესიის სრული ავტოკეფალიის ფაქტს და საქართველოს საკათოლიკოსოზე რუსეთის ეკლესიის უფლებებს თვითმიზნურად ამართლებდა. მის მიერ შეთხზულ „არგუმენტთაგან“ ერთ-ერთი ასეთი იყო: „ქართველ კათალიკოსთა ხელდასხმა რუსეთშიც აღესრულებოდა. მაგალითად, კათალიკოსი ანტონ მეორე ხელდასხმულ იქნა მოსკოვს (1783 წ.)“-ო. ამგვარი ტყუილისა და დემაგოგიისათვის პასუხი უნდა გაეცათ. ამიტომაც მღდ. კ. ცინცაძის აღნიშნული შრომა 1905 წელს წიგნად გამოიცა, რომლის დამატებაში (ვრცელი სქოლიოები) სათანადოდ იქნა წარმოჩენილი და შეფასებული არქ. ნიკანდროსა და მისთანათა გამოსვლები (თვით შრომის თაობაზე იხ. ქვემოთ).

როდესაც ეროვნულ-განმათავისუფლებელი მოძრაობა გაცხოველდა, დეკანოზ კ. ცინცაძის თაოსნობით (თანამოაზრე ისტორიკოს სერგი გორგაძესა და დეკანოზ ანტონ თოთიბაძესთან ერთად) რუსეთის ეკლესიის უწმიდეს სინოდში წარსადგენად 1905 წელს შემუშავებულ იქნა პეტიცია (სხვა ამგვარ პეტიციებთან ერთად) საქართველოს საპატრიარქოს აღდგენისა და განახლების თაობაზე. ამ პეტიციით პეტერბურგს ჩავიდა დელეგაცია ეპისკოპოს ანტონ გიორგაძის, არქიმანდრიტ ამბროსი ხელაიას და დეკანოზ კალისტრატე ცინცაძის შემადგენლობით. მართალია, უწმიდესმა სინოდმა ქართველთა კანონიერი მოთხოვნა უგულვებელყო, ავტოკეფალიისათვის გამოჩენილი მებრძოლნი: ეპისკოპოსი კირიონი, ეპისკოპოსი დავითი, არქიმანდრიტი ამბროსი და ზოგი სხვა გადასახლა კიდეც, მაგრამ ქართველი სამღვდელოების პატრიოტული შეგნება შემდგომ კიდეც უფრო გაერთსულოვნდა, რა-



საც ხელი შეუწყო დეკანოზ კ. ცინცაძის ფუნდამენტურმა შრომებმა: Священник К. Цинцадзе, Автокефалия церкви Грузинской (Исторический очерк IV-XI вв.), Тифлис, 1905; Историческая справка по вопросу об автокефальности Грузинской церкви, Тифлис, 1906.

ამ გამოკვლევებით ღთისმეტყველების მეცნიერებათა კანდიდატი, რომელსაც ისტორიკოსის კვალიფიკაციაც ჰქონდა, კვლევის ძლიერი ალლოთი ცხადყოფდა საქართველოს ეკლესიის ხანგრძლივ, შინაარსიან ისტორიასა და ამ ისტორიის ადგილს ქრისტიანულ სამყაროში. მეცნიერი კრიტიკულად განიხილავდა საისტორიო წყაროებში მშობლიური ეკლესიის ავტოკეფალიის შესახებ შემონახულ მწირ (ზოგჯერ ურთიერთგამომრიცხავ) ცნობებს; ყურადღებას ამახვილებდა უცხოურ მასალაზე, რადგან მიაჩნდა, რომ იმდროისათვის ამ მეტად პრობლემატური საკითხის გარკვევა ქართული და უცხოური მონაცემების შეჯერებით თუ მოხერხდებოდა. წინამორბედთაგან (მარი ბროსე, პლატონ იოსელიანი, მიხეილ საბინინი, ალექსანდრე ხახანაშვილი, პოლიევქტოს კარბელაშვილი და სხვა) განსხვავებით იგი ბრმად როდი მიენდო საქართველოს მატრიარქში ივერიის საპატრიარქოს შექმნის შესახებ შესულ ცნობებს. „საქართველოს ეკლესიის ავტოკეფალიის“ დამუშავებისას მან გულმოდგინედ გამოიძია მსოფლიო საეკლესიო კრებათა აქტები, ბერძნული, სირიული თუ სომხური წყაროები და ქართულ მონაცემებთან მათი შედარების შედეგად წარმოაჩინა საქართველოს საეკლესიო ცხოვრება IV-XI საუკუნეებში. აღნიშნული გამოკვლევით დადასტურდა, რომ მე-5 საუკუნეში მეფე ვახტანგ გორგასლის მცდელობით დაარსებული მცხეთის საკათალიკოსო სრულიად დამოუკიდებელ ეკლესიას ჯერაც არ ნიშნავდა, თუმცა ეს ფაქტი მნიშვნელოვანი ნაბიჯი იყო ამ გზაზე: კათალიკოსები (თვით ავტორისეული განმარტებით, კათოლიკოსი: მართლმადიდებელი ეკლესიის მეთაური ბიზანტიის გარეშე, აღმოსავლეთში), თუნდაც ბერძნები ყოფილიყვნენ, ანგარიშს უწევდნენ თავიანთ ხელმწიფეებსა და საკუთარი ეკლესიის საჭიროებას. ამ შრომითვე გაირკვა მანამდე მეცნიერულად დაუსაბუთებელი რიგი საკითხი: VI საუკუნის შუა წლებიდან საქართველოს კათალიკოსად ქარ-

თველთა დადგინება; VII საუკუნის დასაწყისში ქართველ კათალიკოსთა ქართლშივე ხელდასხმა, წმ. მირონის მცხეთას მოხარშვა და ამ ფაქტის ოფიციალურად დადასტურება თეოფილაქტე პატრიარქის (741-751) მიერ მოწვეულ ანტიოქიის საეკლესიო კრებაზე; ანტიოქიის პატრიარქისაგან საქართველოს ეკლესიის მუდმივ მეთვალყურედ ილუმენების წარმოგზავნა და მათი (ილუმენთა) დამოკიდებულება ქართველ იერარქებთან; მელქისედეკ კათალიკოსის მიერ თავისი თავის კათალიკოს-პატრიარქად გამოცხადება (ნაცვლად „კათალიკოს-არქიეპისკოპოსისა“. ამ ტიტულს ატარებდნენ მისი წინამოადგილენი) და ანტიოქიის პატრიარქის – პეტრე მესამის – თაოსნობით 1053 წელს მოწვეული საგანგებო კრების ავტორიტეტით ამ აქტის – საქართველოს ეკლესიის სრული ავტოკეფალიის – კანონიზება<sup>15</sup>. მკვლევარმა საფუძვლიანად შენიშნა საქართველოს ეკლესიის სრული ავტოკეფალიის ისტორიულ-გეოგრაფიული და პოლიტიკური წანამძღვრები: არაბ მუსლიმანთა მიერ საქართველოსა და ანტიოქიის ტერიტორიული იზოლირება, დასავლეთ და აღმოსავლეთ საქრისტიანოს შორის ექვარისტიული ერთიანობის განყვეტა, საქართველოს გაერთიანება და სხვა.

თვით უწმიდესი სინოდის ოფიციალობაც ვერ უარყო ამ გამოკვლევის მეცნიერული ღირსება, თუმცა საქართველოს ეკლესიის სრული ავტოკეფალიის ისტორიული სიმართლე არ დაიჯერა და რიგი შენიშვნა მისცა ავტორს. უწმიდესი სინოდის კანცელარიის ობერ-მდივანმა, ისტორიკოსმა ვ. სამუილოვმა ჟურნალ „ცერკოვნიე ვედომოსტის“ (პეტერბურგი) 1906 წლის №№1-6-ის დამატებებში გამოაქვეყნა სტატიები, რითაც შეეცადა დაემტკიცებინა, 1783 წლამდე (ე. ი. გეორგიევსკის ტრაქტატამდე) საქართველოს ეკლესია იურიდიულად ანტიოქიის საპატრიარქოზე იყო დამოკიდებულიო. მღვდ. კ. ცინცაძის წიგნზე დაწერილ რეცენზიაში (იგივე ჟურნალი, 1906, №5, გვ. 245-246) იგი აცხადებდა: „Мы не можем согласиться с автором и в том, что в XI веке Иверской церкви была дарована полная автокефалия. Патриарх Антиохийский даровал и вторую автокефалию с обязательством помянуть на службах Антиохийского первосвященителя и тем самым, так же,

как и в VIII веке, недвусмысленно намекал, что патриарх Антиохийский и есть собственно духовный глава Грузинской церкви, а не автокефальный ея католикос“. ამ აზრს ვ. სამუილოვი გამოთქვამდა მოგვიანო ხანის საისტორიო თხზულებათა საფუძველზე და არ უწევდა ანგარიშს, თუ რამდენად სანდონი იყვნენ ისინი. მაგ. მისი მტკიცება, ანტიოქიის პატრიარქ პეტრე III-ს (1053-1057) მიერ ქართველთადმი ბოძებული ავტოკეფალია კათალიკოსთა ქართლშივე (მცხეთას) ხელდასხმით ამოიწურებოდაო, ემყარებოდა ბიზანტიელი ბერის, გიორგი კედრინის (XI ს.), ავტორობით ცნობილ თხზულებას, მაგრამ ოდნავადაც არ ითვალისწინებდა ადრინდელ, პირველწყაროდ გამოსადეგ ქართულსა და თვით ანტიოქიურ (სირიულ) მასალებს, რომელთა გათვალისწინებით ხსენებული ისტორიკოსის ცნობათა სისწორე ეჭვის ქვეშ დგება და ცხადდება, რომ იქ ერთმანეთშია აღრეული VIII და XI საუკუნეების ამბები ერთსა და იმავე საკითხზე (იხ. კ. ცინცაძე, *Историческая справка...* გვ. 9-15).

არქ. ნიკანდროსა და ვ. სამუილოვს მხარი აუბა ხარკოვის უნივერსიტეტის პროფესორმა, ღვთისმეტყველების ისტორიის დოქტორმა დეკ. ტ. ბუტკევიჩმა. მისი მეცნიერული აღლოსა და მეთოდისათვის შეუფერებელი გამოსვლებით (საჯარო მოხსენებებით, პრესით, კერძოდ გაზით „კოლოკოლი“, რომელიც იყო სამისიონერო საზოგადოების ყოველდღიური ორგანო პეტერბურგში) იგი არწმუნებდა საზოგადოებას, ქართველი სამღვდელოების „ერთი ნაწილის მიერ დღის წესრიგში დაყენებული საეკლესიო საკითხი“ ამ ხალხის პოლიტიკური ინტერესებიდან გამომდინარეობს და მათ „სეპარატიზმზე“ მეტყველებს; მას არავითარი ისტორიული და საეკლესიო-რელიგიური საფუძველი არ გააჩნია, რადგან საქართველოს ეკლესია ავტოკეფალური არასდროს ყოფილაო. ქართველი სამღვდელოებისა და ერის გულისწყრომა, აღიარებული მეცნიერის მაგვარი გამოსვლით გამონვეული, გამოიხატა დეკ. კ. კეკელიძის, მლდ. კ. ცინცაძისა და პროფ. ს. გიორგაძის ერთობლივი წერილით: Протоиерей К. Кекелидзе, священник К. Цинцадзе, С. Р. Горгадзе, Открытое письмо о прот. Т. Бутковичу, გაზ. «С.-Петербургские Ведомости», 1906, 17.XII.

№279 (მეორე პუბლიკაცია: კ. კეკელიძე, ეტიუდები..., XIII, 1974, გვ. 177-179).

ამ წერილის – „ღია ბარათის“ – მეშვეობით ქართული და უცხოური საისტორიო წყაროების ჯეროვანმა მცოდნეებმა ერთხელ კიდევ გახაზეს, რომ „ჭეშმარიტება საქართველოს ეკლესიის ავტოკეფალიისა ურყევია ისევე, როგორც თვით მართლმადიდებლობა“ და რომ საქართველოს ეკლესიის ავტოკეფალურ უფლებებში განახლებისათვის წამოწყებული ბრძოლის გაიგივება პოლიტიკურ-სამოქალაქო მოტივებთან სინამდვილეს არ შეესაბამება – ასეთი გაიგივება ცილისწამებაა, რაიც არავის, მეტადრე მღვდელს, არ ეკადრება: ეს მას „არც ამქვეყნად და არც მომავალ ცხოვრებაში არ ეპატიება“.

საქართველოს ეკლესიის ავტოკეფალურ უფლებებში განახლება-აღორძინების მოწინააღმდეგეთა გამოსვლები მღვდელმა კალისტრატე ცინცაძემ უფრო ღრმად და მეცნიერულად განიხილა ზემოთ მითითებულ, 1906 წელს გამოცემულ წიგნში, რომლის სათაური ქართულად ასე უღერს: „ისტორიული ცნობა საქართველოს ეკლესიის ავტოკეფალიის შესახებ“<sup>16</sup>. თამამად შეგვიძლია ვთქვათ, რომ ეს ნაშრომი ამ თემაზე არსებულ გამოკვლევებს შორის ყველაზე ფასეულია. იგი ერთგვარად აჯამებს ქართულ ისტორიოგრაფიაში ამ საკითხზე განეულ შრომას; ითვალისწინებს ღვანლმოსილი მკვლევრების: მარი ბროსეს, ა. ხახანაშვილის, ა. ცაგარელის, ნ. მარის, თ. ჟორდანიასა და სხვათა მეცნიერულ მონაპოვრებს, მეტ დამაჯერებლობას ჰმატებს მათ. ამ გამოკვლევით მეცნიერმა ამავე საკითხზე ადრე წამოყენებული არგუმენტები გაამყარა. მან ანტიოქიელი მწერლებისა და ისტორიკოსების: ბერი ეფრემის (XI ს.), მღვდელმონაზონ ნიკონ დივნოგორეცელის (XI ს.), ცნობილი კანონისტის – პატრიარქ ბალსამონის (XII ს.), პატრიარქ მაკარისა (XVII ს.) და არაბი მღვდლის მიხეილ ბრეკის (XVIII ს.) ცნობების გათვალისწინებით, განსაკუთრებით კი ე. წ. „ანტიოქიურ ქრონოგრაფზე“ – ანტიოქიური საისტორიო მწერლობის ამ უძველეს ძეგლზე – დამყარებული ცნობების მიხედვით აღადგინა პატრიარქ თეოფილაქტესა (VIII ს.) და პატრიარქ პეტრე III-ს (XI ს.) მიერ მოწვეული ადგილობრივი საეკლესიო კრებების დადგენილე-

ბანი საქართველოს ეკლესიის ავტოკეფალიის შესახებ. მართალია, ამ კრებათა აქტებს დოკუმენტურად ჩვენამდე არ მოუღწევია, მაგრამ შემდგომდროინდელ მემორიეთა პირველწყაროებზე დაფუძნებული ცნობები გვაძლევს სრულ უფლებას ჭეშმარიტებად მივიჩნიოთ შემდეგი: „VIII საუკუნეში პატრიარქ თეოფილაქტეს მიერ მონვეული საეკლესიო კრების ძალით ქართველებმა ანტიოქიის საპატრიარქო ტახტისაგან მიიღეს ავტოკეფალია არა სრული დამოუკიდებლობის თვალსაზრისით, არამედ მხოლოდ იმ უფლებით, რომ ადგილობრივ კრებაზე თანამემამულე ეპისკოპოსთაგან ამოერჩიათ და ეკურთხებინათ კათალიკოსი. ამასთანავე ეს ავტოკეფალია მათ აუცილებელ პირობათა გამო ებოძათ: აგარიანებმა გადაკეტეს გზა და თავისუფლად არვის ატარებდნენ მასზე“ (გვ. 8), რასაც ხსენებული პატრიარქის მიერ ქართველთადმი ბოძებული პროტრეპტიკონი ანუ „უფლებათა გაფართოება“ მოჰყვა. მეორემ, ანალოგიურმა კრებამ, პატრიარქ პეტრე მესამის თაოსობით შემდგარმა 1053 წელს, მოაგვარა საქართველოში რწმუნებულ ანტიოქიელ ილუმენსა და კათალიკოს-პატრიარქ მელქისედეკ პირველს შორის გამწვავებული ურთიერთობა: კრებამ მოისმინა ანტიოქიელი პატრიარქის მიერ მცხეთას საგანგებო დავალებით წარგზავნილი ეგზარქოსის ვასილი გრამატიკოსის მოხსენება, რომ ივერიის მამათმთავარმა თავი კათალიკოს-პატრიარქად აღიარა; გაერთიანებულსა და დამოუკიდებელ საქართველოს სამეფოს მართლაც შეჰფერის მწყემსმთავრობდეს პატრიარქი და რომ, წინააღმდეგ ილუმენისეული ბრალდებისა, ივერიელი კათალიკოს-პატრიარქი არანაირი წვალეებისაკენ არ მიქცეულა (ქართველებს მონოფიზიტობისადმი, ე. წ. „აკაკის სწავლებისადმი“ მიდრეკილება ბრალდებოდათ). წმ. გიორგი მთაწმიდლის მიერ კრებაზე წარმოთქმული სიტყვის შემდეგ უფრო ნათელი გახდა, რომ საეკლესიო-კანონიკური თვალსაზრისით საქართველოს ეკლესია არ უნდა ექვემდებარებოდეს რომელიმე სხვა ეკლესიას, იგი ღირსია „სამოციქულოს“ პატივისა და სრული ავტოკეფალიისა (გვ. 90-95)<sup>17</sup>.

ავტორმა ნაშრომის მნიშვნელოვანი ნაწილი დაუთმო საქართველოს ეკლესიის ავტოკეფალიის საკითხს XV-XVIII საუ-

კუნეებში. საეკლესიო გუჯარების, ქართველ და უცხოელ ისტორიკოსების, საქართველოში გარკვეული მისიით ჩამოსული უცხოელი პატრიარქთა ლიტერატურული მემკვიდრეობის გაანალიზებით მან მეტი საბუთი შემატა საქართველოს ეკლესიის სრული ავტოკეფალიის იმხანად სადავოდ გახდილ საკითხს და მით ნათელყო, რომ XV-XVIII სს-ში საქართველოს სტუმრებული აღმოსავლეთის საეკლესიო იერარქები: იერუსალიმის პატრიარქი თეოფანე II (1427-1442), პატრიარქები კონსტანტინეპოლისა: თეოლიპტე (XVI ს.) და ტიმოთე (XVII ს.), ანტიოქიის პატრიარქები: მაკარი და ნეოფიტე (XVII ს.), იერუსალიმის პატრიარქები: დოსითეოზი და პაისი (XVII ს.) და სხვანი ოფიციალური გამოსვლებით, რაც მათსავე „მოგონებებმა“ შემოგვინახა, ადასტურებდნენ საქართველოს ეკლესიის სრულ ავტოკეფალიას – მათგან არც ერთს ეჭვი არ შეუტანია ამ ფაქტის მართებულობაში. აღსანიშნავია, რომ ეს პატრიარქები, მუსლიმანთაგან შევიწროებულნი, ჩვენში უმთავრესად დახმარების სათხოვნელად და შეწირულებათა შესაგროვებლად ჩამოდიოდნენ და მადლიერნი ბრუნდებოდნენ უკან (იხ. გვ. 22-24 და 57). თქმულით ცხადდება, თუ რამდენად ყოფილა აღორძინებული საქართველოს ეკლესია იმხანად (XVI-XVIII სს.).

კათალიკოსობისას დაწერილ წიგნში (ხელნაწერი) „შენიშვნები საქართველოს ეკლესიის ისტორიიდან“ კალისტრატე ცინცაძე დაუბრუნდა ამავე ავტოკეფალიის საკითხს გვიანი ფეოდალური ხანის საქართველოში და აღნიშნა: „აღორძინების ხანაში (XVII-XVIII სს.) ის (საქართველოს მართლმადიდებელი ეკლესია, ნ.პ.) კვლავ გაიმართა წელში და წარმოშვა ისეთი მოღვაწეები, – მისიონერები, რომლებიც საქართველოს გარეთაც ავრცელებდნენ თავის გავლენას: იოანე მანგლელი, რომანოზი და იოანე წილკნელები, გაიოზ მთავარეპისკოპოზი (†1821, მოზდოკსა, სარატოვსა, პენზასა და ასტრახანსაც მოღვაწეობდა), ამბროსი ნეკრესელი (†1808) და თვით ანტონ I კათალიკოზი, რომელთა მოღვაწეობით ჩვენი ეკლესიის მართლმადიდებლობა იმდენად ბრწყინვალედ სჩანდა, რომ ცნობილი ფილარეტი – მოსკოვის მიტროპოლიტი (†1867) – რუსეთის ეკლესიის მართლმადიდებლობას სა-

ქართველოს ეკლესიის მართლმადიდებლობაზე მითითებით ამონიშნება“. მეორე ციტატა იმავე „შენიშვნებიდან“: „სხვა საპატრიარქოებთან ერთად საქართველოს ეკლესიის დამოუკიდებლობას ცნობდა რუსეთის ეკლესიაც და საქმეს იჭერდა მასთან, როგორც სწორუფლებიანთან: დიდი საკითხის გადაწყვეტის დროს იწვევდა მის წარმომადგენელს. მაგ., ნიკონ პატრიარქის გასამართლებისას (1666/7 წ.) მიწვეული იყო მოსკოვის კრებაზე მთავარეპისკოპოზი იოსებ სააკაძე“ (ცინცაძე 122).

კათალიკოსი კალისტრატე ილია ჭავჭავაძის თანამოსაგრე იყო. იგი სიყრმიტგანვე „ზეკაცად“ მიიჩნეოდა საქართველოს უგვირგვინო მეფეს, ერიდებოდა კიდეც ღირს მამულიშვილთან პირად შეხვედრას: აზრი არ შემეცვალოსო მისდამი. მაგრამ ცხოვრებამ მაინც რამდენიმეჯერ შეახვედრა ისინი ერთმანეთს და მოგონებანი ილიაზედ მოძღვრის სულს ნათლად აღებეჭდა. სახელოვანი ერისკაცი განუხრელად მხარს უბამდა სამღვდელოების კეთილ შემართებას. მამა კალისტრატესთან მას არაერთხელ უმსჯელია ივერიის ეკლესიის წარსულსა და მომავალზე. 1906 წელს, სანამ ილია ჭავჭავაძე პეტერბურგს გაემგზავრებოდა სახელმწიფო სათათბიროში მონაწილეობის მისაღებად, მან, საქართველოს წარმომადგენელმა, საგანგებოდ ინახულა დეკანოზი კ. ცინცაძე, რომელმაც ივერიის ეკლესიის გარდასულ დღეთა შესახებ მეცნიერულად დამუშავებული მასალები მიაწოდა იმ მიზნით, რომ რუსეთის მთავრობისა და უწმიდესი სინოდის წინაშე კვლავ წამოეყენებინათ საკითხი ავტოკეფალიის თაობაზე<sup>18</sup>.

1917 წლის მარტში, როდესაც საქართველოს ოცნებამ ფრთა შეისხა და ამ ქვეყნის მართლმადიდებელმა ეკლესიამ დამოუკიდებლობა აღიდგინა, დეკანოზი კ. ცინცაძე საკათალიკოსო საბჭოში ადმინისტრაციული განყოფილების გამგედ აირჩიეს. ამ დღიდან იგი განუხრელად იღვწოდა მშობლიური ეკლესიის სახელის განმტკიცებისათვის საერთაშორისო სარბიელზე.

დეკანოზი კალისტრატე იყო წევრი იმ დელეგაციისა, რომელიც სრულიად საქართველოს საკათალიკოსომ რუსეთს წარგზავნა დროებითი მთავრობის წინაშე, რათა ამ უკანას-

კნელს ეცნო საქართველოს ეკლესიის ავტოკეფალური უფლებები. კერენსკის მთავრობამ სცნო ეს კანონიერი უფლებები, მაგრამ უწმიდესი სინოდი მტრულად შეხვდა საქართველოს ეკლესიის დამოუკიდებლობის აქტს და უარყო კეთილმეზობლური ურთიერთობა ამ ეკლესიასთან (რომელიც მას აღნიშნულმა მისიამ შესთავაზა). მეტიც: სინოდმა საქართველოს მართლმადიდებელი იერარქია მადლმოხსნილად გამოაცხადა და მორწმუნეებს ოფიციალურად მოუწოდა: არ მიენვიათ ქართველი სასულიერო პირები არავითარ მღვდელმსახურებაში, არ მიეღოთ მათგან ლოცვა-კურთხევა, არ შესულიყვნენ ქართულ ეკლესიებში, თორემ „უსათუოდ მოხვდებოდნენ ჯოჯოხეთში“. ნაეგზარქოსალმა პლატონმა, რომელიც თუმცა დიდად აფასებდა ქართულ კულტურას, მოსკოვის საეკლესიო კრებაზე (1917-1918 წლების მიჯნა) განაცხადა, ქართველები გადაუდგნენო მართლმადიდებლობას<sup>19</sup>. ამავე აზრს ავითარებდნენ აღნიშნული კრების მიერ სრულიად რუსეთის პატრიარქად არჩეული და აღსაყდრებული უწმინდესი ტიხონი და სასულიერო უწყებათა დიდი ნაწილი. ისინი აცვლებდნენ ხმებს, რომლის თანახმად „ქართველმა ავტოკეფალისტებმა“ კურსი დასავლეთ ევროპული კათოლიკობისა და პროტესტანტობისაკენ აიღეს. ამის ნიშანიაო, – ირწმუნებოდნენ ისინი, – შემდეგი ფაქტები: ქართველ ინტელიგენციას ტაძრებში საორღანო მუსიკის შემოღება სწადია; მოსკოვისაგან განდგომით დაძაბუნებული ქართული ეკლესია ქედს იხრის ვატიკანის წინაშე, ე. ი. კათოლიკდება. მათი თქმით, ქართველები შოვინიზმმა და ქსენოფობიამ, კერძოდ კი, ანტირუსულმა ისტერიამ შეიპყრო. აფხაზეთის კომისარიატის მიერ გამოცემული დეკრეტით რუსეთის ეკლესიის ქონება ქართველებს გადაეცათ, ხოლო მისი ყოვლადუსამღვდელესობა, სოხუმის ყოფილი ეპისკოპოსი სერგი, იძულებით ნოვოროსისკში ცხოვრობს, მას სამღვდელმსახურო სამოსელიც არ გააჩნია, თუმცა ასეთი სამოსელი უხვადაა სოხუმის საკათედრო ტაძარშიო და სხვა. ამ შინაარსის ბრალდებათა ავტორები, ასევე, მიუთითებდნენ „კონსტანტინოპოლისა“ და „ანტიოქიის“ „პატრიარქების“ უთარილო და უნომრო „ეპისტოლებზე“, უფრო სწორად: „საპასუხო წერილებ-



ზე“ ქართველებისადმი, კერძოდ, იმ ეპოსტოლეებისადმი, კ-პ კირიონ საძაგლიშვილმა თავისი ინტრონიზაციის (აღსაყდრების) შემდეგ, ე. ი. 1917 წლის ოქტომბერში რომ გაუგზავნა აღნიშნულ პატრიარქებს; აცნობა საქართველოს მართლმადიდებელი ეკლესიის ავტოკეფალიის განახლება და სთხოვა მათ თანადგომა და თანალოცვა. საქართველოს საპატრიარქოს სათანადო პასუხები არ მიუღია. ამიტომ პირველ რიგში პასუხს მოითხოვდა კითხვა: საიდან და რა გზით მოხვდა ეს წერილები რუსეთში და იყო თუ არა ისინი რეალური ანუ ავთენტური?

ხსენებული „პასუხები“ აზრობრივად მთლიანად შეესაბამებოდა სრულიად რუსეთის უწმიდესი სინოდისა და პატრიარქ ტიხონის ეპისტოლეებს ქართველი სასულიერო პირებისა და მორწმუნე მართლმადიდებელი ერისადმი. ვგულისხმობთ იმ ბრალდებების ზუსტად განმეორებას, რასაც რუსი იერარქები ქართველ თანამორწმუნეებს უყენებდნენ და რაზეც უკვე ვთქვით. ამასთანავე: ფაქტი, რომ აღმოსავლეთის ხსენებულ პატრიარქებს დასახელებულ დოკუმენტებზე, მხოლოდ რუსული ვარიანტებით გავრცელებულებზე, არც ხელი ჰქონდათ მოწერილი, არც თარიღი ჰქონდათ დასმული და არც ნომერი ჰქონდათ მიცემული, ამ დოკუმენტების ავთენტურობას საეჭვოს ხდიდა. მაგრამ უმჯობესია, ჯერ გავეცნოთ მათ შინაარსს, რომელთა ძირითადი ნაწილი ქართულად ასე ითარგმნება:

„[...] საქართველოს თვითთავად ეკლესიას მე არ ვცნობ და არც შემიძლია ვცნობდე, რადგან 100 წელზე მეტია, რაც მართლმადიდებელი ქართველები იმყოფებით რუსეთის ეკლესიის მმართველობის ქვეშ, – აცხადებდა „კონსტანტინოპოლის პატრიარქი“, – [...] თქვენი ავტოკეფალია შესაძლებელია მხოლოდ რუსეთის ეკლესიასთან შეთანხმებით [...] მამაშვილურად გირჩევთ, მოუსმინოთ თქვენს მწყემსს (იგულისხმება: რუსეთის პატრიარქს, ნ.პ.)“.

„უგუნურო ქართველებო! – ბრძანებდა „პატრიარქი ანტიოქიისა და სრულიად აღმოსავლეთისა გრიგორი IV“, – დაგავიწყდათ, რამდენ წელს ტკბებოდით მყუდროებით, სიწყნარითა და სიმშვიდით რუსეთის მართლმადიდებელი სამეფო

ტახტის საფარველსა ქვეშე? თქვენ არასდროს ყოფილხართ ავტოკეფალური. თქვენს შორის ყოველთვის იყო ურთიერთმიძულვარება და შფოთი, რომელთა აღზოცვა გვიხდებოდა ჩვენ, თქვენდა სასიკეთოდ გარჯილთ. მაგრამ, ოდეს დავსუსტდით და აღარ ძალგვიძდა ხელი მოგვემართა თქვენთვის, მაშინ მწყემსთა მწყემსმა აღამალლა სანთელი ჩრდილოისა, – ახალი მფარველი ყველა მართლმადიდებლისათვის, მათ შორის თქვენთვისაც. და, აი, ახლა, როდესაც ეს სახელმწიფო დასნეულდა, უმადური შვილების მსგავსად ხელი აღმართეთ რუსეთის ეკლესიაზე. როგორ იფიქრეთ, თანაგიგრძნობდით და ვიქნებოდით თანამზრახველნი თქვენმიერი უკანონო ალტყინებისა? გირჩევთ, გონს მოდით და სინანულით მიმართეთ თქვენს უწმიდეს მამას – სრულიად რუსეთის პატრიარქ კირ ტიხონს, ქრისტეს მიერ ჩვენ საყვარელ ძმასა და თანამლოცველს.“

აქვე იმასაც აღვნიშნავთ, რომ საქართველოს მართლმადიდებელი ეკლესიის მესაჭეთა ყურამდე თითქმის ყოველდღე აღწევდა ცნობები, თუ როგორ ავრცელებდნენ რუსი იერარქები ანალოგიური შინაარსის ხმებსა და შეტყობინებებს საზღვარგარეთ, რითაც ისინი მოუწოდებდნენ და აფრთხილებდნენ მსოფლიოს საპატრიარქოებს, არ დაემყარებინათ კავშირი საქართველოს საკათალიკოსოსთან, სანამ იგი არ უარყოფდა თავის „სეპარატისტულ“, „არაკანონიერ“ მიზნებსა და ისევ არ დაემორჩილებოდა რუსეთის სინოდს.

ცილისმწამებლური ეპისტოლეების სიტყვისგება თავს იდო დეკანოზმა კ. ცინცაძემ. სწორედ მას მიანდო საკათალიკოსო საბჭომ, რომ კათალიკოს-პატრიარქ ლეონიდეს სახელითა და მისმიერი მიზანდასახულებისამებრ დაენერა ვრცელი საპასუხო წერილი რუსეთის პატრიარქისადმი. მან ეს დავალება პირნათლად შეასრულა: მის მიერ კათალიკოს-პატრიარქ ლეონიდეს სახელით შედგენილი და 1919 წლის 5 აგვისტოთი დათარიღებული ეპისტოლე, რომელიც მდიდარ ფაქტობრივ მასალასა და კანონიკურად მყარ ახსნა-განმარტებებს მოიცავდა, მოსკოვში გაიგზავნა; გამოქვეყნდა წიგნადაც: *Послание Святейшего Леониды, Католикоса-Патриарха всея Грузии, к Святейшему Тихону, Патриарху Московскому и*

всей России, Тифлис, 1920<sup>20</sup>. მანვე გამოაქვეყნა სტატია („კ. გეორგიევსკის“ ფსევდონიმით), რითაც ნილაბი ჩამოეხსნა კონსტანტინოპოლისა და ანტიოქიის პატრიარქების სახელე-  
ბით გავრცელებულ ეპისტოლეებს: К. Георгиевский, По поводу архипастырского подлога, газ. «Грузия», 1921, 1. II, №5.

წერილი სრულიად რუსეთის პატრიარქ ტიხონისადმი (გაგზავნილი 1919 წლის 5 აგვისტოს) ადრესატის (ტიხონის) 1917 წლის 29 დეკემბრით დათარიღებულ ეპისტოლეს ეხებო-  
და და იმ ბრალდებათა გაბათილებას ისახავდა მიზნად, რი-  
თაც რუსი იერარქები საქართველოს ეკლესიას ესხმოდნენ  
თავს. წერილში დადასტურებული იყო, რომ რუსეთის სასუ-  
ლიერო მთავრობამ, საერო ხელისუფლების ინიციატივით,  
თანდგომითა და უშუალო ქმედებით, 1811 წელს დაარღვია  
მსოფლიო საეკლესიო კრებათა დადგენილებანი და ჩაიდინა  
არაკანონიერი აქტი: ეკლესიის საქმეებში გენერალ ტორმასო-  
ვის ადმინისტრაციული ჩარევის შედეგად მან საქართველოს  
უხუცესი ეკლესია ძალდატანებით შეიერთა, რასაც ქართველ-  
თა მხრიდან იმთავიდანვე პროტესტი მოჰყვა. საქართველოს  
ეკლესიის ისტორიკოსმა, თვით რუსულ წყაროებზევე დაყ-  
რდნობით (მაგალითად, პოლკოვნიკ პუზირევსკის წერილი გე-  
ნერალ-ლეიტენანტ ველიამინისადმი და სხვა), ცხადყო სახე-  
ლები იმ მამულიშვილებისა, რომლებიც შეენივნენ მშობლიუ-  
რი ეკლესიის დამოუკიდებლობის მოსპობას: მიტროპოლიტე-  
ბი დოსითეოზ ქუთათელი და ექვთიმე გაენათელი.

ეპისტოლე პატრიარქ ტიხონს არის სერიოზული გამოკ-  
ვლევა, სამეცნიერო ტრაქტატი, რითაც ერთხელ კიდევ გაესვა  
ხაზი, რომ საქართველოს ეკლესიის ავტოკეფალიის გაუქმება  
ამ ეკლესიის ნების გარეშე მოხდა. ეს აქტი განხორციელებულ  
იქნა რუსეთის სამოქალაქო მთავრობის მიერ, რაც საეკლესიო  
სამართლით (მოც. კან. 30, IV მსოფლ. კრ. 12 და VII მსოფლ. კრ.  
3) შეუწყნარებელია (იხ. გვ. 8-9), რადგან საერო ხელისუფლე-  
ბა არაა უფლებამოსილი ჩაერიოს ეკლესიის შინაურ საქმეებ-  
ში. ავტოკეფალიურ ეკლესიას იმ შემთხვევაში შეუძლია შეი-  
ერთოს მეორე ავტოკეფალური ეკლესია, თუ უკანასკნელს  
ასე სურს და ამ სურვილს ოფიციალურად დაადასტურებს ად-  
გილობრივი საეკლესიო კრება და, ამასთანავე, მართლმადი-

დებელ პატრიარქთა კრებული. ვინაიდან რუსეთის ხელისუფლებამ იმხანად ყველა აღნიშნული პირობა დაარღვია, დოგმატურ-კანონიკური საზრისით საქართველოს ეკლესია კვლავაც ავტოკეფალურად ითვლებოდა. სრულიად საქართველოს საკათოლიკოსო საბჭომ ამიტომაც არ მიიჩნია მართებულად, აღმოსავლეთის პატრიარქებისათვის მიემართა თხოვნით, რათა გაემართათ მსჯელობა სამოქალაქო-ადმინისტრაციული წესით წართმეული საქართველოს საპატრიარქო უფლების აღდგენა-არაღდგენის, ცნობა-არცნობის თაობაზე. ეს უფლება ანუ, სხვანაირად რომ ვთქვათ, საქართველოს საპატრიარქოს ავტოკეფალიის დე-ფაქტო და დე-იურე, ე. ი. ფაქტობრივად და იურიდიულად არსებობა განა თავად მრავალსაუკუნოვანმა ტრადიციამ არ განამტკიცა?!

ზემოთ აღნიშნული სტატიის მეშვეობით ყველასათვის ნათელი გახდა, რომ საქართველოს ეკლესიის შესახებ რუსი იერარქების ის წერილები, რომლებიც ძირითადად „ცერკოვნიე ვედომოსტის“ ფურცლებზე იბეჭდებოდა, მტკნარ სიცრუეს შეიცავდა. ავტორის („კ. გეორგიევსკის“ ანუ იგივე კ. ცინცაძის) მიერ მოხმობილი რიგი ფაქტებისა ამხილებდა აღმოსავლეთის პატრიარქთა „პასუხების“ არალოგიკურობასა და არაადეკვატურობას. გავითვალისწინოთ, რომ განახლებული საქართველოს მართლმადიდებელი ეკლესიის იერარქიას არ მიუმართავს არავისთვის, მოგვანიჭეთ ავტოკეფალიაო, რადგან მიიჩნევდა (და მიიჩნევს), რომ ავტოკეფალია მას დიდი ხნის წინ მიენიჭა. ამიტომ ბუნებრივია, რომ საქართველოს საპატრიარქო აღნიშნული შინაარსის პასუხებს არც მოელოდა და არც მიუღია. „კ. გეორგიევსკის“ სტატიიდან ვგებულობ, რომ კონსტანტინოპოლის პატრიარქის თანამოსაყდრეს, მიტროპოლიტ დოროთეოსს, მიულოცავს კათალიკოს-პატრიარქ (ასე უწოდებია თვით) ლეონიდესათვის ევროპულ სახელმწიფოთა მიერ საქართველოს de facto დამოუკიდებლობის აღიარება; ანტიოქიის პატრიარქ გრიგორ IV-ს ჯერ კიდევ 1914 წელს რუსეთის ეკლესიის იერარქთა წინაშე განუცხადებია, რომ ის თავად და კონსტანტინოპოლის მსოფლიო პატრიარქი გერმანე V († 1919) საქართველოს ეკლესიას ავტოკეფალურად მიიჩნევენ. და, ბოლოს, თვით კონ-

სტანტინოპოლის პატრიარქის თანამოსაყდრეს უთქვამს გ. გოგოლაშვილისათვის – საქართველოს გენერალური კონსულისათვის თურქეთში, რომ კონსტანტინოპოლის პატრიარქის „პასუხი“ ყალბი ანუ ნატყუარია. ყალბი და ნატყუარია (დიდი ალბათობით) აგრეთვე ანტიოქიის პატრიარქის „პასუხიც“ და, მაშასადამე, ისიც შეთხზულია ვინმე „ყოვლადსამღვდელო მღვდელთმთავრის“ მიერ.

### *დევნილებასა და პატიმრობაში*

საქართველოს ძალდატანებითი გასაბჭოებისა და გაბოლშევიკების პირველივე დღიდან ანტირელიგიური და ანტიეკლესიური ლაშქრობა დაიწყო. რელიგიური ორგანიზაციები, მათ შორის საქართველოს მართლმადიდებელი ეკლესია, კანონგარეშედ გამოცხადდა (და ასე გაგრძელდა რამდენიმე თვის განმავლობაში). ახალმა ადმინისტრაციამ სასულიერო პირებს სამოღვაწეო ასპარეზი მკაცრად შეუზღუდა და სამრევლოებს (ეკლესიებს) ყოველგვარი კერძო საკუთრება ჩამოართვა. ამ რეჟიმისა და ადმინისტრაციისათვის განსაკუთრებით მიუღებელი აღმოჩნდნენ განათლებული და მორწმუნე ერში მაღალი ავტორიტეტის მქონე პირები, – მოძღვრები, რომელთა შორის დეკანოზი კალისტრატე ცინცაძე ერთ-ერთ პირველ ადგილზე იდგა.

ყველაზე დიდი განსაცდელი ივერიის სამოციქულო ეკლესიას 1923 წელს დაუდგა: საგანგებო კომისიამ (ჩეკამ) იმა წლის იანვარს დააპატიმრა უწმიდესი და უნეტარესი სრულიად საქართველოს კათალიკოს-პატრიარქი ამბროსი (ბესარიონ ხელაია) და მასთან ერთად საკათალიკოსო საბჭოს ყველა ადგილობრივი წევრი: დეკ. კ. ცინცაძე, დეკ. ი. მირიანაშვილი, ნ. თავდგირიძე, (მოგვიანებით) დეკ. მ. ტყემალაძე და ნ. არჯევანიძე. ამავე წელს სამართალში მისცეს ქუთათელ-გაენათელი მიტროპოლიტი ნაზარი (ლექსავა), სვეტიცხოვლის არქიმანდრიტი პავლე (ჯაფარიძე), დეკ. დ. ლაზარიშვილი, დეკ. ა. თოთიბაძე და ბევრი თვალსაჩინო საეკლესიო და საზოგადო მოღვაწე.

**შენიშვნა:** *საკათალიკოსო საბჭო, ანუ მუდმივი კრება, კათა-*

ლიკოს-პატრიარქის მამათმთავრობით აერთიანებდა ყველა მმართველ მღვდელმთავარს, სხვადასხვა წოდების სასულიერო პირებს და ერისკაცებს. მას ირჩევდა სრულიად საქართველოს საეკლესიო კრება როგორც დელეგატებისაგან, ისე არადელეგატებისაგან. იგი პასუხისმგებელი იყო პერიოდული კრების წინაშე (იხ. საქართველოს ეკლესიის მართვა-გამგეობა, თბ. 1920, გვ. 8-9). ადგილობრივ წევრებად იწოდებოდნენ ადგილზე (საკათალიკოსო საბჭოს ცენტრალურ ორგანოში) სისტემატურად მომუშავენი. აღნიშნულმა საბჭომ 1927 წლამდე იარსება.

საკათალიკოსო საბჭოს უმთავრეს ბრალდებად წაუყენეს შედგენა მემორანდუმისა, რომელიც სრულიად საქართველოს კათალიკოს-პატრიარქის, ამბროსის, ხელმოწერით 1922 წლის 7 თებერვალს გაეგზავნა გენუის კონფერენციას<sup>21</sup>. როგორც გამოძიებამ ცხადყო, მოწოდება საზღვარგარეთ გაიტანა დეკ. იასონ კაპანაძემ. იმავე წლის მარტში იგი (მემორანდუმი) მოთავსებულ იქნა გენუის გაზეთ „კაფარაში“, ხოლო აპრილში, ვით დასაგმობი, გამოაქვეყნა საბჭოთა პრესამ. ამ გზავნილებით „მდაბალი ამბროსი, სულიერი მწყემსი და პატრიარქი სრულიად საქართველოსი“, გმობდა საქართველოს სახელმწიფოებრიობის წინაშე ჩადენილ დანაშაულს და ამცნობდა „კულტურულ კაცობრიობას“ ამ ქვეყანაში აღბორგებული ანტირელიგიურ ფსიქოზის ფაქტს. მწყემსმთავრის თქმით, ქართველ ხალხს „უბღალავენ წმიდათაწმიდას – სარწმუნოებრივ გრძნობას და, სინიდისის თავისუფლების დროშის ქვეშ, ნებას არ აძლევენ თავისუფლად დაიკმაყოფილონ რელიგიური მოთხოვნილება: მისი სამღვდელოება უკიდურესად დევნილია, მისი ეკლესია – ეს ძველისძველი ფაქტორი საქართველოს ეროვნულ-სახელმწიფოებრივი აღმავლობისა და ძლიერებისა – დღეს უფლებააყრილია იმდენად, რომ ნებაც არა აქვს თავისი შრომით, გარჯით და უნარით მოიპოვოს მუდმივი სარჩო არსებობისა. ერი კვნესის, ერი გმინავს, მაგრამ საშუალება არა აქვს ხმის ამალღებისა. ამ პირობებში ჩემს მწყემსმთავრულ მოვალეობად ვრაცხ, კულტურულ კაცობრიობის გასაგონად ვთქვა: მე, როგორც ეკლესიის წარმომადგენელი, არ შევდივარ პოლიტიკურ ცხოვრების რეგლამენტაციაში, მაგრამ არ შემიძლია არ ვისურვო ჩემი ერისათვის ისეთი წყო-

ბილება, რომელიც შედარებით უფრო შეუწყობს ხელს მის ფიზიკურ აღორძინებას და კულტურულ განვითარებას. ამიტომ ვითხოვ: 1) დაუყონებლივ გაყვანილ იქმნეს საქართველოს საზღვრებიდან რუსეთის საოკუპაციო ჯარი და უზრუნველყოფილ იქმნეს მისი მინა-წყალი უცხოელთა თარეშისაგან. 2) საშუალება მიეცეს ქართველ ერს თვითონ, სხვათა ძალდაუტანებლივ და უკარნახოთ, მოაწყოს თავისი თავი ისე, როგორც ეს მას უნდა, შეიმუშაოს ისეთი ფორმები სოციალ-პოლიტიკური ცხოვრებისა, როგორც მის ფსიხიკას, სულისკვეთებას, ზნე-ჩვეულებებსა და ეროვნულ კულტურას შეესაბამება“. ავტორი იქვე გამოთქვამდა იმედს, რომ „ღრმადპატივცემული კონფერენცია, რომელსაც მიზნად დაუსახავს გაარკვიოს უდიდესი პრობლემები კაცობრიობის ცხოვრებისა და დაამყაროს ქვეყანაზე სამართლიანობა და თავისუფლება, არ უგულებელყოფს პატარა საქართველოს ელემენტარულ მოთხოვნას [...] და დაიხსნის მას ძალმომრეობისა და სამარცხვინო მონობის კლანჭებიდან“.

გარდა აღნიშნულისა, საკათოლიკოსო საბჭოს ბრალად დასდეს ურჩობა მთავრობისადმი, რომელიც მოითხოვდა მისგან, თავისი რომელიმე წარმომადგენელი გაეგზავნა საგანგებო კომისიაში, რომელიც უნდა დასწრებოდა თბილისის სამხედრო-საკრებულო ტაძრის (დღევანდელი პარლამენტის ტერიტორიაზე მდგომის და ძვირფასი არქიტექტურული ნაგებობის) არარელიგიური მიზნით გადაკეთებას. საკათალიკოსო საბჭოს პასუხი, რომელიც უდავოდ (სტილის და ხელნერის თანახმად) დეკ. კ. ცინცაძის შედგენილია, ასეთი იყო: „ეკლესიის მმართველი ორგანი, ზნეობრივი მოსაზრების გამო, ვერ გაგზავნის რწმუნებულს იქ, სადაც ილახება მისი სინდისი. ხოლო ტაძრის წინამძღვარს, თუკი მორალი მისცემს უფლებას, შეუძლია დაესწროს წმიდათაწმიდა ტრაპეზის მოშლისა და დარღვევის ფაქტს“.

საბჭო დაადანაშაულეს აგრეთვე საპატრიარქო ტაძრების საგანძურის გადამალვაში: 1921 წლის 24 თებერვალს, საერთო უწესრიგობის მოლოდინისას, კათალიკოს-პატრიარქ ლეონიდეს ბრძანებითა და არქიმანდრიტ პავლეს (ჯაფარიძის) მიერ უსაფრთხოებისათვის ქუთაისის გადაინახეს სიონი-

სა და სვეტიცხოვლის საეკლესიო ძვირფასეულობა, რაც შემდეგაც, ანტირელიგიური კამპანიის შიშით, არ აცნობეს საბჭოთა მთავრობას.

თქმულის საფუძველზე საქართველოს სსრ უზენაესმა სასამართლომ 1924 წლის 10, 11, 12, 13, 14, 15, 16, 17, 18, 19 მარტის საჯარო სხდომებზე (თავმჯდომარე: გ. ჩხეიძე; წევრნი: გ. რთველაძე, ვ. წივნივაძე; ბრალმდებელნი: ნ. მაჭავარიანი, ნ. ოკუჯავა) განიკითხა ხსენებული მამანი. სასამართლო პროცესს ყოველდღიურად ამუშებდა პრესა: გაზეთები „კომუნისტი“, „მუშა“, „პრავდა გრუზი“ და სხვა (იხ. ჩამოთვლილ დღეთა შესაბამისი ნომრები). თხზავდნენ და აქვეყნებდნენ გამკილავ ლექსებსა და პამფლეტებს. გაზეთებში მღვდელმსახურთა კარიკატურებს ათავსებდნენ. რევოლუციონერი მუშები „ბნელეთის მოციქულთა“, „მოღალატეთა“, „ხალხის მტერთა“ და „კონტრრევოლუციონერთა“ დახვრეტას მოითხოვდნენ, ხოლო დამცველებს (ადვოკატებს): ნინიძეს, ბარათაშვილს, გუნცაძეს, დადიანსა და ქავთარაძეს „ბურჟუაზიულ ელემენტებს“, „რეაქციონერებს“ ეძახდნენ; აწყობდნენ კრებებს, დემონსტრაციებს, იდგნენ სასამართლოს წინ და ყვიროდნენ: „ძირს ამბროსი“, „ძირს ეკლესია“, „ძირს რევოლუციის შენიღბული მტრები“. გასამართლებას თვალყურს ადევნებდა ცივილიზებული მსოფლიო. შეშფოთებული იყო ქართული ინტელიგენცია...

როგორც გამოქვეყნებული აქტები გვამცნობს, სამსჯავროზე დეკ. კ. ცინცაძემ მემორანდუმის თანაავტორად თავი არ აღიარა, თუმცა სასამართლომ აღნიშნული ბრალდება მაინც არ მოუხსნა. მსაჯულთა დამი მიცემულ ჩვენებაში (ჩანაწერს მივაგენით მის პირად საარქივო ფონდში)<sup>22</sup> ბრალდებულმა აღნიშნა, რომ მონოდება გაგზავნილია მისივე მღვდელმთავრის მიერ, რომლის მოქმედებას, საეკლესიო კანონების ძალით, ის ვერ დაინუნებს და, მაშასადამე, ვერც მოიწონებს. „ამისათვის გთხოვთ, ბატონო თავმჯდომარე, – დასძინა მან, – მომცეთ ნება, არ გავცე პასუხი შეკითხვას, არ შევიდე ჩემი მამათმთავრის მოქმედების განსჯაში“. ბრალდებას, თუ კომკავშირული ორგანიზაციისათვის სამხედრო ტაძრის გადაცემის მიზნით რატომ არ გაგზავნა საკათალი-



კოსო საბჭომ წარმომადგენელი საგანგებო კომისიაში, მამა კალისტრატემ უპასუხა: „ზნეობრივ მოსაზრებების გამო! საკათალიკოსო საბჭოს არ შეეძლო ყოფილიყო, თავისი წარმომადგენლის სახით, იქ, სადაც შელახული იქნებოდა მისი სინიდისი, მისი წმიდათა წმიდა; არ შეეძლო გამხდარიყო, თავისი საკუთარი ნებით, მონმედ იმ წმიდა ტრაპეზის მოშლადანგრევისა, რომელსაც ის მოკრძალებით სცემდა თავყვანს. ეს შეუძლებლობა მით უფრო გამართლებული იყო, რომ ის სავსებით გამომდინარეობდა ჩვენი რესპუბლიკის მთავრობის 1921 წლის №12 დეკრეტისაგან, რომლის მეოთხე მუხლით უზრუნველყოფილია საქართველოს მოქალაქის სინიდისის შეულახველობა. [...] დაესწრებოდა თუ არა დეკ. თოთიბაძე სამხედრო საკრებულო ტაძრის მთავრობისათვის არარელიგიური მიზნით გადაცემას (თოთიბაძე ამ ეკლესიას წინამძღვრობდა, ნ. პ.), ეს დამოკიდებული იყო თვით დეკ. თოთიბაძის სინიდისზე: ნებას მისცემდა სინიდისი – დაესწრებოდა, არ მისცემდა – არ დაესწრებოდა“. პროკურორის შეკითხვაზე, სასულიერო პირი უნდა დაემორჩილოს თუ არა მთავრობის დადგენილებას, ბრალდებულმა ასე უპასუხა: „სამღვდელოებამ, როგორც სხვა მოქალაქემაც, უეჭველად უნდა შეასრულოს მთავრობის მიერ გამოცემული კანონები, რომელნიც არ ეწინააღმდეგებიან ღვთის მცნებასა და მორწმუნეთა სინიდისს“. შეკითხვაზე: „მამ მთავრობამ რომ გამოსცეს ღვთის მცნებისა და სინიდისის, – როგორც თქვენ გესმით ეს, – საწინააღმდეგო კანონები, შეასრულებთ მას?“ იმავე ბრალდებულმა მიუგო: „არ ვიცი, როგორ მოიქცეოდნენ სხვები, მაგრამ მე კი ასე მოვიქცეოდი: მოკრძალებით და პატივისცემით მოვახსენებდი მთავრობას, თუ რატომ ვერ (და არა „არ“) ვასრულებ მის მიერ გამოცემულ კანონს და ვითხოვდი, გავეთავისუფლებინე ამ კანონის შესრულებისაგან. თუ მთავრობა შეინწყნარებდა ჩემს თხოვნას, ხომ კარგი, თუ არა და განვემზადებოდი ჯვარზედ საცემელად“.

სამსჯავროს წინარე თავი დამნაშავედ არც ერთმა განკიცხულმა არ სცნო. მართალია, კათალიკოსმა გენუის კონფერენციისათვის მემორანდუმით მიმართვას შეცდომა უწოდა (იხ. „კომუნისტი“, 1924, 21.III, №65), მაგრამ – მისივე თქმით – შექ-

მნილ პირობებში მას, ერის სულიერ მამას, არ შეეძლო სხვაგვარად მოქცეულიყო. არსებობს ზეპირი გადმოცემა, რომლის თანახმად ბრალდებულმა კათალიკოსმა საბოლოო სიტყვაში განაცხადა: „ჩემი სული ღმერთს ეკუთვნის, გული – საქართველოს, ხოლო ლემს – რაც გსურთ, ის უყავით!“<sup>23</sup>.

განაჩენში ვკითხულობთ: „ბოროტმოქმედება გათვალისწინებული სისხ. სამ. კოდ. 60 მუხლით, რაიც მოითხოვს უმაღლეს სასჯელს – სიკვდილით დასჯას – უნდა ჩაითვალოს სავსებით დამტკიცებულად. მაგრამ სასამართლომ მიიღო რა მხედველობაში ბესარიონ ზოსიმე ძე ხელაიას (იგივე კ-პ ამბროსის) და აგრეთვე საკათოლიკოსო საბჭოს სამართალში მიცემულ წევრთა, პირველი – ღრმა მოხუცებულობა, მეორე – მათ მიერ საბჭოთა ხელისუფლების გადაჭრით ცნობა, მესამე – ბრალდებულ ხელაიას მიერ თავის გენუის კონფერენციისადმი მემორანდუმით მიმართვის შეცდომად აღიარება და მეოთხე – ის გარემოება, რომ ისინი საქართველოს მშრომელთა მასებში არ სარგებლობენ არავითარი ნდობით, დაადგინა [...] ბრალდებულ ბესარიონ ზოსიმეს ძე ხელაიას (კ-პ ამბროსის, ნ. პ.) მიესაჯოს თავისუფლების აღკვეთა ცხრა წლით, სასტიკი იზოლიაციითა და ყოველი მისი ქონების კონფისკაციით. [...] კალისტრატე ცინცაძეს – სამი წლითა და ცხრა თვით სასტიკი იზოლიაციითა და მთელი ქონების კონფისკაციით“ („კომუნისტი“, 1924, 21. III, №65; „მუშა“, 1924, 12.III, №4). მსჯავრდებულნი სასჯელალსრულების სხვადასხვა ზონაში განათავსეს. შეღავათისა და მსჯავრის შემსუბუქების იმედი თითქოს გადანურული ჩანდა, მაგრამ საკავშირო მთავრობის მითითების საფუძველზე ისინი ვადაზე ადრე, 1925 წლის 8 მარტს, გაათავისუფლეს.

ჩვენ მოგვისმენია თვითმხილველთა სიტყვები, რომელთა თანახმად სასჯელისაგან გათავისუფლებულებმა სასულიერო და საერო პირებმა პირველ რიგში სიონს მიაშურეს. უცბად, სად იყო და სად არა, იქ უამრავმა ხალხმა მოიყარა თავი; კათალიკოსს, მოხუცს და სნეულს, სამღვდელმთავრო ხალიჩა გაუშალეს, სკამი მიართვეს, დაუჩოქეს. მას უთქვამს: „საქართველო ურყევი ლერწამია და ვინ თქვა, ქართველებმა რწმენა დაკარგესო?!“.

## მღვდელმთავრობის უღელი

პატრიარქს რეზიდენციის შენობა ჩამორთმეული დახვდა, კანცელარია და ბულჰალტერია გაპარტახებული. ისინი სიონის გვერდით ერთ ძველ და მოუწესრიგებელ შენობაში შეუსახლებიათ; თანამშრომელთა დიდი ნაწილი დამფრთხალა და სამსახურისათვის თავი დაუნებებია; ბევრ მღვდელს და დიაკონს უარი უთქვამს საეკლესიო სამსახურზე და ერში გადასულა, ზოგს რჯულიც უარუყვია. ამის მიუხედავად მამათმთავარი ჩვეული ენთუზიაზმით შეუდგა საქმეს. დეკ. კალისტრატე ცინცაძე მისი ერთ-ერთი ყველაზე ერთგული თანამოსაგრე და თანამსახური აღმოჩნდა, რის გამოც არაა გასაკვირი, რომ მწყემსმთავარმა ეპისკოპოსად უპირველესად ყოვლისა ის გამოარჩია, იმავე წლის 31 ოქტომბერს ხელი დაასხა და მიტროპოლიტის ტიტული უბოძა.

საქართველოს მართლმადიდებელი ეკლესიის საერთაშორისო მდგომარეობას ის გარემოება ართულებდა, რომ რუსეთის ეკლესიის ზეგავლენით არც სხვა მართლმადიდებელი ეკლესიები იყვნენ მისი სტატუსისადამი კეთილად განწყობილნი. მათ მიაჩნდათ, რომ ქართველებმა რუსეთის სახელმწიფოს „ავადმყოფობით“, ე. ი. გაკომუნისტებით ისარგებლეს. შემთხვევითობას არ უნდა მიენეროს ის ფაქტი, რომ მათ ავტოკეფალიაზე ლაპარაკი სწორედ 1905 წლის რევოლუციის დღეებიდან დაიწყესო. ისინი (ამ ბრალდების ავტორები) ივინყებდნენ, რომ რუსეთის იმპერიის მოქალაქეთაც სწორედ 1905 წელს ებოძათ მთავრობისაგან თავისუფლება აზრის გამოთქმისა. რუსეთის მართლმადიდებელი ეკლესიის წარმომადგენლებმაც ხომ მაშინ აღნიშნეს პირველად: რუსეთის ეკლესიის ზნეობრივი ავტორიტეტისათვის აუცილებელია, აღდგეს პატრიარქის ინსტიტუტი და მთავრობა არ უნდა ჩაერიოს ეკლესიის საქმეებში! (იხ. ზემოხსენებული „პოსლანიე...“ გვ. 24-25). ამასთანავე ფაქტია, რომ აღმოსავლეთის მართლმადიდებელ იერარქებს მაინც რიდი ჰქონდათ მოსკოვისა და სრულიად რუსეთის უწმინდესი სინოდისა, რომელიც სერიოზულ ეკონომიურ დახმარებას უწევდა მუსლიმურ გარემოცვაში მყოფ მართლმადიდებლებს. ამის გამო ძველთაგან თანამწირველნი

და ქრისტესმიერ ძმანი უპასუხოდ ტოვებდნენ ახლადალსაყდრებულ საქართველოს კათალიკოს-პატრიარქთა მოკითხვის ბარათებს. მათ არ მიიწვიეს საქართველოს წარმომადგენლობა 1926 წლისათვის დანიშნულ მერვე მსოფლიო საეკლესიო კრებაზე (რომელიც ვერ შედგა). მაშინ საკათალიკოსო საბჭომ თვით მიმართა ყოვლადუნმიდეს პატრიარქს ძმური ეპისტოლეთი, რომლის ტექსტი კვლავ (იმჟამად მიტროპოლიტად პატივდებულმა) კალისტრატემ დაწერა<sup>24</sup>.

ეპისტოლე ქრისტესმიერი სიყვარულით ულოცავდა მსოფლიო საპატრიარქოს უდიდეს ზეიმს და, თავის მხრივ, მწუხარებას გამოთქვამდა, რომ „უცნობ მიზეზთა გამო, იგი არ იქმნა შერაცხილ ჩინებულთა შორის, რომელნიც მოწოდებულ არიან მართლმადიდებელი ეკლესიების ქორწილსა ზედა (მათე 22, 2-3) მსოფლიო კრებაზე“. ეპისტოლე კონსტანტინოპოლის მამათმთავარს ამცნობდა საქართველოს ეკლესიის წარსულსა და მის მიძიმე აწმყოს, რომელსაც, მისი თქმით, „ადგილი არ ექნებოდა, მსოფლიო პატრიარქს (აგრეთვე დანარჩენ პატრიარქებსაც) პასუხი რომ გაეცა კათოლიკოს-პატრიარქების კირიონის, ლეონიდისა და ამბროსის მოკითხვის ბარათებზე. აღმოსავლეთის პატრიარქთა მდუმარებამ და საქართველოს უძველესი ეკლესიის მიმართ უყურადღებობამ კადნიერყო შფოთისა, მძულვარებისა და ძმათა ურთიერთზე ამხედრების მოყვარენი“. საქართველოს მწყემსმთავარი და მისი საბჭო დასძენდა: „არა გვსურს ვიფიქროთ, რომ ეს მდუმარება გამონვეულია ამა მსოფლიო მოსაზრებითა: პატარა ერის ეკლესიური ინტერესები მსხვერპლად შეენიროს დიდი ერის ეკლესიურ მეგობრობასა და კეთილგანწყობილებას. უღრმესი პატივისცემით გაცნობებთ რა ზემოაღნიშნულს მსოფლიო კრებისათვის მოსახსენებლად, სრულიად საქართველოს საკათოლიკოსო საბჭო გამოთქვამს სრულს იმედს, რომ თქვენი ყოვლადუნმიდესობა, აღძრული ეკლესიური ჭეშმარიტების ძიებით, აღადგენს, დანარჩენ მართლმადიდებელ ეკლესიათა საჭეთმპყრობლებთან ერთად, საქართველოს მართლმადიდებელ ეკლესიასთან ძველს ურთიერთობას, ესე იგი ისეთს, როგორიც სუფევდა ჩვენს შორის მეცხრამეტე საუკუნის დასაწყისამდე. ხოლო, თუ თქვენი ყოვლადუნმიდესობა დასტოვებს

ჩვენს თხოვნას უყურადღებოდ და არ შეუწყობს ხელს საქართველოს ეკლესიის საკუთარის თავითა და მის საქმეებში სხვა ეკლესიის ჩაურევნელად წინსვლას, მაშინ ჩვენი ეკლესია იძულებული იქნება, დაიცვას თავის წიაღში ქვემარტივ მართლმადიდებლობა და კანონიკური ნორმები იმ წესითა და იმ საშუალებით, რომელსაც თვით დაინახავს საჭიროდ და მიზანშეწონილად, მით უმეტეს, რომ საქართველოს რესპუბლიკაში ეკლესია გამოყოფილია სახელმწიფოსაგან და უკანასკნელი არ ერევა მის შინაურ საქმეებში. ხოლო ზნეობრივ პასუხისმგებლად მისი განცალკევებისა ის ჩათვლის აღმოსავლეთის მართლმადიდებელ ეკლესიებს, რომელთაც არ მოისურვებს კანონიკური ქვემარტივების აღიარება და უკანონო პრეტენზიების მხილება“.

### *მორწმუნეობის კულტურა და თავისუფალი მოქალაქეობა*

როდესაც კალისტრატე ცინცაძის სულიერი ცხოვრებისა და ღვაწლის ზოგად პორტრეტზე ვფიქრობთ, მრავალ სათნოებათა შორის, ჩვენს ყურადღებას განსაკუთრებით მისი მორწმუნეობის კულტურა იპყრობს. აქ, პირველ რიგში, სიყვარულის და სიკეთის უსაზღვროება, სხვაგვარად რომ ვთქვათ, – სულის და გულის ყოველთა და ყოველთათვის განფენის ნიჭი და ნებისყოფა იგულისხმება. ლაპარაკია განსხვავებული სარწმუნოების, ხედვისა და აზროვნების ადამიანთა სიყვარულზე, მათ თანადგომასა და თანალმობაზე, მათთვის ლოცვაზე და მათთან ერთად ლოცვაზე, ერთსა და იმავე დროს ლოცვაზე, თანალოცვაზე. მორწმუნეობის ამ კულტურას განაპირობებს ის, რასაც რჯულშემწყნარებლობას, გნებათ ტოლერანტობას, ვუნოდებთ. შეუძლებელია ვიფიქროთ, რომ აღნიშნული ნიჭი და კულტურა ღვთის ხატებისა და მსგავსების მფლობელი კაცის ბუნება, ანდა: ამ ბუნების ორგანული ნაწილი, პიროვნებისა თუ კოლექტივის ბუნებრივი მოთხოვნილება არ იყოს. თუმცა ფაქტია, რომ მიზეზთა და მიზეზთა გამო ეს ნიჭი ინდივიდების გულსა და გონებაში მთვლემარე და მიძინებულია. მას გამოღვიძება სჭირდება და გამოიღვიძებს კიდევ, თუკი გარემო და, პირ-

ველ რიგში, სულიერი მოძღვარი მას ასეთი გამოღვიძებისა-  
კენ უბიძგებს; თუკი მის სულს ყოველთა მიმართ სიყვარუ-  
ლისა და სხვებთან ერთად ლოცვის სათნოება დაეუფლება.  
ასეთი გამოღვიძებისა და ამ სათნოების აღორძინების მოთ-  
ხოვნილება განსაკუთრებული სიმძაფრით მაშინ იჩენს თავს,  
როდესაც სხვადასხვა ეროვნებისა და სარწმუნოების ადამიან-  
ებს შორის შური, მტრობა და სიძულვილი ჩამოვარდება.

და, აი, 1905 წელს კავკასიაში, კერძოდ კი თბილისსა და ბა-  
ქოში, ქრისტიანთა და მუსლიმთა დაპირისპირებამ იჩინა თავი.  
ბაქოში შიიტ მუსლიმებსა და სომეხ გრიგორიანებს შორის  
შეტაკება მოხდა. დაიხოცნენ ადამიანები, მათ შორის მარ-  
თლმადიდებელი რუსები და ქართველები. ამ დროს სასულიერო  
პირები – მღვდლები და მოლები – შენდობისა და მიტევე-  
ბის ინიციატივით გამოვიდნენ და სხვადასხვა სარწმუნოების  
ადამიანებს ერთმანეთისათვის ლოცვისაკენ მოუწოდეს. ასეც  
მოხდა: კავკასიის მასშტაბით ერთსა და იმავე დროს ეკლესი-  
ებსა და მეჩეთებში სხვადასხვა ტომისა და რწმენის ადამიან-  
ებმა ღმერთს შენდობა სთხოვეს და მშვიდობისათვის ილო-  
ცეს. თბილისის ქაშვეთის წინამძღვარი, მღვდელი კ. ცინცაძე  
მაღალი შეგნებით გამოეხმაურა ამ მოწოდებასა და მოძრაო-  
ბას. იმა წლის 20 თებერვალს მან ხალხმრავალ ეკლესიაში სა-  
განგებო პანაშვიდი და პარაკლისი გადაიხადა და სიტყვა წარ-  
მოთქვა (დედანი დაცულია ავტორის პირად საარქივო ფონ-  
დში)<sup>25</sup>. იგი მიესალმა სხვადასხვა აღმსარებლობის მორწმუნე-  
თა თანალოცვის ფაქტს და აუწყა დამსწრე საზოგადოებას,  
თუ რა შედეგი გამოიღო ინტერკონფესიურმა ლოცვამ. მისი  
თქმით, თანალოცვათა შემდეგ „შესწყდა მკვლელობა, ჩამო-  
ვარდა მშვიდობა, განჰქრა მძულვარება! ძმური სიყვარულით  
აღფრთოვანებული ხალხი, განურჩევლად წოდების, სარწმუ-  
ნოების და ეროვნებისა, შეკრებილა ტაძრებში და, თუ ერთ  
დღეს მართლმადიდებელნი ავედრებენ უფალს „ბაქოსა შინა  
მონყვედილ გრიგორიანთა და მუსულმანთ“, მეორე დღეს მუ-  
სულმანები და გრიგორიანები ლოცვა-კურთხევით იხსენიე-  
ბენ შესვენებულ მართლმადიდებელთა“.

ვკითხულობთ ციტირებულ სიტყვებს და იმასაც, რაც  
მათ მოსდევს, და ჩვენს თვალწინ იხატება აპოკალიპსური

სურათი მსოფლიოს ყველა ხალხისა და ტომის შერიგების და ღვთის წინაშე ერთობლივად წარდგომისა, სურათი იმ დღისა, როდესაც „გაქარწყლდება ეფრემის შური და იუდას მტრები აღარ იქნებიან; ეფრემს აღარ შეშურდება იუდასი და იუდა აღარ უმტრობს ეფრემს“ (ეს. 11,13; გამოცხ. 20,24). განა ამ დღის დადგომას არ შენატრის ქრისტეს ეკლესია? დიახ, ხალხთა ასეთი ურთიერთობა არის სახარების იდეალი (შდრ. იოანე 10,16) და ამ იდეალის სრულყოფის გზად მოძღვარ კალისტრატეს საყოველთაო ანუ, თანამედროვე ენით რომ ვთქვათ, ეკუმენური ლოცვა წარმოუდგება. ასევე ჩვენც: საქართველოში ეკუმენიზმის ერთ-ერთ მესაძირკვლედ მოძღვარი კალისტრატე ცინცაძე წარმოგვიდგება.

ღვთის ამ ჭეშმარიტ მსახურს შეგნებული ჰქონდა, რომ „ეკლესიის დამოუკიდებლობა იქმნება სრული მხოლოდ მაშინ, როცა დამოუკიდებელი გახდება თვით საქართველო“. მას სწამდა ამასთანავე და ბაგით აღიარებდა, რომ თავისუფლება, გარეშე ერის ზნეობრივად ამაღლებისა, არასრულქმნილი და მოჩვენებითია. როდესაც ის ამ თემაზე ლაპარაკობდა, ხაზს უსვამდა იმ ჭეშმარიტებას, რომლის თანახმად ადამიანის ზნეობრივი ამაღლებისა და პიროვნების მოქალაქეობრივი შეგნების დახვეწისათვის უბრალო (ლიტონი) მორწმუნეობა, გნებავთ ღრმად დარწმუნება იმაში, რომ ღმერთი არსებობს, საკმარისი არ არის. სხვანაირად რომ ვთქვათ, კაცთა მოდგმის სულიერად ამაღლებისათვის საკმარისი არ არის მშრალი ცოდნა ღვთის მიერ გამოცხადებული სიბრძნისა და ჩვენთვის ბოძებული დოგმატიკისა. ეს რომ ნამდვილად ასეა და რომ ამაში სადავო არაფერი არ არის, მეტყველებს თავად მოციქული, რომელიც მოგვმართავს: „შენ გნამს, რომ ღმერთი ერთია. კარგს შვრები. მაგრამ ეშმაკებსაც სწამთ იგი და კანკალებენ. შენ კი, ამოა ადამიანო, არ გსურს გაიგო, რომ რწმენა საქმეთა გარეშე მკვდარია?“ (იაკობი 2,19-20). ეს ნიშნავს: ეშმაკებმაც იციან, რომ ღმერთი ერთია ანუ მათაც, ეშმაკებსაც, აქვთ ადეკვატური და ზუსტი საღვთისმეტყველო ცოდნა, რის გამო თრთიან ღვთის წინაშე, მაგრამ ისინი მაინც ეშმაკებად რჩებიან და ბოროტებას სჩადიან. მამ როგორ სარწმუნოებას შეუძლია კაცთა მოდ-

გმის გაუმჯობესება? აქ უნმინდეს კალისტრატეს შემოაქვს ცნება „სალი სარწმუნოება“, რაც ნიშნავს სარწმუნოების არა თეოლოგიურსა და დოგმატურ მხარეს, არამედ პიროვნებისა თუ კოლექტივის მორწმუნეობის კულტურას. ეს აზრი წითელ ზოლად გასდევს მის სამოძღვრო პრაქტიკასა და ქადაგებათა ციკლს. ამ მხრივ საყურადღებოა მისი სიტყვა, თქმული საზოგადო და სახელმწიფო მოღვაწის, ვლადიმერ გობეჩიას, არაორდინალურ ვითარებაში გარდაცვალების გამო 1918 წელს. სწორედ აქ, ამ ქადაგებაში, არის მთავარი და არსებითი ყურადღების გამახვილება მორწმუნეობის კულტურაზე, რაც ნიშნავს, რომ გავიმეოროთ და დავაკონკრეტოთ, – პირადი რელიგიური გრძნობების სხვასთან ურთიერთობაში და საზოგადოებაში გამოვლენის წესსა და რიგს, ანუ ინდივიდის ზნეობრივ-რელიგიურ აღზრდას და ფორმირებას. აი, ეს არის „სალი სარწმუნოება“, რომელიც, ავტორის პირდაპირი და მკაფიო აღიარებით, მართლმადიდებლად ცნობილ ჩვენს საზოგადოებაში დიდი დეფიციტია. რატომ? – იმიტომ რომ, მოძღვრის მინიშნებით, ჩვენ ასეთი სარწმუნოების ანუ მორწმუნეობის ასეთი კულტურის მიმართ ყურადღებას ნაკლებად ვამახვილებთ, რამაც სავალალო შედეგებამდე მიგვიყვანა. ამ შედეგებმა თავი ქვეყნის პოლიტიკურ ყოფაშიც იჩინა: ჩამოგვშორდა აჭარა, ჩამოგვშორდა საინგილო; ჩვენს გვერდით ცხოვრება არ სურთ სხვა ეროვნებისა და სხვა სარწმუნოების წარმომადგენლებს. ამის მთავარი მიზეზი არის ჩვენი გულსა და გონების სიცივე, სიყვარულის არარსებობა. მოვუსმინოთ მოძღვარს: „შევისწავოთ: ღვთის განგება კიდევ გვაფრთხილებს! ის გვეუბნება: ქრისტეს დიადის მცნების – ურთიერთას სიყვარულის – გარეშე ცხოვრება შეუძლებელია და, ამისათვის, თუ გნებავთ განთავისუფლებულ საქართველოში განვითარდეს თავისუფალი მოქალაქეობა, ხელი შეუწყეთ სალი სარწმუნოებრივ-ზნეობრივი სწავლის გავრცელებას, მტკიცეთ სდევით ქრისტეს მცნებაზე და ვიდრე ჟამი გაქვთ, იქმოდეთ კეთილსა ყოველთა მიმართ“ (გალ. 6, 10) (იხ. „ახალი სიტყვა“, 1918, №8, გვ. 4)<sup>26</sup>.

შემდგომად საქართველოს დამოუკიდებლობის გამოცხადებისა (1918 წლის 26 მაისი – წმ. ექვთიმე ათონელის ხსენე-



ბის დღე) მამულიშვილნი ნაავადარი სხეულის მოკეთებას, ძმათა შორის ჩატეხილი ხიდის – გაორებული ქართული გულის – გამრთელებას ესწრაფვოდნენ. „დედის სალმობის“ მომხსენებელი (ი. ზირაქი 7, 29) მამა კალისტრატე, საქმისაებრ კეთილი მწყემსისა, ასე ავედრებდა მამულს მაღალყოვლადუსამღვდელოეს მიტროპოლიტ ანტონ გიორგაძის ნუთისოფლიდან ახლადგარდაცვალებულ სულს: „მეუფეო წმიდაო! გერწამს და აღვიარებთ, რომ უკვდავი სული შენი და გული დღესაც განვრცობილ არს (2 კორ. 6, 11) საჭიროებათათვის მშობელის ერისა, რომელიც, გარეშეთაგან თავისუფალი და თვითთავადი, შინ დაჰმონებია ძმათმძულვარებას: ძენი და ასულნი მისნი ამხედრებულან ურთიერთის წინააღმდეგ და ლამის მშობელი დედა, შენი საყვარელი საქართველო, კვლავ მტრის გულისად გაჰხადონ!.. საჭიროა ძალი ზეგარდამო, ძალი ზეციური, ძალი ღვთიური, რომელსაც მრავალჯერ უხსნია სამშობლო ჩვენი განსაცდელისაგან!.. მაშ, ისწრაფე, მღვდელთმთავარო, სმენად (იაკ. 1, 19) ქვეყნის ჭირისა, წარსდეგ წინაშე დიდისა მღვდელთმთავრისა, ალაპყარ მისდამი ხელნი შენნი და შენებრ კადნიერებით და სასოებით შეღალადე: *გარდამოიხილე ზეცით, ღმერთო, და იხილე, და მოჰხედე ვენახსა ამას, და განამტკიცე ესე, რომელ დაასხა მარჯვენემან შენმან*“ (ფს. 79, 14-15)“.

### *საბჭოეთი და „კაენის სული“ საქართველოში*

„ვენახსა ამას“ მე-20 საუკუნის 20-30-იან წლებში „კაენის სულის აღზევებამ გადაიქროლა“ (როგორც ეს ერთ იმდროინდელ პოეტს და მოაზროვნეს უთქვამს). თუ რაოდენ მძვინვარებდა იმ დროს ანტირელიგიური პროპაგანდა ანუ „კაენის სული“, ამხილებს ათეისტური სათამაშოების მოგონება, რომელთაგან ერთ-ერთის შესახებ გაზეთი „ახალგაზრდა კომუნისტი“ (1928, 18.IV. №137) გვაუწყებს: „ანტირელიგიური ტირის“ თამაშის გამოყენება განსაკუთრებით მნიშვნელოვანია ახლა, სააღდგომო უქმეებთან დაკავშირებით. ეს თამაში მეტად სასარგებლო და საინტერესოა, რადგან მას შეუძლია თამაშში ჩააბას მთელი კოლექტივი და მოთამაშეებში გამოი-

მუშაოს ერთგვარი წინდახედულობა და გონებამახვილობა. საამისოდ საჭიროა შემდეგი მონყობილობა: ფანერის ფიცარი, რომელზედაც გამოხატულია სხვადასხვა რელიგიური კულტის წარმომადგენელთა სურათები. ის ადგილები, სადაც აღნიშნულია შავი რგოლები, უნდა ამოიჭრას 4-5 სანტ. დიამეტრით. საჭიროა პატარა ბურთები, რომელთაც შეედლებათ ხვრელში თავისუფლად გავლა მიზანში მოსახვედრად“. ფართოდ იყო გავრცელებული ე. წ. ანტირელიგიური პროცესიები: აზვირთებული ათეისტები (მეტწილად ახალგაზრდები) ჩამოაცვამდნენ გადაჯვარედინებულ ჯოხზე მღვდლის სამოსელს (კუნკულბარტყულს, ანაფორას და ა. შ.), ჩამოკიდებდნენ მათზე ჯვარს, დაიჭერდნენ ხელში საეკლესიო რელიკვიებს (ხატ-სანაწილეებს, ბაირალებს, სამწერლობლებს და ა. შ.), დადიოდნენ ქუჩებში, ერთმანეთს აწყებოდნენ და კვებოდნენ სიცილით, ილანძლებოდნენ, იმუშტებოდნენ, სახალხოდ ბილწავდნენ რელიგიურ სინმიდეთ, შეხინტრიცდებოდნენ ეკლესიებში, ამასხარავებდნენ მორწმუნეებს; მღვდლებს ხშირად სცემდნენ, გიდელში ან ქვევრში ჩასვამდნენ და ისე დააგორებდნენ მთიდან, ეკლესიის მსახურებს წვერებს აკრეჭდნენ (ანდა აგლეჯდნენ), შლიდნენ ღვთისმსახურებას, არაიშვიათად ტაძრებსაც ანგრევდნენ, რასაც ჩვეულებრივ ქეიფი („ოჩხარი“) მოჰყვებოდა<sup>27</sup>.

„მუკელების“ (მებრძოლ უღმერთოთა კავშირის) წრეგადასულმა თარეშმა ლამის ნაცარტუტად აქცია ივერიის ეკლესია. აი, რას ვკითხულობთ საკათალიკოსო სინოდის მიმართ მორწმუნეთა ჯგუფის წერილში, რომელიც შედგენილი უნდა იყოს 30-იანი წლების დასაწყისში (ცინცაძე 228): „მოგვევლინა ღვთის რისხვა... დაიჩაგრა სარწმუნოება და დაკნინდა სამღვდელოება. უკანასკნელი იდევენება ყველგან და ყველაფერში. იგი ისპობა ფიზიკურად და ჩლუნგდება გონებრივად. დღითიდღე ხელიდან გვეცლებიან საუკეთესო სასულიერო მოღვაწენი, ხოლო მათი შემცვლელი ნაკლებად ჩანს. [...] ნელ-ნელა ისპობა ჩვენ ეკლესიაში ძველი გალობა, ძველი ეკლესიური კითხვა და ყველაფერი, რაც ჩვენი ერისა და ეკლესიის სიამაყეთ ითვლებოდა“. და მართლაც: საკათალიკოსოში სრული ანარქია გამეფდა. სამღვდელოთა ნაწილმა თვითნე-

ბობა დაინყო. ერთი შეხედვით ეს თითქოს არალოგიკურია. ბუნებრივი და ლოგიკური ის იქნებოდა, რომ დევნილებას თანამორწმუნეების, ერისა და ბერის, მობილიზაცია გამოენ-  
ვია; ისინი უფრო უნდა დაახლოვებოდნენ ერთმანეთს, რათა მტერს ერთსულოვნებით და ერთიანი ფრონტით დაპირისპი-  
რებოდნენ. მოხდა საპირისპიროდ. აი, რას სწერს კათალი-  
კოს-პატრიარქი ამბროსი მაღალყოვლადუსამღვდელოეს კა-  
ლისტრატეს 1926 წლის 28 იანვარს (ცინცაძე 177): „...დღე-  
ვანდელი მდგომარეობა მშობლიო ეკლესიისა მოითხოვს მის  
ერთგულ მსახურთაგან გაორკეცებული ენერგიით მოქმედე-  
ბას... სამწუხაროდ უნდა აღინიშნოს, რომ ადგილებზე ეპარ-  
ქიებში საეკლესიო ცხოვრება მოდუნებულია: ცნობები არ  
იგზავნება [საპატრიარქოში] იმ შემთხვევებშიც კი, როდესაც  
საეპარქიო კრება იმართება; უზენაესი დანესებულების  
ბრძანება-განკარგულებანი სუსტად სრულდება. ეს არის მი-  
ზეზი, რომ დღევანდლამდე ვერ წარხოცეს ბეჭედი საქარ-  
თველოს ეკლესიის მონობისა – რუსული ოდიკი დამოუკი-  
დებლობის ემბლემით – ქართველი ოდიკით. დღემდე არ იმე-  
ქონება საქარო ცნობები საკათოლიკოზოში მოქმედ ეკლესი-  
ათა და მღვდელმსახურთა შესახებ“.

როდესაც ამ სიტყვებს კითხულობ და სხვა მასალებსაც  
ეცნობი, უნებლიეთ დაგიდგება თვალწინ არაბობისდროინდე-  
ლი საქართველოს (VIII ს.) და აბო ტფილელის წამების აღმწე-  
რი იოანე საბანისძე, რომელიც ამბობს: დადგა დრო, „რომლი-  
სა ჟამისთვისცა უფალი იტყვის, ვითარმედ მრავალნი სცდე-  
ბოდიან და მრავალთა აცთუნებდენ (შდრ. მათე 24, 24; 2 ტი-  
მოთ. 3, 13) და მოციქული პავლე მისწერს ტიმოთესა, ვითარ-  
მედ მოვალს ჟამი, ოდეს სიცოცხლისა ამის მოძღვრებასა არა  
თავს იდებდენ, არამედ გულისთქმისაებრ თვისისა თავით  
თვისით შეიკრებდენ მოძღვრებასა ქავილითა ყურთაითა და  
ჭეშმარიტებისაგან სასმენელნი გარემიიქცინენ და ზღაპრებ-  
სა მიექცენ (2 ტიმოთ. 4, 3-4), რომელიცა ესე ან ჟამსა ამას  
აღესრულების ჩვენ შორის. [...] მიერთგან და ვიდრე აქამომ-  
დე ნაშობნი ქრისტეანეთანი გარდაგულარძნეს: რომელნიმე  
მძღავრებით, რომელნიმე შეტყუვილით, რომელნიმე სიყრმე-  
სა შინა უმეცრებით, რომელნიმე მზაკუვარებით და სხვანი,

რომელნი-ესე ვართ მორწმუნენი, მძლავრებასა ქვეშე დამონებულნი და ნაკლუფანებითა და სიგლახაკითა შეკრულნი, ვითარცა რკინითა, ხარკსა ქვეშე მათსა გვემულნი და ქენჯნილნი, ძვირ-ძვირად ზღვეულნი, შიშითა განილევნიან და ირყევიან, ვითარცა ლერწამნი ქართვან ძლიერთა...“ იოანე საბანისძე და, ჩანს, ბევრი იმდროინდელი ქრისტიანი ქართველი ფიქრობდა, რომ უკვე მოვიდა წუთისოფლის აღსასრულის ჟამი და, დღეს თუ არა ხვალ, ცა ჩამოიქცევა და მიწა განადგურდებაო. ანალოგიური ფიქრები მოეძალა მორწმუნე ქართველ ერს აგრეთვე მე-20 ს-ის 20-იან წლებში, ღვთისმგმობელობის მძვინვარების ჟამს. ბევრი სკეპსისმა და ცოდვათა შორის ერთ-ერთმა დიდმა ცოდვამ – მიმომწვლილველობამ (უიმედობამ, უსასოობამ) შეიპყრო. ასეთ ვითარებაში საჭირო იყო ხალხის მორალური გამხნევება, – ზნეობრივი მაგალითი, ახსნა-განმარტება და შთაგონება, რომ ისტორია არ დასრულებულა; ბრძოლა გრძელდება და ფარ-ხმალის დაყრა ქრისტეს ღალატის ტოლფასია. ამ ავბედით ჟამს მწყემსმთავარი კალისტრატე ერს ასე მოძღვრავდა (ცინაცაძე 97): „მართალია, ოქროს ასოებით ამოსაჭრელ სიტყვებს (გულისხმობდა დეკრეტს „სინდისის თავისუფლების შესახებ“, ნ.პ.) დაერთო მრავალ სამღვდლო პირთა ეკლესიისაგან ჩამოშორება, მაგრამ ბაგრატ-დავით-თამარის დროსაც ხომ მრავალი ხუცესი ჩამოშორდა ეკლესიას?!.. რაც შეეხება იმ ქარიშხლის სიმძაფრეს, რომელმაც გამოიწვია ალაგ-ალაგ ტაძრების დახურვა თუ დაქცევა, არც ეს არის მორწმუნეთათვის საშიში: მძაფრ ქარტეხილს თან სდევს ნიავი წვლილი და მას შინა არს უფალი (3 მეფ. 19, 12)... წმიდაო მოციქულთა სწორო ქალწულო ნინო (ეს ქადაგება ნინოობისას წარმოითქვა, ნ.პ.), რომელმან მოღვაწეებითა შენითა განანათლე ბნელი გულთა მამათა ჩვენთა, შენ გლოცავთ და შენ გვედრებით უღირსნი ესე ძენი და ასულნი სულიერთა შვილთა შენთანი: მოუკლებელად გარეშემიცივე ჩვენცა სახარებითა წმიდითა, ჯვართა პატიოსნითა და მადლითა ღვთისათა., განაძლიერე შორის ჩვენსა ცხოვრებად საუკუნოდ მიმყვანებელი ურთიერთას სიყვარული და განამტკიცე ღვთისა დედისა წილხდომილსა სოფელსა შინა ჭეშმარიტი ძმობა, ერთობა და თავისუფლება! იყავნ, უფალო, იყავნ!“

მეორედ მოსვლისა და ქვეყნის დაქცევის ცრურწმენას, რაზეც უკვე ვთქვით, ბევრი სხვა ცრურწმენა და უმსგავსობა დაემატა. ზოგადად: შეიბღალა ერისა და ბერის ზნეობა. იმ დროს არა ერთი და ორი საერო თუ სამღვდლო პირის რწმენა გამრუდდა და გაუკუღმართდა. ზოგიერთ ღვთისმსახურს, ეკონომიურად გაღატაკებულსა და გაჩანაგებულს, თავის გადაარჩენის ველური ინსტინქტი დაეუფლა; მუქთახორობამ, სიხარბემ, ანგარებამ დაისადგურა სულმოკლე მღვდლების სულში. ასეთ სულელებში კი ადვილად ჰპოვა ადგილი სექტანტურმა ცნობიერებამ პათოლოგიური აზროვნების გაგებით; გზა გაეხსნა ერეტიკულ ფანატიზმსა და რელიგიურ მანიაკობას. აღზევდნენ ცრუმოდგვარნი, მკითხავ-მარჩიელნი, მონაქადაგნი; გაფერმკრთალდა ზღვარი ჭეშმარიტ ქრისტიანობასა და ხალხურ, ზოგჯერ ფსიქიურ ავადმყოფობამდე მისულ, რწმენა-წარმოდგენებს შორის. რელიგიის ნიღბით შეიმოსა მაგია. ერს, ურწმუნოების გარდა, მწვალებლობისა და განარმართების საცდური დაემუქრა. ამ ვითარების სიმძიმე ღრმად გააცნობიერა კალისტრატე ცინცაძემ და მან, როგორც ღვთისმეტყველებისა და კათოლიკე ეკლესიის ჭეშმარიტი ტრადიციის საუკეთესო მცოდნე მოძღვარმა, ასერიგად გზააბნეული მრევლის დაკვალიანების უღელი იტვირთა. აქვე იმასაც ვიტყვით, რომ ჩამოთვლილი მანკიერებანი 30-იან წლებში კიდევ უფრო მასშტაბური და მავნებლური გახდა. გამოჩნდნენ ისეთი მღვდლებიც, რომლებმაც განწყვიტეს საეკლესიო იერარქიასთან კავშირი და დაიწყეს სისხლიანი მსხვერპლშენირვის შესრულება და ჯადოსნობის მსგავსი რიტუალების გამართვაც კი. ისინი ამტკიცებდნენ: ღვთისგან მოგვეცა გამოცხადება, რომ 1. ბავშვები დაიხოცებიან, თუ სასწრაფოდ არ მოინათლებიან, და 2. ცუდად წაგვივა საქმე, თუ ღმერთს და წმინდანებს ცხვრებს, თხებსა და მოზვრებს არ შევწირავთ! ამან აიძულა კალისტრატე ცინცაძე, უკვე საქართველოს სამოციქულო საყდრის საჭეთმპყრობელი, რომ მრევლისათვის საგანგებო ეპისტოლეთი მიემართა ქართულ და რუსულ ენებზე და განემართა ქრისტიანული მსოფლმხედველობის ორი არსებითი პრინციპი: 1. ჩვენ ბავშვებს ვნათლავთ არა სიკვდილის შიშით (რადგან სიკვდილი არ არ-

ჩვეს მონათლულს მოუნათლავისაგან), არამედ ქრისტესმიერი ცხოვრებისა და ცხოვნებისათვის და 2. ქრისტე არ მოითხოვს ჩვენგან სისხლიან მსხვერპლს და მეტიც, – ჩვენ, ქრისტიანები, სიხლიანი მსხვერპლის შეწირვით იესო ქრისტეს მიერ ჯვარზე გაღებულ მსხვერპლს ვაუფასურებთ (ეს ეპისტოლე დათარიღებულია 1936 წლის 28 აპრილით)<sup>28</sup>.

დავუბრუნდეთ მისი უნმინდესობის ბიოგრაფიას.

*საჭეთმპყრობლის კვერთხი ქაოსისა და მუქარის პირისპირ*

უკვე ვთქვით და ამჯერად დავაზუსტებთ: 1925 წელს უნმინდესი კათალიკოს-პატრიარქ ამბროსის ლოცვა-კურთხევითა და მის მიერვე დეკანოზი კალისტრატე ცინცაძე ხელდასხმულ იქმნა ნინონმიდის ეპიესკოპოსად. იმავე დღეს მას მიტროპოლიტობა ებოძა და დაინიშნა კათალიკოს-პატრიარქის თანამოსაყდრედ. იმხანად პატრიარქი, ბევრი სულიერი და ფიზიკური ტანჯვის გამოვლის შემდეგ, დასნეულებული და დაუძღურებული გახლდათ, რის გამოც ეკლესიის მართვადგანმგებლობის პრაქტიკული საქმე თანამოსაყდრეს, კალისტრატეს, ებარა.

და, აი, ამ დროს, გარეშე მტრებს, ათეისტ კომუნისტებსა და ველიკორუს იერარქებს, დაემატნენ შინაური მტრები – ყოფილი თანამებრძოლი და თანამწირველი ძმები. ესენი იყვნენ ის სასულიერო და საერო პირები, რომელთა ეკლესიოლოგიური და საზოგადოებრივ-პოლიტიკური პოზიციები რუსეთის „ჟივიაი ცერკოვის“, ანუ „ცოცხალი ეკლესიის“, პოზიციებს და პრეტენზიებს ენათესავებოდა<sup>29</sup>. ისინი ცნობილი არიან რეფორმატორებისა და განმაახლებლების სახელითაც, რადგან მოითხოვდნენ რეფორმებს საეკლესიო ცხოვრების თითქმის ყველა უბანზე და, თანაც, – სასწრაფოდ. ამ განხრით მათ პრინციპული წინააღმდეგობა, თუ მხედველობაში არ მივიღებთ მოთხოვნას, – სასწრაფოდ, პატრიარქთან და მის თანამოსაყდრესთან არ ჰქონდათ და არც შეიძლებოდა ჰქონოდათ მას შემდეგ, რაც გამოქვეყნდა სრულიად საქართველოს საკათალიკოსო საბჭოს ზემოთ დასახელებულ (გვ. 187-188) მოწოდება საეკლესიო რეფორმების მომზადების თაობაზე (1922 წლის 19 ოქტომბერი). გავითვალისწინ-

ნოთ, რომ ამ დოკუმენტს, რომელშიც ლაპარაკია საეკლესიო ნესგანგების „თანამედროვე ცხოვრების მოთხოვნილებათა მიხედვით“ გამარტივების შესახებ, თავად უნმინდესი პატრიარქი ამბროსი და მისი ყველაზე ახლო თანამოსაგრე კალისტრატე ანერენ ხელს საკათალიკოსო საბჭოს სხვა წევრებთან ერთად. მაგალითად შეგვიძლია მოვიყვანოთ კალენდრის საკითხი. ორივე, – როგორც კათალიკოს ამბროსის ოპოზიცია, ისე პოზიცია, – კალენდრის რეფორმის მხარეზე იდგა; ორივეს უნდოდა, რომ საეკლესიო-ლიტურგიკულ პრაქტიკაში ახალი სტილი (გრიგორიუსის კალენდარი) შემოღებულიყო, რადგან ორივე აღიარებდა ამ სტილის ასტრონომიულ უპირატესობას და საეკლესიო ტრადიციასთან შესაბამისობას. განსხვავება მდგომარეობდა იმაში, რომ ოპოზიცია ამ რეფორმის დაუყოვნებლივ განხორციელებას მოითხოვდა, პოზიცია კი რეფორმისათვის მოსამზადებელი სამუშაოების ჩატარების, რიგითი მორწმუნეების დაკვალიანებისა და გათვითცნობიერების აუცილებლობას ხედავდა<sup>30</sup>. ასეა თუ ისე, ისინი არსებითად ერთსა და იმავე პოზიციაზე იდგნენ.

უფრო რთულად იდგა საკითხი პოლიტიკასთან და, კერძოდ, საბჭოთა რეჟიმთან ურთიერთობაში. კათალიკოს-პატრიარქის ოპოზიცია, რომელსაც ეპისკოპოსები ქრისტიფორე ციციქიშვილი და დავით კაჭახიძე ხელმძღვანელობდნენ, ფიქრობდნენ, რომ ეკლესიას თავსდამტყდარი უბედურების ერთ-ერთი მიზეზი არის კათალიკოს-პატრიარქ ამბროსისა და მის დაქვემდებარებაში მყოფი საკათალიკოსო საბჭოს „არაგონივრული და უგუნური პოლიტიკა“. იგულისხმება ანტისაბჭოთა და ანტიკომუნისტური კურსი, რომლის დამადასტურებელ ფაქტებად ისინი (ოპოზიციონერები) მიიჩნევდნენ: ეკლესიამონასტრებსა და სამღვდელმთავრო რეზიდენციებში დაცული განძის გადაძალვას, გენუაში მემორანდუმის გაგზავნასა და საოკუპაციო ჯარების დაუყოვნებელი გაყვანის მოთხოვნას, 1924 წლის ანტისაბჭოთა აჯანყებაში სასულიერო პირების მონაწილეობას და სხვასაც. ამ ფაქტებმა ანუ, ზოგადად, საოკუპაციო ხელისუფლებასთან ასეთმა ხისტი ურთიერთობამ, რასაც ბოლშევიკების გაბრაზება და რისხვით ანთება მოჰყვა, ოპოზიციონერების აზრით, სამარის კარამდე მიიყვანა საქარ-

თველოს მართლმადიდებელი ეკლესია; დაიღუპნენ ჩინებული სასულიერო პირები, მათ შორის – ქუთაისის მიტროპოლიტი ნაზარი ლეჟავა და მისი თანამოსაგრე სამღვდლო და საერო დასი. და ეს ყველაფერი საქართველოს მართლმადიდებელი საპატრიარქოს ანტისაბჭოთა კურსის ბრალიაო.

ხსენებულმა ოპოზიციამ 1926 წლის 26-27 დეკემბერს ქუთაისში ყრილობა მოაწყო, რაშიც, სავარაუდოდ, მას ირიბად და ჩუმად საბჭოთა სპეცსამსახურები დაეხმარნენ, რადგან ეჭვი არაა, რომ ეს სამსახურები პროკომუნისტი და პროსაბჭოელი მორწმუნეების მხარეზე იდგნენ. ასეა თუ ისე, ფაქტია, რომ ყრილობის მონაწილეებმა შეიმუშავეს ეპისტოლე „სრულიად საქართველოს ეკლესიის მორწმუნეთა მიმართ“, რომელსაც საქართველოს მთელ ტერიტორიაზე ბროშურის სახით ავრცელებდნენ. ეპისტოლეს შინაარსი ასეთი არის: საქართველოს მართლმადიდებელი ეკლესია ყოფნა-არყოფნის ზღვარზე დგას. მიზეზი სხვადასხვაა: გარეგანიც და შინაგანიც. უკანასკნელში იგულისხმება საკათალიკოსო საბჭოს „უგუნური და მოუფიქრებელი საქციელი“, რამაც საბჭოთა მთავრობის უკურნალობა განაპირობა, – რისხვა და შურისძიება. სოციალიზმი ქრისტიანობისათვის სანატრელი ფორმაციააო, – გვარწმუნებდნენ ეპისტოლეს ავტორები, რადგან მიზნად ისახავს ექსპლუატაციის ლიკვიდაციას და თანასწორობას. მხოლოდ ერთ რამეში ვერ დავეთანხმებით კომუნისტებს, არ არსებობსო ღმერთი. დანარჩენში ის ყველანაირად კარგი იდეოლოგიაა. ამიტომ გვმართებს მის გვერდით დგომა და მასთან თანამშრომლობა. რაც შეეხება კათალიკოსპატრიარქ ამბროსისა და მის თანამოსაყდრე კალისტრატეს, ყრილობის გადაწყვეტილებით ისინი ეკლესიის მართვის სადავეებს უნდა ჩამოშორებოდნენ (თუმცა ამბროსის თავის პატივში ტოვებდნენ) და უნდა გაუქმებულიყო საკათალიკოსო საბჭო. საკათალიკოსოს მართვა-გამგეობის ყველა ფუნქციას თავის თავზე იღებდა „დროებით მმართველობა“, რომლის შემადგენლობა ყრილობაზე განისაზღვრა. ეპისტოლეს სტრიქონსა და სტრიქონს შორის იკითხებოდა კათალიკოსის წუთისოფლიდან მალე და დროზე წასვლის ოცნება. ეს ოცნება დღითი დღე ძლიერდებოდა.



და, აი, „დროებითმა მმართველობამ“ 1927 წლის 22 მარტს გადაწყვიტა, კათალიკოსი ამბროსი ჩამოეშორებინა „საქმეთა წარმოებისაგან“. „მმართველობის“ წევრებმა მილიციის დახმარებით ჩამოართვეს მას, უწმინდეს კათალიკოსს, დოკუმენტაცია და დაიკავეს კანცელარია. აქ შვენი უწყება, რომ ქუთაისის საეკლესიო ყრილობის ყველა დებულება და დადგენილება მეცნიერულად, წყაროთმცოდნეობის დონეზე განიხილა და კრიტიკის ქარცეცხლში გაატარა მიტროპოლიტმა კალისტრატე ცინცაძემ. მან იმავე წლის 25 აპრილს განასრულა 456 გვერდიანი შრომა „ქუთაისის საეკლესიო ყრილობის გამო (მწარე მოგონებანი საქართველოს ეკლესიის ახლო წარსულიდან)“ (ცინცაძე 102)<sup>31</sup>. აქ მოცემულია აღნიშნული, რამდენიმე გვერდიანი ეპისტოლეს უვრცელესი განმარტება. ესაა საქართველოს ეკლესიის ახლო წარსულისა თუ, საერთოდ, ორთოდოქსული სამყაროს იურიდიულ-კანონიკური წყობილების ისტორიულ ჭრილში გასაცნობად ფასდაუდებელი დოკუმენტი, რომელიც ამ სიტყვებით მთავრდება: გადაწყვეტილება კანცელარიის ჩამორთმევის შესახებ „გამოუცხადეს მის უწმიდესობას მარტის 23. ამ გამოცხადების მეორე დღეს კათოლიკოზ-პატრიარქმა ამბროსიმ დაგარგა ენის ხმარების შესაძლებლობა (მარტის 25), მარტის 27 გონებაც, ხოლო მარტის 29 დილის სამ საათზე კი განუტევა სული... არ უნდა ავჩქარებულებიყავით“.

უწმინდესი და უნეტარესი კათალიკოსის, ამბროსის, გარდაცვალების (1927 წლის 29 მარტის) შემდეგ საქართველოს სამოციქულო საყდარი კომუნისტური რეჟიმისა და იდეოლოგიის მიმართ ოპორტუნისტულად განწყობილმა პარტიამ დაიკავა. 1927 წლის 21-27 ივნისს თბილისში შედგა სრულიად საქართველოს IV საეკლესიო კრება, რომელმაც კათალიკოს-პატრიარქად გამოარჩია და აღასაყდრა მიტროპოლიტი ქრისტეფორე ციციქიშვილი, კალისტრატე ცინცაძე კი გამოცხადებულ იქნა მანგლისის ეპარქიის მმართველად, მანგლელად. ამ აქტით და ამის შემდეგ მიტრ. კალისტრატეს სამოღვაწეო სარბიელი შეიზღუდა: ის საპატრიარქოს ცენტრალურ აპარატს ჩამოშორდა და ფაქტიურად ეპარქიის გარეშეც დარჩა (კაცმა რომ თქვას, ეპარქიებში და, კერძოდ, მანგლი-

სის ეპარქიაში იმ დროს უკვე ისეთი ვითარება შეიქმნა, რომ ეპოსკოპოსს იქ აღარც კი დაედგომებოდა; სამრევლოები აღარ ფუნქციონირებდა). მიტრ. კალისრატე რეალურად ქაშვეთის ეკლესიის წინამძღვრობას დაუბრუნდა. ის ქაშვეთის ეკლესიის გალავანში ცხოვრობდა და ძირითადად კვლევითი საქმიანობით იყო დაკავებული; მონოგრაფიულად სწავლობდა აღნიშნული ტაძრისა და მისი სამრევლოს ისტორიას, რაც განასრულა კიდევ სქელტანიანი ნაშრომის სახით (მიმოხილვა იხ. ქვემოთ). ასე გაგრძელდა 1932 წლის 10 იანვრამდე, კათალიკოს-პატრიარქ ქრისტეფორე ციცქიშვილის გარდაცვალებამდე, რომელმაც, პოზიციათა სხვაობის მიუხედავად, მოსაყდრედ მაინც მიტროპოლიტი კალისტრატე დატოვა.

1932 წლის 21-22 ივნისს თბილისში შედგა სრულიად საქართველოს VI საეკლესიო კრება, რომელმაც მისი მაღალყოვლადუსამღვდელოესობა მიტროპოლიტი კალისტრატე ცინცაძე სრულიად საქართველოს კათალიკოს-პატრიარქის თანამდებობაზე აირჩია. აღსაყდრების (ინტრონიზაციის) ცერემონიალი სვეტიცხოვლის საპატრიარქო ტაძარში აღესრულა (ამ კრების დეტალები და სიტყვა, რომელიც ახლად აღსაყდრებულ მწყემსმთავარს აღსაყდრების ჟამს უნდა წარმოეთქვა, და ალბათ წარმოეთქვა, ჩვენთვის ცნობილი არ არის; დოკუმენტები ამ აქტის შესახებ მის პირად საარქივო ფონდში არ მოიპოვება)<sup>32</sup>.

საპატრიარქო ტახტს უწმიდესი კალისტრატე ორ ათეულ წელს განაგებდა.

ეს დრო, განსაკუთრებით 30-იანი წლები, საქართველოს მართლმადიდებელი ეკლესიის, როგორც ინსტიტუციის, საბედისწერო წლებად ითვლება, რადგან მთელი სიმწვავეთ დაისვა კითხვა: კიდევ რამდენ წელს შეინარჩუნებს ეს ეკლესია არსებობას?<sup>33</sup> გარდა სარწმუნოებრივ-ზნეობრივი გაუკუღმართებისა, რაც უკვე აღვნიშნეთ, ეს წლები ბევრი სხვა დრამატული და ტრაგიკული მოვლენებითაც აღინიშნა. მღვდელმსახურთა და მორწმუნეთა რბევა-ანოიკებამ, არნახულმა ბეგარამ და ფინანსპექტორთა თვითნებობამ აიძულა სრულიად საქართველოს საკათალიკოო სინოდი, დაუყოვნებლივ მიეღო საგანგაშო ზომები, ელიარებინა ივერიის სამოციქუ-

ლო საყდრის უკიდურესი განსაცდელი და 1933 წლის 2 აპრილს საქართველოს სსრ ცაკისათვის შემდეგი შინაარსის მოხსენებითი ბარათი გაეგზავნათ (ცინცაძე 70. მოგვაქვს შემოკლებით): „საკათალიკოზო სინოდს მოხსენდა, რომ ტფილისის საბჭოს საკონტროლო განყოფილებას გაუცია განკარგულება სასწრაფო ზომების მიღების შესახებ ეკლესიების დავალიანების განაღდებისათვის, წინააღმდეგ შემთხვევაში მათი ჩამორთმევისათვის, – ეკლესიებს უკვე მოუვიდათ ბრძანება: «დავალიანება დაიფაროს სამი დღის განმავლობაში, წინააღმდეგ შემთხვევაში დადებული ხელშეკრულება გაუქმებულ იქნებაო»... ცხადია, ასეთი წინადადების შესრულება ეკლესიებს არ ძალუძთ: თუ წლების განმავლობაში ვერ შეჰქონდათ მთლიანად გადასახადი და საურავები, როგორ გადაიხდიან მას სამ დღეში? მაშასადამე, უნდა ჩაითვალოს გადაწყვეტილად, – ქალაქთან დადებულ ხელშეკრულებათა გაუქმება და ეკლესიების დაკეტვა. ამას კი ბუნებრივად მოჰყვება საქართველოს ეკლესიის უზენაესი ორგანოს – საკათალიკოზო სინოდის გაუქმებაც; მისი წევრები არიან ამა თუ იმ სამრევლოს ან მღვდელი, ან მრევლი, – თუ იკეტება ეკლესია, უქმდება სამრევლო, რასაც თან სდევს საკათალიკოზო სინოდის წევრების მიერ თავიანთ უფლებების დაკარგვა: არარსებული სამრევლოს მღვდელი და მრევლი საკათალიკოზო სინოდის წევრად ვერ იქნება. ვისთვის არის საჭირო ან სასარგებლო უცხო სახელმწიფოების ოფიციალურ თუ არაოფიციალურ წარმომადგენელთა მიერ ბლომად დასახლებულ საქართველოს ეკლესიათა დაკეტვა, სამრევლოთა განიავება და საკათალიკოზო სინოდის გაუქმება? ისიც იმის გამო, რომ ახლადფეხადგმულ პროლეტარულ სახელმწიფოს ღარიბ მორწმუნე-მოქალაქეთ არ აქვთ შესაძლებლობა გადაიხადონ ერთდროულად (არა მათი მიზეზით საურავებით გასიებული თანხა) 50 000 მან. ეს ხომ საბაბს მისცემს ჩვენი ქვეყნის მტრებს ბოროტად გამოიყენონ შექმნილი გარემოება და გამოიწვიონ უზენაეს ხელისუფლებისადმი უკმაყოფილება როგორც შინ, ისე გარეთ. მიზანშეწონილია ეს?...“.

მსგავსი შუამდგომლობანი სასწრაფოდ და რამდენიმეჯერ გაეგზავნა საბჭოთა კავშირის უმაღლესი საბჭოს პრე-

ზიდიუმსა და სხვა შესაბამის ორგანიზაციებს, რითაც საქვეყნოდ აღიარებულ იქნა ფაქტი: თუ რევოლუციის დაწყებამდე საქართველოში 1500 შტატის (ზედმინერალ სასწავლებლებითა და სამხედრო ტაძრებით 2300) ეკლესია მოქმედებდა, 1934 წელს სამრევლოთა რიცხვი არ აღემატებოდა 15-ს. კომუნისტური პარტიის ცენტრალური კომიტეტის პირველი მდივნის კანდიდ ჩარკვიანისადმი მიმართვაში (1934 წ.) ვკითხულობთ: „დახურულ ეკლესიათა შორის არის მსოფლიოში სახელგანთქმული მცხეთის სვეტიცხოველიც, რომელიც ცნობილია არა მხოლოდ მით, რომ ის იშვიათი ისტორიული ძეგლია, არამედ, და უმთავრესად, მით, რომ ის არის ქართველი ერის „აკვანი“ და „ემბაზი“. ჩვენი ხალხისა და ეკლესიის ურყევი ტრადიციით საქართველოს მამათმთავრის, კათოლიკოზ-პატრიარქის, კურთხევა უნდა უექველად მოხდეს სვეტიცხოველში. ამის გამო, ხსენებული ტაძრის არმოქმედ ეკლესიად გადაქცევა პირდაპირი ნაბიჯია ათეულ საუკუნიათა ეკლესიის გაუქმებისათვის, რაც საბაბს მისცემს ჩვენ მტერ-მოყვრებს ახმაურდნენ ახალგაზრდა რესპუბლიკის წინააღმდეგ და არასასიამოვნოდ დაურჩება ჩვენს ხალხსაც, მიუხედავად მისი შვილების რწმენის სხვაობისა თუ ურწმუნოებისა... ეკლესიის დამოუკიდებლობა ერთ-ერთი მთავარი ბოძია თვით ერის დამოუკიდებლობისა. ეს შეგნება იყო მიზეზი იმისა, რომ დიდმპყრობელურმა რუსეთის სინოდმა ასი წლის განმავლობაში მრავალფეროვან ძალადობით ერთი ნუთითაც ვერ დაგვაგინყა კათოლიკოზ-პატრიარქის ფუნქციების შეჩერება, და ეხლა, როდესაც უამრავი ტანჯვა-ვაებისა და ბრძოლის შემდეგ აღვიდგინეთ ეკლესიის ავტოკეფალობა, ჩვენვე გავაუქმეთ იგი მისთვის, რომ მცხეთის რაიონის მესვეურებს დასჭირდათ ტარასი ეპისკოპოსის ბედშავი ოთახი?!... სვეტიცხოველის მოქმედ თუ არამოქმედ ტაძრად გამოცხადებას აქვს პოლიტიკური მნიშვნელობაც, და საკითხი ამის შესახებ, თუ დღესდღეობით ყველასათვის არ არის საგრძნობი, მწვავედ წამოიჭრება მოხუც (75 წ.) კათოლიკოზ-პატრიარქის გარდაცვალების შემდეგ. ასეთ უხერხულ მდგომარეობაში რომ არ ჩავვარდეთ, საჭიროა, სანამ სვეტიცხოველის დახურვის ამბავი არ გახმაურებულა, მი-

სი გახსნა, მით უმეტეს, რომ იგი დაიხურა ადმინისტრაციული წესით: ამა წლის ივლისის 12 დაიბარეს სვეტიცხოვლის წინამძღვრის მოადგილე ტარასი ეპისკოპოზი და უბრძანეს, – 48 საათის შემდეგ ბინა გაათავისუფლე და ტაძრის გასაღები ჩაგვაბარეო, რაც ისეთი სისასტიკით იქმნა შესრულებული, რომ გამოძევებულმა თავისი საკუთარი ნივთების ტაძრიდან გამოტანის ნებართვაც კი ვერ მიიღო“.

ჩვენთვის ცნობილია ისიც, რომ იმ ჟამს გაუქმდა (საღვთო მსახურებისათვის დაიხურა) მცხეთის რაიონის ყველა ტაძარი. სამთავროს დედათა მონასტერი იატაკქვეშეთში გადავიდა: წმ. ტრაპეზი სარდაფში გამართეს, წირვა-ლოცვა-საც ღამლამობით ასრულებდნენ; მონაზვნებს იძულებითი სამუშაო დაუწესეს და ამუშავებდნენ თითქმის მუქთად სხვადასხვა დანესებულებაში. ყოველდღიურად იყო მოსალოდნელი თბილისის სიონის იავარყოფა, ქაშვეთის გაცამტვერება (ეს ტაძარი ქალაქის ხედს აუშნოვებს და მთავრობის მშენებარე სახლს ჩრდილავსო; ის არ არის ისტორიული ძეგლი, რის გამოც უნდა ავიღოთო)<sup>34</sup>. ბოლო არ უჩანდა პროვოკაციულ ღონისძიებებს: ეკლესიათა გალავნებში მართავდნენ სასადილოებს, ჰიგიენის სახლებს, საერთო საცხოვრებლებს, კონცერტებს.

ჩვენს ხელთაა კ-პ კალისტრატეს მიმართვა საქართველოს სსრ უმაღლესი საბჭოს პრეზიდიუმსა და ფინანსთა სახალხო კომისარიატს, დათარიღებული 1940 წლის 19 მარტით (ცინცაძე 70). დოკუმენტი გვაუწყებს და გვისურათებს, რომ 30-იან წლებში მღვდლები (განსაკუთრებით სოფლად) „გამომწყვდეულნი“ იყვნენ ეკლესიის გალავანში, რომლებთანაც, პატრიარქის თქმით, „წესების შესასრულებლად მიდიოდნენ უმთავრესად ღამ-ღამობით, მეზობლებმა არ დაგვინახონო“. ფინისსპექტორები თურმე ასე „ამშვიდებდნენ“ სულიერო პირებს, რომლებიც ყოველ ახალ წელს გადიდებულ ბეგარას ვერ იხდიდნენ, რის გამოც დაჯარიმებული იყვნენ: ან გადაიხადეთ შემონერვილი თანხა ჯარიმითურთ, ან თავი დაანებეთ მღვდლობას, ან, კიდევ, მზად იყავით სასამართლოს მკაცრი მსჯავრისათვის – იძულებით სამუშაოებზე ან ციხეში გასაგზავნად! ცხადია, არასმქონე მღვდლები გადა-

სახადს ვერ ფარავდნენ და იძულებულნი იყვნენ, ან დაენებებინათ თავი სამსახურისათვის, ან მიეღოთ სასჯელი მისთვის, რომ მათი შემოსავალი მცირე იყო.

1940 წლის 29 ივნისს თბილისის კიროვის რაიონის საფინანსო განყოფილებამ კათალიკოს-პატრიარქ კ. ცინცაძეს, როგორც საპატრიარქო ტაძრის წინამძღვარს, ასეთი ულტიმატუმი წარუდგინა: „ფინანსთა სახალხო კომისარმა უარი გითხრათ სიონის ტაძარზე დარიცხული 86644 მან. და 25 კაპ. მოხსნის შუამდგომლობაზე, რის გამოც წინადადებას გაძლევთ, რათა 1/VII-მდე დაფაროთ აღნიშნული დავალიანება, წინააღმდეგ შემთხვევაში საკითხი გადატანილი იქნება აღმასრულებელ კომიტეტის სხდომაზე ტაძრის გაუქმებისა და დახურვის შესახებ“.

აღნიშნული ულტიმატუმი იმდენად მკაცრი და კატეგორიული ჩანდა, რომ საქართველოს მწყემსმთავარი იძულებული გახდა საგანგაშო დეპეშა გაეგზავნა საკავშირო მთავრობისათვის, მიემართა იოსებ სტალინისათვის და ემცნო ყველასათვის: „მიუხედავად იმისა და იმ გარემოებისა, რომ ეკლესიის არსებობა უზრუნველყოფილია დიდი სტალინის შუქმფრქვეველ კონსტიტუციით, ჩვენს ეკლესიას კარს მოსდგომია ისეთი განსაცდელი, რომელსაც შეუძლია სავესებით მოუღოს მას ბოლო სულ მოკლე ხანში... სანამ საბჭოთა კავშირის კონსტიტუციიდან არ არის ამოშლილი 124 მუხლი, ნუ იქნება ხელოვნურად მიჩქმალული, ადმინისტრაციული წესით განადგურებული საქართველოს ეკლესია და მით აღგვილი პირისაგან ქვეყნისა ქართველი ერის უძველესი კულტურის ცოცხალი ნაშთი“ (ცინცაძე 70, ფ. 130, 135)<sup>35</sup>.

### *ომი და მშვიდობა*

კათალიკოს-პატრიარქის წინდახედულობამ, პატრიოტთა და ინტელიგენტთა თავდადებათ (20-იან წლებში ამ მიმართულებით, კალისტრატე ცინცაძის გვერდით, იღვწოდა და იბრძოდა მწერალი გრიგოლ რობაქიძე) კომუნისტური მთავრობის კურსი საქართველოში მართლმადიდებელი ეკლესიის გაუქმების შესახებ გააჯანჯლა, სამამულო ომის დაწყებამ კი

ამ კურსს ბოლო მოუღო. 1941 წლის სექტემბერში საღვთო მსახურებისათვის გახსნილ იქნა სვეტიცხოველი და სამთავროს დედათა მონასტერი, შეწყდა რეპრესიები ეკლესიებისა და მათ მსახურთა მიმართ. ხელისუფალთაგან კათალიკოსის იმჟამინდელ მიმართვა-თხოვნებს, რომელთა პირები ავტორს შეუნახავს, უკვე ამგვარი მინაწერი ამშვენებს: „შეწყნარებულია სავსებით. კ.-პ. კ.“.

მეორე მსოფლიო ომის დროს საქართველოს მართლმადიდებელი ეკლესია, მამათმთავრის წინამძღვრობით, ანტიფაშისტური ძალების მხარეს იდგა<sup>36</sup>. ფრონტისათვის სახელმწიფო ბანკში კათალიკოს-პატრიარქ კალისტრატე ცინცაძის სახელზე გახსნილი იყო ანგარიში, რის მეშვეობით თითოეულ მართლმადიდებელ მორწმუნეს საშუალება ჰქონდა, შეეტანა შესაწირი და წვლილი გაეღო საერთო საქმის წარმატებისათვის. მოხუცი კათალიკოსი გამოდიოდა მიტინგებზე და პრესითაც აკეთებდა მოწოდებებს, ხაზს უსვამდა ნაციტური იდეოლოგიის ანტიჰუმანურ და ანტისაზოგადოებრივ ხასიათს; კაცთა მოდგმის დახარისხების ანუ რასიზმის სრულ შეუთავსებლობას როგორც ბიბლიის სულთან და ქრისტეს მოძღვრებასთან, ისე გერმანულენოვანი ხალხების კულტურასთან ზოგადად და დიდი გერმანელი საეკლესიო რეფორმატორის მარტინ ლუთერის სულიერ მემკვიდრეობასთან კერძოდ. ასეთი თანადგომისათვის საბჭოთა მთავრობამ და პირადად იოსებ სტალინმა მას მადლობა გამოუცხადეს (ამ საგანზე მდიდარი მასალა გვხვდება კ-პ კალისტრატეს პირად საარქივო ფონდში. განსაკუთრებით საინტერესოა სტალინთან მიმონერა: ცინცაძე 144)<sup>37</sup>.

ომის შემდეგ კათალიკოს-პატრიარქი კალისტრატე მშვიდობისათვის მეტრძოლთა რიგებში ჩადგა. იგი მონაწილეობდა საერთაშორისო სამშვიდობო ფორუმებში როგორც ამ მოძრაობის აქტიური წევრი; გამოდიოდა სიტყვებით და ინიციატივებით (მოსკოვი 1948 და 1951 წწ.). მას ამ თემაზე მიმონერა ჰქონდა უილიამ კინგთან, ჯოზეფ რაიტთან და ომის საწინააღმდეგო მოძრაობის სხვა წარმომადგენლებთან (ცინცაძე 164,165,171). კათალიკოსი კალისტრატე სიტყვითა და საქმით ძალმომრეობის წინააღმდეგომი იყო: „მიაქციე მახვი-

ლი ალაგსავე თვისსა, რამეთუ ყოველთა, რომელთა აღიღონ მახვილი, მახვილითა წარწყმდენ“ (მათე 26,52) – ნიადაგ ახსნებდა ის ხალხს. სწორედ ქრისტესმიერი სიყვარული მიაჩნდა მწყემსმთავარს *მშვიდობისა და კაცთა შორის სათნოების* (ლუკა 2,14) საფუძვლად და სჯეროდა, რომ მშვიდობა და უზნეობა ურთიერთშეუთავსებელი რამ ცნებებია, რომ თვით რჯულია სრულყოფილი ზნეობის წყარო, მხოლოდ ღვთის რწმენა გადაარჩენს კაცობრიობას. არაერთ ისტორიულ ამბავს გვითხრობდა იგი იმის დასტურად, თუ რა შედეგი მოსდევს ძალმომრეობას. სამეცნიერო მოხსენების ტიპის ერთ ქაგადებაში, რომელიც მან წმ. ნინოს ხსენების დღეს სიონში წარმოთქვა, აღნიშნულია: „როდესაც მირიან მეფეს აღედრა სურვილი, ქრისტეანობა შეეტანა შორის „მთიელთა, ჭართალელთა, ფხოელთა, გუდამაყრელთა და ნილკანელთა“ იძულებითა და მახვილით“ და ეს აზრი გაუზიარა წმიდა ნინოს, უკანასკნელისაგან მიიღო პასუხად: „არა ბრძანებულ არს უფლისაგან მახვილისა აღება, არამედ ჯერ-არს სახარებითა და პატიოსნითა ჯვართა უჩვენო გზა ჭეშმარიტი, მიმყვანებელი ცხოვრებად საუკუნოდ და ვსასოებ, მადლმან ღვთისამან განანათლოს ბნელი იგი გულთა მათთაი“... მირიან მეფემ ეს უბრალო ჭეშმარიტება ვერ შეიგნო და „მცირედ წარმართა მახვილი... და (ფხოელთა) შიშით მოსცნეს კერპნი მათნი დალენად“, მაგრამ თვით კი „გადაკრბეს თოშეთს“. ასეთი ნაყოფი გამოიღო მირიან მეფის უადგილო გულმოდგინებამ და წმიდა ნინოს მიერ ნაჩვენებ გზიდან გადახვევამ: ფხოელები ქრისტეანობასაც გაექცენ და სამშობლო ტერიტორიაც დააცალიერეს. ამ ცდამ დაარწმუნა საქართველოს მპყრობელი ნინოს მიერ არჩეული გზის უპირატესობაში, რის გამოც ხელი აღარ შეუშლია წმ. ქალწულისათვის... და ამრიგად გავრცელებული სარწმუნოება ჩვენთვის შეიქმნა „უდიდეს ზნეობრივ ძალად, რომელმაც აამოძრავა და დაიმორჩილა მთელი საქართველო და რომელიც გადაიქცა ერის სინიდისის საზომად არა გარეგანი რაიმე საშუალებით, არამედ ერის გონების განახლებით და განსჯა-განცდით, რად იგი არს ნება ღვთისა კეთილი, სათნო და სრული (რომ. 12, 2)<sup>38</sup>.

პატრიარქი მიისწრაფოდა, რომ მსოფლიოს ავტოკეფა-



ლურ ეკლესიებს ეცნოთ ქართველი მართლმადიდებელი ერისა და ამ ქვეყნის ეკლესიის საპატრიარქო უფლებები და მართლმადიდებლთა საერთაშორისო ოჯახში ისტორიულად კუთვნილი ადგილი მიეჩინათ მისთვის. კერძო პირთათვის დაწერილ წიგნში: „შენიშვნები საქართველოს ეკლესიის ისტორიიდან“ კ-პ კალისტრატე ხაზს უსვამდა წვლილს, რომელიც მისმა ერმა და ეკლესიამ შეიტანეს საქრისტიანოსა და მსოფლიო კულტურის საღაროში. მითითებულ თხზულებაში ვკითხულობთ: „ვისაც სურს გაეცნოს ქართული ტაძრების კედლების მოხატულობასა და ფერწერას, დაათვალიეროს უბისი, ყინწვისი, გელათი, სვეტიცხოველი და მრავალი სხვანი და თუ ამის შემდეგ მინაწერების, მინიატურებისა და ხელთნაწერების გაცნობის სურვილი აღეძრება, მოინახულოს ჩვენი მუზეუმები... მაშინ ის დარწმუნდება, რომ საქართველოს ეკლესიას თამამად შეუძლია წარდგეს დიდი ერების ეკლესიებთან და თქვას: ის მცირე ნაშთი, რაც ჩემი წარსულიდან გადაურჩა ცეცხლს, მახვილსა და წუმწუმას, რით ჩამოუვარდება მტრებისაგან ხელუხლებელ თქვენს ძეგლებს?“.

საქართველოს საპატრიარქო უფლების საერთაშორისო აღიარებისათვის საქართველოს საკათალიკოსოს მონვევით 1943 წლის 28 ოქტომბერს თბილისში სტუმრად ჩამოვიდა სრულიად რუსეთის პატრიარქ სერგის მიერ ოფიციალურად წარმოგზავნილი სტავროპოლისა და პიატიგორსკის მთავარეპისკოპოსი ანტონი. კვირას, 31 ოქტომბერს, მისი მეუფების თანამწირველობითა და კათალიკოს-პატრიარქ კალისტრატეს მიერ სიონის ტაძარში შესრულდა საღმრთო ლიტურგია, რომლის ძალით და რომლის შემდეგადაც აღდგა ძმური ურთიერთობა საქართველოსა და რუსეთის ეკლესიებს შორის (იხ. „Журнал Московской Патриархии“, Москва, 1944, №3, გვ. 13-19). ამ აქტით რუსეთის ეკლესიამ თავისი ისტორიის მანძილზე ოფიციალურად და ფორმალურ-კანონიკურად პირველად ცნო საქართველოს ეკლესიის თვითთავადობა, დიფტიქში მეექვსე ადგილი განუკუთვნა მას და ამ ფაქტის შესახებ ოფიციალური დოკუმენტით აუწყა აღმოსავლეთის მართლმადიდებელ მწყემსმთავრებს, რითაც საქართველოს მართლმადიდებელ ეკლესიას გზა გაეხსნა

მსოფლიოს სხვა საპატრიარქოებთან ურთიერთობისთვის. ამის შემდეგ შესაძლებელი გახდა, დაწყებულიყო მოძრაობა იმ მიზნით, რომ აღნიშნულ საპატრიარქოებსაც ოფიციალურად და კანონიკური წესებით ელიარებინათ საქართველოს მართლმადიდებელი ეკლესიის ავტოკეფალია დე-იურე<sup>39</sup>. ზაგორსკის სასულიერო აკადემიის მესვეურებმა (ეს აკადემია 1946 წელს განახლდა) ჯეროვნად შეაფასეს კათალიკოს კალისტრატეს ქრისტოლოგიური განსწავლა და 1948 წელს მიიწვიეს იმავე აკადემიის სამეცნიერო საბჭოს წევრად.

მამათმთავარი ომისშემდგომაც იღვწოდა, რომ მშვიდობიანი თანაარსებობა დამყარებულიყო საერო და სასულიერო მთავრობებს შორის, რათა ეკლესიას კულტურულ-ზნეობრივი განვითარების შესაძლებლობა მისცემოდა. ამ მიზანს პატრიარქმა დიპლომატიური ცოდნა და ენერჯია შეაღია: საბჭოთა მთავრობას იგი „ჟამითიუჟამოდ“ სწერდა მოხსენებით ბარათებს, რითაც უსაბუთებდა ეკლესიის მნიშვნელობას ქვეყნის სულიერი ცხოვრებისათვის, ქართველი სამღვდელთა დღებით როლს ჩვენი ისტორიისათვის და იმას, რომ ერის ზნეობა დღესაც აუცილებლობს სარწმუნოებასა და ეკლესიას, რომ კულტურისა და მეცნიერების წინსვლისათვის, მყოფადისათვის აუცილებელია, გავუფრთხიდე და მონაგართ ვუანდერძოთ წარსულის ცოცხალი ნაშთი – ეკლესია. ხელისუფალთადმი ერთ-ერთ ოფიციალურ მიმართვაში კ-პ კალისტრატე ამბობდა: „სამსახურებრივ და სინიდისის მოვალეობად ვთვლი მოგახსენოთ შემდეგი: საქართველოს ეკლესია უძველესი კულტურული დაწესებულებაა ჩვენში. მან სულიერად გამოზარდა ჩვენი ხალხი, გადაარჩინა გათათრებასა და გარუსებას და შეუნარჩუნა საკუთარი ეროვნული სახე. დოღმატიური სწავლით იგი არ განსხვავდება სხვა მართლმადიდებელ ეროვნებათა ეკლესიისაგან, მაგრამ საუკუნეთა მანძილზე მას გამოუმუშავებია თავისებური კილო კითხვისა და გალობისა, წესებისა და წირვა-ლოცვის შესრულებისა, რაც პირადი გადაცემით გადადის ერთი თაობიდან მეორეში, რადგანაც, საგალობლების მცირე ნაწილის გარდა, ყოველივე ზემოაღნიშნული ნოტებზე გადაუღებელია და სათანადო გამოკვლევებში აღუწესხველი. განუსაზღვრელი ძალაუფლებით შემოსილის

უნმიდესის სინოდის ხელისშეწყობით მთლიანად გადაღებულა ნოტებზე რუსულ (სლოვენურ) ღვთისმსახურების საგალობლები, სახარება-სამოციქულოს საკითხავები, ჟამნ-დავითნის კითხვის მანერები და მღვდელ-დიაკვნის სათქმელი კვერქს-ასამაღლებლები, ხოლო წესებისა და მღვდელმოქმედებათა შესრულების შესახებ დასტამბულია ათეული ტომები მცოდნე პირების მიერ. ამავე დროს ჩვენში უნმიდესი სინოდი არამც თუ არ ანარმოებდა კვლევა-ძიებით მუშაობას და ხელს უწყობდა ძველი კულტურის ნაშთების დაცვას, არამედ, მის მიერ მოვლინებულ „განმანათლებელთა“ პირით, გიორგი ხუცესმონაზონისა და შოთა რუსთველის ენას ძაღლების ყეფად თვლიდა, მიქელ მოდრეკილის ჰანგებს მგელთა ხროვის ყმუილს უწოდებდა და „ბრძნულად“ გვირჩევდა – რუსული საგალობლების ნოტებს მიუწერეთ ქართული სიტყვები და ეზიარეთ კულტურული ხალხის ღვთისმსახურებასო... დღეს კი, როდესაც მცირე ერების კულტურული ნაშთები არ არის დატოვებული საბჭოთა მთავრობის ყურადღების გარეშე, ეკლესიურ მხარესაც, უდგებიან რა წმინდა მეცნიერული თვალსაზრისით, იკვლევენ და სწავლობენ. მაგრამ ჯერ კიდევ ბევრი რამ შესასწავლი და დაუწერელია, და ეს ბევრი რამ მოიპოვება მხოლოდ ეკლესიის ნიაღში“ (ცინცაძე 70, ფ. 130).

კათალიკოსი კალისტრატე აქტიურად ჩაება იმ პოლიტიკურ მოძრაობაში, რომელიც 1945 წლის დასაწყისიდან სტალინის ინიციატივით გაჩაღდა და რომელიც თურქეთისაგან მიტაცებული ქართული მიწა-წყლის ისტორიულ სამშობლოსთან, საქართველოსთან, დაბრუნებას და ისტორიული სამართლიანობის აღდგენას ისახავდა მიზნად. საქართველოს მართლმადიდებელი ეკლესიის საჭეთმპყრობელი, აჭარელი მუსლიმების ლიდერ რასიხ ბერიძესთან ერთად, მხარში ამოუდგა ცნობილ მეცნიერ-ისტორიკოსებს და მწერლებს, რომლებიც აღნიშნულ იდეის ხორცშესხმისათვის იღვწოდნენ. ამ იდეის ისტორიულ საფუძველებსა და სამართლიანობას ასაბუთებდნენ. ამის დასტურია მისი პუბლიკაცია – „წერილი რედაქციის მიმართ“ („კომუნისტი“, 1946, 8.1, №6)<sup>40</sup>. ცნობილია ამავე ავტორის სხვა დოკუმენტიც, დაცული მის პირად საარქივო ფონდში (ცინცაძე 115): „საქართველოს საკათოლიკოზოს ზემო

ქართლის ეპარქიებისათვის“, რომელშიც ვკითხულობთ: „დროა ქრისტიანულ საქართველოს გვერდში ამოუდგეს 400 წლის განმავლობაში მისგან ჩამოშორებული მკვიდრი ძმა და მასთან ერთად შეუდგეს ადამიანის გამაფაქიზებელ და ამაღლებელ კულტურულ მუშაობას... ოსმალეთის პრესის ზოგიერთი წარმომადგენელნი ავრცელებენ ხმას, ვითომც მუსულმან ქართველთა გაერთიანება საქართველოსთან გამოიწვევს საქართველოს ეკლესიის მიერ მათ გაქრისტიანების ცდასო. ჩვენ აღთქმას ვდებთა ჩვენისა და ჩვენი მოადგილეების სახელით: გაბრიყვებით, მზაკვრობითა და ცთუნებით არც ერთი მუსულმანი არ იქნება გაქრისტიანებული“. ამ წერილითვე მან წარმოგვიდგინა „ზემო ქართლის“ სახელით ცნობილი ტერიტორიის ეპარქიათა სრული სია: ალაშკერტის, ანჩის, ბანის, დადაშენის, ერუშეთის, იშხანის, კარის, სატრაფელას, ტბეთის, ნურწყაბისა და წყაროსთავისა, რაც, მისივე მითითებით, უდრის ახლანდელი ოსმალეთის ოლქებს: ათინს, ალაშკერტს, ართვინს, არტაანს, ბასიანს, გუმბრისს, თორთომს, ისპირს, კისკომს, ოლთისს, რიზეს, ყარსს, ყალზევანს და ხოფას, მეტწილად მუსლიმანი ქართველებით დასახლებულს. „ეს ის მხარეა, – აღნიშნავს ავტორი, – სადაც დაირწა აკვანი ქართული კულტურული ცხოვრებისა და სადაც ყველაზე ადრე შეიგნეს აუცილებლობა პოლიტიკურად გაერთიანებისა ცალ-ცალკე დაყოფილი საქართველოსი“<sup>41</sup>.

### *წარსულის მემკვიდრეობისათვის*

მისმა უწმიდესობამ და უნეტარესობამ არამცირედი ამაგი დასდო ისტორიული ძეგლების მოვლისა და პატრონობის საქმეს. შვენივს უწყება, რომ ამ მიმართულებით ის დეკანოზობის დროსაც იღვწოდა. იგი იყო იმ კომიტეტის მდივანი, რომელიც მიზნად ისახავდა მცხეთის ჯვრის ტაძრის აღდგენასა და დაცვას. ჩვენს ხელთაა თაბახის ფურცლის ორივე გვერდზე სტამბურად დაბეჭდილი ტექსტი, რომლის რამდენიმე ეგზემპლარი დაცულია მის პირად საარქივო ფონდში. ესაა მოწოდება მოქალაქეებისადმი, რათა გამოიჩინონ კეთილი ნება და მატერიალურად დაეხმარონ კომიტეტს. ენა,

ლექსიკა და სტილი ცხადყოფს, რომ ამ დოკუმენტის ავტორი არის დეკანოზი კალისტრატე ცინცაძე. მონოდების ტექსტი, დაწერილი მე-20 საუკუნის 10-იან წლებში (ზუსტი თარიღი არ უზის), საყურადღებოა არა მხოლოდ ძეგლთა დაცვის ისტორიის კუთხით, არამედ მეცნიერული თვალსაზრისითაც საგულისხმო დეტალებს შეიცავს.

აი, ამ ტექსტის ძირითადი ნაწილი:

«მცხეთის პირდაპირ, არაგვის გაღმა, ფრიალო კლდის პირად, დიდებულად აღიმართება და სანუგეშოდ გადმოჰყურებს არემარეს უუძველესი ქართველთ ტაძარი – „ჯვარის საყდარი“ ანუ, როგორც ზოგნი ეძახიან, „ჯაჭვის საყდარი“.

გარდმოცემა გვეუბნება, სადაც ეს ტაძარია აღმართული, იქ ერთ დროს წმ. ნინოს უცხოვრიაო. აქ იგი დაბინავებულა იმავე კლდის დასავლეთ ფერდობზე, ერთ გამოქვაბულში, და ცრემლით გამოუთხოვნია უფლისაგან სასმელი წყარო. ეს წყარო დღესაც განთქმულია, „ძუძუს წყლის“ სახელით, მცხოვრებთა შორის სასწაულითა. იქვეა გამოქვაბულიც.

თვით იმ ადგილს, სადაც დღეს საყდარი სდგას, წმ. ნინოს აღუმართავს ერთი იმ ოთხ ჯვართაგანი, რომელნიც სასწაულთ-მოქმედის ხისაგან იყვნენ გაკეთებულნი. დღეს ეს ჯვარი თვით ტაძარშია დასვენებული და მისს უდიდეს სინმიდეს შეადგენს.

მეშვიდე საუკუნის დასაწყისში, ქართლის მამფალთა, სტეფანოზისა, ადარნასესი და დემეტრეს მიერ აღშენებულმა „ჯვარის საყდარმა“ შეუკეთებლად მოაწია ჩვენამდე და თავის კედლებზე მრავალი ძვირფასი საისტორიო-საარქეოლოგიო წარწერა და საქანდაკო-ჩუქურთმოვანი სამკაული შეგვინახა.

1893 წელს ან გარდაცვალებულმა ყოვლად სამღვდელო ალექსანდრე ეპისკოპოზმა თავისი საფასით ამ ტაძარს რკინის სახურავი გადაჰხურა, მაგრამ ეს სახურავი მალე ქარმა გადაჰგლიჯა, და დღეს ეს დიდებული ნაშთი ირღვევა, და თუ ძლიერ მალე არ მივეშველნეთ, სრულად დაიქცევა. ამის დაქცევა კი იქმნება დაქცევა და აღმოფხვრა უუძველესი ქართულ ხუროთმოძღვრების ნაშთისა, უუძველესი ქართულის ანბანის და წერის ნიმუშებისა. ბევრ ტაძარ-მონასტრებს და

ეკლესიებს მოუწევია ჩვენამდე დანგრეულს თუ დაუნგრეველს, ბევრი კედლის წარწერები და ტყავის წიგნები მოგვეპოვება, მაგრამ არც ერთ ეკლესიისა არ შეგვიძლია დამტკიცებით ვთქვათ, ჯვარის ეკლესიის უადრეს იყვეს აშენებული, არც ერთ სხვა წარწერის არა გვაქვს საბუთი გადაჭრით უჩვენოთ, რომ ჯვარის წარწერის დროს ეკუთვნის. ამიტომ ამ უუძველეს ხუროთ-მოძღვრების ნაშთს და ქართულ პალეოგრაფიის უძველესის ნიმუშის შენახვას განსაკუთრებული ყურადღებით უნდა მოვექცეთ, განადგურებას გადავარჩინოთ და შეურყეველი გადავსცეთ მომავალ თაობას».

აღნიშნული მიმართულებით კალისტრატე ცინცაძეს შრომა და რუდუნება არასდროს შეუწელებია. პირიქით: მან ამ სფეროში ღვაწლი მას შემდეგ გააათქვამა, რაც ათეისტმა კომუნისტებმა ეკლესიებისა და მონასტრების წინააღმდეგ ვანდალური ბრძოლა დაიწყეს. მისი თავდაუზოგავი მცდელობით მრავალ ტაძარს ასცდა დანგრევა (მაგალითად, ქაშვეთის ეკლესიას, როგორც უკვე აღვნიშნეთ, გრიგოლ რობაქიძესთან ერთად). იგი სათანადო დაწესებულებებს განუმარტვდა, თუ დღევანდელი მთავის რაოდენი მნიშვნელობა აქვს გარდასული წლების ცოცხალ ნაშთს – მართლმადიდებელ ეკლესიას თავისი არქიტექტურით, საღვთისმსახურო წესებითა და სულიერი მემკვიდრეობით. მის წინადადებას და თხოვნას მთავრობა უმეტეს შემთხვევაში ანგარიშს უწევდა (გავითვალისწინოთ, რომ იმდროინდელი მთავრობისა და ხელისუფლების წარმომადგენელთა უმეტესობა მისი ნამონაფარი იყო).

მეორე მსოფლიო ომის შემდეგ ეკლესიას შედარებით წყნარი ცხოვრება ეღირსა. ანტირელიგიური კამპანიაც, ასე თუ ისე, მშვიდობანი გახდა: ეკლესიების ნგრევა, ანდა ადმინისტრაციული წესით დაკეტვა, სასულიერო პირების დაჭერა-გადასახლება აღარ ხდებოდა. ამის წყალობით საქართველოს საკათალიკოსომ მოახერხა და 1946 წელს ბროშურის სახით გამოსცა „სიონის ტაძრისათვის მცირედი ცნობანი“. ამავე წელს დაიბეჭდა საქართველოს ეკლესიის მართვა-გამგეობის დებულებანი. 1944 წლიდან დაიწყო ყოველწლიური საეკლესიო კალენდრის გამოცემა. ლადო გუდიაშვილის მიერ მოიხატა ქაშვეთის წმ. გიორგის ეკლესიის საკურთხველი: იხ. ლ.

გუდიაშვილი, მოგონებების წიგნი (ლიტერატურული ჩანაწერი თინათინ კობალაძისა), თბ. 1979, გვ. 85-87. ასეთი რამ 30-იან წლებში თითქმის წარმოუდგენელი იყო.

კალისტრატე ცინცაძემ მნიშვნელოვანი ამაგი დასდო ქართულ სიძველეთსაცავებს. 1928 წელს, მიტროპოლიტობისას, მან თბილისის სახელმწიფო უნივერსიტეტის სიძველეთსაცავს (ყოფილი საეკლესიო მუზეუმის ფონდს) შესწირა ხელნაწერები: „ლოცვანი“ (ქეთევან დედოფლის ნაქონი, XVI), „მარგარიტი“ (ქადაგებათა წიგნი, XVI), „სჯულის კანონი“ (დავით რექტორის გადაწერილი) და სხვა, რაც უდრის დღევანდელი ხელნაწერთა ინსტიტუტის A ფონდის №№ 1064, 1291, 1737, 1738, 1739. კალისტრატე ცინცაძე ფხიზლად ადევნებდა თვალყურს მშობლიური მეცნიერების წინსვლას და არაერთხელ გაუწევია სამსახური მისთვის საფუძვლიანი შენიშვნებით რიგ დარგში; არაერთხელ გამოსულა ის სამეცნიერო სესიებზე და არაერთი კონსულტაცია გაუწევია მას ქართველოლოგიის სხვადასხვა უბანზე მკვლევრებისათვის, თანამემამულეებისთვისაც და უცხოელებისთვისაც.

### *ამაგდარი სულიერი მოძღვარი*

სამოღვაწეო ასპარეზზე გამოსვლისთანავე კალისტრატე ცინცაძე დაუმეგობრდა ქართულ კულტურას. XIX-XX საუკუნეების მიჯნაზე არ გადადგმულა მნიშვნელოვანი ნაბიჯი ერის სულიერი წინსვლისა, საყურადღებო კვალი რომ არ დამჩნია მას სიტყვიტა თუ საქმით. მართალია, ახალი (საბჭოთა) კანონის მიერ ეკლესიის სარბიელის მკაცრად შემოიფარგლა და მისი მოღვაწეობის არეალიც შეიზღუდა, მაგრამ კათალიკოსი კალისტრატე, როგორც დიდად განათლებული სასულიერო პირი, დამსახურებული პედაგოგი და კულტურტრეგერი, მაინც ინარჩუნებდა ავტორიტეტს ერის სულიერი ცხოვრების ბევრ დარგში. მას ანგარიშს უწევდნენ და მისი დამსახურების წინაშე ქედსაც იხრიდნენ თვით კომუნისტური მთავრობისა და წითელი ინტელიგენციის წარმომადგენლები, რომლებსაც ახსოვდათ, და კეთილად ახსოვდათ, მისი პედაგოგიური ღვაწლი და სათნოება. მის მიმართ პიროვნულ

პატივისცემას გამოხატავდნენ კომუნისტური ზედაფენის წარმომადგენლები: იოსებ სტალინი, კანდიდ ჩარკვიანი, ზაქარია კეცხოველი და სხვანი, თუმცა საქართველოში, ისე როგორც საბჭოთა კავშირში ზოგადად, ანტირელიგიური პროპაგანდის მასშტაბი, ძალადობრივ მეთოდებზე უარის თქმის მიუხედავად, არ შემცირებულა.

კალისტრატე ცინცაძის პიროვნების ინტელექტუალურ სიღრმეზე და, რაც მთავარია, მის სასულიერო და კულტუროლოგიურ ღვაწლზე, მის დამსახურებაზე განათლების, ხელოვნებისა და მეცნიერების წინაშე მეტყველებს მისი ხანგრძლივი და შინაარსიანი სამოძღვრო პრაქტიკა. აქ აგრეთვე (სხვათა შორის) იგულისხმება რიგი კულტურულ-საგანმანათლებლო ღონისძიების დროს მის მიერ გადახდილი პარაკლისები და ამ პარაკლისებზე წარმოთქმული ქადაგებები, ასევე, რელიგიის, კულტურისა და მეცნიერების მოღვაწეთადმი მიძღვნილი ეპიტაფიები (გასვენებებზე წარმოთქმული სიტყვები). ამგვარი სიტყვა-ქადაგებებით ის საკითხის ძირითად, განმსაზღვრელ და ყველაზე მნიშვნელოვან ასპექტებს გამოკვეთდა ხოლმე, ეს ეპიტაფიები (რომელთაგან ბევრი გამოუქვეყნებელია) ძალზე საინტერესო და ფასეულია ქართული კულტურისისა და, მეტადრე, მწერლობის ისტორიისათვის<sup>42</sup>. ასეთ ეპიტაფიათა შორის პირველ რიგში უნდა მოვიხსენიოთ: „განჯითგან ნიკოლოზ ბარათაშვილის გადმოსვენების გამო“, „გიორგი დავითის ძე ქართველიშვილის გარდაცვალების გამო“, „სამსონ თოფურიას გარდაცვალების გამო“, „ილიას გარდაცვალების გამო“, „ყოველად სამღვდელთა ალექსანდრეს გარდაცვალების გამო“, „გრიგოლ ორბელიანის გარდაცვალებითგან ოცდახუთის წლის შესრულების გამო“, „დ. ზ. სარაჯიშვილის გარდაცვალების გამო“, „ალექსანდრე სამსონის ძე ხახანაშვილის გარდაცვალების გამო“, „კ. ს. მესხის გარდაცვალების გამო“, „ნიკო ლომოურის გარდაცვალების გამო“, „თევდორე დავითის ძის ჟორდანიას გარდაცვალების გამო“ და სხვა\*.

---

\* ტექსტები ავტორისეული ბიბლიოგრაფიული შენიშვნებით იხ. ზემოთ („ყვავილკრებული“).



პატრიარქი მღვდელმსახურებასთან ერთად განაგრძობდა მეცნიერულ-შემოქმედებით მუშაობას. მან ხელი მიჰყო იმდროისათვის მთელი სიმწვავით წამოჭრილი საკითხების გაშუქებას. სწორედ ამგვარი საკითხებია დასმული და გაანალიზებული მის შემდეგ შრომებში: „ვეფხისტყაოსნის ავტორის მსოფლმხედველობისათვის (შემთხვევითი დაკვირვებანი)“, კრიტიკული შენიშვნები შ. ნუცუბიძისა და მ. გოგიბერიძის რუსთველოლოგიური შრომების შესახებ, ტექსტოლოგიური შენიშვნები ვეფხისტყაოსნის კონსტანტინე ჭიჭინაძისეული გამოცემის მიმართ, „კანონნი წმიდათა მოციქულთანი“ (გამოკვლევით და შენიშვნებით), „ქართული ოდიკისათვის“, „ნიკიფორე ირბაქის ვინაობისათვის (ქართული წიგნის 300 წლისათვის იუბილეს გამო)“, „მასალები საქართველოს ეკლესიის კალენდრის შესახებ“, „ქვაშუეთის წმ. გიორგის ეკლესია (ისტორიულ-არქეოლოგიური ძიებანი)“, „ივერიის საეკლესიო წესი“ (რუს. ენაზე), „მცხეთა და მისი ტაძარი „სვეტიცხოველი“ (რუს. ენაზე), შენიშვნები „საქართველოს ისტორიის“ ჯანაშიასეულ ნაშრომზე და სხვა. მან დაგვიტოვა მოგონებათა ციკლი XIX–XX საუკუნეების ბევრ თვალსაჩინო მოღვაწეზე. მღვდელმთავრობისდროინდელ შრომათა უმრავლესობას ის „კ. მ. ეკაშვილის“ ფსევდონიმით აწერდა ხელს.

გამოკვლევა „ნიკიფორე ირბაქის ვინაობისათვის“ მეცნიერმა მიტროპოლიტობის დროს, 1929 წელს, დაწერა (ავტოგრაფი ინახება ხელნაწერთა ინსტიტუტში: ცინცაძე127)<sup>43</sup>. ხელნაწერის აშიაზე ავტორს ნაღვლიანდ მიუწერია: „ეს წერილი უნდა დაბეჭდილიყო „მნათობში“ (სათანადო წარწერაც ადასტურებს ამას), მაგრამ ფსევდონიმის გამომჟღავნების გამო უკან დამიბრუნეს. მერე წაიღეს (მეორე ცალი) „ლიტერატურული მემკვიდრეობისათვის“, მოიწონესო, მითხრეს, მაგრამ არ დასტამბეს... მესამე ცალი დღესაც ი. თავაძესთან არის... გადასცა ვ. ეგნატაშვილმა“. სათაურთან გვხვდება მინაწერი (სხვა მელნით და ხელით): „წერილი იბეჭდება საკითხის დადგინებისათვის. რედ.“. მაშასადამე, ეს ან „მნათობის“, ან „ლიტერატურული საქართველოს“ იმდრო-

ინდელი რედაქტორის ავტოგრაფია. მას, ჩანს, მასალის გამოქვეყნება დაუგეგმავს, მაგრამ ამაოდ.

შრომა ერთობ საყურადღებოა. იგი ეძღვნება პირველი ქართული ნაბეჭდი წიგნის 300 წლისთავს და ამ სანატრელი ნამონყების ერთ-ერთი სულისჩამდგმელის – ნიკიფორე ირბაქის – ვინაობას. ნიკოფორე ირბაქი (ანუ ირბახი) თანაავტორია პირველი ქართული დასტამბული წიგნისა „ქართულიტალიური ლექსიკონი“, რომელიც კათოლიკე მისიონრების დამწყალობებით დაიბეჭდა რომში 1629 წელს.

როგორც თავფურცელი გვამცნობს, ლექსიკონი შეუდგენია იტალიელ ბერს სტეფანე პაოლინის, რომელსაც ამ საქმეში დახმარებია „წმიდა ბასილის წესის მონაზონი“, „ქართველი“ ნიკიფორე ირბაქი. ძველთაგანვე განმტკიცებული იყო აზრი, რომლის თანახმად ნიკიფორე ირბაქი არის გაკათოლიკებული ქართველი (შდრ. მ. თამარაშვილი, ისტორია კათოლიკობისა ქართველთა შორის, თბ. 1902, გვ. 92-95). მაგრამ მკველვარმა დ. კარიჭაშვილმა დაარღვია ტრადიციული შეხედულება და ნიკიფორე ირბაქი იმ ცნობილ ბერძენ მიტროპოლიტად მიიჩნია, რომელიც იერუსალიმიდან დიპლომატიური მისიით იყო წარმოგზავნილი საქართველოსა და რუსეთში (დ. კარიჭაშვილი, ქართული წიგნის ბეჭდვის ისტორია, თბ. 1929, გვ. 17-22).

კ. მ. ეკაშვილის გამოკვლევის მიზანია ქართულ და უცხოურ წყაროებზე დაყრდნობით გაარკვიოს იმ მამულიშვილის ვინაობა, რომელმაც ქართული ანბანი პირველად აზიარა იოანე გუტენბერგის გამოგონებას. ავტორი ასაბუთებს, რომ მე-17 საუკუნის პირველი ნახევრიდან ცნობილი ორი ნიკოფორე (ერთი – ეპისკოპოსი და მეორე – მიტროპოლიტი) სხვადასხვა პიროვნებაა. ამათგან პირველი ქართველია, მეორე – ბერძენი. მკვლევრის მეცნიერული არგუმენტაციის თანახმად, ქართველი ნიკიფორე იყო იერუსალიმის ქართული მონასტრის წინამძღვარი, რომელიც შემდგომ ეპისკოპოსის ხარისხით შეიმოსა. თეიმურაზ პირველმა 1626 წელს სწორედ ის წარგზავნა ევროპაში ელჩად, სადაც მან სტეფანე პაოლინის ხელი გაუმართა ქართულ-იტალიურ ლექსიკონზე მუშაობისას. იერუსალიმის ქართული მონასტრის იმდროინდელ

(მე-17 საუკუნის პირველი ნახევრის) აღაპებსა თუ სხვა დოკუმენტებზე დაკვირვებამ, აღნიშნული ლექსიკონის გაანალიზებამ მეცნიერი იმ დასკვნამდე მიიყვანა, რომ ნიკიფორე ირბაქი იგივე ნიკიფორე ირუბაქიძე-ჩოლოყაშვილია („ირბაქი“ ანუ „ირბახი“ „ირუბაქიძის“ იტალიური სახეცვლილება): „ნიკოფორე ირბაქი არის კახი, ჩოლოყაშვილი, ომანის ძე, ჯვრის მამა, გოლგოთის იღუმენი, ბრძენი, ფილოსოფოსი, რიტორი, შვიდი ენის მცოდნე“. კალისტრატე ცინცაძე არ იზიარებს მამა მიხეილ თამარაშვილისა და სხვათა გავრცელებულ აზრს ნიკოფორე ირბაქის გაკათოლიკების თაობაზე და ფიქრობს, რომ ეპისკოპოს ნიკოფორეს, რომელიც იღუმენის მოვალეობასაც ასრულებდა გოლგოთის ქართულ მონასტერში, კათოლიკობა არ მიუღია. მაშ საიდან გაჩნდა ცნობა მისი გაკათოლიკების შესახებ? ამის მიზეზი მოძღვარ ნიკიფორე-ნიკოლოზის მაღალ სარწმუნოებრივ კულტურაში უნდა ვეძებოთ. მკვლევარი ამბობს: მამა ნიკიფორე იყო „იწრო სარწმუნოებრივ სექტანტობისაგან თავისუფალი და ფართო მსოფლმხედველობის ადამიანი“, რის გამოც მას კათოლიკეებთან თბილი ურთიერთობა ჰქონდა და უკანასკნელნიც ფიქრობდნენ, კათოლიკეაო (გვ. 27, შენ. 52). ფაქტია, რომ ქართული წიგნის დიდი ამგდარი ბოლომდე პატივცემული იყო როგორც მართლმადიდებელთაგან, ისე კათოლიკეთა მხრიდან.

კალისტრატე ცინცაძის სამეცნიერო მოღვაწეობაში უმნიშვნელოვანესი ადგილი უჭირავს ისტორიულ-არქეოლოგიური ხასიათის შრომებს ქაშვეთის ეკლესიის შესახებ. ამ საკითხით იგი ადრე დაინტერესებულა და 1910 წელს შესაბამისი წერილებიც გამოუქვეყნებია ხელმოუწერლად ქართულ-რუსულ გაზეთებში. აღნიშნულ წელს იკურთხა ახალი ტაძარი (შენობა) და ტრაპეზი ქვაშვეთის წმ. გიორგის ეკლესიისა. მაშინ, საეკლესიო ცხოვრების თითქმის ყველა უბანზე რუსული ყაიდის ბატონობის დროს, ეროვნული ტრადიციით ტაძრის აგება-გამშვენება არაჩვეულებრივი მოვლენა იყო. ამიტომაც გაუღიზიანებია მამაპაპისეული ტრადიციით შედგენილ პროექტს „ყოველსავე ქართულის მოძულე ადმინისტრაცია რუსეთისა“. კ. ცინცაძე გვიამბობს (იხ. მისივე „ტფი-

ლისის ქვაშვეთის წმ. გიორგის ტაძრისათვის“; რემინგტონზე: ცინცაძე 70, ფ. 101): „1903 წლის იანვარში გეგმა წარედგინა დასამტკიცებლად და საგუბერნიო სამმართველოში გასაგზავნად ალექსი ეგზარხოსს აღმშენებლ [ტაძრის მშენებლობის] კომიტეტის მრთელი შემადგენლობის მიერ, თავმჯდომარის, გენერალ-ადიუტანტის თავადის ივანე გივის ძის ამილახორის მეთაურობით. ეგზარხოზმა გადაავლო გეგმას თვალი თუ არა, გამოსწია თავის სამუშაო მაგიდის ერთ-ერთი უჯრა, ამოიღო ხახვისთავა გუმბათიანი ეკლესიების მრავლად დამზადებული გეგმები (ვიატიკიდან ჰქონდა ჩამოტანილი), გადაუშალა ამილახორს და უთხრა: ეს არა სჯობია, თქვენო ბრწყინვალეებავ! აქ სამი მხრით ხოროები არის, ხალხიც მეტი დაეტევა, ლამაზიც არის და იაფიც დაჯდებაო. ამილახორმა, გაითვალისწინა რა, თუ რა სუნით იყო გაჟღენთილი ეს წინადადება, მოახსენა პატრიოტ-მღვდელთმთავარს: შეიძლება, თქვენო მაღალყოვლადუსამღვდელოესობავ, ეს სჯობდეს კიდევ, მაგრამ ჩვენ მამა-პაპას გამოუმუშავებია აი ის გეგმა, ჩვენი მხრის საუკეთესო ტაძრები იმ გეგმით უშენებიათ და ჩვენც გვსურს ჩვენი სამრევლო ტაძარიც ამნაირად ავაგოთო. ეგზარხოზმა არც აცივა და არც აცხელა: თქვენო ბრწყინვალეებავ, წინაპრებს რაც სისულელე (გლუპოსტი) ჩაუდენიათ, ჩვენ როდი უნდა გავიმეოროთ! ოთხმოცი წლის მოხუცმა ძლივს შეიკავა თავი და მხოლოდ ეს მოახსენა: წინაპართა ამ მოქმედებაში ვერც ჩვენ, უბრალო სიკვდილის შვილები, ვერც ჩვენი და უცხო ქვეყნების მეცნიერნი ვერ ხედავენ სისულელეს და თქვენ კი, როგორც გნებავთ, ისე იფიქრეთო. ენაშეუბრუნებლობას დაჩვეულმა თვითმპყრობელობის განაწყენებულმა მოხელემ თითქმის ერთ წელიწადს დაავიანა გეგმის გაგზავნა დასამტკიცებლად, მაგრამ ბოლოს ანგარიში გაუნია ამილახორის „დიდკაცობას“ და გეგმა წარგზავნილ იქმნა დასამტკიცებლად“.

მამულიშვილები სიხარულით შეეგებნენ ქაშვეთის ახალი ტაძრის ეროვნული არქიტექტორულ-ხუროთმოძღვრული ტრადიციების მიხედვით განახლებას (იხ.: ა. ჯორჯაძე, ქართული მუსიკის შესახებ, „სახალსო გაზეთი“, 1910, 27. X, №142; მისივე, თხზულებანი, წიგნი მესამე, თბ. 1911, გვ. 34-35. შდრ.

ვ. ბერიძე, თბილისის ხუროთმოძღვრება 1801-1917, ტ. II, თბ. 1963, გვ. 87-89). „მიხარის, როცა ვხედავ ამ ტაძრის მამა-პაპათა მიერ შემუშავებული გეგმით შენებას. იქნება, ღვთის შენევნით, მათი სარწმუნოებრივი გრძნობაც განცხოველდეს ჩვენშიო“ - ხშირად იტყოდა თურემე მცხოვანი იაკობ გოგებაშვილი.

1918 წელს ქაშვეთის სამრევლო საბჭოს მიუმართავს თხოვნით წინამძღვრისათვის, დაენერა ამ ეკლესიისა და მისი მრევლის თავგადასვალი. მამა კალისტრატეს სიამოვნებით თავსუდევს ეს დავალება და 1927-30 წლებში შეუდგენია ვრცელი (386 გვერდიანი) მონოგრაფია სათაურით: „ქვაშვეთის წმიდის გიორგის ეკლესია ტფილისში“ (ცინცაძე 117. ხელნაწერი, ავტორის მითითების თანახმად, უნდა ინახებოდეს აგრეთვე საქ. ხელოვნების ინსტიტუში)<sup>44</sup>.

ამ შრომაში თავმოყრილი და გაანალიზებულია აღნიშნული თემის ირგვლივ არსებული ყველა ისტორიულ-არქეოლოგიურ-ეთნოგრაფიული, ლიტერატურული თუ ფოლკლორული მასალა. განსაკუთრებული მნიშვნელობისაა XVIII საუკუნის ცნობილი საეკლესიო იერარქების: ქრისტეფორე თბილელის, ანტონ პირველი და ანტონ მეორე კათალიკოსების, ვარლამ მიტროპოლიტისა და სხვათა სიგელ-გუჯარები, რომელთათვისაც ავტორს ქაშვეთის მრევლთაგანის, ნ. არჯევანიძის, ოჯახში მიუკვლევია.

წყაროების ზედმიწევნით შესწავლის შედეგად მკვლევარმა გამოავლინა თბილისის ქაშვეთის წმ. გიორგის ეკლესიის სამი ტაძრის არსებობა: პირველ ტაძრად უნდა ჩაითვალოს 1864 წელს საბოლოოდ დანგრეულ-დაქცეული რიყის ქვისაგან ნაგები ტაძარი, ვინაიდან მასზე ადრინდელი ტაძრის შესახებ არავითარი ცნობა არა გვაქვს. მეორე ტაძარი (ჯვრის ტიპისა, გუმბათოვანი) პირველი ტაძრის გვერდით აუცილებლად 1753 წელს ფილიპე დეკანოზისა და გივი ამილახორის თაოსნობით. 1755 წელს ეს ტაძარი მოუხატავს ოსტატ ნიკოლოზ აფხაზს, მაგრამ 1810-17 წლებში გენერალ ტორმასოვს „შეუკეთებ-გაუმშვენებია“ იგი და აღნიშნული მხატვრობაც ნაუშლიათ; მესამე ტაძარი, ამჟამინდელი, დეკ. კ. ცინცაძის თაოსნობითა და არქიტექტორ ლ. ბილფელდის მი-

ერ შემუშავებული გეგმით 1904-10 წლებში აღუმართავთ ძველი – უკვე სერიოზულად დაზიანებული და დანგრევის პირამდე მისული – შენობის ალაგას.

„სამთავისის“ მოდელით აგებული ეს ტაძარი ქართული ხუროთმოძღვრების იშვიათი ნიმუშია (ხუროთმოძღვარი ე. ანდრეოლეტი). კ. ცინცაძის თქმით, იგი „წარმოადგენს იშვიათ შეთანხმებას სიმარტივისას და სიმსუბუქისას, თვალტანადობისა და სილმაზისას... თუ ქართული ხუროთმოძღვრების განსაკუთრებულ თვისებას წარმოადგენს ჩუქურთმა-გრეხილების სინაზე და სიმრავლე, ქვაშვეთის ტაძარი, შეიძლება თამამად ითქვას, ერთადერთი და საუკეთესო ძეგლია ამ მხრივ ტფილისში. იგი შემოსილია ჩუქურთმებით ზომიერად: არც ისე დარიბად, როგორც სიონი, და არც ისე ჭარბად, როგორც ნიკორწმინდა და ქვათახევი. ჩუქურთმები გადმოღებულია საქართველოს სხვადასხვა ეკლესიებიდან და შეხამებულ-შეფარდებულია ერთიმეორესთან იმნაირად, რომ უცებ ვერც კი გაარჩევთ, განსხვავდება რითიმე ერთი სარკმლის თამასები მისი მეზობელი სარკმლის თამასებისაგან თუ არა. ესეც ერთგვარი თავისებურებაა ქართული ხუროთმოძღვრებისა“ (გვ. 50-51).

აღნიშნულ შრომაში ფრიად საყურადღებოა მსჯელობა ტოპონიმ „ქვაშვეთის“ შესახებ (გვ. 5-12). ავტორი ამ სახელწოდებით საქართველოს სხვადასხვა კუთხეში რამდენიმე სალოცავს ადასტურებს. ეს სალოცავებია: ქართლში: საციციანოს მთის კალთაზე (ხაშურის გასწვრივ, მტკვრის მარჯვენა ნაპირზე), სოფლების თავუეთისა და დამპალოს მახლობლად, სოფ. ქვაშვეთში, სოფ. მუხრანში და სოფ. ქემერტის მახლობლად; კახეთში: სოფ. გურჯაანში (სახასოში), სოფ. ზიარში, სოფ. აწყურში („თეთრი გიორგის“ ქვემოთ ყოფილა ეკლესია, რომელიც ამჟამად აღარ არსებობს, მაგრამ იქ დარჩენილა ხე „ქვაშვეთის ხედ“ წოდებული); იმერეთში: სოფლებში: ფარცხანაყანევში, დიდიჯიხაიში, კვახჭირში და ნიგოზეთში; საინგილოში: სოფ. ქურმუხში; სვანეთში: ლენჯერის საზოგადოების სოფ. ქვაშვეთში. ამ ტაძართა დღესასწაული მენელსაცხებელთა (აღდგომიდან მეორე) კვირიაკეს არის დანიშნული და ყველა ეს ტაძარი წმინდა გიორგის სახელს ატარებს. რაც შეეხება სახელწოდებას „ქვაშვეთი“, ავტორი ფიქრობს, რომ „ქვაშვე-

თის“ („ქაშუეთის“, „ქაშვეთის“) ეტიმოლოგია უნდა აიხსნას იმ ცნობილი გადმოცემით, რომელიც წმ. დავით გარეჯელისადმი მიძღვნილ საცისკრო კანონშიც კი არის არეკლილი, – შეცდენილი ქალის მიერ ქვის შობა. ჩამოთვლილ „სოფლებში „ქვაშვეთობა“ და მისი მენელსაცხებელთა დედათა კვირიაკეს დღესასწაულობა, – ამბობს მკვლევარი, – გადატანილია იქიდან, სადაც დაედო საფუძველი „ქვაშვეთობას“, ე. ი. ტფილისიდან. ხოლო „ქვაშვეთობის“ წმ. გიორგის ტაძრებთან დაკავშირება გვაძლევს საბუთს ვთქვათ გადაჭრით: გარეთუბნის (ასე უწოდებდნენ ძველად ამ ადგილს) „მონასტრის“ ტაძარიც (რომლის შესახებაც გარდამოცემია საუბარი) წმ. გიორგის სახელობაზე იყო აშენებული“.

***შენიშვნა:** ტოპონიმ „ქვაშვეთის“ წარმომავლობაზე მეცნიერებაში განსხვავებული აზრიც არსებობს: შდრ. აკ. შანიძე, ქართველთა მონასტერი ბულგარეთში, თბ. 1971, გვ. 365-368. მსცოვანი აკადემიკოსი „ქაშვეთ“-ს აკავშირებს „ქაჯუეთ“-თან, რაც მისი დაკვირვებით „ქაჯთა სამყოფელს“ ნიშნავს.*

ასევე საყურადღებოა ხსენებულ გარდმოცემასთან დაკავშირებული კ. ცინცაძისეული დაკვირვებანი და ვარაუდები: თბილისის ძველ „გარეთუბანში“ V-VI საუკუნეებში ე. წ. „მოსენაკეთა“ არსებობის შესაძლებლობა (გადმოცემაში თქმული „მონასტერი“ ხომ არ უდრის მოსენაკეთა საზოგადოებას?), ქართველთა ყოფა-ცხოვრებაში „მოსენაკეობის“ კვალის დადასტურება და სხვა<sup>45</sup>.

საკითხი, თუ ქართველმა ერმა თავის უახლოეს მფარველად რატომ დასახა წმ. გიორგი, ამ შრომაში ასეა გადანყვეტილი: „ქართველი ერის გაქრისტიანების დროსვე საქართველოში გავრცელდა თქმულება კაბადუკიელ ჭაბუკ მხედარ გიორგის შესახებ, რომელიც აღესრულა 303 წელს, ე.ი. ორი-სამი ათეული წლით ადრე ქართველი ერის „მონათვლამდე“. თქმულებით, ჭაბუკი გიორგი იყო სამშობლოს ერთგული დამცველი („მფეთა წინამბრძოლი“), ომის დროს მტერთა დამმარცხებელი („ძღვევა-შემოსილი“), ტყვეობაში ჩაცვივნულთა შემწე და მფარველი („ტყვეთა განმათავისუფლებელი“), სენთა და სნე-

ულთა მკურნალი („სნეულთა მკურნალი“), გლახაკთა და ღარიბთა დამხმარე („გლახაკთა ხელის აღმპყრობელი“), ჭეშმარიტებისა და სიმართლისათვის მებრძოლი და წამებული („ღვანლით შემოსილი დიდი მონამე“ ანუ „მრავალმონამე“). თუ ამ საზოგადო დახასიათებას დავუმატებთ ზოგიერთ „ფაქტებს“ წმიდანის ცხოვრებიდან (ვლასი ქალაქისა და სელინის მეფის ასულის ვეშაპისაგან გათავისუფლება და ამ მხეცის მოკვლა), ჩვენთვის გასაგები იქნება, თუ რატომ აირჩია „დიდ ვეშაპთა“ მიერ დასანთქმელად განმზადებულმა პატარა ქართველმა ერმა წმ. გიორგი თავის მფარველად და ხელმძღვანელად, რატომ დაუკავშირა თავისი განმანათლებელი ქალწული ნინო სისხლით ნათესაობით წმ. გიორგის და რატომ აშენებდა თავის გაქრისტიანების პირველ წლებშივე ტაძრებს წმ. გიორგის სახელზე“ (გვ. 10)<sup>46</sup>.

ქაშვეთის ეკლესიისა და მისი შემოგარენის ისტორიულ-არქეოლოგიური კვლევისას ავტორი შეეხო საქართველოს საეკლესიო თუ სამოქალაქო ისტორიისათვის რიგ საყურადღებო საკითხებს: ქაშვეთის ტაძრის სამხედრო-სტრატეგიულ დანიშნულებას, მის კულტურულ-საგანმანათლებლო როლს, მასთან დაკავშირებულ პოლიტიკურ მოვლენებს (რუსეთ-საქართველოს ურთიერთობას) და ა. შ. მრავალი ისტორიული დოკუმენტი თუ პიროვნება გახადა მან მეცნიერული კვლევა-ძიების საგანი. გივი ამილახორის (ამილახვრის) (XVII-XVIII სს.) ცხოვრების მიმოხილვისას (შენიშვნა 24, გვ. 179-201) გულდასმით შეისწავლა „ამილახორიანთ საგვარეულოს ისტორიული გუჯრები“ (ნაწილი დასტამბულია კრებულში „ძველი საქართველო“, ტფ., ტ. II, ნაწ. 2. გვ. 101-138) და გამოარკვია, რომ გივი ყოფილა ცნობილი იოთამ ზედგინიძის (XV ს.) შთამომავალი, ანდუყაფარ ამილახორის ძე (ამილახორი მეჯინიბეთუხუცესს ნიშნავს თურმე). იგი ფრიად დანინაურებულა ირანის სამეფო კარზე; უომნია ინდოეთსა და ავღანეთში. მას აუშენებია ქაშვეთის ეკლესია (იხ. ზემოთ), განუახლებია შიო-მღვიმის მონასტერი და თბილისის ბეთლემის ტაძარი, გადაურჩენია მეჩეთად გადაკეთებას თბილისის სიონი და განუახლებია სვეტიცხოვლის სამი კოშკი.

მოკლედ: ჩვენი ერის წარსულის თითქმის ყველა უბანზე



(ისტორიის, ეთნოგრაფიის, ხელოვნების, ხელოსნობის, ლიტერატურისა თუ ფოლკლორის დარგში) ჰპოვებს მკითხველი ამ შრომაში საყურადღებო მასალას.

ნაშრომში „Иверския церкви чин хиротоний“ (ცინცაძე 112) განხილულია მიტროპოლიტად კურთხევის წესი და მოცემულია შესაბამისი ტექსტი. ეს წესი ქართული ძველი საეკლესიო პრაქტიკის გათვალისწინებით პირველად დეკ. ანტონ თოთიბაძეს შეუდგენია (სამწუხაროდ, არ ვიცით, რა წყაროთი უსარგებლია მას). ამ წესით უკურთხებიან მიტროპოლიტად ლეონიდე (ოქროპირიძე), ანტონი (გიორგაძე), ნაზარი (ლეჟავა) და თვით ავტორი – კალისტრატე ცინცაძე. 1935 თუ 1936 წელს უკრაინის პრიმასს, პიმენ მიტროპოლიტს (პეგოვს), კ-პ კალისტრატესათვის მიუმართავს თხოვნით, მიეწოდებინა მისთვის საქართველოს ეკლესიაში მიღებული წესი მიტროპოლიტად ან მთავარეპისკოპოსად ხელდასხმისა. კათოლიკოსსა და პროტოპრესვიტერ იოანე სმირნოვს სიამოვნებით თავსუდევთ ეს საქმე: გულდასმით გაცნობიან დეკ. ა. თოთიბაძისეულ შრომას, ჩაუხსნორებიან, შეუვსიან ახალი მასალით, უთარგმნიან სლავურად და გაუგზავნიან ყ-დსამღვდელო პიმენისათვის, რომელსაც იგი ხმარებაში შემოუღია, როგორც Чин Иверския церкви. ამ შრომის ქართულად დაწერილ წინასიტყვაში (დათარიღებულია 1941 წლის 10 აპრილით) ავტორი კ-პ კ. ცინცაძე აღნიშნავს: „შესატყვისი ქართული ტექსტი ჩაბარებული ჰქონდა სიონის უკანასკნელ კანდელაკს და ჯერ ვერ მიპოვნია“-ო. მართლაც, დავძენთ, ამ ტექსტის დაკარგვა ქართული ლიტურგული მწერლობის ისტორიას საგრძნობლად გააღარიბებს. გავითვალისწინოთ, რომ ესაა მდიდარი და საერთაშორისო მეცნიერებისათვის ფრიად საყურადღებო ისტორია. ქართული ორიგინალური ლიტერატურა იცნობს ანალოგიური შინაარსის შემდეგ წესებს: „წესი, რომელი იქმნების ხელდასხმასა ზედა ეპისკოპოსისასა“ (დეკ. კ. კეკელიძის წინასიტყვაობით, თბ. 1917); „ეპისკოპოსის ხელდასხმასა ზედა“ (კათალიკოს-პატრიარქ ანტონ პირველის რედაქციის მიხედვით) და „კურთხევაი და საყდრად აღყვანებაი კათოლიკოზისა“ (X საუკუნის ევქოლოგიონიდან).

გამოკვლევა „ქართული ოდიკისათვის“ (დასრულებულია

1942 წელს; ცინცაძე 119) განხილულია ამ მრავალმხრივ საყურადღებო საკულტო საგანთან დაკავშირებული რიგი საკითხი. აქ მოთხრობილია ისტორია ოდიკისა საერთოდ და ქართული ოდიკისა კერძოდ. ამ ნაშრომში მკითხველი იპოვის პასუხს კითხვაზე, თუ პირველად როდის და საიდან შემოიტანეს ჩვენში ხელნაკეთი თუ დაბეჭდილი ოდიკები. მკვლევარი დანვრილებით აღწერს ჩვენამდე მოღწეულ ქართულ ნაბეჭდ ოდიკებსა და მათგან შვიდ რედაქციას განასხვავებს: I დაბეჭდილია 1707 წელს (მეფე ვახტანგ VI-სეული); II – 1740 წ. (კათალიკოს დომენტიანეული); III – 1747 წ. (კათალიკოს ანტონ პირველისეული); IV – 1768 წ. მოსკოვში (მიტრ. ათანასესეული); V – 1815 წ. საჩხერეში (მიტროპოლიტ დავითისეული); VI – 1822 წ. საჩხერეში (მთავარეპისკოპოს სოფრონისეული); VII – 1822 წ. მარტვირში (მიტროპოლიტ ბესარიონისეული). აქვე დადგენილია ქართული ორიგინალური ოდიკის არქეტიპი, რომელიც საკათალიკოსო საბჭოს მინდობილობით (1917 წელს) აღნიშნული გამოკვლევის ავტორმა (დეკ. კ. ცინცაძემ) და დეკანოზმა პ. კარბელაშვილმა საფუძვლად დაუდეს ახალი, ეროვნული ოდიკის მაკეტს.

რამდენადაც ცნობილია, ქართულ მეცნიერებაში აღნიშნულ თემაზე სპეციალური გამოკვლევა არ მოიპოვება: ეს ნაშრომი პირველი (თანაც საფუძვლიანი) მონოგრაფიაა. ბევრი აქტუალური, დღემდე პასუხგაუცემელი საკითხია წამოჭრილი მასში: მაგალითად: 1707 წელს დამზადებული ოდიკის ქართული წარწერა პირმშო ხომ არ არის ვახტანგ VI სტამბისა (1709 წელს დასტამბული სახარების ნაცვლად)? რას წარმოადგენდა სოფ. მარტვირის (მარტვილის) სტამბა? და სხვა. გამოკვლევის გაცნობამ დაგვარწმუნა, რაოდენი ჯაფა თავსუდვია მსცოვან სწავლულს, დასაანანია. რომ იგი სპეციალისტთათვისაც კი დღემდე ხელმიუწვდომელია<sup>47</sup>.

ზემოთ აღნიშნული (მღვდელმთავრობის დროს დაწერილი) შრომებიდან ფართო საზოგადოება მხოლოდ «„ვეფხისტყაოსნის“ ავტორის მსოფლმხედველობას» იცნობს (კ. ეკაშვილი, „ვეფხისტყაოსნის“ ავტორის მსოფლმხედველობისათვის, შოთა რუსთაველი, ისტორიულ-ფილოლოგიური ძიებანი, 1966, თბ. გვ. 227-274)<sup>48</sup>. ეს ნაშრომი 1937 წელს არის შესრუ-

ლებული. მას შემდეგ რუსთველოლოგიაში ბევრი რამ დაზუსტდა და გაირკვა. ამის მიუხედავად ამ ნაშრომში განხილულ საკითხებსა და ნამოყენებულ არგუმენტებს დღესაც არ დაუკარგავს ფასი. ქართული ლიტერატურათმცოდნეობისათვის ერთობ მნიშვნელოვანია შოთა რუსთველის საღვთისმეტყველო პოზიციის ახლებურად გაიაზრა და ნარმოჩენა, რითაც ავტორი დაუპირისპირდა იმდროისათვის მეცნიერებასა და საზოგადოებაში გაბატონებულ აზრს „ვეფხისტყაოსნის“ ავტორის არაქრისტიანობის, ანდა არამართლმადიდებლობის თაობაზე და ცხადყო გენიალური პოეტის ორთოდოქსულ-ქრისტიანული მრწამსი. მან ერთ-ერთმა პირველმა მიაგნო ნაწარმოების სიუჟეტის ქრისტიანული ინტერპრეტაციის გასაღებს. მისი მტკიცებით, პოემის მთავარი მოქმედი პირების თავგადასავალი და ნაწარმოების ფაბულა იგავის ენით და მეთოდით მიგვანიშნებს სახარების უმთავრეს მოძღვრებაზე სინანულით ღმერთთან მიახლებისა და, ამ გზით, პიროვნების სრულქმნის შესახებ. ავტორის ლოგიკით, ავთანდილი და თინათინი, ერთი მხრივ, და ნესტანი და ტარიელი, მეორე მხრივ, სხვადასხვა რელიგიურ-ზნეობრივი ხასიათებია. ამ ხასიათებისა და სახეების მეშვეობით თეოლოგ მკვლევარს სურს გვითხრას: ღმერთს დაშორებული და, ამდენად, გზასაცდენილი ადამიანი (ნესტან-დარეჯანისა და ტარიელის სახით) მხოლოდ ქრისტიანული ნათელღებით თუ გაბედნიერდება. უფრო რომ დავაკონკრეტოთ, გენიალური პოემის პერსონაჟთა კალისტრატე კათალიკოსისეული ინტერპრეტაცია დაახლოებით ასეთია: „მშობლის ურჩი“, „თავხედი“, „სულსწრაფი“ და უდანაშაულოთა სისხლისმღვრელი ინდოელი უფლისწული (ლაპარაკია ნესტანზე) „განცდილმა ჭირმა და მნუხარებამ (საქ. მოც. 14, 22) გამოაფხიზლა და დაანერინა მსოფლიო ლიტერატურაში სწორუპოვარი ჰიმნი მონანისა... მონანულთა და ტვირთმძიმეთა თავშესაფარი ხომ ქრისტიანობაა... ავთანდილის ამონაკენესი, – „მაგრამ ღმერთი არ გასწირავს კაცსა შენგან (სოფლისაგან) განანირსა“, რომელიც სავსებით გამოხატავს ნესტანის სულისკვეთებას, მხოლოდ პერიფრაზია იეზეკიელ წინასწარმეტყველის სიტყვებისა: „არა მნებავ მე სიკვდილი უთნოისა, არამედ მოქცევა მისი გზისაგან მისისა და ცხოვრება მისი“ (33,

11). ვით თვითნებობით სახლისაგან მამისა გასული უძღები შვილი (ლუკ. 15), როდესაც მოეგო თავსა თვისსა, ნესტან-დარეჯანი, თინათინის დამხმარე ხელით, კვლავ დააბრუნა მამამან კეთილმან სახლსა თვისსა, რათა აღარა განეშოროს მას. მართლმორწმუნე ქრისტიანი შეიძლება შეაშფოთოს ნესტანის მხოლოდ შემდეგმა სიტყვებმა: „ან თავს კლდეთა ჩავიქცევ, ანუ მოვიკლავ დანითა“... მაგრამ ეკლესიის მიერ წმიდათა შორის შერაცხილ არიან დომინა და ასულნი მისნი ვირონეა (ვერონიკა) და პროსკულია (პროსდოკა), რომელნიც ქალწულეზის დაცვის მიზნით ხიდიდან წყალში გადავარდნენ და თავი დაიხრჩვეს, და პელაგია ქალწული, რომელმაც ამავე მიზნით მალლა სართულიდან თავი გარდაიქცია და მიწაზედ დავარდნისთანავე განუტევა სული“. პოემის დადებით გმირად მკვლევარს თინათინი ესახება (ავთანდილი მისი კეთილი ნების აღმსრულებელია). მისი (თინათინის) „გონებრივი და ზნეობრივი კულტურა არის შედეგი ქრისტიანული სწავლა-მოდღვრებისა... თინათინი ქრისტიანი ქალია და საუკეთესო ქრისტიანი. აი მისი სახელმძღვანელო მცნებები: პატივ-ეც მამასა შენსა და დედასა შენსა; შეიყვარო მოყვასი შენი, ვითარცა თავი თვისი; ეძიებდით პირველად სასუფეველსა ღვთისასა და სიმართლესა მისსა და ესე ყოველი მოგენიჭოს თქვენ; ნუ თავისა თვისისა ხოლო კაცად-კაცადი თქვენგანი ეძიებენ, არამედ მოყვასისაცა... (გამოსლ. 20, 12; მრ. 12, 31; ფილიპ. 2, 4.

შდრ. სტრ.:  $\frac{750}{703}$ ;  $\frac{753}{706}$ ;  $\frac{853}{798}$ ;  $\frac{1426}{1361}$ )...\* ტყუილად კი არ ეძებდა აკად. ნ. მარი „ვეფხისტყაოსნის“ ქალების ტიპს ქართველ მონაზვნებში. ჩვენ მეტსაც ვიტყვით: თინათინი ღვიძლი შვილია სახარებისა“ (გვ. 146).

ამ გამოკვლევით კათალიკოსმა კალისტრატემ პირველმა ნათელყო, რომ „უჟამო ჟამი“ იესო ქრისტეს მხატვრული სახეა (გვ. 236), ხოლო „მზიანი ღამე“ – ქრისტიანული ღმერთის ატრიბუტი (გვ. 235-236); რომ რუსთველი მიმართავს ეკლესი-

---

\* მკვლევარი სარგებლობდა ვფ-ის კ. ჭიჭინაძისეული, 1934 წლის, გამოცემით, რომელიც შემდეგ საიუბილეო, 1937 წლის, გამოცემისათვის შეუღარებია.

ის მამათაგან ნაცად მხატვრულ-ესთეტიკურ ხერხებს და რომ ჰოემას ასხივოსნებს საღმთო წერილი: მკველვარმა ტექსტში ასობით ბიბლიურსა თუ საღვთისმსახურო შესატყვისს მიაგნო (გვ. 248-250). მეცნიერის არგუმენტაციით, „რუსთველი არამცთუ ახსენებს სამებას და მით უკუაქცევს საბაბს „ვეფხისტყაოსნის“ დევნისას, არამედ მთლიანად წარმოგვიდგენს ქრისტიანული დოგმატიკის უმთავრეს ნაწილს, რომელსაც ღვთისმეტყველები ანდომებდენ ათასფურცლოვან ტრაქტატებსა და მრავალტომოვან გამოკვლევებს“ (გვ. 137).

ხსენებული შრომის გამომზეურობის შემდეგ (1966 წ.) რუსთველოლოგიური კვლევა-ძიების წინაშე ახალი პერსპექტივები გადაიშალა; ამ სფეროში ახალ მიგნებებს გაეხსნა გზა. ბიბლიის, ლიტურგიის, კანონიკისა და ღვთისმეტყველების საფუძვლიანი ცოდნის წყალობით „ვეფხისტყაოსნის“ მსოფლმხედველობის კვლევისას მეცნიერმა კათალიკოსმა სიტყვა მიაგო ისეთ ავტორიტეტებს, როგორც იყვნენ: ნიკო მარი, შალვა ნუცუბიძე, იუსტინე აბულაძე, მოსე გოგიბერიძე და სხვანი.

ვკითხულობთ კალისტრატე ცინცაძის რუსთველოლოგიურ შრომებს<sup>49</sup> და დანანებით ვამბობთ: ეროვნული კულტურის ამ მკვლევარს და მოამაგეს რატომ არ ჰქონდა დრო და „მოცალეობა“, მეტი ეკვლია, დაენერა, ეთქვა და ესახსოვრა შთამომავლობისათვის.

### *სამოძღვრო პრაქტიკა და ღვთისმეტყველება*

მონოგრაფიულად შესწავლას საჭიროებს კალისტრატე ცინცაძის სამოძღვრო პრაქტიკა და სამოძღვრო ღვთისმეტყველება, რომლის განუყრელი ნაწილი არის მქადაგებლობა. ამჯერად ზოგადი მიმოხილვით შემოვიფარგლებით. სწორედ სამქადაგებლო მოღვაწეობამ გამოაჩინა იგი ღვთისმეტყველად და ეჭვი არაა, რომ ქართული სამოძღვრო ღვთისმეტყველების ისტორიაც საპატიო ადგილს მიუჩენს მის ჰომილიებს, მშვენიერი ქართულით წარმოთქმულთ და დაწერილთ, რის შესახებ ორიოდ სიტყვა ზემოთაც ვთქვით. ეს ჰომილიები შესრულებულია საუფლო-სადღესასწაულო და წმინდან-

თა ხსენების დღეებში, ასევე სხვადასხვა სოციალური ფენისა და წოდების ადამიანთა ანდერძის აგებისას, ანდა ამა თუ იმ საყურადღებო მოვლენების აღსანიშნად. კალისტრატე ცინცადის ქადაგებები თავის დროს მრავლად ისტამბებოდა ბროშურებად, ქადაგებათა კრებულებში (1901, 1912-1913), სპეციალურ გამოცემებსა თუ ჟურნალ-გაზეთებში. იგი ქადაგებებში მარტივი, ადვილადსაქმელი ფორმით შთააგონებდა მსმენელთ ღრმა საღვთისმეტყველო აზრებსა და დოგმატებს; მიანიშნებდა ცხოვრების არსსა და ადამიანის უზენაეს მიზანს. იღუმალებით მოცულსა და ერთი შეხედვით გაუგებარ ბიბლიურ ეპიზოდებს მოძღვარი ისე განმარტავდა და ისეთ ეგზეგეზას გვთავაზობდა, რომ ნებისმიერი რანგის მსმენელისათვის ხელმისაწვდომი და გასაგები ყოფილიყო, რათა საღვთო წერილი შეეცნო და შეეთვისა მრევლს.

ქაშვეთის სამრევლოში შესვლის დღეს (1903, XII.26) მან ხუცესის წარმმართველ საქმედ საღი სწავლა-მეცნიერების ხალხში დანერგვა აღიარა და დასძინა: „ქრისტიანესათვის საგანი მისწრაფებისა გარეშე ქრისტესა არ არსებობს, რის გამო საგანი მისი მისწრაფებისა არის და იქმნება, რათა გამოიხატოს ჩვენს შორის ქრისტე (გალტ. 4, 19)“. მას, მოძღვარს, ღრმად სწამდა და საქმით ადასტურებდა, რომ ჭეშმარიტი განათლება და ზნეობა სარწმუნოებისაგან განუყოფელია, რომ სულმდაბალი და ზნედაცემული „ქრისტიანი“ ცრუმორწმუნეა, რადგან ქრისტე თავადაა სრულყოფილი ზნეობა და სიყვარული. და თუ რა არის და რას ნიშნავს „საღი სარწმუნოება“ (რის თაობაზე ორიოდე სიტყვა უკვე ვთქვით), ანდა როგორ უნდა გვესმოდეს მართლმორწმუნეობის არსი, მოძღვარმა ცოცხალი და შთამბეჭდავი მაგალითებით განმარტა. იაკობ გოგებაშვილისადმი მიძღვნილ ეპიტაფიაში („შინაური საქმეები“, 1912, №25) მან ასეთი შემთხვევა გვამცნო ამ ღირსი პედაგოგის ცხოვრებიდან: „უკანასკნელ დღეებში, როცა მახლობლებმა უამბეს [იაკობს], შენს სადღეგრძელოდ და სენისაგან განსაკურნებელად საქართველოს კუთხეებში პარაკლისები გადაუხდიათო, მოხუცი, მიუხედავად ძლიერი ტკივილებისა, დამშვიდდა, გამხიარულდა და სიამოვნებით წარმოსთქვა: *მადლობა ღმერთს, ჩემთვის*

ლოცულობენ, ეს კარგი ნიშანია, ვინაიდან სხვისთვის ლოცვა მარტო ზნეობრივად განვითარებულ არსებათა კუთვნილებათაა“.

მიცვალებულთა სულებისათვის ლოცვის, ანუ პანაშვიდის, დროს მოძღვარი ყოველთვის ესაუბრებოდა ჭირისუფლებსა და თანამგლოვიარე საზოგადოებას. ეს საუბრები დაფუძნებული იყო საღვთო მოძღვრებასა და მოყვასის სიყვარულზე, თანაგრძნობისა და თანალმობის ისეთ მადლსა და ძალაზე, რითაც სულიერი მამა სასონარკვეთილ ჭირისუფლებს ამშვიდებდა და სარწმუნოებაში განამტკიცებდა, ზოგჯერ კი ზღვარს დაუდებდა ამაქვეყნის სიკეთით ტკბობას და ამპარტავნებას. ბევრს დღესაც ახსოვს, რარიგ დაამშვიდა მისმა მოძღვრებამ სვეუბედურნი, რარიგ ცხადად განუმარტა ბედკრულ მშობლებს სიკვდილ-სიცოცხლის საიდუმლო<sup>50</sup>. გავითვალისწინოთ, რომ ამ საიდუმლოზე ფიქრის დროს, როგორც წესი, ასეთი კითხვა დაისმის: ამქვეყნად, და თანაც ხშირად, რატომ ბატონობს უსამართლობა? თუკი ღმერთი კეთილია და სამართლიანი, რატომ უშვებს ის სიკვდილს ისეთი ადამიანებისას, რომლებიც არიან ახალგაზრდები და ყოვლად უმანკონიც კი? „შვიდი ათასი წლის წინად, – უამბობდა ის საზოგადოებას გიორგი ქართველიშვილის გარდაცვალების გამო თქმულ სიტყვაში („მწყემსი“, 1901, №20), – ღმერთმა შექმნა კაცნი ხატად თვისად, ხოლო მსგავსება ღვთისა თითონ კაცს უნდა მოეპოვებინა. [...] და მაშინ იგი შეიქმნებოდა ხორციელადაც უკვდავი. მაგრამ კაცმა არ ინება თავითგანვე შედგომოდა ამ გზას, არ ინება სულიერი შრომითა და ღვანლით მოეპოვებინა ხორციელებრივი უკვდავება! მან მოინდომა პირდაპირ გაღმერთება, მოინდომა ის, რაც მისთვის მიუწვდომელი იყო და ამისათვის სანადელს ვერ მინვდა, დაკარგა კი სიმშვიდე სულისა და სიმრთელე სხეულისა, დაავადმყოფდა, დასნეულდა. ამის შემდეგ რაღა საჭირო იყო სნეულისა და ავადმყოფის კაცის ხორციელებრივი უკვდავება, ან ამ პირობებში უკვდავება ემჯობინებოდა კი სიკვდილსა?!... და ამისათვის ყოვლადმონყალე ღმერთმა კვალად მოუვლინა კაცს მონყალეობა თვისი და უბრძანა: ვინაიდან შენი ხორციელებრივი უკვდავება სულიერი და ხორციელი ტანჯვა იქმნება შენთვისო, ამისათვის –

მინა ხარ და მინადვე მიიქეციო... როგორც ხედავთ, საყვარელნო, სიკვდილი არამც თუ სავალდებულო ყოფილა კაცისათვის, არამედ საჭირო და სანატრელიც. მაშ რაღად ვტირით და რაღად ვგოდებთ? იქნება ვტირით და ვგოდებთ მისთვის, რომ გვეშინია: ვაი თუ საუკუნოდ დავჰკარგეთ ჩვენი ძვრიფასი და საყვარელიო, ვაი თუ ველარ გვეღირსოს მის ნახვამ? დიახ! ყველაზე საშიში და შესაზარი სწორედ რომ ეს შიშია! თუ მოყვასი ჩვენი გვშორდება საუკუნოდ, თუ იმას ვერასოდეს ველარ ვიხილავთ, თუ ის დაიკარგა ჩვენთვის სამარადისოდ, მაშინ სიკვდილზედ უსასტიკესი და კაცზედ უშუბედურესი აღარა ყოფილა რა ამ ქვეყანაზედ. მაგრამ, არა, ამის წინააღმდეგია თვით ჭკუა და გონება კაცისა, რომელნიც ვერ ურიგდებიან ამ აზრსა, ამისივე წინააღმდეგია თვით ენა, რომელიც სიკვდილს უწოდებს განსვენებას, მიძინებას, ამის წინააღმდეგია თვი საღმრთო წერილი [...] ამისათვის, მწუხარება და ტირილი, ვიში და გოდება არის საჭირო არა მიცვალებულთათვის, რომელთა ქრისტეს მიერ მიიძინეს და განისვენეს, არამედ ჩვენთვის და ცოდვათა ჩვენთათვის, რომელთა სიმრავლე აღდგება წინაშე ჩვენსა“.

„ადამიანისათვის სიკვდილი სავალდებულოა, – *წინაუძს კაცთა ერთგზის სიკვდილი* (ებრ. 9, 27), – ქადაგებდა იგი 1918 წლის 19 იანვარს ქაშვეთის ტაძარში სამშობლოსათვის თავდადებულ ყმაწვილთა, ნ. მაკარაშვილისა და გ. ჩიკვაიძის, ბრძოლის ველითგან ჩამოსვენების გამო, – ხოლო თუ ცხოვრების მიერ შეუბილწველნი, უწმიდესის მისწრაფებით განმსჭვალულნი და ქვეყნისათვის საჭირო ახალგაზრდანი გვეცლებიან ხელითგან მაშინ, როდესაც მოხუცი განაგრძობენ სიცოცხლეს, ეს ჰხდება ჩვენ სულიერად განსაფრთხობელად, ზნეობრივად გასასწორებელად, განსაფაქიზებელად... (ხშირად) ცხოვრების სინამდვილეს ვარიდებთ თვალსა, ვაყურებთ ნახევრად გაღვიძებულს სინიდისსა... და მივცემივართ ზნეობრივ ძილსა, რომელსაც თანდათან მივყევართ ზნეობრივის სიკვდილისაკენ... სწორედ ამ სიკვდილის კარზედ მყოფთ განგება გვაფრთხილებს, ხელითგანა გვაცლის ქვეყნის იმედთა და მშობელთა ნუგეშს... თუ მოიგონებთ, რაოდენი მწუხარება და კეთილშობილური გრძნობა



აღიძრა ჩვენს გულში ამ სამი დღის განმავლობაში (ოჯახში მისვენებიდან დაკრძალვის დღემდე, ნ.პ.), დამეთანხმებით, რომ წინაშე ჩვენსა მდებარე ქაბუკთა წუთისოფლის უდროვოდ გამოსალმებამ ჩვენ ცხოვრების ქაობს ბევრად თუ ცოტად ჩამოგვაშორა, სულიერად განგვაფრთხო, ზნეობრივად გამოგვაფხიზლა...“<sup>51</sup>.

### *ტკბილმწარე მოგონებანი და ბარათები*

კათალიკოს-პატრიარქ კალისტრატე ცინცაძის წერილობით მიმკვიდრეობაში ერთობ საპატიო ადგილი უჭირავს მოგონებათა ციკლს, ქართულ და რუსულ ენებზე დაწერილ მემუარებს. მათგან ჩვენ უკვე შევეხეთ ორს: მოგონება ილია ჭავჭავაძეზე და მოგონებას ზაქარია ფალიაშვილზე. ამჯერად აღვნიშნავთ, რომ მემუარში „მოგონება ზაქარია პეტრეს ძე ფალიაშვილზე“ (1938) ჩენს ყურადღებას, სხვა საინტერესო ცნობებთან ერთად, იქცევს მართლმადიდებელი და კათოლიკე თანამემამულეების პიროვნული კეთილგანწყობილება და თანამშრომლობა პრაქტიკული ლიტურგიის სფეროში; კათოლიკეთა ეკლესიის ორდანიისტიკისა და ლოტბარის, კომპოზიტორ ზაქარია ფალიაშვილის მართლმადიდებელთა ხუცესისაგან მართლმადიდებელთა ეკლესიაში მიწვევა, იქ მგალობელთა გუნდის ჩამოყალიბება და მართლმადიდებელთა ლიტურგიის სხვადასხვა პრაქტიკულ საკითხზე კათოლიკე სპეციალისტის მუშაობა მართლმადიდებელი სასულიერო პირის ლოცვა-კურთხევით, რაც ორი დიდი მამულიშვილის – მართლმადიდებელი კალისტრატე ცინცაძისა და კათოლიკე ზაქარია ფალიაშვილის – მაღალ სამოქალაქო შეგნებასა და რელიგიურობის კულტურას ადასტურებს.

საეკლესიო და სამოქალაქო ისტორიის არაერთი საყურადღებო ფაქტი და მოვლენა არის აღწერილი სხვა მემუარებშიც. აქ პირველ რიგში უნდა დავასახელოთ სქელტანიანი მემუარები: „ნაწყვეტები (მოგონებანი არა შორეულ წარსულიდან)“, „Из моих воспоминаний“ და „ქუთაისის საეკლესიო ყრილობის გამო 1926 წლის დეკემბრის 26-27-ში“, ასევე: მოგონებები ნიკოლოზ ზებედეს ძე ცხვედაძეზე, ლუარსაბ ბოცვაძეზე

და „სამოც-ოთხმოციანელების სოფლის მღვდლის ტიპი“. ეს მემუარები, განსაკუთრებით კი პირველი სამი, – დიდი მოცულობისაა, გამოირჩევიან უმდიდრესი წყაროთმცოდნეობითი ბაზით და გვთავაზობენ უმდიდრეს მასალას იმდროინდელი საეკლესიო ისტორიისათვის; ისინი არიან არა უბრალო მოგონებები, არამედ აკადემიური ხასიათის დასრულებული სამეცნიერო ნაშრომები, რის გამოც მათი გამოქვეყნება საშურ საქმედ გვესახება<sup>52</sup>.

კ-პ კალისტრატეს პიროვნების სიღრმისა და სისავსის წარმოსაჩენად არანაკლები მნიშვნელობა აქვს მოგონებებს მასზე. იგულისხმება აკადემიკოს ნიკო კეცხოველის, პროფესორ ვასტანგ ბერიძის, ფსიქოლოგ ერასტი ბაჩნაძისა და სხვათა მემუარები, რომელთა ავტოგრაფები დაცულია მისი უწმინდესობის პირად საარქივო ფონდში<sup>53</sup>.

კ-პ კალისტრატე ცინცაძის მოგონებებს ალამაზებს ყოვლდასამღვდელო გაბრიელის ნათელი სახე: ერთხელ ეპისკოპოსს სტუმრად მიუღია სტუდენტი კალისტრატე. მეუფეს უსაუბრია მასთან, მასთან ერთად სადილი მიურთმევია და ჭაბუკისათვის ფულიც უჩუქებია. ლოცვა-კურთხევისას უთქვამს: თუ საქართველო გიყვარს, ბერობაზე უნდა იფიქროო. ამით მღვდელმთავარს ახალგაზრდისათვის შემონაზვნების სურვილი აღუძრავს, მაგრამ იმხანად ზეცას სხვაგვარად უნებებია: კიევის სასულიერო აკადემიის სამღვდელოდ გამზადებული კურსდამთავრებული უცხოელ ქალიშვილს შეუღლებია (ამ ქალიშვილის ვინაობასა და გაცნობის გარემოებას უკვე შევეხეთ). ვიცით აგრეთვე, რომ ზნემაღალ დედას მხარი აუბამს თავმდაბალი და ჯვარისმტვირთველი მეუღლისათვის. როდესაც (1925 წელს) მამა კალისტრატეს ეპისკოპოსად მოუწოდეს, მორწმუნე მეუღლეს ქმრისათვის უთქვამს: თუ მშობელი ეკლესია მოითხოვს შენგან ახალ პირობებში სამსახურს, შენ, თანახმად მაცხოვრის მცნებისა, უნდა დაუტეო ცოლიცა და შვილიც, აღიღო ჯვარი თვის და შეუდგე ქრისტეს (მათე 10, 37), ჩვენთვის ზრუნვა მიუტევე უფალსა (ფს. 54, 23): რომელი არ ივინყებს ცის ფრინველთა, არ მოგვაკლებს თავის მონყალებას ჩვენცაო<sup>54</sup>. ასე აუსხამს ფრთანი ყოვლადსამღვდელო გაბრიელის ლოცვა-კურთხე-

ვას და, თუმცა კალისტრატე ცინცაძე მონაზვნად არ აღკვე-  
ცილა, მან, მღვდელმთავარმა, ღირსეულად ითვისა ბერობის  
მადლი<sup>55</sup>. მისი ცხოვრება სულიერი ზრდისა და ფერიცვალე-  
ბის გზა იყო. გასაოცარი იყო ღრმად მოხუცის გონება და  
მსჯელობის სიღრმე. მის უნმინდესობას უკანასკნელ ამო-  
სუნთქვამდე აკითხავდნენ მეცნიერები კონსულტაციებისა  
და რჩევა-დარიგებისათვის. პატრიარქ კალისტრატეს სა-  
ფუძვლიან მითითებებსა და კრიტიკულ შენიშვნებს ანგარიშს  
უნეგდნენ ღვანლმოსილი მკვლევარნი: ილია აბულაძე, შალ-  
ვა ნუცუბიძე, კორნელი კეკელიძე, აკაკი შანიძე, სარგის კა-  
კაბაძე, ლეონ მელიქსეთ-ბეგი და სხვანი, რომელთაც ბევ-  
რჯერ აღუნიშნავთ დიდი მეუფის უხმაურო დამსახურება  
ქართული მეცნიერების წინაშე.

აღნიშნული მემკვიდრეობის განუყოფელ ნაწილად წარ-  
მოგვიდგება კათალიკოს კალისტრატე ცინცაძის პირადი მი-  
მოწერა რელიგიის, კულტურისა და მეცნიერების სხვადასხვა  
საკითხზე. მისი საარქივო ფონდიდან ჩვენთვის ცნობილია  
წერილები აკაკი შანიძისადმი, ლეონ მელიქსეთ-ბეგისადმი,  
ივანე ჯავახიშვილისადმი და ბევრი სხვა ცნობილი თუ ნაკლე-  
ბად ცნობილი პიროვნებისადმი. ასევე ყურადსაღებია, რო-  
გორც პერსონალური, ისე საზოგადოებრივი თვალსაზრი-  
სით, წერილები კალისტრატე ცინცაძისადმი ქართულ, რუ-  
სულ და სხვა ენებზე თანამენამულებებისგანაც და უცხოელე-  
ბისგანაც. ეჭვი არაა, რომ ამ მიმოწერაში ნებისმიერი დარ-  
გის მკვლევარი, იქნება ის ღვთისმეტყველი, მეცნიერი თუ  
პოლიტიკოსი, არა ერთსა და ორ შთამბეჭქდავ და დღესაც გა-  
მოსადეგ სიტყვას ამოიკითხავს<sup>56</sup>.

მთავარხუცესი ყოველმხრივ იცნობდა სამწყსოს, რის  
წყალობითაც ბევრ ქართველოლოგს გაუმართა მან ხელი და  
აღუძრა სურვილი ჩვენი ეროვნული კულტურის უკეთ გაც-  
ნობისა. უცხოელებს, რომელნიც დაინტერესებულნი იყვნენ  
ამ კულტურით, ის აწოდებდა სათანადო მასალებსა და საყუ-  
რადლებო მითითებებს. უნმინდესი კალისტრატე შეძლებისა-  
მებრ ეხმარებოდა აგრეთვე (სწერდა წერილებს, უგზავნიდა  
ნიგნებს) უცხოეთში მოღვაწე მეცნიერს, პარიზის წმ. ნინოს  
ქართული ეკლესიის დამაარსებელსა და მოძღვარს, გრიგოლ

ფერაძეს, სრულიად საქართველოს მესამე საეკლესიო კრების მიერ (გელათი, 1921 წ. სექტემბერი) სასულიერო განათლების მისაღებად დასავლეთ ევროპაში გაგზავნილს, რომელიც არქიმანდრიტის ხარისხში მონამებრივად აღესრულა 1942 წელს ოსვენციმის საკონცენტრაციო ბანაკში.

### *ღვთისა და მოყვასის სამსახურში*

ვით ღირსი ბერი, ნეტარხსენებული კათოლიკოსი ერიდე-ბოდა რეკლამას. ხშირად სხვისთვის გაირჯებოდა, თავად გადაიტანდა მეცნიერული კვლევის მთელ სიმძიმეს და, თუ აუცილებელი არ იყო, ვინაობას არც გაამჟღავნებდა. მოპაექრეს თავისი ცოდნისა და ინტელექტის უპირატესობას არ აგრძნობინებდა.

ღვთისმსახურ კალისტრატეს ყოველდღიური ცხოვრების წესსა და სათნო ღვაწლზე გვიამბობს მისი ერთ-ერთი თანმედროვე ერთ ლიტერატურულ ჩანახატში, რომელიც ანონიმურია (ცინცაძე 93). მასში ვკითხულობთ: კათალიკოს-პატრიარქი „წვება არა უადრეს პირველი საათისა, ხოლო 6 საათზე უკვე ფეხზეა. [...] უპირველეს ყოვლისა ლოცვით მიმართავს უფალს თავის ბინაში. შემდეგ ეწვევა ტაძარს, ემთხვევა ხატებს, განსაკურებით – წმ. ნინოს ხატს. შედის საკურთხველში, სადაც მუხლმოდრეკილი დიდხანს ლოცულობს. ლოცვის შემდეგ სათანადო განკარგულებებს გასცემს ტაძარში და შინ ბრუნდება. გზაში მოწინებით ლოცულობს ტაძრის გვერდით დასაფლავებულთა სულის საოხად. [...] საუზმობს უბრალო ჩაით და მსუბუქ მისატანებლით. ისევ მოკლე ლოცვა და შეუდგება მუშაობას. [...] აქვე უნდა აღინიშნოს, რომ დაწესებული დრო მთხოვნელთა მიღებისათვის, რაც არ უნდა საქმე ჰქონდეს მას, არა აქვს. იგი იღებს ყველას, ვისაც კი მასთან ესაქმება. ის გადაუდებლად იღებს ზომებს მთხოვნელთა დასაკმაყოფილებლად, მაგრამ ვაი იმის ბრალი, თუ მას საეჭვო ადამიანი ეწვია... სათნოა და გულკეთილი. გარშემომყოფთ უკვირთ მისი გულისხმიერება, თანაგრძნობა მოყვასის გაჭირვებისადმი... ნაშუადღევის 3 საათზე მისი უწმიდესობა სადილობს. იგი სტუმართმოყვარეა: 2-3 ადამიანი მუდამ უზის გვერდით სუფრასთან. თავის ტაბლაზე კათო-

ლიკოსი ყველასთან ერთნაირია, განურჩევლად მდგომარეობისა და თანამდებობისა. [...] მუშაობს ღამის 12 საათამდე. მუშაობას სწყვეტს მხოლოდ ჩაის დასალევად 7 საათზე. არასდროს არ ვახშობს... არავითარი უძრავი ქონება ან ფულადი სალსარი არ გააჩნია. გასაგებიცაა: ეხმარება ყველას, ვინც კი მას მიმართავს. ბევრი ნუგეში უნახავს ცხოვრებაში, მაგრამ სიმწარეც ბევრი უგემია“.

დავძენთ: მრავლისმნახველსა და მრავლისგანმცდელ მღვდელმთავარს ოდენ ქრისტესმიერი მოთმინება, რწმენა და სიყვარული ანუგეშებდა. მარადის ლოცვამ გამოანართო და ბოლომდე აზიდვინა ჯვარი, რომელიც სიყრმითგანვე ეტვირთა მიმდევნს მოძღვრებისა: „ჰბაძევდ ჯინჭველსა, მედგარო, და იქმენ მუშაკ მსგავს მისა“ (შდრ. იგავი სოლ. 6, 6). სიცოცხლის ბოლო წლებშიც, მიუხედავად ხანდაზმულობისა, მამათმთავარი ყველას აოცებდა უზადო მეხსიერებითა და ხალასი აზროვნებით. ზნესრული მოძღვრის განათლების გზას ბოლო არასდროს მოღებია (ასეთი რამ წმიდანთა ხვედრია მხოლოდ!).

მრავალნაცადი მწყემსმთავარი იღვწოდა, რათა საქართველოს სამოციქულო ეკლესიას საიმედო მომავალი შექმნოდა სასულიერო სასწავლებლისა და პერიოდული ჟურნალის სახით, მაგრამ ეს ნატვრა ამქვეყნიდან თანაწარიტანა.

### *ცხოვრების დაისი*

1952 წელს ნაავადარი მწყემსმთავარი განსაკუთრებული ხალისით შეეგება ნინოობას: მცხეთა-თბილისის ხუცესნი სიონს მიიხმო. მამული და დედული შეავედრა მოციქულთასწორს. თვისივ მარჯვენით აზიარა ქრისტესმოსავნი. შემდგომ სტუმარნი შინ, ახალნაგებ საპატრიარქო სახლში, მიიპატიჟა (რომელიც რუსეთის ერთ-ერთი ეპარქიისაგან შემონანირი თანხით აუშენებია). აკურთხა და დალოცა ჭერი სამვილიშვილო, მერმე ტრაპეზად დასხა ყველა. ჩვეულებისამებრ მოილხინაო ხანდაზმულმა.

იმ დღიდან სენმა ავად დარია ხელი: 3 თებერვალს ვალმოხდილი კათოლიკოსი არსთა გამრიგემ წუთისოფლიდან გაიხმო<sup>57</sup>.

(აღსასრულიც წმიდანისებრი მიმადლებია!)

მოგვითხრობენ: იმ ზამთარს მზიანი დღეები იდგა; მხოლოდ 3 თებერვალს მოიღრუბლა, თოვლი მოვიდა: ბუნებაც ატირდაო ჩვენთან ერთად...

და ზეციურ ცრემლით გაპატიოსნებულმა გვამმა სიონს განისვენა მარადუამიერ.

თბილისი, 1980-1982 წლები

(გადაკითხული და განახლებული  
2014 წლის სექტემბერ-ოქტომბერში)

## შენიშვნები

<sup>1</sup> პერესტროიკის ბოლო ფაზასა და მომდევნო პერიოდში კ-პ კალისტრატე ცინცაძის ცხოვრებისა და მოღვაწეობის შესახებ რამდენიმე ნაშრომი გამოქვეყნდა (იხ. ქვემოთ, გზადაგზა). წყაროების სიუხვითა და ინფორმაციულობით გამოირჩევა მონოგრაფია: ნ. როსტომაშვილი, სრულიად საქართველოს კათოლიკოს-პატრიარქი კალისტრატე (ცინცაძე), [თბ., წელი არ არის მითითებული]. შევნიშნავთ, რომ ამ შემთხვევაში გვარის ფრჩხილებში ჩასმას არავითარი გამართლება არა აქვს, რადგან ეს გვარი ეკუთვნის პიროვნებას, რომელსაც ნათლისღებისა და სამოქალაქო რეგისტრაციის დროს შერჩეული სახელი არ გამოუცვლია.

<sup>2</sup> პროგრამა, რომლის შესახებ ლაპარაკია აქ, დაცულია საქართველოს სახელმწიფო საისტორიო არქივში: თბილისის სასულიერო სემინარიის ფონდი (ტრ. ხუნდაძე, გაზეთი „დროება“ და თბილისის სასულიერო სემინარია. მიმოხილველი II, თბ., 1951, გვ. 69-70).

<sup>3</sup> თბილისის სასულიერო სემინარიის დრამატული წრის შესახებ საუბრობს აგრეთვე ალექსანდრე ყიფშიძე (ფრონელი), რომელიც ამ სემინარიაში 1879-1882 წლებში სწავლობდა. მისი დღიურების სრული ვარიანტი გამოსაქვეყნებლად მოამზადა და გამოაქვეყნა ნინო ციხისთავმა: ალექსანდრე ყიფშიძე (ფრონელი), დღიური ერთი სემინარიელისა, თბ., 2013, გვ. 21-22,71.

<sup>4</sup> ამ ფაქტის შესახებ შედარებით ვრცლად იხ.: ნ. პაპუაშვილი, კ. მ. ცინცაძის ცხოვრება და მეცნიერული მემკვიდრეობა. მრავალთავი XIII, თბ., 1986, გვ. 106.

<sup>5</sup> ამ საკითხთან დაკავშირებით იხ. აგრეთვე: ნ. ტაბიძე, კალისტრატე ცინცაძე, თბ., 2008, გვ. 28-30,34,47-50.

<sup>6</sup> ნოდარ ტაბიძე ამ პუბლიკაციას ასე მიუთითებს: „1896, №217“ (იხ.: მისივე, დას. წიგნი, გვ. 7), რაც მექანიკური შეცდომაა.

<sup>7</sup> აღნიშნული პირიდან კონსტანტინე გამსახურდიამ (უმცროსმა), ჩვენი

შეთავაზების საფუძველზე, შეასრულა ნაშრომის პირველი თავის თარგმანი: „ქრისტიანობის გავრცელება და დამკვიდრება საქართველოში“. ეს თარგმანი ავტორის მიერ ქართულ ენაზე დაწერილ და მითითებულ პირს დართულ „წინასიტყვაობასთან“ ერთად გამოვაქვეყნეთ „სალეთისმეტყველო კრებულში“ იმ ნომერში, რომელიც მიეძღვნა კ-პ კალისტრატეს დაბადების 120 წლისთავს და რომელიც ჩვენი რედაქტორობით მომზადდა (1987, №3, გვ. 63-131). ჩანს, ავტორი განსაკუთრებულ მნიშვნელობას ანიჭებდა სადისერტაციო თხზულების მონაკვეთს „დამწერლობის წარმოშობა ქართველთა შორის“. ეს ნაწილი მას, „Пастырь“-ის რედაქტორ დეკ. დავით ლამბაშიძის წინადადებით, გამოსაქვეყნებლად მოუშვებდა და მოუქიდელებელი სტატიის სახით, მაგრამ, როგორც თვითონ აღნიშნავს, ობიექტური თუ სუბიექტური მიზეზების გამო ვერ გამოუქვეყნებია. ხელნაწერი ინახებოდა შვილიშვილის, ნიცა ხუციშვილის, ოჯახში. მისი თარგმანი, კ. გამსახურდიასვე შესრულებული, გამოვაქვეყნეთ „სალეთისმეტყველო კრებულში“: 1991, №1, გვ. 161-187.

<sup>8</sup> ეს სტატია მეორედ, ჩვენი მიმოხილვის თანხლებით, გამოქვეყნდა ჟურნალში „ბალავერი“: 1988, №1, გვ. 90-95. იგი მესამედაც დაიბეჭდა (მეორე პუბლიკაციის მოხსენიების გარეშე): მნიგნობრობა ქართული 10, თბ., 2010, გვ. 137-143.

<sup>9</sup> მესამე პუბლიკაცია: მნიგნობრობა ქართული 10, თბ., 2010, გვ. 150-156. აქაც წინა პუბლიკაციები მითითებული არ არის.

<sup>10</sup> ეს ქადაგება ჩვენი თანხლები წერილითურთ მეორედ გამოქვეყნდა ჟურნალში „თავისუფლება“: 2003, №6, გვ. 45-49.

<sup>11</sup> ეს ეგზეგეტიკური ჩვენ ვნახეთ 1980 წელს საქართველოს საპატრიარქოს ბიბლიოთეკის ფონდში, რომელიც იმხანად წმ. ნიკოლოზის ეკლესიაში ინახებოდა (ორთაჭალა). ზემოთ მოყვანილი ციტატა და მინაწერი ამ ეგზეგეტიკური მასალის მამრად გამოვსწავლეთ. თვით ეგზეგეტიკური კი, მისი რარიტეტული მნიშვნელობის გამო, კათალიკოს-პატრიარქ ილია II-ს გავუზღვევინეთ და მის მიმართ საგანგებო ყურადღების გამოჩენა ვთხოვეთ.

<sup>12</sup> ეს სიტყვა ჩვენ მეორედ გამოვაქვეყნეთ თბილისის ივანე ჯავახიშვილის სახელმწიფო უნივერსიტეტის ახალციხის ფილიალის გაზეთში „მესხეთი“: 1990, 3.XII, №1.

<sup>13</sup> კ-პ კალისტრატეს პირად საარქივო ფონდში (მითითებულ საქმეში) დაცულია სამოძღვრო კურსების გაკვეთილების ცხრილი და მასწავლებელთა სია. დოკუმენტს ახლავს დეკ. კ. ცინცაძის მინაწერი, საიდანაც, სხვათა შორის, ვგებულობთ: კურსები ფუნქციონირებდა საქართველოს კათალიკოს-პატრიარქის რეზიდენციაში (ყოფილი საეგზარქოსო სახლი); სოფლიდან ჩამოსული მოწაფეები ამ სახლის ქვედა სართულში ცხოვრობდნენ; მეცადინეობა მიმდინარეობდა კათალიკოს-პატრიარქის კარის ეკლესიაში. დავძენთ: ეს სახლი, სათავსოები და ეზო სახელმწიფომ ეკლესიას 1923-1924 წლებში, კ-პ ამბროსის პატიმრობის დროს, ჩამოართვა. მოგვიანებით იქ საქალაქო პოლიციის სამმართველო განთავსდა, 1990 წელს კი ეგვევ შენობა სათავსოებითა და ეზოკარმიდამოთი საქართველოს საპატრიარქოს დაუბრუნდა.

<sup>14</sup> ამ და ბევრ სხვა საყურადღებო ფაქტზე საუბრობს კ-პ კალისტრატე 1938 წელს დაწერილ მემუარში „მოგონება ზაქარია პეტრეს ძე ფალიაშვილზე“,

რომელიც ოთხჯერ გამოქვეყნდა: ორჯერ მიხეილ ქავთარიას მიერ („საბჭოთა ხელოვნება“, 1971, №10; მნიგნობრობა ქართული 10) და ორჯერ ჩვენს მიერ („საქართველოს კათოლიკე“, 1994, IV, №1; „საბა“, 2004, IX, №9). პროფ. ს. ვარდოსანიძე ნერს, კ. ცინცაძე ზ. ფალიაშვილს „თავის დროზე ასწავლიდა სალთო სჯულს“ (ს. ვარდოსანიძე, პატრიარქები, ნ. II, თბ., 2013, გვ. 82). ეს, ცხადია, შეცდომაა, მაგრამ ამ შეცდომის მიზეზი და წყარო ჩვენთვის გამოუცნობია.

<sup>15</sup> თარიღისა და ანტიოქიის პატრიარქის ვინაობის საკითხზე კალისტრატე ცინცაძის პოზიციის შესახებ იხ.: ნ. პაპუაშვილი, კალისტრატე ცინცაძის ნერილი ივანე ჯავახიშვილს [მიმოხილვა, ტექსტის პუბლიკაცია, შენიშვნები]: „ქართული ენა და ლიტერატურა სკოლაში“, 1986, №2-3, გვ. 110-119.

<sup>16</sup> თარგმნილია ქართულად ა. ბრეგაძის მიერ (მნიგნობრობა ქართული 10: კალისტრატე ცინცაძე, ნ. II, თბ., 2010, გვ. 7-136).

<sup>17</sup> ამ მოვლენაზე, ანუ გიორგი მთაწმინდლის ცხოვრებიდან აქ ნაგულისხმევი ეპიზოდზე იხ. ჩვენი სტატია „გიორგი მთაწმინდელი – ეკლესიოლოგი, კულტურტრეგერი და რეფორმატორი“ („სოლიდარობა“, 2010, №4, გვ. 90-91). ამავე თემაზე კ-პ კალისტრატეს სხვა ნაშრომის შესახებ: ნ. პაპუაშვილი, კათალიკოსი და კათალიკოსობა საქართველოში. „დიალოგი“, 2008, №1-2, გვ. 221-224.

<sup>18</sup> „მოგონება ილიაზედ“ პირველად გამოქვეყნდა ჩვენს მიერ ჟურნალში „მნათობი“: 1985, №2, გვ. 171-174. მეორედ გამოქვეყნდა პროფ. მ. ქავთარიას მიერ სერიამი „მნიგნობრობა ქართული“: ტ. 10, გვ. 200-206 (პირველი პუბლიკაცია აქ მითითებული არ არის).

<sup>19</sup> შედარებით ვრცლად: ნ. პაპუაშვილი, საქართველოს ეკლესია ორ მსოფლიო ომს შორის, თბ., 1996, გვ. 12-14.

<sup>20</sup> თარგმნილია ფრანგულად და ქართულად. ფრანგული თარგმანი და გამოცემა მიმოხილვითურთ შესრულებულია რომში 1932 წელს კათოლიკე მღვდლის, აღმოსავლეთის ეკლესიათა ისტორიის დოქტორის მიხეილ თარხნიშვილის მიერ. ეს მისი პირველი პუბლიკაცია იყო. ამ პუბლიკაციის შესახებ მცირე კომენტარი და ბიბლიოგრაფიული ცნობა იხ.: თ. ჭუმბურიძე, მიქელ თარხნიშვილის ცხოვრება და მოღვაწეობა. მ. თარხნიშვილი, ნერილები, თბ., 1994, გვ. 13-14, 539; ნ. პაპუაშვილი, მიხეილ თარხნიშვილი და მისი „საქართველოს ეკლესიის ისტორია“. მ. თარხნიშვილი, საქართველოს ეკლესიის ისტორია დასაბამიდან მე-7 საუკუნის დასასრულამდე, გამოსაცემად მოამზადა, წინასიტყვა, გამოკვლევა, შენიშვნები და საძიებელი დაურთო ნ. პაპუაშვილმა, თბ., 2014, გვ. 51. ქართული თარგმანი, შესრულებული რაფიელ ივანიცკი-ინგილოს მიერ, გამოქვეყნდა იმავე 1932 წელს საქართველოს ეროვნულ-დემოკრატიული პარტიის ჟურნალში „სამშობლო“ (პარიზი, №11, გვ. 36-56; ამავე გამოცემის მეორე პუბლიკაცია გურამ შარაძის წინასიტყვი: „ჯვარი ვაზისა“, 1990, №1, გვ. 64-76, მესამე პუბლიკაცია: ს. ვარდოსანიძე, პატრიარქები, თბ., 2013, გვ. 108-133). ამ დოკუმენტის ატრიბუცია შესაძლებელია კ-პ კალისტრატეს იმ მინაწერის მეშვეობით, რომელიც გვხვდება გამოცემის ხელნაწერთა ინსტიტუტში, კ. ცინცაძის ფონდში, დაცულ ეგზემპლარზე: „დაინერა საკათალიკოსო საბჭოს მინდობილობით. კ.-პ. კ.“. ეს რომ ნამდვილად ასეა, აღნიშნავს ტექსტის



ქართულად მთარგმნელიც, რომელიც ემიგრაციამდე საკათალიკოსო საბჭოს წევრი იყო და საეკლესიო თემატიკაში ერთობ გათვითცნობიერებული, სიცოცხლის ბოლო ოცი წლის მანძილზე – მართლმადიდებელი მღვდელი ესპანეთში (ქდეკანოზი რაფიელ ინგილო-ივანიცკი. „ივერია“, 1967, VI, №13, გვ. 30). მის სტატიაში „ჩვენი ეკლესიისათვის“ ვკითხულობთ: „ცნობილია აგრეთვე დასაბუთებული დარბაისლური პასუხიც მიტროპოლიტ ლეონიდესი [პატრიარქ ტიხონს] (ტექსტი შედგენილია ან განსვენებულ კათალიკოს კალისტრატეს მიერ – იმ ხანებში მმართველი საკათოლიკოსო კანცელარიისა)“ („ივერია“, 1956, II, №8, გვ. 22. აღნიშნულ სტატიაზე მიგვითითა და ქსეროასლი მოგვანოდა ყოფილმა დეკანოზმა ვასილ კობახიძემ, რისთვისაც მადლობას მოვახსენებთ). დეკ. კ. ცინცაძის რეალურ ავტორობას ადასტურებს აგრეთვე იმდროინდელი დეკანოზი ნიკიტა თალაქვაძე: მისივე, მოქალაქე-მღვდლის დღიურიდან, თბ., 2013, გვ. 486.

<sup>21</sup> ამ დღიურმენტის გამოცემებისა და უცხო ენებზე თარგმნის შესახებ იხ.: ამბროსი ხელაია რუსეთის საეკლესიო პოლიტიკის შესახებ აფხაზეთში («სტატიის გამო „ხმა სოხუმიდან“»), გამოსაცემად მოამზადა, თარგმნა, გამოკველევა და შენიშვნები დაურთო ნ. პაპუაშვილმა, თბ., 2006, გვ. 34; N. Papuashvili, *Aus der jüngsten Vergangenheit der georgischen orthodoxen Kirche: Die Erneuerung der Autokephalie und die Reformen*, Tiflis 2012, S. 65; ამბროსი (ხელაია), ეპისტოლარული მემკვიდრეობა, გამოსაცემად მოამზადა გ. საითიძემ, თბ., 2012, გვ. 33-34, 120. იმის მიუხედავად, რომ მემორანდუმის ტექსტი ბევრჯერ არის გამოქვეყნებული, მასთან დაკავშირებული ისტორიულ-ტექსტოლოგიური საკითხები ჯერჯერობით შეუსწავილი და დაუზუსტებელია. არ ვიცით, მაგალითად, ტექსტი პირველად რა ენაზე ითარგმნა და დანიშნულების ადგილზე რომელენოვანი თარგმანით გაიგზავნა, რა მიმართებაა ორიგინალის ტექსტის სხვადასხვა პუბლიკაციას შორის, რამდენად ადეკვატურია ადრეული თარგმანი (თუ თარგმანები) და ა. შ.

<sup>22</sup> გამოაქვეყნა მიხეილ ქავთარიამ კომენტარით: კ. ცინცაძე, ჩემი დაკითხვა. „მნათობი“, 1990, №9, გვ. 150-155.

<sup>23</sup> „საბოლოო სიტყვის“ ტექსტი, რომელიც კ-პ ამბროსის ოჯახმა შემოინახა, გამოქვეყნდა 1988 წელს ჟურნალში „მნათობი“: №10, გვ. 148-161 (აკაკი მინდიაშვილის კომენტარით). ეს არის უაღრესად რაციონალური, დიპლომატიური და მოზომილი გამოსვლა, რომლის დედააზრი ასეთია: რაც გავაკეთე, ჩემი უფლება კი არა, მოვალეობა იყო. ფრაზას, რომელიც ზეპირი სიტყვით ანუ ფოლკლორით გაგრცელდა, თანაც მისი უწმუნდესობის სიცოცხლეშივე (შდრ.: ნ. თალაქვაძე, მოქალაქე-მღვდლის დღიურიდან, გვ. 258) და რომელიც დღეს მყარადაა გამჯდარი ჩვენს ცნობიერებაში, არც „საბოლოო სიტყვა“ და არც იმდროინდელი წერილობითი წყაროები არ იცნობს. ამის გამო მისი ავთენტურობა უარყო პროფ. სერგო ვარდოსანიძემ (ზეპირი განცხადებებით სამეცნიერო-საზოგადო სხდომებზე), რასაც, ცხადია, საფუძველი აქვს. ამის მიუხედავად საკითხი ამონურულად ვერ ჩაითვლება, თუ არ გაეცა პასუხი კითხვას: რა მიმართებაშია საბოლოო სიტყვის ფოლკლორული ვარიანტი წერილობით ვარიანტთან. შევეცდებით, წარმოვადგინოთ ჩვენი პასუხი, რამდენადაც წინამდებარე წიგნის ფორმატი ამის საშუალებას მოგვცემს. ფოლკლო-

რული ფრაზის პირველი და მეორე ნაწილი: „სული ღმერთს ეკუთვნის, გული – საქართველოს“ სრულ თანხმობაშია „საბოლოო სიტყვის“ შინაარსთან. იქ, ტექსტში, ნათქვამია: „ჩემთვის ტკბილი იქნება ის სასჯელი, რომელსაც მომისჯის უზენაესი სასამართლო მშობლიური ეკლესიის და ერის თავისუფლების დაცვის მიზნით ხმის ამოღებისათვის. ეს იქნება დაგვირგვინება იმ ჯვარისა, რომელიც ჩემგან ნატვირთია და ვატარებ ჩემი ცხოვრების უკანასკნელ თითქმის 37 წლის განმავლობაში. ჩემგან ეროვნული ინტერესების დასაცავად ამაღლებული ხმა და მსჯავრი, რომელსაც მომისჯის უზენაესი სასამართლო, მონახავენ თავის ადგილს ყოველის ქართველის გულში, – იმ ქართველისა, რომელსაც ჯერ კიდევ არ დაუკარგავს სარწმუნოება და სამშობლოს სიყვარული. ამითაც ბედნიერად ჩავთვლი ჩემს თავს. როგორც მორწმუნე ვიტყვი – იყოს ნება ღვთისა!“.

ამ შემთხვევაში ჩვენ გვახსენდება ცნობილი ფრაზა თეოლოგიისა და ეკლესიის ისტორიიდან: „მწამს, რადგან აბსურდია!“. ცნობილია, რომ ეს სიტყვები, პარადოქსული სილოგიზმის ეს კლასიკური ნიმუში, ძველი დროის პოპულარულ ქრისტიან მწერალს, ტერტულიანეს, მიეწერება. მაგრამ ასევე ცნობილია ისიც, რომ ეს სიტყვები და ეს ფრაზა ტერტულიანეს ნაწერებში არ გვხვდება. სამაგიეროდ გვხვდება ისეთი გამონათქვამები, რაც შინაარსობრივად ისეთსავე თანხვედრაში დასახელებულ ფრაზასთან, როგორც წმ. ამბროსი ხელაიას „საბოლოო სიტყვის“ წერილობითი ვარიანტი ფოლკლორული ვარიანტის პირველ-ორ ნაწილთან. აი, ტერტულიანეს ერთ-ერთი გამონათქვამი: „ძე ღვთისა ჯვარს ეცვა, – არ მერცხვინება, რადგან სასირცხვიოა; ძე ღვთისა მოკვდა, – სრულიად სარწმუნოა, რადგან უაზრობაა; დამარხული აღდგა. – ნამდვილია, რადგან შეუძლებელია“. ანდა: „რასაც ჩვენ ვღიარებთ, ეს სალი აზრისთვის უაზრობაა“ (ლათინური ორიგინალიდან გვითარგმნა პროფ. ზურაბ კიკნაძემ და წყაროც მიგვითითა: De Carne Christi [ქრისტეს ხორცის შესახებ]: 4,5). ვფიქრობთ, სავსებით ლოგიკურია და ბუნებრივიც, რომ ტერტულიანეს ის ტექსტები, რომელშიც ყოველადძლიერი და ყოველმსპყრობელი ღმერთის ბოსელში შობაზე, ჯვარცმაზე, დამარხვასა და აღდგომაზე არის ლაპარაკი, კოლექტივის მეხსიერებამ შეაჯამა, დანურა და იმ ფორმულით გამოკვეთა ანუ, უფრო ზუსტად, გამოაკრისტალა, რომელიც დღეს ყოველმა სწავლულმა ქრისტიანმა იცის. რაც შეეხება წმ. პატრიარქის ფოლკლორული ფრაზის მესამე ნაწილს: „ლემს, რაც გსურთ, ის უყავით!“, იგი საკმაოდ რადიკალური და ექსტრემისტული გამონათქვამია და, ამდენად, წინააღმდეგობაშია „საბოლოო სიტყვის“ წერილობითი ვარიანტის წყნარ ტონთან. ამის გამო არ არის მოსალოდნელი, რომ ამ ტონის ავტორს ეს სიტყვები, ანდა ასეთი შინაარსისა და ასეთი ემოციური დატვირთვის ფრაზა წარმოეთქვას. ამდენად, საბოლოო სიტყვის ფოლკლორული ვარიანტის ეს ნაწილი ხალხის, კოლექტივის, მასის ინტერპოლაცია და თვითშემოქმედება უნდა იყოს, მასისა, რომელსაც, როგორც წესი, ექსტრემიზმი იზიდავს და გმირს ხშირად იმის თქმას მიაწერს, რისი თქმაც მას (მასას) თავად სურს და ეოცნებება.

<sup>24</sup> გამოქვეყნებულია ჩვენს მიერ ქართული დედანიც და პარალელური ფრანგული თარგმანიც, რომლის თანხლებით ეს დოკუმენტი ადრესატს გაეგზავნა: N. Papuashvili, Aus der jüngsten Vergangenheit der georgischen

orthodoxen Kirche: Die Erneuerung der Autokephalie und die Reformen, Tiflis 2012, S. 131-143. ატრიბუციის საკითხი: იქვე, სქოლიოში.

<sup>25</sup> გამოქვეყნებულია ჩვენს მიერ: „ალტერნატივა“, 1999, 19.X-1.XI, №21.

<sup>26</sup> ეს თემა შედარებით ვრცლად არის გაშლილი ჩვენს წერილში „სალი სარნმუნოება“, რომელიც ახლავს განხილული სიტყვის მეორე პუბლიკაციას: „თავისუფლება“, 2002, №5, გვ. 20-22. ამ პუბლიკაციის საჭიროება პოსტსაბჭოური საქართველოს პოლიტიკურ-რელიგიურმა და ზნეობრივმა კლიმატმა გვიკარნახა. ჩვენ ვფიქრობთ, რომ პრობლემები, რომელთა წინაშე ჩვენი ქვეყანა დგას, დიდწილად სწორედ სალი სარნმუნოების დეფიციტმა, მართლმადიდებლობით თავმომწონე საზოგადოებაში ქრისტეს სახარების – სიყვარულის – დაკნინებამ, დამდაბლებამ და გაპარტახებამ განაპირობა. მიზეზებს გარეშე ფაქტორებში ვეძებთ, საკუთარ თავს მართლმადიდებელ ქრისტიანებს ვეძახით, მაგრამ გვავიწყდება ერთ-ერთი უპირველესი ზნეობრივი პრინციპი: მიზეზი, პირველ რიგში, შენს თავში უნდა მოიძიო (მდრ. 1 კორ. 11,31)! იქნებ ამის მიზეზი არის მართლმადიდებლური ნაციონალიზმი, რასაც ქრისტე და მისი ეკლესია გმობს და რამაც პოსტსაბჭოური საქართველო გლობალურად მოიცვა?! და, აი, ახლა, როდესაც ეს შენიშვნა იწერება, ჩვენ დისკრიმინაციის კიდევ ერთი ფაქტის წინაშე დავდექით. ლაპარაკია სამოქალაქო დაპირისპირებაზე, რომელიც მოხდა ადიგენის რაიონის სოფელ მოხეში 2014 წლის 22 ოქტომბერს და რომელიც გამოიწვია იმ სამუშაოს დაწყებამ, რაც ადგილობრივი მთავრობის თაოსნობით დაიწყო და რაც მუსლიმთა სალოცავის ააშთა აარაღი-გიური მიზნით გადაკეთებას გულისხმობს. როგორც ვხედავთ, დაპირისპირების მიზეზად ამ შემთხვევაში თავად სახელმწიფო გამოიყურება, სახელმწიფო, რომელმაც მართლმადიდებელ ეკლესიას ყველა ძველი საკულტო ნაგებობანი დაუბრუნა. ჩანს, ეს სახელმწიფო არამართლმადიდებლებს და, კერძოდ, მუსლიმებს ქვეყნის მეორეხარისხოვან მოქალაქეებად აღიქვამს, რაც დისკრიმინაციაა. აღნიშნული ინციდენტი შედარებით ვრცლად: თ. მათეშვილი, რელიგიური შუღლით პროვოცირებული მართვადი ქაოსი. „რეზონანსი“, 2014, 24.X, №285.

<sup>27</sup> ინფორმაცია ანტირელიგიური პროცესების თაობაზე შედარებით ვრცლად: ნ. თალაქვაძე, მოქალაქე მღვდლის დღიურიდან, თბ., 2013, გვ. 513, 434-435.

<sup>28</sup> პრობლემები, რომელთა მოგვარების მიზნით ეს ეპისტოლე დაიწერა, თანამედროვე საქართველოს მართლმადიდებელ (ვაშკობინებდით: მართლმადიდებლობის დამჩემებელ) საზოგადოებაშიც მწვავედ დგას. ეს განსაკუთრებით სისხლიანი მსხვერპლის შეწირვისა და მასთან დაკავშირებული ცრურწმენების მისამართით ითქმის. გავითვალისწინოთ, რომ ასეთი მსხვერპლშეწირვა დღესაც სრულდება თვით საკათედრო ეკლესიების გალავნებში და დედაქალაქის ცენტრშიც კი. და თანაც: სრულდება იმავე ცნობიერების გავლენით, რის გამოსასწორებლადაც არის მიმართული კ-პ კალისტრატეს 1936 წლის ეპისტოლე. გავითვალისწინეთ რა ეს ვითარება, ამ დოკუმენტის ქართული ვარიანტი ჩვენ სამჯერ გამოვაქვეყნეთ (კომენტარითურთ): „სალვთისმეტყველო კრებული“, 1987, №3, გვ. 170-172; „ახალი ქართული გაზეთი“, 1998, 19.VIII, №23, გვ. ე-8; „თავისუფლება“, 2003,

№4, გვ. 47-49. გამოსცა სერგო ვარდოსანიძემაც (მისივე, პატრიარქები, თბ., 2013, გვ. 149-151). მაშადადამე, წინამდებარე გამოცემა, რითაც მთავრდება „ყვავილთკრებული“, მეხუთეა. ქრისტიანულ ტრადიციაში სისხლიანი მსხვერპლშენივრის საკითხი ჩვენ განხილული გვაქვს სტატიაში „ერთი სანესო ჩვეულებების კვალი გრიგოლ ხახანძეთელის ცხოვრებაში“: „ქართული ენა და ლიტურატურა სკოლაში“, 1987, №1-4, გვ. 238-254.

<sup>29</sup> ამ ეკლესიას საქართველოში „ცხოველ ეკლესიასაც“ უწოდებდნენ. 20-იან წლებში მისი ერთ-ერთი ყველაზე აქტიური წარმომადგენელი იყო დეკიოსებ ჩიჯავაძე, კათალიკოს-პატრიარქ კირიონის განუყრელი მეგობარი და თანამოსაგრე. იხ. ც. ჩხარტიშვილი, დეკანოზი იოსებ ჩიჯავაძე (წერილები კირიონ მეორისადმი), თბ., 2013, გვ. 9, 20-22. აღნიშნული ეკლესიის იდეებისადმი განსაკუთრებულ სიმპათიებს, თურმე, სამეგრელოს რაიონებში ამჟღავნებდნენ: ნ. თალაქვაძე, მოქალაქე მღვდლის დღიურიდან, თბ., 2013, გვ. 445-447.

<sup>30</sup> ამ საკითხს ჩვენ რამდენჯერმე გამოვხმაურეთ ქართულ და გერმანულ ენებზე; გვქონდა პოლემიკაც. ბოლო პუბლიკაცია: ნ. პაპუაშვილი, კალენდრის ახალი სტილი და საქართველოს მართლმადიდებელი ეკლესია. ისტორიისა და ეთნოლოგიის ინსტიტუტის შრომები X-XI, თბ., 2010/2011, გვ. 386-396 (ქართული ვარიანტი), 396-403 (გერმანული ვარიანტი).

<sup>31</sup> გამოაქვეყნა პროფ. მ. ქავთარიამ (მნიგნობრობა ქართული 9: კალისტრატე ცინცაძე, ნ. 1, თბ., 2010, გვ. 305-481).

<sup>32</sup> მეტი ინფორმაცია: ს. ვარდოსანიძე, პატრიარქები, თბ., 2013, გვ. 54-56.

<sup>33</sup> ვეთანხმებით პროფ. მიხეილ ქავთარიას, რომელიც წერს: „ეს იყო უმძიმესი 30-იანი წლები. სწორედ ამ პერიოდში დაიწყო კალისტრატე ცინცაძის ავტორიტეტის კიდევ უფრო ზრდა. მის გარშემო გაუხმაურებლად დადგა ქართული ინტელიგენციის ერთი ნაწილი და სწორედ მათთან ურთიერთობა აძლევდა ენერჯის უჯაროდ დარჩენილ გენერალს“ (მნიგნ. ქართ. 9, გვ. 508). დავძენთ: ფაქტი, რომ საქართველოს მართლმადიდებელმა ეკლესიამ ინსტიტუციური არსებობა შეინარჩუნა, ძირითადად განაპირობა ავტორიტეტმა, რომელიც მოსავდა კათალიკოს კალისტრატეს იმდროინდელი კომუნისტური ელიტის არა ერთი და ორი წარმომადგენლის თვალშიც კი.

<sup>34</sup> ქაშვეთის ტაძრის სამრევლოსათვის ჩამორთმევის საკითხი, თითქოს, გადწყვეტილი იყო, მაგრამ საქართველოს კომპარტიის ცენტრალური კომიტეტის მაშინდელ მდივანს, ლავრენტი ბერიას, კათალიკოსის თხოვნისათვის ანგარიში გაუწევია: ს. ვარდოსანიძე, დას. წიგნი., გვ. 53.

<sup>35</sup> შედარებით ვრცლად 30-იანი წლების დევნილობის შესახებ: ნ. პაპუაშვილი, საქართველოს ეკლესია ორ მსოფლიო ომს შორის, თბ., 1996, გვ. 19-28; მისივე, საქართველოს ეკლესია იმედისა და უიმედობის ზღვარზე. „სიტყვა“ („ახალი 7 დღის“ ყოველთვიური გამოცემა), 2007, №1, გვ. 77-80; N. Papuašvili, Antireligiöse Hysterie und Verfolgung (Die Georgische Orthodoxe Kirche zwischen den beiden Weltkriegen), in: Glaube in der 2. Welt, 1996, # 3, S. 18-22; N. Papuašvili, Aus der jüngsten Vergangenheit der georgischen orthodoxen Kirche: Die Erneuerung der Autokephalie und die Reformen, Tiflis 2012, S. 63-82

<sup>36</sup> დიდ კვერექსში „ჩვენი ერის, მისი მთავრობისა და მხედრობის“ მოხსენი-

ება 1941 წლის 24 ივნისიდან დაიწყო: ნ. ტაბიძე, კალისტრატე ცინცაძე, თბ., 2008, გვ. 18.

<sup>37</sup> ირკვევა, რომ ნაცისტური გერმანიის სპეცსამსახურები დიდ იმედებს ამყარებდნენ კათალიკოს კალისტრატე ცინცაძის პროვინებაზე. ჩანს, მათ მიზნად მიმხრობის იმედი ჰქონდათ, რაც, საეარაუდოდ, შემდეგ გარემოებებს ემყარებოდა: პირველი ის, რომ მას, კ. ცინცაძეს, გერმანელი, დაბადებით გერმანიის იმპერიის მოქალაქე, ცოლი ჰყავდა და მის ოჯახს სხვადასხვა ქვეყანაში მცხოვრებ გერმანელებთან ნათესაური კონტაქტები უნდა ჰქონდა და მეორე, იგი ფლობდა გერმანულ ენას და გამოირჩეოდა განათლებით, რის გამოც ის თანამემამულეებს შორის დიდი ავტორიტეტით სარგებლობდა. მედარებით ვრცლად: ნ. პაპუაშვილი, გრიგოლ ფერაძე სარწმუნოებისა და მოქალაქეობის შესახებ, თბ., 2006, გვ. 87-88,207; N. Papuashvili, *Aus der jüngsten Vergangenheit...*, S. 82-83. სტალინთან მიმონერისა და მასთან ურთიერთობის რეალური თუ ფანტაზიისეული ამბების თაობაზე: ნ. ტაბიძე, დას. წიგნი, გვ. 23-25; ს. ვარდოსანიძე, დას. წიგნი, გვ. 151,155-156. ეს ამბები (კერძოდ, კალისტრატე სტალინთან ანაფორის გარეშე შევიდაო), ჩანს, პოპულარობით სარგებლობდა ქართულ ემიგრაციაშიც: დ. ჭუმბურიძე, რედაქტორისაგან. – ნ. როსტომაშვილი, დას. წიგნი, გვ. 5. კ. ცინცაძის ძმისშვილის, ქ-ნ ანტისას ზეპირი ინფორმაციით, სტალინი კათალიკოს-პატრიარქ კალისტრატეს წყალტუბოში შეხვდა.

<sup>38</sup> ეს ქადაგება წარმოითქვა 1926 წლის 14 (27) იანვარს, მიტროპოლიტობის დროს. ეს ის დროა, როდესაც მართლმადიდებელი და, ზოგადად, ქრისტეს ეკლესიის მისამართით წამოყენებულ იქნა ბრალდებათა დიდი პაკეტი. ერთ-ერთ პირველ ადგილზე იდგა ბრალდება, რომლის თანახმად ქრისტეს მოძღვრება და ქრისტეს ეკლესია, თითქოს, შინაგანად და ბუნებითად არის დაპირისპირებული ჰუმანიტურ და დემოკრატიულ ღირებულებებთან. მიტროპოლიტი ავტორის მიზანია ცხადყო, რომ პირიქით: სწორედ ქრისტეს მოძღვრება არის ჭეშმარიტი ჰუმანიზმისა და დემოკრატიის ცხოველყოფელი წყარო. დიდი თეოლოგიური და ეკლესიათმცოდნეობითი მნიშვნელობის გამო ჩვენ ეს დოკუმენტი ორჯერ გამოვაქვეყნეთ: „საღვთისმეტყველო კრებული“, 1985, №1, გვ. 20-33; ნ. პაპუაშვილი, წმიდა ნინო და თანამედროვეობა (ქადაგების ტექსტით). „თავისუფლება“, 2002, №9, გვ. 12-23.

<sup>39</sup> ამის მიუხედავად აღმოსავლეთის მართლმადიდებელი პატრიარქები მცხეთის საყდრის ავტოკეფალიის დე-იურედ აღიარებისაგან დიდხანს თავს იკავებდნენ. ეს ვითარება გაგრძელდა 1990 წლის 23 იანვრამდე. ამ დღეს კონსტანტინოპოლში (სტამბოლში) მსოფლიო პატრიარქის, ყოვლადღუსწმინდეს დიმიტრიოს I-ის ლოცვა-კურთხევით შედგა უწმინდესი სინოდის სხდომა, რომელმაც, სრულიად საქართველოს კათალიკოს-პატრიარქ ილია II-ის მიმართვისა და თხოვნის თანახმად, განიხილა საქართველოს მართლმადიდებელი ეკლესიის სტატუსის საკითხი და გამოიტანა დადგენილება ამ ეკლესიის ორთქიული ავტოკეფალიის აღიარების თაობაზე. შესაბამისი სიგელი იმავე წლის 25 იანვარს გამოქვეყნდა. მასალები: „ჯვარი ვაზისა“, 1990, №3, გვ. 5-14.

<sup>40</sup> მდრ.: ერთი იდეოლოგიური კამპანიის ისტორიიდან (საბჭოთა კავშირის ტერიტორიული პრეტენზიები თურქეთისადმი 1945-1953 წლებში), მასა-

ლები გამოსაცემად მოამზადა და შესავალი წერილი დაურთო ჯ. სამუშიამ, თბ., 2003, გვ. 23-45; ნ. ტაბიძე, დას. წიგნი, გვ. 53-56; ს. ვარდოსანიძე, დას. წიგნი, გვ. 71-74.

<sup>41</sup> შდრ.: ნ. პაპუაშვილი, კ. მ. ცინცაძის ცხოვრება და მეცნიერული მემკვიდრეობა. მრავალთაფი XIII, თბ., 1986, გვ. 105. აღნიშნულმა კამპანიამ დადებითი გამოხმაურება ჰპოვა ქართულ ემიგრაციაშიც. იხ.: მ. თარხნიშვილი, საქართველოს ეკლესიის ისტორია..., გვ. 57-58, 85.

<sup>42</sup> აქ საგულისხმო და გასათვალისწინებელია აკადემიკოს კორნელი კეკელიძის სიტყვები, წარმოთქმული კალისტრატე ცინცაძის სიძის, ვახტანგ ქართველიშვილის, დაკრძალვის დღეს და გადმოცემული პროფ. მიხეილ ქავთარიას მიერ: „კალისტრატე ღრმადმორწმუნე კაცი ბრძანდებოდა. ეკლესიას მიუძღვნა მთელი ცხოვრება. ამიტომ ქართული მწერლობის ისტორიამ დაკარგა ერთი კარგი და წარჩინებული მკვლევარი“ (მნიგნ. ქართ. 10, გვ. 194).

<sup>43</sup> გამოვაცქეყენე ჩვენ მიმოხილვის თანხლებით: მესხეთი (საისტორიო კრებული) III, თბილისი-ახალციხე, 1999, გვ. 170-198. მეორე პუბლიკაცია: მნიგნობრობა ქართული 9, თბ., 2010, გვ. 211-242 (მ. ქავთარიას გამოცემა).

<sup>44</sup> გამოცემა: კ. ცინცაძე, ქვაშვეთის წმიდის გიორგის ეკლესია ტფილისში, გამოსაცემად მოამზადა, ბოლოსიტყვა და საძიებელი დაურთო მ. ქავთარიამ, თბ., 1994.

<sup>45</sup> აღნიშნულ საკითხებზე შედარებით ვრცლად: ნ. პაპუაშვილი, სათნო გადმოცემა «მამა დავითი და შეცდენილი ქალი» (კათალიკოს-პატრიარქ კალისტრატე ცინცაძის მიმოხილვის კვალდაკვალ ქვაშვეთის შესახებ). ასურელი მამები აღმოსავლურ და დასავლურ საეკლესიო ტრადიციაში, თბ., 2009, გვ. 89-106. „ქაშვეთის“ სახელით ცნობილი სალოცავი ადგილების კ. ცინცაძისეულ ნუსხას, რომელიც თხუთმეტი ერთეულისაგან შედგება, ჩვენ ვავსებთ ოთხი ერთეულით (გვ. 102-104). მათგან მეოთხე, ანუ საერთო ნუსხის მე-19 „ქაშვეთი“, დადასტურდა 2008 წლის ივლისის მიწურულს ქსნის ხეობაში, ლარგვისის თემში, სოფელ მახიარეთში ფოლკლორულ-ეთნოგრაფიული ექსპედიციის მიერ პროფ. ზურაბ კიკნაძის, პროფ. ხვთისო მამისიძე-დიშვილისა და ამ სტრიქონების ავტორის შემადგენლობით. მახიარეთის ქაშვეთი ნახევრად ალპურ ზონაში მდებარეობს. იგი დანგრეულია, მაგრამ მალაღმთიანეთის პირობაზე მაინც შთამბეჭდავ ნაგებობად გამოიყურება. ბევრი საკითხი მაშინ, დროის სიმცირის გამო, შეუსწავლელი დაგვრჩა, მაგრამ იმედი გვაქვს, რომ შევისწავლით, როდესაც პოლიტიკური ვითარება გამოკეთდება, როდესაც ხეობა, რომელიც ჩვენი დაბრუნებიდან რამდენიმე დღის შემდეგ ოკუპირებულ იქნა, გათავისუფლდება და ჩვენ კვლავ ვენვევით საქართველოს ამ კურთხეულ მხარეს.

<sup>46</sup> ამ საკითხის ისტორიულ-ქრონოლოგიურ მხარესთან დაკავშირებით რამდენადმე განსხვავებული პოზიცია აქვს ჩამოყალიბებული ამავე ეპოქის მეორე დიდ ქართველ სასულიერო პირს მღვდელმონაქმე გრიგოლ ფერაძეს: Cr. Peradse, Skizzen zur Kulturgeschichte Georgiens. 1. Der Heilige Georg im Leben und in der Frömmigkeit des georgischen Volkes (ein religionsgeschichtlicher Versuch), in: Der Orient 12, 1930, H. 2, S. 45-52; გრ. ფერაძე, წერილები ჩვენი წარსული ცხოვრებიდან. წმ. გიორგი ქართველი ერის შემოქმედებაში

(ქართული წარმართობის შესახებ). „ჯვარი ვაზისა“ (ნმიდა ნინოს ქართულ მართლმადიდებელ მრევლის ორგანო), პარიზი, 1932, №2, გვ. 6-39.

<sup>47</sup> გამოქვეყნდა ჩვენს მიერ: „ლიტერატურა და ხელოვნება“, 1992, №1-2, გვ. 195-217. მეორე პუბლიკაცია: მნიგნობრობა ქართული 9, თბ., 2010, გვ. 187-210 (მ. ქავთარიას გამოცემა).

<sup>48</sup> ამ ნაშრომის გამოქვეყნების ისტორიასთან დაკავშირებით: ნ. პაპუაშვილი, კ. მ. ცინცაძის ცხოვრება..., გვ. 109-110, სქ. 51.

<sup>49</sup> ზოგადი მიმოხილვა: ნ. პაპუაშვილი, კ. მ. ცინცაძის ცხოვრება..., გვ. 109-112.

<sup>50</sup> აკადემიკოს შალვა ნუცუბიძის მეუღლე, ქეთევან ნუცუბიძე, იხსენებს, თუ როგორ დაუმშვიდა კათალიკოსის სიტყვამ და მეტყველებამ მას და მის მეუღლეს გული, მათი ვაჟის, პატარა შალის, გარდაცვალების გამო დათუთქული: ქ. ნუცუბიძე, მოგონება კალისტრატე კათალიკოსზე. „საღვთისმეტყველო კრებული“, 1987, №3, გვ. 48-49.

<sup>51</sup> ეს ქადაგება მეორედ გამოვაქვეყნეთ 1992 წელს და მიუძღვნენთ სამშობლოსათვის ბრძოლის ველზე აღსრულებული ახალგაზრდა პარლამენტარის, სოფლის მეურნეობის დოქტორის ნუგზარ მიხანაშვილის ხსოვნას: „ლიტერატურული საქართველო“, 1992, 4.XII, №47.

<sup>52</sup> მოგონებათა აღნიშნული ციკლის გამოქვეყნების პროცესი ხელნაწერთა ინსტიტუტის მეცნიერმა თანამშრომელმა მიხეილ ქავთარიამ დაიწყო ზაქარია ფალიაშვილზე მოგონების გამოქვეყნებით (იხ. ზემოთ შენ. 14), რაც გაავრცელეთ ჩვენ აღნიშნულ ინსტიტუტში მუშაობის დროს. პირველად გამოვაქვეყნეთ „მოგონება ილიაზე“ (იხ. ზემოთ შენ. 18), რასაც მოჰყვა რუსულ ენაზე დაწერილი მოგონების პირველი სამი თავის თარგმანის გამოქვეყნება: გამოქვეყნდა 1987 წელს „საღვთისმეტყველო კრებულის“ მე-3 ნომერში, რომელიც მიძღვნილია კ-პ კალისტრატე ცინცაძის დაბადების 120 წლისთავისადმი (გვ. 20-47). თარგმანი ჩვენი (მითითებული ნომრის რედაქტორისა და შემდგენლის) თხოვნით შეასრულა მისი უწმინდესობის შვილიშვილმა რუსულად კორძაიამ იმ ეგზემპლარიდან, რომელიც ინახება შვილთაშვილის, ვახტანგ ქართველიშვილის ოჯახში. ეს თარგმანი, თხზულების დანარჩენი ნაწილის თარგმანთან ერთად (ამ ნაწილის მთარგმნელები ნ. ჯოლოხაძე და აკ. ბრეგაძე), გამოსცა მთავარეპისკოპოსმა ანანია ჯაფარიძემ: კ. ცინცაძე, ჩემი მოგონებიდან, თბ., 2001. იქ, სამწუხაროდ, ვერ ვხვდებით მითითებას თხზულების ზემოთ აღნიშნული მონაკვეთის პირველი პუბლიკაციის შესახებ და მკითხველისათვის გაურკვეველი რჩება, თუ სად მოიპოვა და საიდან აიღო გამომცემელმა ამ მონაკვეთის თარგმანის ტექსტი, რაც გამოცემის აკადემიურ მხარეს აკნინებს და კოლევანური ეთიკის ნორმებს არღვევს (შდრ. ჩვენი რეცენზია აღნიშნულ გამოცემაზე: ნ. პაპუაშვილი, „უგულისწყრომოდ, მიუკერძოებლად“. „საგურამო“, 2002, №2, გვ. 61). ეგვევითქმის კ. ცინცაძის ამავე და სხვა მოგონების მომდევნო პუბლიკაციის მისამართითაც (რედაქტორი პროფ. მიხეილ ქავთარია): მნიგნობრობა ქართული 10, თბ., 2010.

<sup>53</sup> ამ დიკუმენტებიდან მ. ქავთარიამ გამოაქვეყნა ნიკო კეცხოველის „ყველაზე სათნო ჩემი მასწავლებელი“ და ერასტი ვაცნაძის „მოგონება“ (მნიგნ. ქართ. 10, გვ. 495-509).

<sup>54</sup> ქ-ნ ოფელია-ნინოს პოზიცია ჩვენთვის ცნობილია კ. ცინცაძის სიტყვიდან, რომელიც მან ეპისკოპოსად კურთხევის დღეს წარმოთქვა. იგი პირველად ჩვენ გამოვაქვეყნეთ: „საღვთისმეტყველო კრებული“, 1987, №3, გვ. 166-168.

<sup>55</sup> მკვლევართა ნაწილს ჰგონია, რომ კათალიკოს-პატრიარქი კალისტრატე „იყო ბერი“ (ნ. როსტომაშვილი, დას. ნიგნი, გვ. 184), რაც მართალი არ არის. გავითვალისწინოთ, რომ საქართველოს ეკლესიის მართვა-გამგეობის იმხანად მოქმედი, პირველი საეკლესიო კრების მიერ დამტკიცებული დებულებების მიხედვით ეპისკოპოსისათვის ბერობა აუცილებელი არ იყო: ნ. პაპუაშვილი, დეკანოზ კორნელი კეკელიძის მოხსენებები საეკლესიო კრებაზე. „ზღვარი“, 2005, №1, გვ. 7-8; მისივე, კონკრეტული კეკელიძე პირველ საეკლესიო კრებაზე და ორი კანონიკური დოკუმენტის ატრიბუციის საკითხი. ქრისტიანულ-არქეოლოგიური ძიებანი, 1/2008, გვ. 438-439.

<sup>56</sup> უფრო კონკრეტულად: ნ. პაპუაშვილი, კ. მ. ცინცაძის..., გვ. 112-113.

<sup>57</sup> ბოლო დროს ფართო საზოგადოებრიობისათვის ცნობილი გახდა კათალიკოს-პატრიარქ კალისტრატე ცინცაძის გარდაცვალების აქამდე სრულიად უცნობი ვერსია. მხედველობაში გვაქვს პუბლიკაცია: ლ. ურუშაძე, საქართველოს კათალიკოს-პატრიარქი კალისტრატე ცინცაძე (1932-1952). „რელიგია“, 2014, №2, გვ. 5-9. ავტორი იმონუმებს კ-პ კალისტრატეს წერილებს, რომლებიც მან საბჭოთა მთავრობისა და ხელისუფლების წარმომადგენლებს სიცოცხლის ბოლო წლებში გაუგზავნა და რომლებიც, მკვლევრის შეფასებით, კრიტიკასა და მკაცრ ტონს შეიცავს, აგრეთვე – ამერიკის კონგრესის 1955 წლის გამოცემას „კომუნისტური გადატრიალება და საქართველოს ოკუპაცია“ (ქართული თარგმანი: [თბ., 2007]). ამ დოკუმენტის თანახმად კათალიკოს-პატრიარქმა კალისტრატემ 1951 წელს ინტერვიუ მისცა „ნიუ-იორკ ტაიმისს“ კორესპონდენტს და აღნიშნა: „საქართველოში მხოლოდ 100 ეკლესია შემორჩა. სხვა ფაქტები რომც არ არსებობდნენ, ესეც საკმარისი იქნებოდა იმის სადემონსტრაციოდ, რაც კომუნისტებმა ქართულ ეკლესიას დამართეს. ქართველ ხალხს ამერიკელ ხალხთან მეგობრული ურთიერთობის დამყარების სურვილი აქვს“ (ქართ. თარგ. გვ. 41). იქვე აღნიშნულია, რომ სსრკ-ის ინტერვიუს გამო კათალიკოსი „დააპატიმრეს. წამების შემდეგ 1952 წლის 3 თებერვალს კათალიკოსი კალისტრატე ციხეში გარდაიცვალა“ (გვ. 45). გადმოსცემს რა ამ ინფორმაციას, ლევან ურუშაძე დასძენს: „არსად, სადაც კათალიკოს კალისტრატეზეა ლაპარაკი, არ არის აღნიშნული, რომ იგი წამების შემდეგ ციხეში გარდაიცვალა“, რაც მიგვანიშნებს, რომ ის, მკვლევარი, ნდობას უცხადებს მითითებულ ინფორმაციას და, მამასადავად, კათალიკოს კალისტრატეს პატიმრობაში აღსასრულის ვერსიას ავითარებს. ინფორმაცია ინტერვიუს შესახებ რომ ნამდვილია, ეს ცხადია. ამ ინტერვიუს იცნობდა ქართული ემიგრაციაც. ჟურნალში „ივერია“ ვკითხულობთ: „2.455 ეკლესიიდან რუსეთის საბჭოთა რეჟიმს გადარჩენია (თანახმად 1951 წლის ქათალიკოს კალისტრატეს მიერ New-york-Times-ის წარმომადგენელ ბ-ნ ჰარისონ ე. სალისბერისადმი განცხადებისა) მხოლოდ 100 სამრევლო და ალბად ამოდენივე ეკლესია და მღვდელი“ (1856, №8, გვ. 38). რაც შეეხება ინფორმაციას პატრიარქის საპყრობილეში გარდაცვალების შესახებ, ეს ინფორმაცია, კონგრესის იმავე გამოცემის თანახმად (გვ. 41), ამოღებულია იმ ჩვენებიდან, რომელიც ემიგრანტმა ვალერიან სანგულიამ, ქართველი მღვდლის შვილმა, კონგრესის ერთ-ერთ კომიტეტს



---

მისცა. საკმარისია, თვალი გადავაგლოთ აღნიშნული ჩვენების ტექსტს, რათა დავრწმუნდეთ, რომ ის აგებულია ზეპირად გავრცელებულ და ინდივიდუალურ მესსიერებაში შემონახულ ამბებზე, რასაც სიზუსტის პრეტენზია ვერ ექნება. მაგალითად, იქ ნათქვამია, რომ კათალიკოსი ამბროსი ციხეში გარდაიცვალა (გვ. 45). თუ „ციხეს“ პირდაპირი მნიშვნელობით გავიგებთ, მაშინ უნდა ვალიაროთ, რომ ეს არასწორი ინფორმაციაა. ჩვენ გვქონდა შემთხვევა, გვესაუბრა კ-პ კალისტრატეს ძმისშვილთან – ანტისა ცინცაძესთან, რომელიც ბიძას უვლიდა და მის სასიკვდილო სარეცელსაც არ მოშორებია. მისი ინფორმაციით უნმინდესი კათალიკოსი საკუთარ რეზიდენციაში გარდაიცვალა და დიდი პატივით, ხალხმრავალი პროცესიით და შთამბეჭდავი წესგანგებით დაიკრძალა.

თბილისი, 2014 წლის სექტემბერ-ოქტომბერი



## НУГЗАР ПАПУАШВИЛИ

### Святейший и блаженнейший Католикос-Патриарх всея Грузии Каллистрат Цинцадзе<sup>1</sup>

«Поминайте наставников ваших, которые проповедывали вам слово Божие, и, взирая на кончину их жизни, подражайте вере их» (евреям 13,7)

Подобающее описание полных заслуг жизни Католикоса-Патриарха Каллистрата Цинцадзе не терпит отлагательств, ибо архиерейский облик этого блаженной памяти духовного наставника является воплощением нравственного совершенства и цельности разума. Предлагаемая статья в общих чертах рассматривает его деятельность. Нами привлечены материалы из личного архива досточтимого патриарха, хранящегося в Институте рукописей Академии наук Грузии им. К.С.Кекелидзе (нынешний Национальный центр рукописей), воспоминания и впечатления знакомых и близких святейшего Каллистрата, с радостью рассказавших нам о Христовой самоотверженности их наставителя.

Католикос-Патриарх всея Грузии Каллистрат (Каллистрат Михайлович Цинцадзе) родился 12 апреля 1866 года в селе Тобаниери Ванского района (в то время Кутаисского уезда).

Благодаря добронравным родителям будущий католикос с отроческих лет приобщился Христовой вере. Старшая сестра обучила шестилетнего Каллистрата церковному письму и псалтыри. За такое усердие отец (священник Михаил) подарил ему книгу по родному языку «Бунебис кари [Врата природы]» Якова Гогешавили. Отрок, жаждущий учения, еще в дошкольном возрасте приступил к освоению псалмопения и приобщился благодати священства с этих же пор.

---

<sup>1</sup> Опубликовано патриархией Грузии в «Богословском сборнике», по правилам внутреннего пользования, 1980, №2, с. 99-118 (на грузинском языке), во второй раз (сравнительно обширный вариант) – в календаре Грузинской церкви (1982, с. 143-162), научной целью обработанный и пространный вариант – в сборнике Института рукописей Академии Наук Грузии «Мравалтави» (XIII, 1986, с. 96-113). Этот текст должен был быть опубликован в «Журнале Московской Патриархии» 1986 году в связи со стадацатилетней годовщиной его Святейшества Каллистрата, однако по неизветной для автора причине не был напечатан. Данный текст является слегка переработанный и незначительно дополненный вариант текста, составленного тридцать лет назад.

Однажды в Тобаниери пожаловал его Пресвященство Габриэл (Кикодзе). Архипастырь тотчас же заметил благородство и живой ум Каллистрата. После службы он подозвал юношу к себе, побеседовал с ним, заставил его прочесть несколько молитв и псалмов, приласкал мальчика и посоветовал отцу непременно отдать его в духовное училище.

В 1875 году родители отдали Каллистрата в Кутаисское духовное училище, после успешного окончания которого в 1882 году он поступил в Тбилисскую духовную семинарию. Здесь талантливый юноша прошел новые ступени духовной закалки.

В то время Тбилисская духовная семинария была единственным в Грузии училищем, где под руководством квалифицированных педагогов ученики приобретали основательные знания во многих областях науки: грузинскую литературу преподавал проф. Ф. Жордания, а богословие – протоиерей Павел Светлов (впоследствии профессор Киевского Университета). Здесь же зародилась и зрела мысль о восстановлении автокефалии грузинской церкви.

Юноша Каллистрат с большим усердием взялся за духовное просвещение. Не пропускал священнодействия; молился ежедневно и горячо. Вместе с тем он поддерживал все добрые починки студентов: участвовал в национально-освободительном движении семинаристов, содействовал молодым писателям и был даже членом студенческого драматического кружка.

В 1888 году педагогический совет семинарии направил своего выпускника Каллистрата Цинцадзе в Киевскую духовную академию. В высшем учебном заведении будущий пастырь приобрел основательные философско-богословские знания. Здесь он вел серьезную научную работу. В труде «Иверская Церковь в период Сассанидов (265-570)», за который Каллистрату Цинцадзе была присвоена научная степень кандидата Богословия, выкристаллизовалось его религиозно-патриотическое кредо.

Диссертант в этом исследовании, опираясь на первоисточники, научно обосновал положение об апостольности грузинской церкви – ее основоположником является один из двенадцати апостолов Андрей Первозванный. Автор документированно показал церковные взаимоотношения Иверии-Антиохии (III-VI вв.) и, исходя из тех же исторических данных, выявил недействительность версии о подчинении нашей церкви католикосату Армении. Здесь же был освещен ряд неясных со времен владычества сассанидов вопросов истории католикосата Иверии. Среди них – церковное право, поместные церковные соборы, список архиепископов, иерархическое строение церкви и др.

Означенное исследование было признано наилучшим и высоко оценено профессорами Малышевским и Олесницким (см. «Мцкემси [Пастырь]», Тифлис, 1892 г., №13-14, с. 10-11). В Киеве он познакомился с немецкой девушкой Офелией Томмас, которая там работала гувернанткой и преподавателем немецкого языка. Молодые люди полюбили друг друга и обвенчались в православной церкви.

В 1892 году кандидат богословских наук Каллистрат с убеждениями и мужеством истинного духовного наставника возвратился на родину и вскоре приступил к исполнению трудных, но желанных обязанностей священнослужителя.

Отец Каллистрат преданно служил сперва в Дидубийской церкви Богоматери (в Тбилиси), а затем с 1903 года – в Квашветской церкви святого Георгия (новое здание этой церкви было построено по его инициативе). В 1909 году настоятель Квашветского собора был возведен в сан протоиерея.

С того дня, как отец Каллистрат был поставлен настоятелем, он радел об обогащении нашей церкви теологическими приобретениями, о восстановлении традиций богословской науки, забытых после Католикоса Антона I и его школы (с I четверти XIX столетия).

Появление молодого богослова перед народом предвещало пробуждение после долгого бездействия: 25 апреля 1893 года (на другой день после его рукоположения во священники) 27-летний священнослужитель достойно предстал у гроба известного поэта Николоза Бараташвили перед процессией, воплощавшей собой всю Грузию. В панихидной проповеди<sup>2</sup> духовный наставник охарактеризовал творчество поэта с богословско-философской точки зрения, он почувствовал подлинно христианскую душу истинного художника, и признал, что сутью творчества Н. Бараташвили является постижение дремлющего в мироздании Божественного начала. «Николоз Бараташвили в природе и посредством природы – учил он – ищет и находит того, кто в силах дать отраду и облегчение... Таким образом, согласно слову апостола (Римлянам I, 19-20), он природу признал гласом Божиим к людям – книгой, в которой вычитал, что сердцу человека облегчение и отраду может дать лишь тот, кто является причиной сотворения его и природы». Такое осмысление творчества Николоза Бараташвили явилось новым словом в грузинской литературной критике.

Священнослужитель в первый же день прихода в паству уведомил

---

<sup>2</sup> Рукопись этой рчи хранится в архиве католикоса Каллистрата (№97, с. 122-125). Впервые она была напечатана в «Богословском сборнике» при Патриархии Грузии (1980, №2, стр. 63-66), во второй раз в журн. «Джвари вазиса» (1981, №1, стр. 28-29).

верующих об истинной науке и проповедывал: «Кто раньше возглавлял обучение и просвещение, сегодня отстал от другого сословия, дело обернулось так, что для духовенства совершенно достаточным считалось знание часослова-псалтыри-служебника и умение с грехом пополам ставить свою подпись на церковных документах». По словам наставника, это национальное несчастье способствовало распространению лжепросвещения, главари которого пользовались подобной немощью духовенства для принижения церкви. Они вопили об устарении веры и нарочно затушевывали подлинную причину ее ослабления в народе – отсутствие самостоятельной, независимой церкви. Именно в этом была причина зарождения в народе неверия и безнравственности. «Что спасет, какое лекарство поможет этой болезни? Кто должен позаботиться о «Народе, ходящем во тьме... и живущем в стране тени смертной (Исаия 9,2)? – вопрошал наставник и сам же отвечал – Поскольку веру и нравственность уронили лженаука и лжепросвещение подлинные наука и просвещение должны воскресить их. Поэтому долг каждого истинно просвещенного грузина вернуть младшим братьям своим то, что отняло у них невежество и лжепросвещение, вернуть народу христианскому, крестоносному, мученику за Христа прадедовскую веру и неоскверненную, незапятнанную, безупречную нравственность».

Евангельское учение о преображении и обновлении вселяло в сердца сынов отечества надежду на пробуждение национальной энергии. Священник Каллистрат указывал на монашество как на источник мощи страны, и участь Грузии связывал с судьбою ее монастырей. В речи, произнесенной в 1907 году в связи с кончиной его Преосвященста Александра Окропиридзе он поучал: «Правда, на сей день монашество не в чести у общества, но причина этого кроется в измене монахов своему прямому назначению. Если сегодня большинство монахов составляют любители праздной жизни, то раньше это было не так. В былые времена понятия монашество и подвижничество на общественном поприще были синонимами. Если раньше грузин покидал мать и отца, сестер и братьев, дом и соседей и уходил в монастыр-пустыню, то он заботился не о себе, а приносил себя в жертву отчизне, ради широкого поприща покидал узкие пределы, способствовал просвещению своего народа, углублению его самосознания, усилению его и внутреннему совершенствованию. Он заботился о вдовах и сиротах, о нищих и немощных, вселял надежду в сердца и утешая гнущихся под бременем, подбадривал тружеников и обличал сильных мира сего, когда они сбивались с пути истины и правды. Поэтому, доколе монашество выполняло свой долг, Грузия росла и цвела, а когда

монашество пало, то и Грузия пришла в упадок, распалась на части».

14 октября 1900 года отец Каллистрат благословил фундамент нового здания грузинской гимназии и после благодейственного молебня следующими словами приветствовал основание очага просвещения: «Мы сегодня закладываем основу храма, который из своих пределов должен выпустить патриотов, осененных светом науки, поднявших щит вероисповедования и достигших высокого нравственного совершенства». На богослужении присутствовали: Н. Цхведадзе (основатель новой гимназии), С. Клдиашвили (архитектор), В. Такайшвили (профессор) и Ар. Кутателадзе (педагог). Все единодушно благословили основание грузинской гимназии.

Воля Господа открыла мечту патриотов и внушила грузинским ученым мысль о создании университета в недрах названной гимназии. 26 января 1918 года, в день памяти св. Давида Строителя (+1125) Католикос-Патриарх всея Грузии Кирион отслужил праздничную литургию в храме гимназии и благословил грузинский университет (протоиерей Каллистрат был сослужителем его святейшества).

Скромный и просвещенный человек, подлинный патриот, отец Каллистрат евангельской любовью радел о всех благотворительных делах – был сотрудником церковного музея, членом комиссии по исправлению грузинских богослужебных книг. Под его редакцией (совместно с прот. Корнели Кекелидзе) в 1915 году был издан «Требник». В то же время он был представителем комитета по возрождению мцхетских храмов, активно участвовал в работе исторического и этнографического общества, публиковал статьи в периодике того времени: «Мцкемси», «Пастырь», «Иверия», «Дроеба [Время]», «Шинаури сакмееби [Внутренние дела]», «Сакартвело», «Ганатлеба [Просвещение]», «Театр», Духовный вестник грузинского экзархата» и др.

Особенно примечательна педагогическая деятельность протоиерея К. Цинцадзе: он преподавал закон Божий в дворянской и мужской гимназиях, сотрудничал в педагогическом совете духовной семинарии. Он же составил и издал учебное пособие для закона Божьего<sup>3</sup>. 27 апреля 1922 года Святейший Синод грузинской церкви назначил Каллистрата директором новооткрытых духовных курсов (Названное училище по определенным причинам просуществовало до 12 января 1923 года. В это время по политическим мотивам арестовали директора упомянутого училища и большую часть педагогов).

Самоотверженную педагогическую деятельность священнослужи-

---

<sup>3</sup> Прот. К. Цинцадзе. Молитвенник и сокращенный катехизис. Тифлис, 1914 (на грузинском языке).

телей укрощали высокая нравственность и отзывчивость по отношению к ученикам. Доброго духовного наставника с глубоким почтением упоминали композитор Захария Палиашвили, академик Корнелий Кекелидзе и поколения деятелей грузинской культуры, приобщенных кротости и свету просвещения литургическими проповедями отца Каллистрата.

В 1908 году по инициативе прот. Каллистрата Цинцадзе, Композитора Захария Палиашвили, либретиста Петра Мирианшвили и прот. Антона Тотибадзе в Грузии впервые было основано «Общество филармонии», целью которого было возрождение грузинских песнопений. В 1910 году, по просьбе отца Каллистрата, Захарий Палиашвили собрал певчий хор для Квашетской церкви и перенес на ноты «Чин литургии св. Иоанна Златоуста». В 1918 году вместе с Иерархами грузинской церкви на премьеру своей оперы «Абесалом и Этери» Захарий Палиашвили специально пригласил просвещенного священнослужителя; в тот день рядом с католикосом Кирионом и митрополитом Леонидом, благословившими первые шаги национальной оперы, стоял прот. Каллистрат.<sup>4</sup>

Главной заслугой Католикоса-Патриарха Каллистрата является восстановление автокефалии грузинской церкви. В 1894 году в журнале «Пастырь» была опубликована научная статья на русском языке священника Каллистрата Цинцадзе о былых днях грузинской церкви. Статья вызвала гнев экзарха (редактору протоиерею Давиду Гамбашидзе он пригрозил закрытием журнала). Исследование свидетельствовало об апостольности грузинской церкви – в нем сквозила мысль о правомерности восстановления ее самостоятельности. Это была весьма смелая статья, она означала усиление голоса протеста, раздавшегося со дня упразднения автокефалии апостольской церкви Иверии (1811 г.).

В 1905 году когда оживилось национально-освободительное движение, по инициативе К. Цинцадзе (совместно с единомышленниками проф. С. Горгадзе и прот. А. Тотибадзе) была разработана петиция относительно восстановления Патриархата Грузии для представления святейшему синоду русской церкви. С этой петицией в Петербург прибыла делегация в составе епископа Антона Гиоргадзе, архимандрита Амвросия Хелая и протоиерея К. Цинцадзе. Святейший синод отклонил законные требования Грузии. Известные борцы за автокефалию грузинской церкви (епископ Кирион, епископ Давид, архимандрит Амвросий и некоторые другие) были сосланы. Но после этого самосознание грузинского духовенства еще более окрепло, чему

---

<sup>4</sup> Воспоминания Каллистрата Цинцадзе о Захарии Палиашвили опубликовал доктор филологических наук М. Кавтария «О большом композиторе»: «Сабчота хеловнеба», 1971, №10, с. 18-22 (на грузинском языке). Мы осуществили еще две публикации этого воспоминания.

в немалой степени способствовали фундаментальные труды отца К. Цинцадзе: «Автокефалия церкви грузинской»<sup>5</sup> и «Историческая справка по вопросу об автокефальности Грузинской церкви»<sup>6</sup>. В этих серьезных трудах кандидат Богословия с незаурядным чутьем научного поиска обрисовал долгую и содержательную историю грузинской церкви и место этой истории в христианском мире.

Отец Каллистрат был соратником Ильи Чавчавадзе, которого с юношеских лет считал «титаном». Он поначалу даже избегал встречи с некоронованным царем Грузии, из страха изменить свое мнение о нем. Но жизнь свела их несколько раз, и в душе духовного наставника запечатлелись светлые воспоминания об Илье. Знаменитый мирянин-борец за свой народ неуклонно поддерживал все благие начинания духовенства. Вместе с отцом Каллистратом он не раз обсуждал прошлое и будущее Иверской церкви. В 1906 году, когда он был членом Государственной думы, перед отъездом в Петербург для участия в работе этого государственного органа, Илья Чавчавадзе специально навестил К. Цинцадзе, взял у него научно обоснованные материалы о былых днях Иверской церкви, чтобы вновь поставить вопрос об ее автокефалии перед правительством России и Святейшим Синодом.

В марте 1917 года, когда воплотилась мечта грузин и наша церковь восстановила свою независимость, прот. К. Цинцадзе был избран заведующим административного отдела совета Католикосата. С того дня он неустанно радел об упрочении места родной церкви на международной арене.

Прот. Каллистрат был членом делегации, направленной представительством всея Грузии к Временному правительству России с целью добиться от него признания автокефальных прав Грузинской церкви. Святейший синод отрицательно встретил факт восстановления самостоятельности грузинской церкви и отверг добрососедские взаимоотношения с ней (предложенные ему грузинской миссией). Некоторые церковные иерархи в своих официальных или неофициальных выступлениях фальсифицировали историю борьбы за автокефалию грузинской церкви и дело представляли так, будто Патриархия Грузии добровольно присоединилась к Российской Церкви<sup>7</sup>.

---

<sup>5</sup> Отец Каллистрат Цинцадзе. Автокефалия церкви грузинской (Исторический очерк IV-XV веков), Тифлис, 1905.

<sup>6</sup> Священник К. Цинцадзе. Историческая справка по вопросу об автокефальности Грузинской церкви, Тифлис, 1906.

<sup>7</sup> «Церковные ведомости», 1919, I.XII, №7 (Приложение); К.П.Каллистрат Цинцадзе, К автокефалии Грузинской церкви (малая заметка на груз. яз.), 1944, с. 5 (перепечатано на машинке).



Внести ясность в эти вопросы взялся протоиерей К. Цинцадзе. По доверенности совета католикосата и сообразно целям Католикоса-Патриарха Леонида, он написал пространное письмо патриархии России, опубликованное также в виде отдельной книги<sup>8</sup>. В письме с привлечением исторических фактов было засвидетельствовано, что духовное правительство России при содействии и под непосредственной диктовкой гражданского правительства в 1811 году нарушило постановления вселенских церковных соборов и совершило незаконный акт: насильственно присоединило древнейшую церковь Грузии, что с самого же начала вызывало со стороны Грузии резкий протест. Знаток церковной истории Грузии из русских источников выискал имена патриотов, павших жертвой уничтожения самостоятельности родной церкви (митрополиты – Кутаисский Доситеоз, Гаенатский Евфимий и другие).

Некоторыми первыми иерархами Православных Церквей факт восстановления самостоятельности Грузинской Церкви был понят как революционный акт. В деле опровержения этой мысли заслуга прот. Каллистрата велика.

Сей истинный служитель Божий сознавал, что свобода без нравственного возвышения народа несовершенна и фальшива. Поэтому он поучал нас в 1918 году: «Провидение Божеское предупреждает нас, оно говорит: без великой заповеди Христа – без любви друг к другу – жить невозможно и, поэтому, если вам угодно, чтоб в освобожденной Грузии развилось свободное гражданство, способствуйте распространению здорового религиозно-нравственного учения, стойте твердо на заповеди Христа, и пока есть у вас время, творите добро по отношению ко всем».

С января 1923 до февраля 1925 года протоиерей Каллистрат Цинцадзе вместе с Католикосом-Патриархом Амвросием Хелая и с другими членами Совета Католикосата был арестован в виду политического мотива. Его обвиняли в участии составления меморандума, который был послан от имени Католикоса-Патриарха Хелая на конференцию в Геную. Суд присудил виновникам длительный срок заключения, но правительство освободило их досрочно (в феврале 1925 г.).

В 1925 году по благословению Святейшего Католикоса-Патриарха Амвросия Хелая протоиерей К. Цинцадзе возводится в сан епископа и становится в тот же день митрополитом и местоблюстителем Патриаршего Престола Грузии. А 22 июня 1932 года церковный собор всея Грузии интронизировал его в Патриархи.

---

<sup>8</sup> Послание Святейшего Леонида, Католикоса-патриарха всея Грузии, к Святейшему Тихону, Патриарху Московскому и всея Руси, Тифлис, 1920.

Патриарший престол Святейший Каллистрат правил в течение двух десятилетий. 20-30-е годы XX века были тяжелым для священнослужителей Грузии, но нашей Апостольской Церкви все же сопутствовал успех благодаря его архипастырству. Патриарх стремился, чтобы автокефальные Церкви мира признали патриаршие права Грузинского православного народа и определили исторически принадлежащее ему место в Православной семье. С этой целью 28 октября 1943 года Патриархат Грузии пригласил в гости в Тбилиси Ставропольского архиепископа Антона. Он приехал, как специально присланный Патриархом всея Руси Сергием. В воскресенье, 31 октября, его пресвященство и Патриарх Каллистрат вместе служили в Сионском храме. После исполнения Католикосом-Патриархом Каллистратом божественной литургии глубже стали братские отношения между церквами Грузии и России<sup>9</sup>. Тем самым нашей Церкви был открыт путь для взаимоотношений с другими патриархами вселенной. Главари духовной академии Загорска подобающе оценили Христологическое просвещение Католикоса-Патриарха Каллистрата и в 1948 году пригласили его в члены Ученого Совета той же академии.

Святейший патриарх, наряду с богослужением, продолжал научно-творческую работу. Следует отметить, что он принялся за решение вопросов, стоявших со всей, для того времени, остротой. Именно такие вопросы проанализированы им в следующих трудах: «Каноны святых апостолов» (с примечаниями), «О грузинской антиминое», «К вопросу о личности Никифора Ирбаха» (по поводу 300-летия грузинской книги)», «Материалы о грузинском церковном календаре», «Иверския церкви Чины», «Церковь св. Георгия Квашвети (историко-археологические изыскания)», «О мировоззрении автора «Витязя в тигровой шкуре», Критические заметки о руствелологических трудах Ш. Нуцубидзе и М. Гогиберидзе и другие. Он оставил также цикл воспоминаний о многих выдающихся деятелях XIX-XX вв. Большинство своих трудов святейший Каллистрат подписывал псевдонимом «К.М.Экашвили».

Исследование «К вопросу о личности Никифора Ирбаха» ученый архипастырь написал в период митрополитства – в 1929 году. На полях рукописи имеется грустная приписка автора: «Эта статья должна была быть напечатана в журнале «Мнатоби» (об этом свидетельствует и соответствующая надпись), но из-за оглашения псевдонима вернули мне. Затем взяли (второй экземпляр) для «Литературного наследия», одобрили, как мне сказали, но не напечатали».

Труд заслуживает серьезного внимания. Он посвящен 300-летию

---

<sup>9</sup> См. «Журнал Московской Патриархии». Москва, 1944, №3, с. 13-19.

первой грузинской печатной книги и личности одного из вдохновителей этого желанного начинания – Никифора Ирбаха. Никифор Ирбах является соавтором первой грузинской печатной книги «Грузинско-итальянский словарь», который был опубликован в Риме в 1629 году с благословения католических миссионеров.

Как сообщает титульный лист, словарь составлен итальянским монахом Стефано Паолини, которому в этом деле помог «монах чина св. Василия», «грузин» Никифор Ирбах. С давних пор поддерживалась мысль, что Никифор Ирбах являлся грузино-католиком<sup>10</sup>. Но исследователь Д. Каричашвили отклонил традиционное мнение и счел Никифора Ирбаха тем известным греческим митрополитом, который был послан из Иерусалима в Грузию и Россию с дипломатической миссией<sup>11</sup>.

Целью исследования «К. М. Экашвили» было установление личности патриота, впервые приобщившего грузин к открытию Иоанна Гутенберга. Основываясь на грузинские и иностранные источники, автор приходит к выводу, что известные с первой половины XVII века епископ Никифор и митрополит Никифор – разные лица. Из них первый – грузин, а второй – грек. Автор обоснованно утверждает, что грузин Никифор был настоятелем Грузинского Иерусалимского Монастыря, впоследствии он был облечен в степень епископа. Именно его направил царь Теймураз Первый послом в Европу, где он помогал Стефану Паолини в работе над грузинско-итальянским словарем. Исследование агапов и других документов Иерусалимского Грузинского Монастыря того времени (первая половина XVII века), изучение сведений грузинских летописцев и католических миссионеров, анализ названного словаря привели ученого к заключению, что Никифор Ирбах является тем же Никифором-Чолокашвили («Ирбах» или «Ирбаки» является итальянским видоизменением «Ирубакидзе»); «Никифор Ирбах – кахетинец, Чолокашвили, сын Иоанна, настоятель Крестного монастыря, игумен Голгофы, мудрец, философ, ритор, знаток семи языков». Исследователь не разделяет распространенного мнения отца Михаила (Тамарашвили) и других<sup>12</sup> о принятии Никифором Ирбахом католичества и обоснованно думает, что епископ Никифор, исполняющий обязанности игумена в Грузинском монастыре Голгофы, никогда не принимал папизма. Он до конца пользовался

---

<sup>10</sup> ср. М. Тамарашвили. История католичества среди грузин, Тбилиси, 1902, с. 92-95 (на грузинском языке).

<sup>11</sup> ср. Д. Каричашвили. История печатания грузинской книги, Тбилиси, 1929 г., с. 17-22 (на грузинском языке).

<sup>12</sup> Арн. Чикобава. История изучения иверо-кавказских языков, Тбилиси, 1965, с. 24 (на груз. языке).

большим уважением как православных, так и католиков.

Ряд интересных с культурно-исторической точки зрения вопросов рассмотрен в труде «К грузинскому антими́нсу». В нём дана история антими́нса вообще и, в частности, грузинского: когда и откуда были внесены в Грузию рукодельные или напечатанные антими́нсы. Здесь же установлен архетип грузинского оригинального антими́нса, который по доверенности Совета Каталикосата в 1917 году автор исследования (протоиерей Каллистрат) и протоиерей П. Карбелашвили положили в основу макета нового национального антими́нса.

Из вышеназванных сочинений широкая общественность знакома лишь с трудом «Мировозрение автора Витязя в тигровой шкуре»<sup>13</sup>. Эта работа, выполненная в 1937 году, весьма ценна для грузинского литературоведения. В ней по-новому осмыслено богословие Шота Руставели. В противоположность господствующему в то время мнению о нехристианстве автора «Витязя в тигровой шкуре», или о неправославности его, ученый выявил ортодоксально-христианские убеждения гениального поэта. Святейший Каллистрат одним из первых дал Христианскую интерпретацию сюжета сочинения: глубинный смысл и фабулы и образов персонажей это учение о приближении к Богу через покаяние и совершенствование личности таким путем: Автандил и Тинатин с одной стороны и Нестан и Таризел с другой – это разные религиозно-нравственные характеры, разлученный с Богом, и потому сбившийся с пути человек (образы Нестан-Дареджан и Таризела) смогут найти счастье лишь в Христовом крещении.

Этим исследованием Католикос-Патриарх Каллистрат первым установил, что «Ужамо жами (вневременное время)» является художественным образом Иисуса Христа, а «Мзиани гаме (Солнечная ночь)» - своеобразным атрибутом Христианского Бога: Руставели обращается к эстетико-художественным приемам, испытанным Отцами Церкви, и лучезарность поэме придает Священное Писание: исследователь сотнями нашел в тексте библейские или богослужебные соответствия.

После выхода в свет названного труда (1966 г.) руставеловедческие изыскания приняли иное направление, в этой области открылись пути для новых находок. Исследователь Руставели в совершенстве знал Библию, литургику и богословскую литературу и он смог ответить таким авторитетам, как Николай Марр, Шалва Нуцубидзе, Юстин Абуладзе, Мосэ Гогиберидзе и др.

---

<sup>13</sup> К. Экашвили. К мировозрению автора Витязя в тигровой шкуре, Шота Руставели, историко-филологические разыскания, Тбилиси, 1966 (на грузинском языке).

Сборник воспоминаний Патриарха Каллистрата украшает светлый образ его преосвященства Габриэл: Однажды епископ принял в гости студента Каллистрата. Владыка беседовал с ним, угостил обедом и одарил юношу деньгами. Благословляя, он сказал, что любовь к Грузии обязывает к заботе о монашестве. Этим архипастырь вызвал в душе юноши желание постричься в монахи, но небеса пожелали иначе и он сочетался браком с иностранкой, немкой, с которой познакомился и полюбил в Киеве. Высоконравственная жена поддерживала скромного и крестоносного супруга; когда (в 1925 г.) отца Каллистрата призвали в епископы, верующая жена сказала ему: если родная церковь требует тебя служить в новых условиях, ты, согласно заповеди Спасителя, должен покинуть жену и детей, взять крест свой и следовать Христу (Матфей 10,37). Возложи на господу заботы твои (Псалтырь 54,23): кто не забывает птиц небесных, не лишит нас милости своей».

Молитва-благословение его преосвященства Габриэла воплотилась следующим образом: отец Каллистрат не постригался в монахи, но он приступил к жизни полной монашеской благодати. Его жизнь являла собой путь духовного роста и преображения. Удивительны были разум и ясность суждений глубокого старца. К его святейшеству чуть ли не до последних минут жизни обращались ученые за советами и наставлениями. С обоснованными указаниями и критическими замечаниями патриарха Каллистрата считались заслуженные ученые – Ш. Нуцубидзе, К. Кекелидзе, Ак. Шанидзе, С. Какабадзе, Ил. Абуладзе, Леон Меликсет-беков и другие, которые не раз отмечали высокие, но негласные заслуги великого владыки перед грузинской наукой.

Как подобает достойному монаху, блаженной памяти Католикос-Патриарх избегал рекламы, часто он утруждал себя, когда того не требовала необходимость, не оглашал своей личности. В споре он никогда не давал противнику чувствовать превосходства своих познаний и интеллекта.

О преданности священнослужителя Каллистрата ближнему оповещает письмо современника (хранится в архиве патриарха, №93), неизвестный автор которого так рассказывает о повседневной жизни Святейшего архипастыря: «ложится спать не ранее часа, а в 6 часов он уже на ногах... Первым делом он в своей квартире обращается к Спасителю, затем посещает храм, кланяется иконам – особенно иконе св. Нины, Входит в алтарь, где коленопреклоненный долго молится. После молитвы отдает соответствующие распоряжения в храме и возвращается домой. По дороге с благоговением молится за упокой душ людей, погребенных рядом с храмом... Завтракает легкой пищей и простым чаем. Опять краткая молитва и приступает к работе... Здесь

же следует отметить, что определенного времени для приема посетителей у него нет, какими делами бы он ни был загружен, принимает всех, кто имеет к нему дело. Он неотложно принимает меры для удовлетворения посетителей, но горе сомнительному посетителю... Он кроток и добр. Окружающих изумляет его отзывчивость, сочувствие к беде ближнего... В три часа полудня его Святейшество обедает. Он гостеприимен: 2-3 человека всегда разделяют с ним трапезу. За трапезой католикос со всеми одинаков, без различия состояния и занимаемой должности... Работает до 12 часов ночи... Работу прерывает лишь для чая в семь часов. Никогда не ужинает... Не обладает никаким недвижимым имуществом или деньгами. Это и понятно: он помогает всем, кто обращается к нему. Многое утешило его на его веку, но и горя пришлось ему вкусить премного».

Добавим: лишь Христово терпение, вера и любовь утешали немощного. Непрестанная молитва закалила его и дала силы нести свой крест, поднятый с юношеских лет, до конца. Он поистину следовал словам: «Пойди к муравью, ленивец, посмотри на действия его и будь мудрым» (Притчи 6,6). Безупречной памятью и ясным мышлением изумлял патриарх в преклонном возрасте. Просвещению нравственного наставника не было конца (такое лишь удел святых!).

Многоопытный архипастырь радел о создании надежного будущего Грузинской Апостольной Церкви в виде духовного училища и печатного органа, но эту мечту он унес с собой в мир иной.

3 февраля 1952 год, исполнивший свой долг перед родной церковью Католикос-Патриарх был отозван из суетного мира вершителем судеб.



В этой книге впервые публикуется сборник проповедей и речей Католикоса Патриарха Калистрата Цинцадзе, которые были произнесены им во время литургии, молебен и панихид. Вступительное слово а также исследования, проведенные примерно тридцать лет назад, основательно переработаны автором для данного издания, так же сопровождаются примечаниями.

В проповедах Калистрата Цинцадзе помимо церковной и теологической тематики, встречаются рассуждения на такие темы, как демократия, права человека, церковь и государство, толерантность и мир. Данные материалы убеждают читателя в том, что антидемократичные, ксенофобские, этнонациональные тенденции, которые заметны в жизни современной Грузинской Православной Церкви, не соответствуют ее природе. Они приходят в противоречие как с прошлым Православной Церкви, так и с пастырским, богословским наследием Католикоса Патриарха Калистрата Цинцадзе.

Series «Religion in conflicts and negotiations»

**CALLISTRATUS TSINTSADZE**

**SERMONS AND SPEECHES**

Manuscripts were collected and edited, introduction and research were prepared by Dr. Nugzar Papuashvili

Abstract

One of the serious problems of contemporary Georgia is fundamentalism and nationalism of the Orthodox population. Its scale and outcome is obvious and it creates an obstacle for the development of democratic processes in the country. Specific groups of Orthodox population often offend non-Orthodox ones; they do not allow them to open the houses of prayer and hold different events. State authorities, for the largest part, are unable to resist the actions of such groups and they sometimes even patronize them. Therefore, the principle of equality of the citizens is infringed.

Since the aforementioned actions are being carried out by the secular and religious people under the name of Orthodox, people, not having the knowledge about this subject, assume that these actions, corresponding thoughts and attitudes are the essence and norm of the Orthodox Church. The question arises: Is this indeed the truth?

The desire to find an answer to this question inspired us to issue and spread the literature in which the Orthodox belief and tradition of the Orthodox Church will be objectively represented and which will help the wide audience of readers to develop correct orientation.

Such kind of literature is presented in the sermons and speeches of the famous religious and civil worker, teacher and a scientist, Catholicos-Patriarch of Georgia in 1932-1952, Callistratus Tsintsadze, with regard to different civil, political and cultural-educational events. These include discussions on the topics, such as democracy, human rights, church and the state, coexistence of the churches of different confession in the same

society, church and the culture, knowledge and faith, tolerance and love towards foreigners, reconciliation of the enemies and kindness among humans. This material will assure the reader in the following: the violence that today takes place from the side of the Orthodox Church is not the tradition of this church and is inappropriate for the history of the Georgian Orthodox Church.





In Georgian Languages

Responsible person,  
Nugzar Papuashvili

E-mail – [nugzarpa@yahoo.de](mailto:nugzarpa@yahoo.de)



Publishing House **“UNIVERSAL”**

19, I. Chavchavadze Ave., 0179, Tbilisi, Georgia ☎: 2 22 36 09, 5(99) 17 22 30

გამომცემლობა „**უნივერსალი**“

თბილისი, 0179, ი. ჭავჭავაძის გამზ. 19, ☎: 2 22 36 09, 5(99) 17 22 30

E-mail: [universal@internet.ge](mailto:universal@internet.ge)



ქაშვეთის ტაძარი, სადაც  
ამ წიგნში წარმოდგენილი  
ქალაქების დიდი ნაწილი  
წარმოითქვა.



ქალისტრატე ცინცაძე  
1895 წლის აბლო ხანა

მეფე ჩემო! ვუხარდები და ვთხოვ, რომ ყველაზე სურვილი  
რაც 1911 იყოლე ვანკუბოში სწავლიყდათათვის მინ  
შეგონებ უნდა, რომელიც, ვახსენებთ თუ ვახსენებთ  
ვარი, მინც რაწმინდას ძმათმყვანად: მინც რა სურვილი  
ბინდი ამხრებდურს ყხთიყხთ წინაშეც და რამინ შეგონ  
რც რა, მინც სურვილი სწავლიყდა, ყველა მინც ვერსე ვახსენებ..